



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

WIDENER LIBRARY




HX JVL2 .

LC 37.200

3

Cornell




20 vols

1250

LC 37.200 (3)

Harvard College Library



LIBRARY OF THE
CLASSICAL DEPARTMENT

BIBLIOTHECA

CLASSICA LATINA

SIVE

COLLECTIO

AUCTORUM CLASSICORUM LATINORUM

CUM NOTIS ET INDICIBUS

On souscrit, à Paris,

CHEZ N. E. LEMAIRE, Éditeur, rue des Quatre Fils, n° 16, au Marais.

BARROIS l'aîné, libraire, rue de Seine, n° 10, Faub. St-Germ.

DEBURE frères, libraires du Roi, rue Serpente, n° 7.

TREUTTEL et WURTZ, libraires, rue de Bourbon, n° 17.

F. DIDOT, imprimeur du Roi et de l'Institut, rue Jacob, n° 24.

JULES RENOUARD, libraire, rue de Tournon, n° 6.

BOSSANGE père, libraire, rue de Richelieu, n° 60.

BRUNOT-LABBE, libraire de l'Université, quai des Augustins, n° 33.

MONGIE aîné, libraire, boulevard Italien, n° 10.

H. VERDIÈRE, libraire, quai des Augustins, n° 25.

ARTHUS-BERTRAND, libraire, rue Hautefeuille, n° 23.

Et chez tous les Libraires de France et des pays étrangers.

M. T. CICERONIS
QUÆ EXSTANT
OPERA OMNIA
CUM
DEPERDITORUM FRAGMENTIS
IN QUATUOR PARTES DIVISA
ITEM
INDICES QUINQUE
NOVI ET ABSOLUTISSIMI

EXCUDEBAT FIRMINUS DIDOT,
REGIS ET GALLICARUM ACADEMIARUM TYPOGRAPHUS,
VIA JACOBÆA, N^o 24.

•

M. T. CICERONIS
PARS SECUNDA
SIVE
ORATIONES OMNES
AD OPTIMOS CODICES
ET EDITIONEM J. VICT. LE CLERC
RECENSITÆ
CUM SELECTIS VETERUM AC RECENTIORUM NOTIS
CURANTE ET EMENDANTE
N. E. LEMAIRE

VOLUMEN PRIMUM



PARISIIS
COLLIGEBAT NICOLAUS ELIGIUS LEMAIRE
POESKOS LATINÆ PROFESSOR

•••••
MDCCCXXVII

Lc97.200

HARVARD UNIVERSITY
CLASSICAL DEPARTMENT

PRÆFATIO NOVI EDITORIS

DE CICERONIS ORATIONIBUS.

NONNULLA de hac secunda Ciceronis operum parte, qua quidem ejus orationes continentur, præmissuris non id consilii est propositum, ut tantum auctorem, dum legentibus commendandum arbitramur, eundem ingenii culpa deteramus et elevemus. Ea enim præstantissimis viris concessa laus est, ut qui eos prædicandos suscipiant, non temeritatis magis quam vani ingenii culpam subeant, et sui simul et aliorum oblii esse videantur: quippe qui propriæ imbecillitatis immemores de actis rebus et seculorum auctoritate ac perpetua admiratione consecratis, quasi jam in dubium vocentur, disserere audeant.

Quem vero umquam magis quam Ciceronem in forensibus studiis æqualium admiratio, ita est prosequuta, ut nihil amplius jam posteris faciendum superfuerit, quam ne in tanto ætatum consensu novissimi venirent, et in hac veluti transmissa venerationis hereditate a prioribus recentiores superarentur? Spirat enim vivitque Tullii orationibus commissa vis et calor; et nobiles has voces, quibus toties romanum forum personuit, quamvis tacente illa quasi corporis

eloquentia, quæ novam eis vim addebat, tamen rudes nos et alienigenæ intelligimus, et veluti torrentis fluvii impetu ultro volentesque rapimur.

Age enim, si in hujus tantum voluminis finibus nos contineamus, quis umquam verius orator, id est, « vir bonus ac fortis dicendi peritus » exstitit, quam qui in civili causa, in illo virium suarum tentamento, circumscriptos sibi terminos egreditur, ut victarum partium proditores ac transfugas ante ipsa vincentium ora, debita afficiat ignominia? Quo autem sensu permovemur, quum in Roscii Amerini causa, inter servientium silentia ac metum, in illo scelerum omnium æstu ac furore, adolescentis hominis liberam vocem audimus, qui non minore ingenio quam animo Sullana odia in se vocare, rei causam a sua separare non dubitat, et Reipublicæ nomine, miseram temporum conditionem, sicariorum audaciam liberrima indignatione conqueritur? In ea certe oratione, maximus apparet Cicero; et jam virum illum agnoscis, qui in Catilinæ ruinam ac patriæ crescit salutem.

Neque sane in minimis illud Ciceroni fuit, quum eum Siculi rogaturi adierunt, ut suam ipsorum causam adversus scelus ac libidinem summa potentia subnixam defenderet. Tanta sane populi totius fide dignum se præstitit; et postquam Cæcilium quemdam, a Verris patronis appositum contemptu, ridiculo, atque odio perfudit, et omnes rei insidias ac artes diligentia ac virtute

elusit; jam ad causam venit, jam Verrem aggreditur, urget, obruit, supplicio quodam humanis legibus majore afficit; et in omnes indignationis, odii, invidiæ, misericordiæ affectus assurgit, ut vere « dono quodam providentiæ genitum » virum dicas, « in quo totas vires suas eloquentia experiretur ».

Verum, ne a proposito diutius aberremus, paucis admonendus lector, qua ratione nostrum illud opus digresserimus. Ita nobis abunde omnis generis superfuerunt auxilia, ut in hac re unum nobis subeundum sit crimen, ne illis ipsi defuisse videamur. Ut enim illas in Ciceronis orationes commentariorum bibliothecas omittamus, quæ quidquid olim de Cicerone in utramque partem docti disputavere, totum continent, et legentium studiis ad satietatem consulunt; vera nobis adminicula præbuere tum P. Manutii, quem sæpius ducem sequuti sumus, impensæ Tullio vigiliæ, et Grævii ubertas, qui dum ceteros recitat auctores, plurimis locis et ipse facem prætulit, tum maxime Nic. DESJARDINS labor, qui, quamquam ab Oliveto fastiditus, « quasi nihil novi afferat », plus ad illustrandum Ciceronem solus ipse valuit, quam plurimorum ambitiosa congeries. Huic præsertim hæsimus, hujus sæpius notas expressimus, sensus hausimus, ita tamen ut, non recentioribus neglectis, quidquid apud minus antiquæ notæ commentatores probandum nobis occurreret, ultro receperimus. Sic opem tulere Ferratius, Grono-

vius, Verburgius, Lallemandus, Facciolatus, Garatonius, Ernestus præsertim, quem qui laudandum susciperet, is legentibus injuriam faceret. Profuere et plurimi alii, quorum nomina circumferuntur, interpretes, e quibus ea selegimus quæ ad illustrandum Ciceronem, aut explicandam latini sermonis subtilitatem atque elegantiam faciebant, omissis iis, quæ in tanta literarum luce edere supervacuum labor videretur. In recentissimis autem Schützio et, quod ad Verrinas orationes pertinet, Harlesio nos maximas gratias habere profitemur; prioris notulis ad obscura quædam explicanda, feliciter usi, hoc unum desiderii habuimus, quod paullo in mutando ac corrigendo audacior, auctori sæpius proprium ingenium affinxerit.

Ne plura autem extraneis accepta haberemus, vetuere doctissimæ Jos. Vict. LE CLERC elucubrationes, qui dum totum Ciceronem vernaculo sermone donandum suscepit, præclarissime simul et de civibus et de alienigenis est meritis; quippe cujus opera non minus latine quam gallice tersus ac politus prodeat Cicero, et jam futuris in posterum laboribus, quasi fundamentum hæc illius editio sit supponenda. Immémoris autem esset animi non J. L. BURNOUF nomen huic conjungere, qui postquam suis in Sallustium vigiliis tantam literis operam navavit, non minorem Ciceronis Quintianæ orationi, ut cetera omittamus et de hoc tantum volumine loquamur, præ-

stitit, cujus quidem gallicas notas omnes in nostras transtulimus.

Denique, ne quid mancum et imperfectum huic operi accederet, quum sæpius nobis fuerat animadversum Ciceronem ea, quæ ad jus civile spectat, parte laborare, ac vix plerumque intelligi, quidquid jurisconsultum requireret, ad doctissimum virum PONCELET juris in Acad. Paris. doctorem ac professorem referendum curavimus, qui ea, qua est, humanitate ac doctrina, impedita quædam loca omnino illustravit, Gaio præsertim splendidam faciem præferente, cujus nuper detecta opera novam faciem romano juri, Ciceronis inprimis ætate, addiderunt. Idem etiam, ne quidquam obscurum hac de re superesset, ad calcem hujus voluminis de privatis ac publicis, stante republica, judiciis appendicem addidit, qua edocti vel legum romanarum omnino rudes optime de legibus agentem Tullium possint intelligere.

Hac eadem instructi ratione, quæ difficiliora ad veterum mores spectarent, in excursu ad nonnullius orationis finem submisimus; sic quædam de provinciis ex Ferratio, de vectigallibus ex DESJARDINS desumpsimus; et quum in Verrinis orationibus prætoris urbani ac provincialis non rara mentio occurrat, et in eorum jurisdictione, imperio, muneribus frequens sit Cicero, operæ pretium fore credidimus si de eis, quidquid ex veteribus ac jurisconsultis collegerat DESJARDINS, nos, eodem D. PONCELET recensente, ederemus.

Is igitur laboris nostri fuit tenor, ut ad conficiendum quod ad textum pertinet egregia uteremur Jos. Vict. LE CLERC editione, uno tantum et altero excepto loco, quem mutandum pace tanti viri censuimus: quod ad notas, optima quaeque et maxime auctorem illustrantia ex commentariis tum vetustissimis, tum recentioribus, seligeremus. Addidimus praeterea varias e MSS lectiones tum ab eodem Jos. Vict. LE CLERC electas, tum ex Garatonio, Schützio et ceteris desumptas, prout satis magni momenti videbantur. Singulis orationibus praemissa est narratio earum rerum, quae a legentibus praecipue ad intelligendum auctorem maxime valerent. Quae quidem argumenta tum ex iis, qui in eadem versati sunt materiae, exscriptimus: tum saepe quia minus brevitate et brevitas, aut obscuritas scripta videbantur, ipsi diligentius redintegranda suscepimus: eoque etiam premium fore rati, si hanc faciliorem narrationem ea sequerentur, quae et quo tempore, quibus audientibus, aut iudicantibus habita sit creda, explicarent. Subiungimus etiam praefationem auctoris sive synopsin, quae, quasi manu deductas, litterae auctorem intra praefationis versuum deprehendimus, tum hoc excerptum utroque articulo, et censuram, quibus Fulvius peroravit, explicata sunt, incrementa de reliquis causis, quibus res ita vertitur, unde et quaeque patere videt, ac tumulus perspicit. Ceterum, ut in his servandos praeterea, quae hic ad hunc Fulvium hanc ad hunc

dere, aut aliquid ad véterem adjuvandam scripturam posset afferre, ita rursus eadem repeti, inutilia coacervari, res pluribus, quam opus esset, verbis explicari, exemplis et argumentis legentes obtundi et crescere volumen absurdum duximus. Hoc ergo proposito sæpe sæpius interpretum nimiam temperavimus redundantiam, et eos brevius loqui compulimus, tanta tamen fide ac diligentia, ut nihil eorum ingenium queri possit, nec quidquam, nisi intempestivam doctrinæ ac verborum luxuriam circumciderimus.



NICOLAI DESJARDINS

PRÆFATIO.

DE ista, quam adornavimus, Ciceronis orationum editione, atque de ipso Cicerone si præfaremur, nos operam plerisque legentium non injucundam sumpturos esse putavimus.

Post exhaustos circa hanc Ciceronis operum partem tot illustrium in republica literaria virorum labores, noster iste labor si multis supervacaneus esse videbitur, non erit quod miremur : quippe qui nihil quod jam prædictum non fuerit, dici aut excogitari posse, quo nitidiora et explicatiora sint ista volumina, existimabunt. Fatebuntur ea quidem vepribus olim cohorruisse; at nunc assidua eruditorum hominum cura et studio effectum esse contendent, ut perpurgata beneficæ manus opem ultra non implorent; licere jam inoffenso pede per singulas orationes decurrere. Sane quidem fuit tempus, quum et ego in eadem, quam mihi opinionis errore finxeram, existimatione versarer. Verum ad has ipsas orationes legendas quum primum animum appuli, quantas ibi tunc sive in rebus intelligendis, sive in perspicienda verborum vi, difficultates vidi; quas neque meo Marte enodare, neque aliorum, quos mihi subsidio comparaveram, laboribus expedire possem! Quin inde mihi, unde auxilium speraveram, novus accedebat labor. Nunc enim, interpretibus in summa varietate opinionis et dissensione sententiæ constitutis, quærendum fuit quorum potior esset interpretatio : nunc investigandum, quod ab iis aut consulto, aut incuria, vel prætermisum, vel parum

PRÆFATIO NICOLAI DESJARDINS. xvij

diserte fuerat explicatum; non sine voto, ut existeret aliquando ex tot viris, quos alit Parisiensis Academia in artium studiis liberalissimis maxime versatos, doctrinisque tum græcis, tum latinis eruditissimos, qui de multis bene merendi studio excitatus, susciperet curam cogitationemque dignissimam suæ virtutis; discendi cupidis adolescentibus, iis maxime, apud quos, juvenes magistros, pueri exercentur, necessariam; omnibus utilem: qui dubia, certius; ambigua et obscura explanatus; difficilia, diligentius; cuncta brevius explicaret: qui denique uberrimos illos eloquentiæ romanæ fontes aperiret, unde facile haurirent ii, qui summæ artis habere scientiam, et perfecte dicendi laudem assequi cuperent. Interea nunc hanc, nunc illam diligenter legebam orationem; quæ legenti notanda, sive indicta aliis, sive delibata leviter, occurrerent, in adversaria conjiciebam; donec continuato multis annis labore, atque singulis orationibus pervolutatis non semel, ea creverunt in librum; quem dicendi studiosæ juventuti, cujus unius in gratiam hoc a me susceptum est negotium, afferro. Suscepti munus officii, prout animo mecum descripseram, an sim exsequutus, aliorum sit judicium. Conatus sum meliora superioribus; perficiet aliquis, quem veræ laudis amor aliquando ad tam eximia ceteris tradenda advocaverit. Nec defuturum qui id aggrediatur, existimo. Ciceronis sincerum judicium, ut olim, etiam nunc intelligentium moderatur orationi: sana quæ fuit illius temporibus eloquentia, victrix perrupit furtim mala fastidia, quibus apud nos adhæserat, quum novi generis eloquentiæ falsis luminibus obscurata delitesceret.

Antequam de hujusce operis ratione disseram, ac de iis dicam qui in hoc industriæ nostræ curriculum

primi descenderunt; abs re non erit, de Ciceronis genere dicendi, et quos obtrectatores habuerit, nonnulla præmittere. Eloquentiæ summus honos liberis in civitatibus semper habitus est. Græcia tamen, atque adeo Athenæ, ubi « prima vestigia, ac prope incunabula reperiuntur eloquentiæ, omnes artes vestustiores habent, et multo ante non inventas solum, sed etiam perfectas, quam hæc est a Græcis elaborata dicendi vis atque copia ». Cic. in Bruto, c. 7. Ante Demosthenem, in quo maxime perfectio dicendi apud Græcos, absolutioque fuisse judicatur, pauci sunt qui eloquentiam fuerint consequuti; ita ut artis rudimenta tantummodo posita fuisse videantur.

Romæ quamvis merces amplissima facultati dicendi proposita fuerit, ac per eam aditus patuerit ad honores quosque maximos, nihilominus tardissime suam etiam maturitatem assequuta est. Ejus originem jam a regum temporibus repetit quidem Tullius initio libri de cl. Oratorib. Sed ab his initiis profectus, et omnium ætatum progressionem persequutus, suppare ætati suæ Crassum et Antonium, vix repperit, in quibus « primum cum Græcorum gloria latine dicendi copia fuerit¹ æquata »; quamquam in ea de se et de Crasso ipse non fuit opinione Antonius, qui diceret « disertos se vidisse multos, eloquentem omnino neminem ». Orat. I, 21. Ergo artis perfectæ consummatæque gloriam Cicero primus ostendit. Is « dono quodam providentiæ genitus, in quo totas vires suas eloquentia experiretur » (Quintil. X, 1), Latinis omnibus superior, nulli Græcorum inferior, Demosthenem aut æquavit, aut etiam superavit. Erat in eo nimirum præstantissimi, et ad quamlibet doctrinam celeriter arripiendam promptissimi acumen ingenii : literis

1. De claris Orator. cap. 138.

multum temporis, discendi causa, vel a pueritia tribuerat. Quotquot Romæ aut cives, aut Græci fuerunt, his temporibus viri eruditione atque doctrina præclari, eis in disciplinam se tradiderat: jus civile, philosophiæ partes omnes, tum quæ ad dialecticam, tum quæ ad mores et naturam pertinent; astronomiam, poeticen, historiam, omnia denique, quæ uno scientiæ nomine continentur, tenuit in primis. Insidebat enim in ejus mente species eloquentiæ, quam Roma nondum viderat, ad quam volebat orationem suam dirigi: eloquentem esse neminem posse putabat, nisi qui multiplici doctrina atque omnium optimarum artium studiis esset eruditus. Plerique ad causas tum privatas, tum publicas adibant, ut in foro discerent; ipse vero « quantum potuit, effecit ut doctus in forum veniret ». Cic. in Brut. 90. Itaque ingenium ejus simul aspectum et probatum est: atque illa ejus eloquentia tantum habuit commendationis, et apud eos ex suis, quos Roma tulit sanæ mentis homines, et apud posteros, ut Cicero jam non hominis, sed eloquentiæ nomen habeatur. Quintil. X, 1.

Verum quantus ille fuit, homo fuit: more autem apud homines ita comparatum est, ut justam habeat venerationem quidquid excellit, atque obtrectationem etiam prope necessariam. Illa virtutis alienæ tristes et obscura rivalis Invidia, quæ bonorum expers, quod assequi posse desperat, odiose deprimit, Ciceronem foedissime laceravit. Tullii mores, si credis ejus gloriæ inimicis, non fuerunt sat boni: fuit sui jactantior, et ultra quam verecundum hominem decet: adscivit sibi genus dicendi Asiaticum, redundans, et plus nimio diffluens.

Quod ei de moribus objicitur, magnum sane crimen est; quo uno, quum nemo possit orator esse,

nisi sit vir bonus, de oratoriæ dignitatis gradu dejectur. Quintil. XII, 1. Quum autem « omnis arrogantia odiosa est, tum illa ingenii atque eloquentiæ maxime molestissima ». Divin. cap. 11. Nihil denique declamatoria loquacitate levius; nihil contemptius. Verum an tria hæc recte in Cicerone reprehendantur, paullo diligentius est investigandum. Ac primum de moribus, quod rei caput est.

In ejusmodi reprehensionibus, quæ gravissimæ sunt, illud in primis quærendum puto, quæ sit vita illius, qui alienam arguit; quæ morum gravitas; quæ hominis, qui arguitur, existimatio. Ista si valeant in his rebus, et vel mediocriter considerentur, omnis illa de moribus Ciceronis accusatio quin evanescat, non est quod dubitetur.

Orationes duæ sunt in Ciceronem ita geminæ, ita sibi similes, ut ex eadem eas officina exsistere non inepte judicaveris: et rursus ita vehementes, ut earum scriptores potius quæsisse videantur, in quem omne virus acerbitalis suæ declamando evomerent, quam habuisse penitus notum aliquem, nedum Ciceronem, in quem tot putida jacere, salva veri similitudine, potuerint. Altera brevior Sallustii nomine circumfertur, ad calcem Ciceronis orationum addi vulgo solita. Altera sane longa, Fufii Caleni, legitur apud Dionem lib. XLVI. Hi sunt duo fontes unde virus hauserunt malivoli, quod Ciceronis in mores despuerent. Quæ Sallustii esse dicitur in Marcum Tullium Ciceronem oratio, eam hujus non esse, docti viri dudum demonstraverunt: tum quod Ciceronem inter et Sallustium inimicitiae tam vehementis causæ non sat idoneæ afferantur; tum quod stylus in ea maxime diversus sit a forma dicendi Sallustiana. Declamatoris cujusdam, sive Porcius Latro ille sit, seu quivis alius, commen-

tum illud esse critici putant, styli exercendi gratia conscriptum; quales sunt laudationes Phalaridis, Ebrietatis, et ceterorum id genus a recentioribus, non ad rei veritatem, sed ad styli exercitationem conscriptæ. Atqui ejusmodi vituperationes ab insulso declamatore data opera coâcervatæ, an umquam accusationis vim apud aliquem obtinebunt, nisi ipse sit insulsissimus? Fictus ille Sallustius ex Caleni oratione excerpssisse videtur calumnias omnes, quæ argumento quod tractandum suscepit, essent accommodatæ: unde etiam levior fit ejus auctoritas: et simul ostenditur Calenum unum esse, a quo ista profecta sint in Ciceronem. Porro Quintus Fufius Calenus fuerat in partibus Cæsaris contra Pompeium; atque postea studuerat ardens Antonio, quem reipublicæ hostem, Tullio annitente, senatus judicaverat. Graviter et acerbe (Phil. VIII et X), idque non semel, Tullius in senatu dixerat contra Calenum, summum Antonii amicum et defensorem: summa ergo fuit inter eos dissensio voluntatis; ut mirum non sit, si hunc ille inimicissime atque infestissime insectetur. Fecit iratus, fecit inimicus, fecit ultor doloris sui, et punitor injuriæ, quam Antonio factam fuisse arbitrabatur. At in exulcerato animo fictum crimen quin facile nascatur, nemo est nescius. Præterea criminatio Caleni quæ est? Omnes omnino naturæ et ingenii virtutes Tullio Calenus abjudicat, et contraria singulis virtutibus vitia ei impudenter affingit. Maledicta in vitam alterius tam petulanter, tam aspere, tam ferociter conjecta refelluntur eo ipso, quod, qua jure qua injuria, lædendi voluntatem aperte præ se ferant. Calumniam vero tam multiplicem, et tam atrocem non avide arripuisset Dio; neque, tam falsa describendo, inustam verissimis mendaciorum notis historiam tradidisset hominum memoriæ sempi-

ternæ, nisi Ciceronis laudum obtrectator ipse esset perpetuus. Sed quoniam « nihil est tam volucre quam maledictum; nihil facilius emittitur; nihil citius excipitur; nihil latius dissipatur » (pro Plancio, cap. 23); nihil tardius abjicitur : si quis illis quæ diximus non contentus, auctoritate certandum etiam contra istos putat; istorum testimoniis opponemus testimonia clarissimorum virorum, cum quibus et fictus ille Sallustius, et Fufius Calenus, neutiquam sunt comparandi. *Verecundum* fuisse Ciceronem, nisi res ipsa doceret, nos ipsi facile demonstraremus : *clementem* Ammianus Marcellinus, lib. XIX, circa finem, eum describit; *reverendum* testem vocat (idem, lib. XXVI initio); *apertum*, Quintus Cicero (de petitione); *facilem*, Caius Cæsar (ad Att. lib. XIV, epist. 2); *prudētissimum* Brutus, nec sine causa; quandoquidem quatuordecim annis (ad Att. l. X, epist. 4) ante prospexit tempestatem eam qua eversa est respublica; *amantissimum* (Catilin. IV, cap. 8) reipublicæ prædicat uni illi conservatæ civitatis gratulatio decreta; *fidelitatem* ejus laudat Plancius (ad Div. X, 4). Parum fortis videtur quibusdam, quibus optime respondit ipse, ait Quintil. lib. XII, cap. 1, « Non se timidum in suscipiendis, sed in providendis periculis »; quod probavit morte quoque ipsa, quam præstantissimo suscepit animo. Infinitum esse me oporteat, si gravissimorum hominum testimonia colligere velim universa, quibus existimationi hominum Tullius vindicatur. Unus sit pro omnibus Cato, qui integritatis ei, justitiæ, clementiæ, fidei testimonium dedit : unus sit Quintilianus (ubi supra), qui quum dixit Ciceronis mores a multis reprehensos fuisse, non immoratur iis accusationibus referendis, quas eo ipso pro levibus et nugatoriis haberi debere significat, sed statim subjicit : ego vero « M. Tul-

lio defuisse non video in ulla parte civis optimi voluntatem. Testimonio est actus nobilissime consulatus : integerrime provincia administrata ; et repudiatus viginti-viratus ; et civilibus bellis neque spe, neque metu declinatus animus, quominus se optimis partibus, id est, reipublicæ jungeret ». Unus sit pro omnibus Q. Catulus (Pis. 3), a quo est *parens patriæ* nominatus. M. Curio (ad Att. I, 15), qui consulatum illum ejus ἀποθέωσιν vocabat. Claudius imperator (Sueton. in Cl. cap. 41), qui Ciceronis defensionem composuit ; Alexander Severus (Lamprid. in Severo), qui ejus imaginem in larario habuit. Audiantur etiam superioris huic nostræ ætatis scriptores, Lutherus, Erasmus¹, Latomus, qui, licet admiratione obstupefacti, Ciceronis amori plusculum etiam, quam concedit veritas, largiantur, Ciceronis animam apud superos vitam quietam agere speraverunt.

Altera in Ciceronem accusatio est. Ingenio, inquiunt, fuit arroganti : data qualibet occasione se magnifice jactat, et ostentat intolerantius. Fatendum est² in hac parte reprehensum non mediocriter fuisse Ciceronem : quamquam is quidem rerum a se gestarum major, quam eloquentiæ fuit jactator. Imo quum arrogantiae sit comes invidia, tantum abest ab eo vitio, quod solet lacerare plerosque, et quod alit artium studiorumque quasi finitima³ vicinitas, ut adversariorum patronis plenissimam concedat eloquentiam ; ingenium sibi et dicendi facultatem modeste detrahat⁴ ; quorum quidem loco ait se diligentiam et industriam

1. Apud Fabric. Biblioth. Lat. Suppl. tom. I.

2. Quintil. XI, 1.

3. Notum est illud Hesiodi, Figulus figulo infestus est, et fabro faber : mendicis mendico invidet, et poeta poetæ. Op. et D. vs. 25.

4. Vid. pro Quint. cap. 1, 2, et pro Arch. poeta, cap. 1, etc.

comparasse. (Quintil. ubi sup.) In ea quæ fuit illi cum Cæcilio de accusatore in Verrem constituendo contentio, quamvis multum esset in hoc momenti, ut ostenderet se accusatorem esse maxime idoneum, quod sine eloquentiæ suæ laude non potuisset; dicendi tamen facultatem Cæcilio magis detraxit, quam arrogavit sibi, seque non consequutum dixit, sed omnia fecisse ut posset eam consequi (Divinat. 12): se nihil dicere de suo ingenio (ibid. 11), quia non est quod possit dicere; neque, si esset, diceret. In dialogis vero (in Bruto, passim) ubi data occasione [datur autem non semel] de se loquitur, non sibi defuisse industriam ostendit, ut ad eloquentiam perveniret, sed tamen id se assequi non potuisse quod cupiebat. Nam quod objiciunt adversarii locum illum (Philipp. II, 1) ubi se cum Antonio comparat, et dicendi facultatem simpliciter sibi arrogat, in eo etiam reprehendendum eum esse non puto: non enim illud indecora eloquentiæ jactatio, sed fiducia est oratori nonnumquam concedenda. (Quintil. ubi supra.)

Dices: sin minus ingenii, et eloquentiæ suæ Tullius, at rerum a se gestarum ostentator magnificus, de consulatu suo et exstincta Catilinæ conjuratione intemperantius sane prædicat, quam necesse est pudori et modestiæ. Non dissimulo ea sæpissime revocari, quæ ad oppressos Catilinæ furores pertinent, et Ciceronem in laudando suo consulatu nimium, adde, si vis, intemperantem posse etiam videri. At de patria magis meritus erat, quam qui umquam maxime. Urbem ex Catilinæ *faucibus* eripuerat; ejus ignes a tectis domorum, gladios a cervicibus civium optimorum depulerat: tantum beneficium, et quo majus civibus a cive conferri nullum potest, dat sane prædicationi justam et legitimam excusationem, prope ut concedenda sit et

ignoscenda; et ut grata potius quam arrogans esse videatur. Aliam Fabius init viam purgandi arrogantiae Ciceronis. Plerumque, inquit Quintil. ubi supra, Cicero de suis rebus gestis non sine aliqua ratione praedicavit. « Aut enim tuebatur eos, quibus erat usus adjutoribus in opprimenda conjuratione; aut respondebat invidiae : ut illorum quae egerat in consulatu frequens commemoratio possit videri non gloriae magis, quam defensionis data. »

His illud etiam accedit, quod quum nobilitati esset invisae omnis novorum hominum industria, cujus invadendae locum quaerere illa non desinebat, cogeatur Tullius, novus homo, de suis egregie factis saepius praedicare, ut haberet quod opponeret imaginibus, consulatibus, et triumphis, quos non suos, sed majorum suorum, nobiles ostentabant. Haud aliam ob causam Marius apud Sallust. in Jug. cap. 83, de se magnifice praedicat, quo hominum « veteris prosapia », ut ait, « multarumque imaginum » superbiam retundat. Male igitur, quod in Mario, quia necessitate coactus fecit, non reprehenditur; id in Tullio, quasi sit levitatis crimen, non eadem necessitatis causa, coarguetur.

Crimina praeterea sunt duo, quae Ciceronis in ingenium etiam conferantur. In refellendo adversario, inquit, est mordacior : naturae suae facetiis indulgenti libentius obsequitur. Objicitur illi *canina* facundia, quod more canum remordeat lacesitus : in quo, et quia dixit in libris de Officiis, virum bonum eum esse qui prosit quibus possit, noceat nemini, « nisi lacesitus injuria », multis eum verbis Lactantius¹ insectatur, velut si in Cicerone pagano ferri non debeat, quod in homine christiano religio negat ferendum.

1. De vero Cultu, i. e. lib. VI, cap. 18.

I. *Cic. pars secunda.*

Ciceronem in ea re vituperatum non iri affirmo ab eo, qui temporum quibus ille vixit¹, rationem habuerit; atque meminerit Solonem illum, atque alios homines sapientissimos existimavisse, civitatis illius optimum esse statum, in qua injuriarum auctorem, non solum qui passi essent injuriam, sed etiam qui passi non essent, ulciscerentur. Plura dicerem, nisi Ciceronem veterum dicta, sententiæ, leges, et mores satis excusarent.

Suavis est (de Orat. II, 54), et vehementer sæpe utilis jocus: multum in causa persæpe facietis proficitur. Sed hujusce virtutis adipiscendæ quanta sit difficultas vel duo maximi oratores (Quintil. I, VI, c. 3), alter græcæ, alter latinæ eloquentiæ princeps, docent. Nam plerique Demostheni facultatem hujus rei defuisse credunt, Ciceroni modum. Is enim non solum extra judicia, sed in ipsis etiam orationibus habitus est nimis in risu; unde Cato illum appellavit «ridiculum consulem» in causa Murenæ; ab inimicis vero «scurra consularis» appellatus est. Ciceronis urbanitas in dictis et jocis, inquit Plutarchus (in Cicer. cap. 4), a principio quidem res judicialis et jucunda videbatur: sed ea quum ad satietatem usque abuteretur, multos offendit, et in eam venit opinionem, ut natura perversus esse crederetur. Hæc fuit de Ciceronis jocis opinio, sed illa quidem malivolorum, uti diximus, et inimicorum. Verum qui nihil habuerunt causæ cur mentirentur, ii Ciceronem ut jocandi peritissimum commendarunt. Observat Macrobius (Saturn. II, 1) duos, quos eloquentissimos antiqua ætas tulit, comicum Plautum, et oratorem Tullium, etiam ad jocorum venustatem ceteris præstitisse. Quod ita esse Fabius (ubi

1. Sebast. Corr. quæsturæ, pag. 432.

supra) prorsus existimat. Hoc tantum vellet, ut, qui jocosum Ciceronis libros tres edidit, dictorum numero parcius indulisset, Tiro, et plus judicii in eligendis, quam in congerendis studii adhibuisset; Cicero, inquit, « minus objectus calumniantibus foret ». Vetus est malum, ut officiosa sedulitas amici mortui dum famæ prodesse vult, obsit. Ambitiosius enim, quam necesse est, conquirendo vel congerendo minutissima fragmenta quæ docti inchoata sæpe reliquerunt, eduntur libelli in quibus frustra eorum requiras manum, quorum nomen præ se ferunt. Eo plus judicii in sua Ciceronis jocosum collectione adhibere debuit Tiro, quod nescius non fuit, multos qui Ciceronis non essent, in Ciceronem collatos, et ejus dictos fuisse, ut nimirum ex tanto nomine insulsis quoque dictis accederet auctoritas : de qua re festive ipse queritur cum Volumnio, atque expostulat quod « parum diligenter possessio salinarum suarum ab eo procuratore defendatur ». Ad Div. VII, epist. 31. Indulserit joci aliquando sane Tullius plus quam satis est, quoniam ita fit, ut qui ceteris aliqua re præcellunt, ea sæpe ad aurium fastidium abutantur : at nihilominus confitendum est eum ad jocos et facetias aptum natura fuisse (Plut. in Cicer.) : vultumque illius risum et serenitatem præ se tulisse ; ita ut sic olim ad Antonium (in Epistolis ad Att. l. XIV) jure scribere potuerit : « Nihil umquam non modo acerbum in me fuit, sed ne paullo quidem tristius aut severius, quam necessitas reipublicæ postulavit ». In illis autem ejus dicteriis artificiosum et argutum quid fuisse, quo a ceterorum dictis certissime distinguerentur : ita ut Cæsar (ad Div. IX, epist. 16) quum tritas aures haberet notandis generibus dictiorum [etenim¹ volumina confecerat ἀποφθεγμάτων],

1. Sueton. in Jul. cap. 56.

si quod afferretur ad eum pro dicto Ciceronis, quod ejus non esset, rejicere soleret. Denique negari non potest jocos eum utiliter adhibuisse quum nocentissimos tueretur, et victoriam jocis adeptum fuisse : uti pro Cœlio ; pro L. Flacco, « quem repetundarum reum joci opportunitate manifestissimis criminibus exemit ». Macrob. Saturn. II, 1. Exstat pro Flacco oratio : jocus non exstat. Sed nihil est quod miremur. Aut enim ante, aut perorata causa, in altercando conjectus est ; aut eum, quum hanc orationem recognosceret, rejecit. Non enim Tullius quales dixit, tales edidit suas orationes, et si persæpe domi meditatæ in foro de scripto recitavit, tamen antequam eas in publicum emitteret, singulas retractavit sane diligenter ; neque ipse solum, sed et Atticus limatissimi judicii vir, cui eas Tullius recognoscendas dabat. Itaque multa dicta sunt ab eo, quæ non comparent in his quas habemus orationibus : atque multa in his hodie leguntur, quæ in foro numquam pronuntiata sunt.

Jocos Ciceronis collectos habent nonnullos Quintilianus ; Plutarchus in Ciceronis vita, et Macrobius Sat. II, 3. Sed hæc quanta pars eorum quos effudit homo in jocis uberrimus ?

Dixi de moribus et de ingenio Ciceronis ; et quam inepte in eis reprehendatur vir summus, demonstravi. Sequitur ut de scribendi ratione qua est usus, et de genere illius eloquentiæ, quam suis adversariis etiam non probavit, dicamus.

« Erat in Cicerone comitas summa ; erat gravitas, et cum gravitate junctus facetiarum et urbanitatis oratorius, non scurrilis lepos » : nam sic in Bruto se describere sub Crassi persona, putatur : « Erat acumen in rebus inveniendis, ornatus in explicandis ; peracre ingenium ; vox canora et suavis ; gestus excellens ;

oratio elegans, incitata, volubilis»: sed quæ redundans, et circumfluens nonnullis esse videretur. Omnium vocibus celebratum est quod Ciceroni ob eam rem objecerunt vel æquales ejus, Calvus, et Brutus, ille Cæsaris percussor, Tullii amicus; *Solutum* eum esse et *enervem*; aut, ut ipsius Bruti verbis utar, «tamquam fractum et elumbem». «M. Tullium, ait Fabius¹, suorum temporum homines incessere audebant ut tumidiorem et Asianum, et redundantem, et in repetitionibus nimium... et in compositione fractum, exultantem, ac pæne, quod procul absit, viro molliorem». Addit Quintilianus illum ipsum Tullium qui a sui temporis hominibus male audierat ob nimios flores, et ingenii affluentiam, eundem ævo suo ipsius jejunum et aridum habitum fuisse. Adeo facile corrumpitur judicii salubritas illa quæ «est medium vitiorum et utrimque reductum». Pergit Fabius: «Præcipue vero presserunt eum qui videri Atticorum imitatores concupierant». Non ergo in genere Ciceronis fuit illud, quod ei obiciebatur orationis vitium, at in eorum opinione fuisse deprehenditur, qui Ciceronem damnabant, quasi tumidiorem et Asiani generis æmulum, quod ab eo genere dicendi recederet, quod ipsi sibi ex oratorum Atticorum imitatione effinxerant: quod genus unum optimum esse, quia videlicet ab Atticis oratoribus esset adhibitum, ipsi quum arbitrantur, omne aliud dicendi genus, non uti vitiosum, sed quod non esset Atticum, fastidiose respuebant: quasi Attica oratio commendationem habere apud auditores sola debuisset. Exstiterunt enim Romæ tempore Ciceronis oratores quidam aridi, atque jejuni, qui se «Atticos, atque Atticorum

1. Lib. XII. cap. 10. Inter recentiores vide etiam nostrum Montanum, *Essai de Montaigne*, lib. II, cap. 10, pag. 146, edit. 1669, in-12.

imitatores » esse dicerent. Hi quum eloquentiam imbecillitate sua metirentur, et tantum laudarent, quantum se posse sperarent imitari; eloquentiam Ciceronis, non illam Lysiae tenuem et exilem, ad cujus imitationem se totos conformaverant, sed grandem, uberibusque sententiis abundantem, tamquam copiosiore, reprehenderunt. Quamvis autem genus illud Atticum in foro, causisque forensibus non posset consistere, erant nihilominus qui partes ejus tutarentur, quique hanc sectam rationemque dicendi defenderent. Istos significat Tullius his verbis (Tuscul. II, 1): « Si orationes nostræ in reprehensionem incurrerunt; si reperiebantur nonnulli qui nihil laudarent, nisi quod se imitari posse confiderent; quemque sperandi sibi, eundem et bene dicendi finem proponerent; et quum obruerentur copia sententiarum atque verborum, jejunitatem et famem se malle, quam ubertatem et copiam dicerent, unde erat exortum genus Atticorum, iis ipsis qui id sequi se profitebantur, ignotum; qui jam conticuere, pæne ab ipso foro irrisi: quid futurum putamus, quum, etc. » Hic fons igitur et origo est calumniarum quibus Tullius a suis æqualibus sæpe est agitatatus. Quum eloquentiam, quæ vera laus illius est, ita ductam ab humili perduxisset ad summum, ut jam ceteri qui vivebant oratores, eo se pervenire posse non arbitrarentur, ad malivolentiam conversi, obtreccatione invidiæ eum laceraverunt, cujus gravitatem in dicendo, vim, et copiam æquare desperarent. Atque deinde homines ignari quid oratio valeret, et quæ sit vera virtus eloquentiæ, in istorum auctoritate, et in hac tam frigida calumnia delituerunt. Istis eloquentiæ suæ vituperatoribus respondet Cicero ipse non argumentando, aut rationibus conquisitis de orationis

natura disputando, sed statuit¹ quid sit genus Atticorum, iis ipsis incognitum, qui se illius imitatores et dici et haberi volebant. Demonstrat eum solum Attice dicere, qui perfecte dixerit. Jejunitatem et siccitatem Lysiæ; tristitiam Thucydidis, dummodo sit urbanitas et elegantia; dulcedinem Xenophontis; suavitatem Isocratis, quos isti, alius alium, imitantur, in Attico genere ut partes quidem, non ut totum reponit. Denique veri Attici genus docet ab uno quærendum Demosthene, quo Athenæ ipsæ non fuerunt magis Atticæ. Oratorem illum cui sine dubio summa vis dicendi conceditur, eminere inter omnes in omni genere orationis; ornatum esse et splendidum; sententiarum ornamentis conformationibusque, omnibus præstare; illum in tribus dicendi generibus peræque floruisse; eo nec graviores exstitisse quemquam, nec subtiliorem, nec temperatiorem: unum esse maxime propositum ad imitandum iis, qui aut dici se desiderant Atticos; aut ipsi Attice volunt dicere. Monet laudum suarum obrectatores, ut ex eo² « quid sit Atticum, discant; eloquentiamque ipsius viribus, non imbecillitate sua metiantur ». Hoc est, ut ex Demosthene exemplum capiant, quanta efficere necesse sit eum qui princeps in dicendo esse vult: ac ne deinceps temere damnent quæ non intelligunt.

An hisce telis confossa malivolentia vivo Cicerone conquieverit, affirmare non ausim. « At³ posteaquam triumphali proscriptione consumptus est, passim qui oderant, qui invidebant, qui æmulabantur; adulatores etiam præsentis potentiæ, non responsurum invase-

1. De cl. Orat. cap. 82 et seqq. Orat. cap. 7 et seqq. Vide etiam Quintil. lib. XII, cap. 10.

2. Orat. cap. 7.

3. Quintil. ubi supra.

runt». Asinium Pollionem¹ passus est rivalem vivus et adversarium. Pollionis filius Asinius Gallus libros etiam in eum scripsit², «in quibus eloquentiam Ciceronis paterna eloquentia conatur obruere : et audet parenti de Cicerone dare palmam laudis oratoriæ». Claudius imperator (Suet. in Claud. cap. 41) adversus hos Galli libros condidit defensionem satis eruditam. Præterea memorat A. Gellius (lib. XVII, cap. 1) Largi cujusdam Licinii librum inscriptum hoc titulo, *Ciceromastix*. Sunt etiam alii³ multi, quorum iniquiora de se judicia et reprehensiones effugere Tullius non potuit. De quorum omnium judicio quid sentiendum sit magnifice declarat A. Gellius, ubi supra : « Ut quidam, inquit, fuerunt monstra hominum qui de diis immortalibus impias falsasque opiniones prodiderunt ; ita nonnulli tam prodigiosi, tamque vecordes exstiterunt, ut scribere ausi sint M. Ciceronem parum integre, atque improprie, atque inconsiderate loquutum. Atque alia quidem quæ reprehenderunt, neque dictu, neque auditu digna sunt, sed enim, etc. » Sic, dum viles de ludo declamatores, quos tenebat veræ eloquentiæ miserabilis ignoratio, famam sibi ex Ciceronis infamia ibant comparatum ; interea sanæ mentis homines, doctrina, atque omnium artium optimarum studiis eruditi, uterque Plinius; M. Seneca, L. philosophi pater; Fabius; Gellius; et quotquot Roma habuit

1. Hic est Asinius Pollio bonis omnibus ævi sui scriptoribus infestus: qui C. Sallustii scripta reprehendebat, ut nimia priscorum verborum affectatione oblita: qui in T. Livio miræ facundiæ viro *Patavinitatem* quamdam notabat. Is Verrem Ciceronis reum fortissime morientem tradidit: et Ciceronis mortem solus ex omnibus maligne narrat; ita ut ejus invidia vel supremo illius sine domita non fuerit.

2. Plin. lib. VII, epist. 4.

3. Vid. Ammian. Marcell. XXII. Senec. in Suas. et Controv. Quintil.

literis doctrinisque perpolitos, ab ignotissimorum hominum calumniis nobilissimum oratorem auctoritate sua vindicabant: dum istos M. Tullius, oratoris filius, non argumentis, sed flagellis refutabat; et parenti suo de illius obtrectatorum « corio ¹ satisfaciebat ».

Sed omissis et Largis et Cestiis, venio ad celeberrimum, dum viveret, romani fori ingenium; et Ciceronis eloquentiæ castigatorem gravissimum, M. Aprum. Is ea Ciceroni objicit, quæ si vera sint, nemo erit qui eum oratoris nomine jam appellari velit. « Lentus est, inquit, in principiis; longus in narrationibus; otiosus circa excessus: tarde commovetur; raro incalcescit; pauci sensus optime, et cum quodam lumine terminantur: nihil excerpere, nihil referre possis. » Vid. Dial. de Orat. cap. 22.

Jam primum omnium satis constat, quo tempore vixit Aper, eloquentiam de sua dignitate multum perdidisse. Senserat Cicero, eam, quum venisset ad summum, « jam senescere ». Tuscul. Disput. lib. II, cap. 5. At quum omnia in unius fuerunt potestate, rerum conversionem scribendi ratio est subsequuta. Ciceroniana dicendi ratio communi quodam in usu atque hominum more versari desiit. Ornamenta² recta et sincera quæ ante bella probabantur, postea non satis idonea esse visa sunt. Orationis copiosæ et elegantis ornatus repudiari cœperunt: forma ipsa, concinnitasque verborum et sententiarum laudata est, non ea quæ sponte se offert, sed quæ studiose conquiritur. Nihil placuit nisi argute dictum, callide excogitatum; nil sine pigmentis, nihil sine fuco puerili:

1. Quod de Cestio tradit Sen. Suas. VII.

2. Cl. abbas Gedyon, *Préf. de sa trad. de Quintil. Fabius*, IX, 5. Petron. 1. Hieronym. epist. ad Pamm. et Nepotem.

lumina et flosculi sententiarum sine modo structi in clausulis clamores et admirationes, velut olim in bonis oratoribus verus orationis ornatus, effecerunt. Tantum eloquentia descendit a vetere gloria! Primi omnium eam perdiderunt declamatores, novum genus oratorum, qui Ciceronis ætate quum exstitissent, levibus atque inanibus sonis ludibria quædam excitando, fecerunt ut corpus orationis enervaretur et caderet. Per eos a naturali pulchritudine traducta est ratio dicendi ad conquisita ornamenta; ad ventosam et enormem loquacitatem; ad rerum tumorem et sententiarum vanissimum strepitum. Lumina verborum, argutiæ, antitheta, turgidæ figuræ, in clausulis sententiolæ, per eos frequentari, seu potius sine iudicio accumulari cœperunt. At ubi L. Seneca cœpit in foro causisque versari, eloquentia demum periit. Multæ Senecæ (Quintil. X, 1) et magnæ virtutes fuerunt: ingenium facile et copiosum; plurimum studii; multarum rerum cognitio. Nam et orationes ejus, et poemata, et epistolæ, et dialogi feruntur. Egregius vitiorum insectator fuit: multæ in eo claræque sententiæ. Sed has tantas viri virtutes ingentia vitia æquabant. Nulla erat in eo vis oratoria; nullum iudicium, in ejus mente nulla insidebat species veræ germanæque eloquentiæ. Genus dicendi fractum, concisum, mutilum, hians: nulla verborum electio, collocatio; nulla comprehensio numerose et apte cadens: aspera, tristis, horrida oratio, neque perfecta, neque conclusa: « Commissiones meræ, calx sine arena ». Suet. in Cal. c. 53. De Sen. vid. A. Gell. XII, 2. Talis, seu potius, sic nulla fuit romana eloquentia, quum in Ciceronis scripta censuram Aper exercuit: amabatur Seneca; solus fere erat adolescentium in manibus; placebat propter sola vitia, quibus eo magis perniciosius abun-

dabat, quod essent dulcia; et ad ea se quisque dirigeret effingenda, quæ poterat: veteres autem et potiores respuebantur scriptores, quos ille non destiterat incessere, quum diversi sibi conscius generis, desperatione formidaret hoc eorum genus, et placere se in dicendo posse iis, quibus illi placerent, diffideret. Istam Senecæ, imo, sui temporis eloquentiam miratus Aper, Ciceronianum dicendi genus elevat, quod in hoc nimirum, uti in Seneca aut Plinio, crebræ non emineant sententiæ; quod acute dicta non intermissis acuminibus legentis animum non percellant; quod omni diligentia munditiam orationis affluentem non affectet; quod epigrammatum acumen in clausulis non referat. Hæc enim in eo requirere videtur Aper, quum ait, « Pauci sensus optime et cum quodam lumine terminantur: nihil excerptum, nihil referre possis ». At genus istud proprium sit sophistarum; pompæ quam pugnæ aptius; gymnasiis et palæstræ dicatum; spretum et pulsum foro; non tam insigne ad maximam laudem, quam ad aurium voluptatem accommodatum. Egregia laus sane fuisset Ciceronis, si, quum pro S. Roscio contra Chrysogonum; pro Siculis contra Verrem; pro patria contra Catilinam diceret, tot nefariorum hominum crimina *rasis*¹, uti Persius ille, « librasset in antithetis », et « doctus posuisse figuras » laudaretur, quum in aciem dimicationemque veniendum fuisset! Quam sceleratis hominibus fecissent invidiam sententiolæ? Non referebat ex illis orationibus argutias auditor, sed Siculorum miseriis, patriæ periculis commotus, judiciali asperitate, forensiumque sententiarum aculeis excitatus e foro discedebat plenus indignationis, aut in C. Verrem, aut in Catili-

1. Pers. Sat. I, vs. 85, et ibi Casaub.

nam, et iracundiæ. Neque tamen quoniam in tribus dicendi generibus peræque floruit, ab hoc incitato et volubili, ad dulçe orationis genus, sentiis argutum, verbis sonans, non deflexit aliquando Tullius. Testes pro Pompeio, pro Archia, pro Marcello, etc. orationes. Sed solam hujus generis virtutem in sentiis positam, ut isti, non putavit; neque voluit ut omnis locus, omnis sensus in fine sermonis aures feriret: quippe qui sic habuit, « Composite et apte sine sentiis dicere, insaniam esse; sententiose autem, sine verborum et ordine et modo, infantiam ». Vid. Orat. cap. 71.

Cicero, inquit Aper, « lentus est in principiis », id est, in exordiis.

Exordium triplex vulgo distinguitur: Principium, insinuatio, et illud quod est ex abrupto. Hisce exordiis utitur Cicero pro ratione causarum quas habet tractandas. Nunc rem statim aggreditur, atque orationem quasi impetu orditur, verbi gratia, per apostrophen, uti Catilin. I: « Quousque tandem, etc. » In ejusmodi exordia non sane cadit Apri reprehensio. Illa ergo respicit quæ *principia* dicuntur, et quæ fiunt per insinuationem. In utrisque quia præparatur auditoris animus, efficiendo ut sit benivulus, ut attentus; ut docilis; non inficiamur ad ea Ciceronem considerate et quasi pedetentim ingredi. Nam si revocandus sit judex, qui aut nobis inimicus, aut adversario erit amicus; si miseratione inclinandus; si causam docendus; quæ partes sunt exordii, anne statim assiliendum erit ad vehemens et acre dicendi genus? Anne his initiis in animum judicis admittetur orator? Nonne potius talem oderit oratorem judex, statim adhibentem has dicendi faces, et ab ipso introitu repente, quasi æstu ingenii sui abreptum, tragoedias excitant-

tem? Sit cursus in oratione incitator, sed modesta et moderata sit ingressio. Prodat se in contentione eloquentia, sed occultetur in exordio; nec in principiis, nisi ab Apro, et ab ejus æqualibus, jactetur. Vid. Quintil. IV, 1.

Venio nunc ad narrationes, in quibus *longus* Apro videtur esse *Tullius*. Quoniam non unius generis fuerunt causæ, quas ad se delatas recepit, in eis fuisse nonnullas, quæ essent ejusmodi ut longiorem narrationem requirerent, verisimile est. Tot legum, tot edictorum, tot rationum, qualia sunt in orationibus pro Cæcina, pro Cluentio, libro tertio in Verrem, et quæ singulatim expendenda erant, prolixa enumeratio non poterat breviter expediri. Longa sunt, quia singula sunt diligenter explicanda. Longa sunt, aut videntur, quia nuda sunt, et ornari negant. Verum ista minime debent in Ciceronem transferri: propria sunt causæ, de qua pendet qui eam recipit, orator. Illa si respuit oratoria ornamenta dicendi, hoc sat erit oratorem eam explicuisse accurate et dilucide: in quo Cicero neutiquam sane est reprehendendus. At ubi nullis jam conclusa formularum captionibus oratio potest longius evagari, quanta sententiarum gravitate! quanto verborum pondere! quanta rerum copia se explicat in Verrinis postremis duabus; in orationibus pro Sextio, pro Milone; Philippica secunda! Quem, nisi sensus communis plane expertem, defixum non ita detineat narrationis nativa jucunditas, ut eam vel breviorē esse non queratur? Longa enim appellanda non est narratio in qua non plus verborum est quam necesse sit. Ea est oratoria ratio constans et perpetua Ciceronis. Rem narrat verbis quam potest lectissimis et gravissimis, quo judicem doceat: mox, ut aut odium adversario conficiatur, aut judex

miseratione moveatur, omnes motus excitat aut indignationis, aut misericordiæ. In quo si tantisper immoratur, quis est, qui, quod summæ artis est, velit reprehendere? Quod autem contendit Aper Ciceronem « tarde commoveri, raro incalescere » : aut dicat omnia in oratione, vel ipsas etiam narrationes, quibus nihil potest esse sedatius, vehementi impetu, et maximis clamoribus esse peragendas; aut Ciceronem fateatur ea, qua decet, incitatione ferri: imo sæpe sic hujus evolare orationem, ut vim et impetum adspicias, vestigia ingressumque non videas.

Exposui quas subiit olim Cicero vituperationes; quibus alii¹ jam antea responderunt. Et a me hic ita responsum puto, ut qui ei opponuntur reprehensores, ipsi justa reprehensione aut invidiæ, aut ignorantæ, aut imprudentiæ carere non posse videantur. Illud autem censorii styli mucronem illum pulcherrime retundit, quod nemo fere umquam fuerit, quin scripta Ciceronis habuerit, quin legerit, quin suspexerit, pæne dicam, veneratus fuerit, ut exemplum, sin minus perfectissimæ omnino, atque numeris omnibus absolutæ, at sane illius quæ minus a perfectissima recedat, eloquentiæ. In ea nonnihil fuisse vitiorum docti judicaverunt, et ipse etiam, alioquin minime sui contemptor, confessus est. Verum in his quanta pars erit? Ad legem veritatis loqui si velis, Ciceronis vitia quotquot sunt in unum si conferantur, vix millesimam ejus virtutem adæquatura esse fateberis. Hunc igitur amemus: hunc spectemus: hoc propositum nobis sit exemplum: non ea tamen religione dicam, an superstitione, quæ altero ab hoc sæculo

1. Ciceronem a calumniis vindicavit peculiari libello Andr. Schottus. Aprum refutavit Anonymus in Memor. Trivult. anni 1718, Mart. pag. 552.

fusa per gentem literatam omnium fere animos occupavit. Exstiterunt homines illis temporibus, quum literæ feliciter cœperunt renasci, qui orbi veluti novam sectam molirentur invehere, et *Ciceronianos* sese vocarent, omnium scripta rejicientes, quæ Ciceronis lineamenta non referrent; quique adolescentes a ceterorum scriptorum lectione deterritos, ad unius Ciceronis imitationem revocarent. Huic ineptiæ viri, qui tunc erant, sapientes adversati sunt: in primis Erasmus, cujus dialogus est *Ciceronianus*, ad id ab eo scriptus, ut doceret bonos scriptores alios, præter M. Tullium, et legendos esse, et imitandos: quod ob meritum maledictis de trivio arreptis eum Julius Cæsar ille Scaliger oneravit¹. Quo quid dici aut fingi potest insanius? Nos vero Ciceronem imitemur, sed ita ut ab aliorum auctorum bene latinorum imitatione non recedamus. Hos cum illo copulemus. Eos juvenum ad optima tendentium æmuletur, ac sequatur industria. Verum Ciceronis æmulatio non debet in sola verborum proprietate concludi. Etenim quis fructus laboris, mutuatam a Cicerone unam et alteram jactare clausulam? Quid proderit flumen gravissimorum et optimorum verborum ab ipso Tullio defluens, si orationis est siccitas? Effingendæ sunt quas extulit Tullius virtutes. Exprimenda sunt illius non verba solum, sed repræsentandum est ingenium: non quomodo pictura primas rerum imagines, oris lineamenta et colores exhibet; sed sicuti refert patrem, in cujus jura et bona venit, filius.

1. Istas Scaligeri orationes, quæ, conquisitis exemplaribus et suppressis, minus erant obviæ, Tolosæ, anno 1621, Maussacus recudendas curavit, cum Erasmi *Ciceroniano*, ut lector intueri simul posset et scelus, et poenam sceleris irrogatam: atque una intelligeret quo judicio nonnulli interdum versentur in iis studiis quæ ab humanitate sibi nomen adsciverunt.

XL PRÆFATIO NICOLAI DESJARDINS.

Quod ad me attinet, quidquid in me opis fuit, quidquid industria efficere, quidquid intelligentia consequi potui, id omne illuc contuli. Quod si ut meo illorum adjuvetur labor, quam potui maximam adhibui diligentiam, hanc meam operam apud se interire ne patiantur. Sinant hujus ad se utilitatem pervenire. Aut me amor suscepti negotii fallit, aut paucae jam illis per Ciceronis orationes decurrentibus officient salebrae: plana, aperta, dilucida, ut essent omnia; ut nullae superessent difficultatum offensiones; praeter eas quas habet aliquot locorum depravatio, si non omnino perfecimus, at sane conati quidem sumus.

M. TULLII CICERONIS
PRO P. QUINTIO
ORATIO

I. Cic. pars secunda.

I

ARGUMENTUM.

C. Quintius, cui multa erant in Gallia vel propria, vel locata pascua, cum Sex. Nævio, olim præcone, societatem earum rerum fecit. Quæ societas quum annos jam complures esset, et sæpe Quintius Nævium suspectum habuisset, moritur repentino Quintius, herede instituto fratre P. Quintio, qui Romæ commorabatur. Is nec ita multo post (A. U. C. 669) in Galliam proficiscitur; ibi annum fere cum Nævio familiariter vivit; et quum inter se multa de societate communicarent, numquam tamen Nævius monuit, aut societatem sibi quidquam debere, aut privatim C. Quintium debuisse. Imo quum a P. Quintio aliquantum æris alieni Romæ esset relictum, Sex. Nævius pecuniam ei offert, quam ut communem existimet, hortatur pro veteri cum ejus fratre Caio societate ac ipsius affinitate: nam P. Quintii consobrinam habebat in matrimonio Nævius, et ex ea liberos. Quintius igitur auxilio Nævii fretus Romam redit, creditoribus se certo die soluturum promittit; Nævium certiores facit, rogat ut sibi curet quod dixisset. Tum ille assem se negat daturum, nisi prius de rebus rationibusque societatis decidisset. Destitutione illa perculsus Quintius, non sine pecuniæ jactura, bona quædam in Gallia vendit, creditoribus dissolvit; ultroque Nævium appellat, ut si quid esset controversiæ per arbitros transigeret. Dat iste amicum Trebellium: Quintius communem necessarium, suumque propinquum Sex. Alphenum. Sed quum res per arbitros propter Nævii avaritiam convenire non posset, res esse in vadimonio cæpit, i. e. alter alterum in jus vocavit, et mutuo certo die se præsto futuros promiserunt. Tunc vero Nævius ait se auctionatum in Gallia, curasse ne quid sibi jam societas deberet: P. Quintius, acta omnia ratus, in Galliam proficiscitur; quem ubi profectum audit Nævius, amicos convocat, testificatur a Quintio desertum vadimonium, et a Burrhieno prætore postulat, ut ex edicto bona ejus possidere liceat. Nam qui vadimonium destituissent, infames erant, et in eorum bona creditores ex edicto prætoris mittebantur; eaque si per dies xxx possessa essent, eis addicebantur. Nævius igitur Quintii

bona proscribit, et antequam jussisset prætor, Quintium e communibus in Gallia bonis ejici curat.

Tunc vero proscriptionis libellos Sex. Alphenus dejicit, se Quintii procuratorem denuntiat, et judicio defensurum. Nævius interea postulat, ut procurator judicatum solvi satisfacere, i. e. locupletes det fidejussores, qui suo periculo præstent tantum solutum iri, quantum, judicio facto, solvi oporteret, si Quintius damnaretur. Cogebantur autem satisfacere, qui vadimonium deseruerant, si litem instaurare vellent, partim ne rursus impune fallerent, partim quia creditores suspicari poterant eos solvendo non esse, quum eorum bona ex edicto prætoris possiderentur. Negat Alphenus æquum esse, procuratorem satisfacere, quod reus satisfacere non deberet, si ipse adesset, sc. quia nec vadimonium deseruerat, nec bona ejus ex edicto a Nævio possideri jure poterant. Appellantur tribuni: petitur, ut adversus edictum Burrhieni intercedant; et idib. sept. P. Quintium sisti Sex. Alphenus promittit.

Venit Romam Quintius, vadimonium sistit: Nævius annum et sex menses nihil petit, quiescit. A Cn. Dolabella denique prætore postulat, ut sibi Quintius judicatum solvi satisfacere ex formula, *quod ab eo petat, cujus ex edicto prætoris bona dies xxx possessa sunt*. Prætor adversus æquitatem ac morem jubet P. Quintium, aut satisfacere, aut sponsionem cum Nævio facere, *si bona sua ex edicto P. Burrhieni prætoris dies xxx possessa non essent*, i. e. certa pecunia eum provocare, ut nullam fuisse bonorum suorum possessionem ostenderet, qua ratione ipse ut petitor priore loco causam dicere cogebatur. Clamabat porro Quintius sese idcirco nolle satisfacere, ne videretur bona sua judicasse ex edicto possessa; quod si concederet, vadimonium a se desertum fateretur, et bonam existimationem perderet; sponsionem vero si istiusmodi faceret, se de causa, in qua, præter fortunas, fama sua et summa existimatio periclitaretur, priore loco dicturum; quæ conditio sane erat iniqua. Quintius tandem ex duabus conditionibus alteram eligit, ut sponsionem illam faciat; judex datur C. Aquillius Gallus, juris civilis scientia clarissimus, et postea Tullii in prætura collega, qui tres jurisconsultos, M. Marcellum, P. Quintilium, L. Lucillum, in consilium sibi advocat. Quum igitur pro Quintio sæpius jam

M. Junius dixisset, legatione autem impeditus esset quominus peroraret; Cicero rogatus a Quintii amicis, in primis a Q. Roscio comædo, causam ejus suscepit, habuitque hanc orationem in comitio (qui locus erat in foro, ubi privata judicia, sive judicia de controversiis subortis inter privatos, exercebantur), M. Tullio Decula, Cn. Cornelio Dolabella coss. anno 67a, Sullanæ dictaturæ primo, Ciceronis vigesimo sexto.

Multa erant in hac causa quæ Quintii patronum deterrerent; nempe Nævii gratia, qui, malis ditatus artibus, Marianarum olim, nunc vero Sullanarum partium fautor, nobiles plerosque advocatos habebat; tum prætorum favor, qui jam Quintium damnaverant, tum maxime Hortensii eloquentia, quem nondum a *fori regno* Cicero dejecerat. Non vero dubitavit noster aperte in Nævium invehi, prætorum Burrhieni ac Dolabellæ injurias queri, ita ut non fortitudinis minus in hac concione quam eloquentiæ nobilissimum specimen ediderit.

Eventus fuit felix. Liberato Quintio, tulit Cicero eloquentiæ suæ fructum, ut scribit A. Gellius, XV, 28.

SYNOPSIS.

Quæstio est in genere judiciali: an Sex. Nævius possederit bona P. Quintii ex edicto prætoris.

Partes orationis quinque sunt: Exordium, 1, 2. Narratio, 3-9. Partitio, 10. Contentio, 11-29. Peroratio, 30, 31.

In Exordio Cicero fatetur se in hac causa partim eloquentiam Q. Hortensii, qui Nævium defendebat, vereri, partim ipsius Nævii opes, apud multos nobiles Sullanarum partium gratiosi, extimescere. Inde M. Junii absentiam, prætoris iniquitatem queritur, qui reum priori loco loqui jusserit; rogatque C. Aquillium, eosque qui ei in consilio aderant, ut Quintii solitudini atque inopie contra vim et gratiam adversarii succurrant, 1, 2. Sic ab Exordio jactat orator prima affectuum semina, in Quintium commiserationis, et odii in Nævium, ceterosque adversarios.

Sequitur NARRATIO, quæ quasi in duas partes distribuitur: 1º In quamdam præparationem, qua orator anteactam Nævii vitam refert, quod ejus ingenium, quam multiplex et tortuosum, etc. 3, 4. 2º In facti narrationem, nempe quo modo dissimulatam perfidiam indicans, Quintium Nævius insidiis circumvenit, 5-9. Quam concludit brevi invidiæ affectu in adversarios, qui eloquentia et potentia ad injuriam abutuntur, 9.

Tum accedit auctor ad PARTITIONEM, 10. Denuntiatque se ostensurum:

1° Causam non fuisse, cur Nævius a prætore postulare, ut bona P. Quintii possideret.

2° Ex edicto illum ea bona possidere non potuisse.

3° Non possedisse.

In *CONTORTIONIS* igitur prima parte probatur causam non fuisse, cur Nævius postulare, 1° Ipsius Nævii testimonio, qui, quum tempus et locum habuerit appellandi Quintii de pecunia, quum serveat avaritia, etc. biennio tamen debitum nullum petiit, 11, 12. 2° Ejusdem Nævii confessione, qui sæpe revocatus ad iudicium de re pecuniaria, conditiones æquissimas repudiavit, atque aperte confessus est nihil sibi a Quintio deberi, 13. 3° Nuda et simplici temporis discussione. Quintius Romæ non fuit quo die vadimonium factum dicit Nævius. 4° Officii ratione. Etiam si Quintius vadimonium deseruisset, non continuo debuit Nævius bona socii, amici, affinis proscribere: quæ proscriptio acerbissima est omnium calamitatum, 14-18. Hunc locum exornat vehemens et pathetica amplificatio.

In secunda parte ostenditur, ex edicto prætoris bona P. Quintii possideri nullo modo potuisse; quod probatur ex ipsis edicti verbis, 19-27. 1° Non enim *latitasse* Quintium, neque *absentem iudicio non defensum fuisse*, quippe quum Alphenus, ejus procurator, libellos Nævii dejecerit, vadimonium promiserit, 19, 20, 21. 2° Non dici posse Nævio parem certationem cum Alpheno Marii fautore non fuisse, quod tunc Mariani dominarentur; quum ipse Nævius istis etiam faveret, et ad victorem tantum Sullam transfugerit, 22. 3° Si Nævius ex edicto bona Quintii possedisset, quærit cur bona non venierint, cur ceteri creditores non convenerint, 23. 4° Additur Narratio, qua docetur Nævium jam, antequam postulasset, ut bona Quintii possideret, illum de suo fundo per vim ejiciendum curasse, quod est contra prætoris edictum, 24-27.

Tertium erat, ut demonstraretur Nævium bona Quintii ne possedisse quidem. Verum totus hic locus interridit una cum initio conclusionis, in qua superius dicta summatim enumerantur, 28, 29.

Denique in *PERORATIONE* iudicis misericordiam maxime commovet a persona Quintii, senis et inopis, et ab ejusdem innocentissima vita; ab adversarii persona, viri potentis, voluptarii et iniqui; rogaturque iudex, ut quum veritas cum Quintio pugnet, plus ejus inopia ad misericordiam quam Nævii opes ad crudelitatem valeant, et ut quam existimationem, quam honestatem in iudicium attulerit, eam liceat ei secum ex hoc iudicio efferre, 30, 31.

Dicendi character subtilis est; persæpe tamen figuris et amplificationibus, et quasi juvenili Ciceronis ubertate luxuriat.

M. T. CICERONIS ORATIONES.

PRO P. QUINTIO ORATIO.

ORATIO PRIMA.

I. **Q**UÆ res¹ in civitate duæ plurimum possunt, hæ contra nos ambæ faciunt² in hoc tempore, summa gratia, et eloquentia: quarum alteram, C. Aquilli, vereor, alteram metuo³. Eloquentia Q. Hortensii ne me in⁴ dicendo impediat, nonnihil commoveor: gratia Sex. Nævii ne P. Quintio noceat, id vero non mediocriter pertimesco. Neque hoc tantopere querendum videretur, hæc summa in illis esse, si in nobis essent saltem mediocria. Verum ita se res habet, ut ego, qui neque usu satis, et ingenio parum possum, cum patrono disertissimo comparer⁵; P. Quintius, cui tenues

I. 1. *Quæ res*. Illud respicere exordium videtur Quintilian. VI, 1. Quum autem sæpius ab ineptis olim in Gallico foro causidicis usurparetur hæc a contrario comparandæ benivolentiæ ratio, et ipse clarissimus *Patru* sic pistrinariam causam esset exorsus, non absurde eam naso suspendit Racinius noster, in fabula dicta *les Plaideurs*, act. III, sc. 3.

2. *Faciunt*, i. e. pugnant. Sic inf. c. 30., et Horat. Ep. II, 1, 68.

3. *Metuo*. Quadam Hortensii eloquentiæ verecundia movetur Tullius; gratiam vero S. Nævii timet ac formidat.

4. Vulgo abest *in*. Restituit e codd. Grævius. J. V. L.

5. *Comparer*. Metaphora sumpta a gladiatoribus, qui par cum pari, ha-

opes, nullæ facultates, exiguæ amicorum⁶ copię sunt, cum adversario gratiosissimo contendat. Illud quoque nobis accedit incommodum, quod M. Junius, qui hanc causam, Aquilli, aliquoties apud te egit, homo et in aliis causis exercitatus, et in hac multum et sæpe versatus, hoc tempore abest, nova legatione⁷ impeditus; et ad me ventum est, qui, ut summa⁸ haberem cetera, temporis quidem certe vix satis habui, ut rem tantam, tot controversiis implicatam, possem cognoscere. Ita, quod mihi consuevit in ceteris causis esse adjumento, id quoque in hac causa deficit. Nam, quo⁹ minus ingenio possum, subsidio mihi diligentiam comparavi: quæ quanta sit, nisi tempus et spatium datum sit, intelligi non potest. Quæ quo plura sunt, C. Aquilli, eo te, et hos, qui tibi in consilio¹⁰ adsunt, meliori mente nostra verba audire oportebit, ut multis incommodis veritas debilitata tandem æquitatem talium virorum recreetur. Quod si tu iudex nullo¹¹ præsidio fuisse videbere, contra vim et gratiam, solitudini atque inopiæ; si apud hoc consilium ex opibus, non ex veritate causa pendetur; profecto nihil est jam sanctum atque sincerum in civitate; nihil, quod humilitatem

bita utriusque virium ratione, componantur. Hinc duo, tria, centum paria gladiatorum.

6. *Amicorum.* Mos erat, ut in iudiciis actor et reus amicos omnes advocarent, quorum auctoritate iudices commoverentur. Illi qui præsentiam tantum commodabant, *advocati*, i. e. ad causam vocati; qui loquebantur, *patroni* appellabantur.

7. *Nova legatione.* Quæ fuerit hæc inexpectata legatio, non liquet. Dabatur enim publica, ad comitandum proconsulem; aut privata, hereditatis ob-eundæ, aut aliorum negotiorum causa.

8. *Ut summa.* Si summam haberem eloquentiam et summum usum.

9. Schütz, auctore Lambino, rescripsit quod, male. J. V. L.

10. *In consilio.* Assessores scilicet, L. Lucullus, P. Quintilius, M. Marcellus (ut est infra 17), quos Aquillius, iudex a prætore datus, jurisconsultos elegerat; et illi quidem consuli, non vero deliberare poterant. Vid. ad calc. hujus volum. Append. de ord. exerc. jud.

11. *Nullo.* Non restitisse Nævii potentiæ. *Nullo* pro nulli, ut apud Plant. et Ter.

cujusquam gravitas et virtus judicis consoletur. Certe aut apud te, et eos, qui tibi adsunt, veritas valebit; aut ex hoc loco repulsa vi et gratia, locum, ubi consistat, reperire non poterit.

II. Non eo dico¹, C. Aquilli, quo mihi veniat in dubium tua fides et constantia, aut quo non in his, quos tibi advocasti, viris electissimis civitatis, spem summam habere P. Quintius debeat. Quid ergo est? Primum magnitudo periculi summo timore hominem afficit, quod uno judicio de fortunis² omnibus decernit: idque dum cogitat, non minus sæpe ei venit in mentem potestatis³, quam æquitatis tuæ; propterea quod omnes, quorum in alterius manu vita posita est, sæpius illud cogitant, quid possit is, cujus in ditione ac potestate sunt, quam quid debeat facere. Deinde habet adversarium P. Quintius verbo Sex. Nævium; re vera, hujusce ætatis homines disertissimos⁴, fortissimos, ornatissimos nostræ civitatis, qui communi studio, summis opibus Sex. Nævium defendunt: si id est defendere, cupiditati alterius obtemperare, quo is facilius, quem velit, iniquo judicio⁵ opprimere possit. Nam quid hoc iniquius, aut indignius, C. Aquilli, dici aut commemorari potest, quam me, qui caput alterius, famam fortunasque defendam, priore loco⁶ causam dicere? quum præsertim Q. Hortensius, qui hoc judi-

II. 1. MS Falkenburg. « Neque hoc eo dico », elegantius. J. V. L. Sic ap. Terent. « Neque eo nunc dico, quod quidquam illum senserim ». — Correctio superiorum, qua vitat offensivam judicis, quem ita modo laudavit, ut ei diffidere videretur.

2. *Fortunis*. Non solum de bonis universis, sed etiam de clientis capite, i. e. vita civili, fama et statu; ut ipse paullo inferius ait orator.

3. *Potestatis*. Subaudi *recordatio*. Quæ sæpius usurpatur ellipsis.

4. Q. Hortensium scil. ac L. Philippum. De quo Horat. lib. I, epist. 7, vs. 46. *Fortissimi* dicuntur quod clientes suos magna constantia defendunt. Sic orat. pro Mil. 8, « fortiter judicare ».

5. *Iniquo judicio*. Inique constituto: hoc enim ad prætorem Burrienum pertinet, non ad hoc Aquillii judicium.

6. *Priore loco*. Vid. Argum.

cio partes accusatoris obtinet, contra me sit dicturus; cui summam copiam facultatemque dicendi natura largita est. Ita fit, ut ego, qui tela depellere et vulneribus mederi debeam, tum id facere cogar, quum etiam telum adversarius nullum jecerit: illis autem id tempus impugnandi detur, quum et vitandi illorum impetus potestas adempta nobis erit; et, si qua in re, id quod parati sunt facere, falsum crimen, quasi⁷ venenatum aliquod telum, jecerint, medicinæ faciendæ locus non erit. Id accidit prætoris iniquitate⁸ et injuria: primum quod, contra omnium consuetudinem, judicium prius de probro⁹, quam de re, maluit fieri; deinde, quod ita constituit id ipsum judicium, ut reus, antequam verbum accusatoris audisset, causam dicere cogeretur; quod eorum gratia et potentia factum est, qui, quasi sua res, aut honos agatur, ita diligenter Sex. Nævii studio et cupiditati morem gerunt, et in ejusmodi rebus opes suas experiuntur, in quibus, quo plus propter virtutem nobilitatemque possunt, eo minus, quantum possint, debent ostendere. Quum tot tantisque difficultatibus affectus atque afflictus, in tuam, C. Aquilli, fidem, veritatem¹⁰, misericordiam P. Quintius confugerit; quum adhuc ei, propter vim adversariorum, non jus par¹¹, non agendi potestas eadem, non magistratus¹² æquus reperiri potuerit; quum ei, summam per inju-

7. Tria hæc verba, ut spuria, delevit Lambinus. J. V. L.

8. *Iniquitate*. Miranda non semel occurrit oratoris libera indignatio, qui non in magistratum injuriam invehi dubitat, dummodo officio ac fidei inserviat.

9. *De probro*. Quæri enim voluit prætor, prius an desertum fuerit a Quintio vadimonium (vadimonii autem desertoribus infamiæ poena erat

constituta), et possessa ne sint ejus bona ex edicto. *Quam de re*, i. e. de pecunia quam sibi Nævius a Quintio deberi dicebat. Vid. inf. cap. 8.

10. *Veritatem*. *Æquitatem*. Vid. Longol. ad Plin. Epist. VIII, 2.

11. *Jus par*. Non æqua disceptandi juris conditio.

12. *Magistratus*. Prætor Burribienus, qui Quintium prior damnavit; et Dolabella, qui damnatum iterum velit.

riam, omnia inimica atque infesta fuerint: te, C. Aquilli, vosque, qui in consilio adestis, orat atque obsecrat, ut multis injuriis jactatam atque agitatam æquitatem, in hoc tandem loco consistere et confirmari patiamini.

III. Id quo facilius facere possitis, dabo operam, ut a principio, res quemadmodum gesta et contracta sit, cognoscatis. C. Quintius fuit P. Quintii hujus frater; sane ceterarum rerum¹ paterfamilias et prudens et attentus, una in re paullo minus consideratus, qui societatem cum Sex. Nævio fecerit, viro bono, verumtamen non ita instituto, ut jura societatis et officia certi² patrisfamilias nosse posset: non quo³ ei deesset ingenium; nam neque parum facetus scurra Sex. Nævius, neque inhumanus⁴ præco⁵ est umquam existimatus. Quid ergo est? quum ei natura nihil melius quam vocem dedisset, pater nihil præter libertatem reliquisset, vocem in quæstum contulit; libertate usus est, quo impunius dicax esset. Quare quod socium tibi eum velles adjungere, nihil erat, nisi ut in tua pecunia⁶ condisceret, qui pecuniæ fructus esset. Tamen inductus consuetudine ac familiaritate Quintius fecit, ut dixi, societatem earum rerum, quæ in Gallia comparabantur. Erat ei pecuaria res⁷ ampla, et rustica sane

III. 1. *Ceterarum rerum.* Subaud. *in negotio.* Sic in Cat. Maj. «Sæpe numero admirari soleo, quum ceterarum rerum tuam excellentem, M. Cato, sapientiam, tum vel maxime, etc.» Et multo post: «quum hominis natura morte dissolvitur, ceterarum rerum perspicuum est, etc.» Sic Græci: τῶν ἄλλων πραγμάτων.

2. *Certi.* Sincera fide, cui fidere possis. Sic Verr. II: «homine certissimo». Sic: «amicus certus in re incerta cernitur».

3. *Non quo.* Occupatio, qua dum

laudare velle Nævium videtur, pungit acriter.

4. *Inhumanus.* Insuavis, injucundus. Vid. pro Planc. 14. Brut. 46.

5. *Præco.* Servi olim erant publici præcones; quorum minime liberalis habebatur quæstus. Notum illud Martialis, lib. V, epigr. 56, 10: «Si duri puer ingeni videtur, Præconem facito».

6. *In tua pecunia.* In aliena. Hoc enim ad quemvis generatim refertur. Pecuniæ vero fructus est lucrum quo familiaris res augetur.

7. *Pecuaria res.* Plurima posside-

bene culta et fructuosa. Tollitur ab atriis Liciniis⁸, atque a præconum consessu in Galliam Nævius, et trans Alpes usque transfertur. Fit magna mutatio loci, non ingenii. Nam, qui ab adolescentulo quæstum sibi instituisset sine impendio, posteaquam nescio quid impendit, et in commune contulit, mediocri quæstu contentus esse non poterat. Nec mirum, si is, qui vocem venalem habuerat, ea, quæ voce⁹ quæsierat, magno sibi quæstui fore putabat. Itaque hercule haud mediocriter de communi, quidquid poterat, ad se in privatam domum sevocabat: qua in re ita diligens¹⁰ erat, quasi ii, qui magna fide societatem gererent, arbitrium¹¹ pro socio condemnari solerent. Verum his de rebus non necesse habeo dicere ea, quæ me P. Quintius cupit commemorare: tametsi causa postulat, tamen, quia postulat¹², non flagitat, præteribo.

bant privati apud Romanos per Italiam et provincias pascua, aut coempta, vendentibus quæstoribus (Liv. XXVIII, 46); aut a publicanis locata, in quæ greges et armenta immittebant. Inde maximum ad remp. redibat vectigal, *scripturæ* nomine. Vid. Verr. II, 70. Font. 1, 2. Ad Attic. II, 15.

8. *Atriis Liciniis*. *Atrium* est area ante ædem porticibus et columnis cincta. *Licina* vero *atria* erant in Palatio monte, ante domum Licinii Crassi, quam postea emit Cicero. Huc conveniebant præcones auctionem facturi. Ceterum multa erant hujus modi Romæ *atria*, et circa forum et apud privatos; docetque Vitruvius, VI, 8: «privatis in domibus, communia fuisse vestibula, in quæ, etiam invocati, suo jure, de populo poterant venire». Hac scilicet ratione popularem gratiam aucupabantur civitatis principes.

9. *Voce*. Id est, qui voce rerum omnium levissima, opes aliquas comparaverat, easdem opes magno emolumento sibi nunc fore putabat.

10. *Diligens erat*. Nævius in fraudanda societate ita erat diligens, quasi furtum honesta res esset, qui vero societatem fideliter administrarent, condemnari solerent.

11. *Arbitrium* delend. censent Græv. Ernest. Schütz, frustra. *Arbitrium* enim *pro socio*, iudicium de societate esse, omnes intelligunt; et inde subauditis præp. *per* aut *secundum*, nihil aliud erit quam per arbitrium pro socio condemnari, aut arbitralem pati condemnationem. Quod hellenismi genus non sane mirum in forensi formula, et a vulgari sermonis usu remota.

12. *Postulat*. *Postulare*, est petere modeste; *flagitare* vero, petere instantius et vehementius.

IV. Quum annos jam complures societas esset, et quum sæpe suspectus Quintio Nævius fuisset, neque ita commode posset rationem reddere earum rerum, quas libidine, non ratione gesserat; moritur in Gallia Quintius, quum adesset Nævius, et moritur repentino¹. Heredem testamento reliquit hunc P. Quintium: ut, ad quem summus mœror morte sua veniebat, ad eundem summus honos² quoque perveniret. Quo mortuo, nec ita multo post, in Galliam proficiscitur Quintius. Ibi cum isto Nævio familiariter vivit. Annum fere una sunt, quum et de societate inter se multa communicarent, et de tota illa ratione atque re Gallicana: neque interea verbum ullum interposuit Nævius, aut societatem sibi quidpiam debere, aut privatim Quintium debuisse. Quum æris alieni aliquantulum esset relictum, quibus nominibus³ pecuniam Romæ curari oporteret; auctionem in Gallia P. hic Quintius Narbone se facturum esse proscribit earum rerum, quæ ipsius erant privatae. Ibi tum vir optimus, Sex. Nævius, hominem multis verbis deterret, ne auctionetur: eum non ita commode posse eo tempore, quæ proscripsisset, vendere; Romæ sibi nummorum facultatem esse, quam, si saperet⁴, communem existimaret, pro fraterna illa necessitudine, et pro ipsius affinitate: nam

IV. 1. *Moritur repentino.* Oblique et quasi aliud agens beneficii crimen Nævio affligit orator. Mira deinde arte narrationem pergit, diversaque congerit adjuncta, ut inde Nævii perfidia magis elucescat. — Nota morte C. Quintii omnino extinctam societatem, ac dissolutam.

2. *Summus honos.* Quamvis enim lege et jure agnationis heres esset P. Quintius, honestior tamen testamento ad eum veniebat hereditas:

illudque ita honori apud Romanos ducebatur, ut Ciceroni objecerit Antonius, hereditates ei nullas ab amicis venisse; quod contra Cicero defendit, amplius se H. S. ducenties (410,00 fr.) ex hereditatibus retulisse.

3. *Quibus nominibus.* Cujus æris alieni solvendi causa, Romæ erat conficienda pecunia. *Curare pecuniam* est curare, ut pecunia detur et solvatur.

4. *Si saperet.* Locutio qua objurgamus, ita ut objurgatio sit amoris index.

P. Quintii consobrinam habet in matrimonio Nævius, et ex ea liberos. Quia, quod virum bonum facere oportebat, id loquebatur Nævius; credidit Quintius, eum, qui orationem bonorum imitaretur, facta quoque imitaturum. Auctionem velle facere desistit: Romam profiscitur. Decedit ex Gallia Romam simul Nævius. Quum pecuniam C. Quintius P. Scapulæ debuisset; per te, C. Aquilli, decedit P. Quintius, quod liberis ejus dissolveret. Hoc eo per te agebatur, quod propter ærariam rationem⁵ non satis erat in tabulis inspexisse, quantum deberetur, nisi ad Castoris⁶ quæsisset, quantum solveretur. Decidis, statuisque tu, propter necessitudinem, quæ tibi cum Scapulis est, quid iis ad denarium⁷ solveretur.

V. Hæc omnia Quintius agebat, auctore et consuasore Nævio. Nec mirum, si ejus utebatur consilio, cujus auxilium sibi paratum putabat. Non modo enim pollicitus erat in Gallia; sed Romæ quotidie, simul atque sibi hic annuisset, numeraturum se dicebat. Quintius porro istum posse facere videbat; debere intelligebat; mentiri, quia causa, cur mentiretur, non erat, non putabat: quasi domi nummos haberet, ita constituit¹ Scapulis se daturum. Nævium certiore facit: rogat, ut curet, quod dixisset. Tum iste vir optimus (vereor, ne se derideri putet, quod iterum jam dico, optimus), qui hunc in summas angustias adductum

5. *Ærariam rationem*. Quia differbat pretium Romanæ pecuniæ qua solvendum erat, a pretio Gallicanæ quam C. Quintius a P. Scapula acceperat.

6. *Ad Castoris*. In MSS quibusd. «ad Cast. templum», e glossa. J. V. L. — Consulendi scilicet erant argentarii, qui prope Castoris templum tabernas habebant.

7. *Ad denarium*. Argenteus nummus est hic Romanam pecuniam, Gallicanæ oppositam significans. Vid. Gronov. de Pec. Vet. III, 10.

V. 1. *Constituit*. *Constituere*, subaud. *pecuniam*, est apud jurisconsultos certum diem statuere, quo debita creditori pecunia dissolvatur. Hinc jocus est Ciceronis ad Div. VII, 4: «Si quod constitutum habes cum po-

putaret; ut eum suis conditionibus² in ipso articulo temporis adstringeret, assem sese negat daturum, nisi prius de rebus rationibusque societatis omnibus decidisset; et scisset, sibi cum Quintio controversiæ nihil futurum. Posterius, inquit, ista videbimus, Quintius: nunc hoc velim cures, si tibi videtur, quod dixisti. Negat se alia ratione facturum, quod promississet: non plus sua referre, quam si, quum auctionem³ venderet, domini jussu⁴ quidpiam promississet. Destitutione illa percussus Quintius, a Scapulis paucos dies aufert⁵; in Galliam mittit, ut ea, quæ proscripserat, venirent; deteriore tempore absens auctionatur; Scapulis difficiliore conditione dissolvit. Tunc appellat ultro Nævium, ut, quoniam suspicaretur aliqua de re fore controversiam, videret, ut quam primum, et quam minima cum molestia tota res transigeretur. Dat iste⁶ amicum M. Trebellium: nos communem necessarium, qui istius domi erat educatus, et quo utebatur iste plurimum, propinquum nostrum, Sex. Alphenum. Res convenire nullo modo poterat: propterea quod hic mediocrem jacturam facere cupiebat; iste mediocri præda contentus non erat. Itaque ex eo tempore res esse in vadimonium⁷ coepit. Quum vadimonia sæpe dilata es-

dagra, fac ut in alium diem differas».

2. *Suis conditionibus.* I. e. quæ suis essent commodis opportuniæ.

3. *Auctionem venderet.* Mendosus multis videtur locus; et legitur *auctione* non merito. Præpositionis ellipsis est, ut apud Cæs. de Bell. Gall. II, 33, «*sectionem vendere*»; et apud nostrum, non semel, «*sponsionem vincere*». Vid. Indic. Latinit.

4. *Domini jussu.* Se non plus teneri erga Quintium promisso dicebat Nævius, quam tenebatur olim, si quum faceret auctionem, domini, i. e.

ejus qui bona vendi jubet, jussu quidpiam alicui addixisset. Carpit h. l. Nævium a vilissima præconis conditione, pejerandique facilitate.

5. *Aufert.* Ad conficiendam pecuniam obtinet.

6. *Dat iste.* Subaudi *arbitrum. Communem.* Nævii scilicet et Quintii necessarium. Quod bonam Quintii fidem demonstrat.

7. *Vadimonium.* Vetus lectio, pro *in vadimonio*. Sic Muren. «in potestate esse», et sæpius. Quum inter amicos res convenire non posset, tunc

sent, et quum aliquantum temporis in ea re esset consumptum, neque quidquam profectum⁸ esset; venit ad vadimonium Nævius.

VI. Obsecro te¹, C. Aquilli, vosque, qui adestis in consilio, ut diligenter attendatis, ut singulare genus fraudis et novam rationem insidiarum cognoscere possitis. Ait, se auctionatum esse in Gallia; quod sibi videretur, se vendidisse; curasse, ne quid sibi societas deberet; se jam neque vadari amplius, neque vadimonium promittere; si quid agere² secum velit Quintius, non recusare. Hic, quum rem Gallicanam cuperet revisere, hominem in præsentia non vadatur: ita sine vadimonio disceditur. Deinde Romæ dies xxx fere Quintius commoratur: cum ceteris, quæ habebat, vadimonia differt, ut expeditus in Galliam proficisci posset: proficiscitur. Roma egreditur ante diem ii kal.³ februarii, Scipione et Norbano coss. Quæso, ut eum diem⁴ memoriæ mandetis. L. Albius, Sex. filius, Quirina⁵, vir bonus, et cum primis honestus, una profectus est. Quum venissent ad Vada Volaterrana⁶ quæ nominantur, vident perfamiliarem Nævii, qui ex Gallia pueros venales isti adducebat, L. Publicium; qui ut Romam venit, narrat Nævio, quo in loco viderit Quintium: quod nisi ex Publicio narratum Nævio esset, non

duæ spondebant partes se die præstituta ad prætoris tribunal ituras. Quæ sponsio *vadimonium* vocabatur. Vid. ad calcem hujus vol. Append. de ord. exerc. jud. § de Sponsione.

8. Olim *perfectum*. Correxerit Græv. e codd. J. V. L.

VI. 1. Addimus *te* post Olivetum, qui e MSS addiderat. J. V. L.

2. *Si quid agere*. Si hanc suam a lite discessionem Quintius velit iudicis sententia confirmari, paratum se esse.

3. *II kalend.* i. e. pridie kal. ut est inf. 18. Sic Hotoman. Lamb. Ernest. Vulgo *IV kalend.* — Anno Urb. 670.

4. *Eum diem*. Quia factum Nævius vadimonium dicebat fuisse nonis febr. Vid. cap. 18.

5. *Quirina*. Sabaud. *ex tribu*. Locutio veteribus familiaris.

6. *Vada Volaterrana* in via Aurelia, a Liburno XVIII millibus distantia. Volaterranus ager in Etruria, mari minime profundo, in vadi morem alluitur.

tam cito res in contentionem venisset. Tum Nævius pueros circum amicos dimittit⁷; ipse suos necesarios⁸ ab atriis Liciniis et a faucibus macelli corrogat, ut ad tabulam Sextiam⁹ sibi adsint hora secunda postridie. Veniunt frequentes : testificatur iste, P. QUINTIUM NON STITISSE, ET SE STITISSE. Tabulæ maximæ signis hominum nobilium¹⁰ consignantur : disceditur. Postulat a Burrhieno prætore Nævius, ut ex edicto¹¹ bona possidere liceat. Jussit bona proscribi ejus, quicum familiaritas fuerat, societas erat, affinitas, liberis istius vivis, divelli nullo modo poterat. Qua ex re intelligi facile potuit, nullum esse officium tam sanctum atque solemne, quod non avaritia comminuere atque violare soleat. Etenim si veritate, amicitia, fide societas, pietate propinquitas colitur; necesse est, iste, qui amicum, socium, affinem, fama ac fortunis spoliare conatus est, vanum se, et perfidiosum, et impium esse fateatur. Libellos¹² Sex. Alphenus, procurator P. Quintii, familiaris et propinquus Sex. Nævii, dejicit; servulum unum, quem iste prehenderat, abducit; denuntiat, sese procuratorem esse; istum, æquum esse, famæ fortunisque P. Quintii consulere, et adventum ejus expectare; quod si facere nolit, atque imbiberit ejusmodi rationibus illum ad suas condiciones perducere, sese

7. Grævius e vestigiis librorum coniciebat, «quod ubi ex Publicio cognovit, pueros circum amicos dimittit». Non aliter Schütz edidit. J.V.L.

8. *Necessarios*. Præcones scilicet, veteres Nævii collegas.

9. *Tabulam Sextiam*. Sextius sane unus erat ex argentariis, quorum multo latius patebant munera quam apud nos. Illi scilicet tabulas (gall. *actes*) coniciebant, auctionibus præerant, deserta vadimonia testabantur.

10. *Nobilium*. Ironia. Istos designat nebulones, quos ab introitu macelli Nævius corrogat.

11. *Ex edicto*. Secundum id quod Burrhiennus edixerat; nempe se in eorum qui vadimonium deseruissent, bona missurum esse, ita ut si dies triginta possessa essent, auctione deinde venderentur, et ipsis creditoribus addicerentur. De *edicto* vide ad calcem Verrin. I, de Præt. Urb.

12. *Libellos*. Proscriptionis.

nihil precari; et, si quid agere velit, iudicio defendere. Hæc dum Romæ geruntur, Quintius interea contra jus¹³, consuetudinem, edicta prætorum¹⁴, de saltu¹⁵ agroque communi a servis communibus vi detruditur.

VII. Existima, C. Aquilli, modo et ratione omnia Romæ Nævium fecisse, si hoc, quod per literas istius in Gallia gestum est, recte atque ordine factum videtur. Expulsus atque ejectus e prædio Quintius, accepta insigni injuria, confugit ad C. Flaccum¹ imperatorem, qui tum erat in provincia: quem, ut ipsius dignitas poscit, honoris gratia nomino. Is eam rem quam vehementer vindicandam putarit, ex decretis ejus poteritis cognoscere. Alphenus interea Romæ cum isto gladiatore² vetulo³ quotidie pugnabat: utebatur⁴ populo sane suo, propterea quod iste caput petere⁵ non desinebat. Iste⁶ postulabat, ut procurator judicatum solvi satisdaret⁷. Negat Alphenus, æquum esse, pro-

13. *Contra jus.* Nam neque desertum vadimonium fuerat, neque reus latitavit; quippe qui procuratorem Alphenum reliquisset.

14. *Edicta prætorum.* Nam prætores non dant possessionem, nisi quum reus absens iudicio non defenditur.

15. *Salto.* Saltus dicitur locus pascuus, silvosus et inaratus; ad rem pecuariam pertinet, ut ager ad arationem.

VII. 1. *C. Flaccum.* Is ex prætura Galliam Narbonensem sortitus obtinebat, et, ut ex *imperatoris* nomine apparet, victoriam aliquam reportaverat.

2. *Gladiatore, i. e. Nævio.* Gladiatoris nomen ad improbos homines transferre solet Tullius. Sic pro Rosc. Amer. 6.

3. *Vetulo.* Veteratore, fraudibus assueto.

4. *Utebatur.* Populus Alpheni favebat, quod eum infensiori odio persequeretur Nævius.

5. *Caput petere.* A gladiatore ducta similitudo occidendi adversarii nimis cupido, quem propter hoc odit populus generose virtutis amans.

6. Sic e MSS et edd. Lamb. Græv. Ernest. Alii, *postulat.* J. V. L.

7. *Satisdaret.* Sensus est: Postulabat Nævius, ut Alphenus daret fidejussores locupletes, qui suo periculo præstarent tantum solum iri, quantum, iudicio facto, solvi oporteret, si Quintius damnaretur. Hæc est satisfactio, quæ dicitur *judicatum solvi*. In actionibus enim personalibus actor nullam satisfactionem dare cogebatur; neque reus, si proprio nomine in iudicio sisteret; cogebatur autem satisfacere, si per procuratorem in iudicio sisteret.

curatorem satisfacere, quod reus satisfacere non deberet, si ipse adesset. Appellantur tribuni⁸ : a quibus quum esset tum auxilium petatum, ita tamen disceditur, ut idibus septembribus P. Quintium sisti Sex. Alphenus promitteret.

VIII. Venit Romam Quintius; vadimonium sistit. Iste, homo acerrimus, bonorum possessor, expulsor, ereptor, annum et sex menses nihil petit; quiescit; conditionibus¹ hunc, quoad potest, producit; a Cn. Dolabella² denique prætor postulat, ut sibi Quintius iudicatum solvi satisfaciat, ex formula, QUOD AB EO PETAT³, quoniam ejus⁴, ex edicto prætoris, bona dies xxx possessa sint. Non recusabat Quintius, quin ita satisfacere⁵ juberet⁶, si bona possessa essent ex edicto. Decernit: quam æquum, nihil dico: unum hoc dico, novum; et hoc ipsum tacuisse mallet, quoniam utrumque quivis intelligere potuisset. Jubet P. Quintium aut satisfacere, aut⁷ sponsionem cum Sex. Nævio facere: SI BONA⁸ SUA EX EDICTO P. BURRHII PRÆTORIS DIES XXX POSSESSA ESSENT. Recusabant, qui aderant tum Quintio: de-

8. *Tribuni.* Hæc ante Sullæ dominationem agebantur, qui tribunis illud intercedendi jus abstulit. De tribunorum potestate vide Cic. de Leg. III, § 9.

VIII. 1. *Conditionibus.* Quas per simulationem transactionis Quintio deferrebat. *Hunc producit*, i. e. rem protrahit.

2. *Cn. Dolabella.* Nimirum nactus eum, a quo ea quæ postulabat, iniqua licet, impetraret. Porro iste Dolabella ex prætura postea Ciliciam avare administravit, et a M. Scauro accusatus repetundarum damnatus est. Vid. Verr. I, 17, 39.

3. *Quod ab eo petat.* Prima sunt verba formulæ, seu capituli, ex edicto

prætoris, in quo ita erat: « Quod ab eo petetur, cujus, ex edicto prætoris Romani, bona dies triginta possessa erunt, ejus rei nomine iudicatum solvi satisfacere jubebo ».

4. *Alii, cujus.* J. V. L.

5. *Ita satisfacere.* Quia, hac exceptione apposita, non confitebatur Quintius possessa esse bona sua, et deserti vadimonii non subibat infamiam.

6. *Juberet.* Ipsum Quintium prætor. Græv. ex MS recepit *juberetur*. Sic etiam Garat.

7. *Multi abesse jubent aut satisfacere, aut.* Invenit Lambin. in MSS. J. V. L.

8. *SI BONA.* Jubetur Quintius spon-

monstrabant, de re⁹ iudicium fieri oportere, ut aut uterque inter se, aut neuter satisfaceret; non necesse esse famam alterius in iudicium venire. Clamabat porro ipse Quintius, sese idcirco nolle satisfacere, ne videretur iudicasse, bona sua ex edicto possessa esse; sponsonem porro si istiusmodi faceret, se, id quod nunc evenit, de capite suo¹⁰ priore loco causam esse dicturum. Dolabella (quemadmodum solent homines nobiles: seu recte, seu perperam facere cœperunt, ita in utroque excellunt, ut nemo nostro loco natus assequi possit¹¹), injuriam facere fortissime perseverat: aut satisfacere, aut sponsonem jubet facere; et interea recusantes nostros advocatos acerrime submoveri.

IX. Conturbatus sane discedit Quintius: neque mirum, cui hæc optio tam misera, tamque iniqua daretur, ut aut ipse se capitis damnaret, si satisfaceret; aut causam capitis, si sponsonem fecisset, priore loco diceret. Quum in altera re causæ nihil esset, quin secus iudicaret¹ ipse de se, quod iudicium gravissimum est; in altera² spes esset ad talem tamen virum, iudicem, veniendi, unde eo plus opis auferret, quo minus attulisset gratiæ, sponsonem facere maluit: fecit. Te iudicem, C. Aquilli, sumpsit³: ex sponso⁴ egit. In hoc summa iudicii, causaque tota consistit. Iudicium esse, C. Aquilli,

dere, se, si iudicatum fuerit bona sua possessa esse, certam pecuniæ summam soluturum.

9. *De re.* Dicebant amici Quintii ante omnia quæri oportere, an Nævio deberetur ex societate pecunia.

10. *Capite suo.* Nempe si lite decideret Quintius, infamis erat et *capite deminutus*. Vid. sup. 2.—*Priore loco.* Nam qui sponsonem provocat, is actoris partes obtinet.

11. Alii, *possêt*. J. V. L.

IX. 1. *Quin secus iudicaret.* I. e. quin desertum a se vadimonium esse fateretur. *Secus* minus recte, minus vere.

2. *In altera.* Si sponsonem faceret.

3. *Sumpsit.* Actori liberum erat ferre iudicem adversario; et si de eo convenisset, a prætore is dabatur cum iudicandi potestate.

4. *Passerat.* et Manut. malebant *ex sponso*. J. V. L. — Sponsonem fecit cum Nævio.

non de re pecuniaria, sed de fama fortunisque P. Quintii vides. Quum majores ita constituerint, ut qui pro capite diceret, is posteriore loco diceret; nos, inaudita criminatione accusatorum, priore loco causam dicere intelligis; eos porro, qui defendere consuerunt, vides accusare, et ea ingenia converti ad perniciem, quæ antea versabantur in salute atque auxilio ferendo. Illud etiam restiterat⁵, quod hesterno die fecerunt, ut te in jus adducerent, ut nobis tempus, quam diu diceremus, præstitueres: quam rem facile a prætore impetrassent, nisi tu, quod esset tuum jus, et officium, partesque, docuisses. Neque nobis adhuc, præter te, quisquam fuit, ubi nostrum jus contra illos obtineremus; neque illis umquam satis fuit illud obtinere, quod probari omnibus posset: ita sine injuria⁶ potentiam levem atque inopem esse arbitrantur.

X. Verum quoniam tibi instat Hortensius, ut eas in consilium¹; a me postulat, ne dicendo tempus assumam; queritur, priore patrono² causam defendente, numquam perorari potuisse³: non patiar, istam manere suspicionem, nos rem judicari nolle; nec illud mihi arrogabo, me posse causam commodius demonstrare, quam antea demonstrata sit: neque tamen tam multa verba faciam; propterea quod et ab illo, qui ante dixit,

5. *Restiterat*. Superfuerat ad nostras injurias cumulandas. — *In jus*. Ad prætorem.

6. *Sine injuria*. Non magna contenti sunt potentia, nisi eam injuria comitetur.

X. 1. *Eas in consilium*. Ut causa peroretur; qua utrimque perorata, judex ibat in consilium cum assessoribus. Si vero longior videretur orator, in privatis judiciis, poterat illi

judex silentium imponere, et sententiam dicere.

2. *Priore patrono*. M. Junio.

3. *Numquam perorari potuisse*. In causis ex sponsione oportebat ut actor et reus eodem die perorarent; tum judex pronuntiabat: alioquin dimittebatur judicium. Quum autem suspicaretur Hortensius diffisum causæ suæ M. Junium rem dicendo protraxisse; ne eadem arte Tullius eluderet

informata⁴ jam causa est, et a me, qui neque excogitare, neque pronuntiare multa possum, brevis postulatur, quæ mihi met ipsi amicissima est. Faciam, quod te sæpe animadverti facere, Hortensi : totam causæ meæ dictionem certas in partes dividam. Tu id⁵ semper facis, quia semper potes : ego in hac causa faciam, propterea quod in hac videor posse facere. Quod tibi natura dat, ut semper possis, id mihi causa concedit, ut hodie possim. Certos mihi fines terminosque constituam, extra quos egredi non possim⁶, si maxime velim : ut et mihi sit propositum, de quo dicam ; et Hortensius habeat exposita, ad quæ respondeat ; et tu, C. Aquilli, jam ante animo prospicere possis, quibus de rebus auditurus sis.

Negamus, te bona P. Quintii, Sex. Nævi, possedissee ex edicto prætoris. In eo sponsio facta est. Ostendam primum, causam non fuisse, cur a prætore postulares, ut bona P. Quintii possideres ; deinde ex edicto te possidere non potuisse ; postremo, non possedissee. Quæso, C. Aquilli, vosque, qui estis in consilio, ut, quid pollicitus sim, diligenter memoriæ mandetis. Etenim rem facilius totam accipietis, si hæc memineritis ; et me facile vestra existimatione⁷ revocabitis, si extra hos cancellos⁸ egredi conabor, quos mihi ipse circumdedi. Nego fuisse causam, cur postulet ; nego ex edicto possidere potuisse ; nego possedissee : hæc tria quum docuero, perorabo.

judicium, instabat ut Aquillius iret in consilium.

4. *Informata*. Alia ex parte demonstrata. Translatum a pictura, quum post adumbrationem quasdam formas inducimus.

5. *Tu id*. Hæc, usque ad *facere*, spuria Schützio. J. V. L. — Nimius fuit in partienda oratione Hortensius ;

quare hic eum, ut sæpe alias, irridet Cicero. Vide Quintilianum lib. IV, cap. 5.

6. *Vulg. possum*. J. V. L.

7. *Vestra existimatione*. Et dum verebor ne, si, aliter atque promisi, rem tractavero, male de me existimetis, metus ille me facile revocabit.

8. *Cancellos*. Metaphora sumpta de

XI. Non fuit causa, cur postulares. Qui hoc intelligi potest? Quia Sex. Nævio, neque ex societatis ratione, neque privatim quidquam debuit Quintius. Quis huic rei testis est? Idem, qui acerrimus adversarius. In hac re te, te, inquam, testem, Nævi, citabo. Annum, et eo diutius, post mortem C. Quintii fuit in Gallia tecum simul Quintius: doce, te petiisse ab eo istam, nescio quam, innumerabilem pecuniam; doce, aliquando mentionem fecisse; dixisse deberi: debuisse concedam. Moritur C. Quintius, qui tibi, ut ais, certis¹ nominibus grandem pecuniam debuit: heres ejus P. Quintius in Galliam ad te ipsum venit in agrum communem; eo denique, ubi non modo res erat, sed ratio quoque omnis, et omnes literæ². Quis tam dissolutus in re familiaris fuisset, quis tam negligens, quis tam tui, Sexte, dissimilis, qui, quum res ab eo, quicum³ contraxisset, recessisset, et ad heredem pervenisset, non heredem, quum primum vidisset, certiore faceret? appellaret? rationem afferret? si quid in controversiam veniret, aut intra parietes⁴, aut summo jure experiretur⁵? Itane⁶? quod viri optimi faciunt, ii, qui suos propinquos ac necessarios caros et honestos esse atque haberi volunt; id Sex. Nævius non faceret, qui usque eo fervet fertur-

foro judiciali, quod cancellis clausum erat.

XI. 1. Certis nominibus. Non dubitandis capitibus, et rebus in tabulis inscriptis. Vid. Benth. ad Horat. Epist. II, 1, 105.

2. Literæ. Tabulæ (gall. *les registres, les écritures*).

3. Hotom. Lambin. e MSS. Olim «qui contraxisset». J. V. L.

4. Intra parietes. Privata disceptatione et honorata amici opera.

5. Experiretur. Experiri, idem apud

jurisconsultos ac «lege agere, judicio persequi». *Summo jure experiri* dicitur is qui, quam strictissimo jure, quam durissime cum adversario contendit.

6. Sic MS Mureti, quemadmodum testatur ipse, Var. Lect. XVI, 19. Antea vulgo editum, «Itane est». J. V. L. — Argumentatur a minori, hoc sensu: Viri minime avari appellant propinquos suos, quos caros habent, si pecuniam sibi ab eis deberi putant; et Nævius, etc.

que avaritia, ut de suis commodis aliquam partem nolit amittere, ne quam partem huic propinquo suo ullius ornamentum relinquat? Et is? pecuniam, si qua deberetur, non peteret, qui, quia, quod debitum nunquam est, id datum non est, non pecuniam modo, verum etiam hominis propinqui sanguinem vitamque eripere conatur? Huic tu molestus esse videlicet noluisti, quem nunc respirare libere non sinis? quem nunc interficere nefarie cupis, eum tu pudenter appellare nolebas? Ita credo: hominem propinquum, tui observantem, virum bonum, prudentem, majorem natu⁸, nolebas, aut non audebas appellare. Sæpe, ut fit, quum ipse te confirmasses, quum statuisses de pecunia mentionem facere, quum paratus meditatusque venisses; homo timidus, virginali verecundia, subito ipse te retinebas; excidebat repente oratio; quum cuperes appellare, non audebas, ne invitus audiret: id erat profecto.

XII. Credamus hoc, Sex. Nævium, cujus caput¹ oppugnet, ejus auribus pepercisse. Si debuisset, Sexte, petisses statim; si non statim, paullo quidem post; si non paullo, at aliquanto; sex quidem illis mensibus profecto; anno vertente² sine controversia. Anno et sex mensibus vero, quum tibi quotidie potestas hominis fuisset admonendi, verbum nullum facis: biennio jam confecto fere, appellas. Quis tam perditus ac profusus nepos, non adesa jam, sed abundanti etiam pecunia, sic dissolutus³ fuisset, ut fuit Sex. Nævius?

7. *Et is.* Epiphonemate concludit nullam Nævio pecuniam deberi. Sic apud Virg. *Æn.* I, 57; VI, 807.

8. *Natu.* Annos natum sexaginta, cap. 31.

XII. 1. *Caput.* Affectata antithesis, qua figurate *caput*, proprie vero au-

res sumuntur; quasi dicat: Noluisti ejus aures obtundere, cujus existimationi et fortunis non parcis!

2. *Vertente*, i. e. absoluto, post Caii Quintii mortem.

3. *Dissolutus.* Vestibus ad talos fluentibus Romani olim utebantur,

Quum hominem nomino, satis mihi videor dicere. Debuit tibi C. Quintius : numquam petisti. Mortuus est ille; res ad heredem venit : quum eum quotidie videres, post biennium denique appellas. Dubitabitur, utrum sit probabilius, Sex. Nævium statim, si quid deberetur, petiturum fuisse; an, ne appellaturum quidem biennio? Appellandi tempus non erat? At tecum plus annum⁴ vixit. In Gallia agi non potuit? At et in provincia jus dicebatur; et Romæ judicia fiebant. Restat, ut aut summa negligentia tibi obstiterit, aut unica⁵ liberalitas. Si negligentiam dices, mirabimur; si bonitatem, ridebimus. Neque præterea quid possis dicere, invenio. Satis est argumenti, nihil esse debitum Nævio, quod tam diu nihil petivit.

XIII. Quid si hoc ipsum, quod nunc facit, ostendo testimonio esse, nihil deberi? Quid enim nunc agit Sex. Nævius? qua de re controversia est? quod est hoc iudicium, in quo jam biennium versamur? quid negotii geritur, in quo ille tot et tales viros¹ defatigat? Pecuniam petit. Nunc denique? Verumtamen petit² : audiamus. De rationibus et controversiis societatis vult dijudicari. Sero; verum aliquando tamen : concedamus. Non, inquit, id ago, C. Aquilli, neque in eo nunc laboro : pecunia mea tot annos utitur P. Quintius : utatur sane : non peto. Quid igitur pugnas? an, quod sæpe multis in locis dixisti, ne in civitate sit; ne locum³ suum, quem adhuc honestissime defendit,

quas zonis, ubi quid agendum esset, ad genus reducebant: quo ex more strenuos et efficaces homines «cinctutos, præcinctos, alte cinctos»; inertes vero, luxuria diffuentes, *discinctos* et *dissolutos* appellaverunt. Sic ap. Hor. Epod. I, 34, «discinctus nepos».

4. Hæc est vera lectio ed. Wald. Alise,

ut Romana, dederunt anno. J. V. L.
5. *Unica*. Singularis.

XIII. 1. *Tales viros*. Tum iudicem et assessores, tum potentes viros qui Nævio præsentibus patrocinabantur.

2. Aliquot MSS et edd. antiquæ, *petat*. J. V. L.

3. *Locum*. Ne ordinem equestrem,

obtineat? ne numeretur inter vivos⁴? decernat de vita et ornamentis suis omnibus? apud judicem causam priore loco dicat; et, eam quum orarit⁵, tum denique vocem accusatoris audiat? Quid? hoc quo pertinet? ut ocyus ad tuum pervenias? At, si id velles, jampridem actum esse poterat. Ut honestiore⁶ judicio conflictare? At sine summo scelere P. Quintium, propinquum tuum, jugulare non potes. Ut facilius judicium sit? At neque C. Aquilius de capite alterius libenter judicat, et Q. Hortensius contra caput non didicit dicere. Quid a nobis autem, C. Aquilli, refertur? Pecuniam petit; negamus deberi: judicium fiat statim; non recusamus. Numquid præterea? si veretur⁷, ut res, judicio facto, parata sit; judicatum solvi satis accipiat: quibus a me verbis satis accipiet, iisdem ipse, quod peto⁸, satsidet. Actum jam potest esse, C. Aquilli: jam tu potes discedere liberatus molestia, prope dicam, non minore, quam Quintius. Quid agimus, Hortensi? quid de hac conditione dicimus? possumus aliquando, depositis armis, sine periculo fortunarum, de re pecuniaria disceptare? possumus ita rem nostram persequi, ut hominis propinqui caput incolume esse patiamur? possumus petitoris⁹ personam capere, accusatoris de-

quem satis amplis rei familiaris copiis adhuc tuetur, retineat et conservet.

4. *Inter vivos*. Hinc quum quis, amissa civitate, in eam restitueretur, *renasci* dicebatur, et dies ejus restitutionis *dies natalis* appellabatur. Sic Cic. ad Att. VI, 6.

5. Hotomannus et Lambinus conjiciunt, «eam quum perorarit». J. V. L.

6. *Honestiore*. Honestiores partes specie agebat Nævius, qui desertum vadimonium a debitore querebatur; odiosiores re ipsa, qui socium, fami-

liarem, propinquum tam atrociter impugnabat.

7. *Si veretur*. Si metuit ne, judicio facto, pecunia parata non sit a Quintio, dabimus fidejussores, qui promittant Nævio solum iri quod fuerit judicatum. Eadem vero se obstringat formula satisfactionis Nævius, quam nosmetipsi.

8. P. Sylvius malit legere, «si quid peto». J. V. L.

9. *Petitoris*. Qui in publico judicio *accusator*, in privato *petitor* dicebatur.

ponere? Imo, inquit, abs te satis accipiam; ego autem tibi non satisdabo.

XIV. Quis tandem nobis ista jura tam æqua¹ describit? quis hoc statuit, quod æquum sit in Quintium, id iniquum esse in Nævium? Quintii bona, inquit, ex edicto prætoris possessa sunt. Ergo, id ut confitear, postulas; ut, quod numquam factum esse judicio defendimus, id, proinde, quasi factum sit, nostro judicio confirmemus. Inveniri² ratio, C. Aquilli, non potest, ut ad suum quisque quam primum sine cujusquam dedecore, infamia, perniciæque perveniat? Profecto, si quid deberetur, peteret: non omnia³ judicia fieri mallet, quam unum illud, unde hæc omnia nascuntur. Qui inter tot annos⁴ ne appellarit quidem Quintium, quum potestas esset agendi quotidie; qui, quo tempore primum male agere⁵ cœpit, in vadimoniis differendis tempus omne consumpserit; qui postea⁶ vadimonium quoque missum fecerit, hunc per insidias vi de agro communi dejecerit; qui, quum de re agendi, nullo recusante, potestas fuisset, sponsionem de probro facere maluerit; qui, quum revocetur ad id iudicium, unde hæc nata sunt omnia, conditionem æquissimam⁷ repudiet; fateatur, se non pecuniam, sed vitam et sanguinem petere. Is non hoc palam dicit? mihi si quid deberetur, peterem, atque adeo

XIV. 1. *Jura tam æqua*. Ironice.

2. *Inveniri*. Lamb. conjicit *Iniri*. J.V. L.

3. *Omnia judicia*. De vadimonio deserto, de satisfactione. — *Illud*. De re pecuniaria.

4. Facciolat. conj. «inter duo annos», vel «integro anno». Sed frustra turbare monet Gœrenz. ad Acad. I, 7. J.V. L.

5. *Male agere*. Formula male con-

cepta uti. Nævius, ubi intellexit, se causa apud prætorem casurum, si ita ageret, vadimonium distulit. Male agit, inquit Cicero in Partit. qui plus petit, qui sero petit, qui non hac lege, hoc iudicio, his verbis quibus petere oportet, petit, etc. Cf. infr. 31.

6. In cod. Oxon. additur *quam*. Idem suadebat Manut. et Lamb.

7. *Æquissimam*. Ut aut uterque, aut neuter satietet.

jampridem abstulissem; nihil hoc tanto negotio, nihil tam invidioso iudicio, nihil tam copiosa advocacione uterer, si petendum esset; extorquendum est invito atque ingratis; quod non debet, eripiendum atque exprimendum est; de fortunis omnibus P. Quintius deturbandus est; potentes, disertī, nobiles omnes advocandi sunt; adhibenda vis est veritati; minæ jactentur; pericula intendantur; formidines opponantur, ut iis rebus aliquando victus et perterritus ipse cedat. Quæ me hercule omnia, quum, qui contra pugnent, video, et quum illum consessum⁸ considero, adesse atque impendere videntur, neque vitari ullo modo posse: quum autem ad te, C. Aquilli, oculos animumque retuli; quo majore conatu studioque aguntur, eo leviora⁹ infirmioraque existimo.

Nihil igitur debuit, ut tu ipse prædicas. Quid si debuisset? continuone causa fuisset, cur a prætore postulares, ut bona possideres? Non opinor id quidem neque¹⁰ jus esse, neque cuiquam expedire. Quid igitur demonstrat? Vadimonium sibi ait esse desertum.

XV. Antequam doceo id factum non esse, libet mihi, C. Aquilli, ex officii ratione, atque ex omnium consuetudine, rem ipsam et factum simul Sex. Nævii considerare. Ad vadimonium non venerat, ut ais, is, quicum tibi affinitas, societas, omnes denique causæ et necessitudines veteres intercedebant: illicone ad prætorem ire convenit? continuone verum fuit postulare, ut ex edicto bona possidere liceret? Ad hæc extrema et inimicissima jura tam cupide decurrebas, uti tibi nihil in posterum, quod gravius atque crudelius facere posses, reservares? Nam quid homini potest turpius, quid

8. *Consessum*. Illos Nævii tot advocatos.

erit præsidio solitudini et inopiæ adversus vim et potentiam.

9. *Eo leviora*. Eo enim magis iudex

10. *Non opinor...neque*. Nota duas

viro¹ miserius aut acerbius usu venire? quod tantum evenire dedecus, quæ tanta calamitas inveniri potest? Pecuniam si cuipiam fortuna ademit, aut si alicujus eripuit injuria; tamen, dum existimatio est integra, facile consolatur honestas egestatem. At non nemo aut ignominia affectus, aut judicio turpi² convictus, bonis quidem suis utitur; alterius opes, id quod miserrimum est, non exspectat: hoc tamen in miseriis adjumento et solatio sublevatur. Cujus vero bona venierunt; cujus non modo illæ amplissimæ fortunæ, sed etiam victus vestitusque necessarius sub præcone cum dedecore subjectus est; is non modo ex numero vivorum exturbatur, sed, si fieri potest, infra etiam mortuos amandatur. Etenim³ mors honesta sæpe vitam quoque turpem exornat: vita turpis ne morti quidem honestæ locum relinquit. Ergo hercule, cujus bona ex edicto possidentur, hujus omnis fama et existimatio cum bonis simul possidetur: de quo libelli in celeberrimis locis proponuntur, huic ne perire quidem [certe] tacite obs-

negantes, quæ magis negant Græcorum more.

XV. 1. *Viro*. Distinguit ab homine virum. Turpe quidem est omnibus, inquit, existimationem amittere; ei vero qui sit inter homines vir, i. e. magno et excelso animo præditus, miserrimum et acerbissimum est.

2. *Judicio turpi*. Judicium turpe illud appellatur, in quo per sententiam damnati infamia notantur: v. g. in actione furti, vi bonorum raptorum, pro socio, et in aliis casibus quos videas in Inst. Justin. IV, 16, 2. Totius hujus intricati loci sensus est: Aliquis ex divite pauper factus est; grave hoc quidem: verumtamen, dum existimatio et fama salva est, habet unde egestatem suam consoletur.

Alius est, qui ignominia affectus, bona tamen servavit; non opus habet, ut vivat, aliena commiseratione: hoc illi in calamitate solatio est: «hic enim, ut ait Juvenal. Sat. 1, 47, damnatus inani Judicio, (quid enim salvus infamia nummis?) Exsul ab octava Marius bibit, et fruitur Dis iratis».

3. Sch. conjicit: «Etenim... vitam quoque miseram exornat: vita turpis et misera». Facciolatus feliciter, «vita ita turpis...». J. V. L. — Locus ambiguus, et antithesi magis quam sano judicio subnixus, cujus primum membrum generatim de vita quavis turpitudine deformata accipitur; alterum autem membrum ad eum solum refertur, qui probri judicio, vel innocens, est damnatus. Sensus est: Tur-

cureque conceditur : cui magistri⁴ fiunt, et domini constituuntur, qui, qua lege et qua conditione pereat, pronuntient; de quo homine præconis vox prædicat⁵, et pretium conficit; huic acerbissimum vivo videntique funus ducitur⁶; si funus id habendum sit, quo non amici conveniunt ad exsequias cohonestandas, sed bonorum emptores, ut carnifices⁷, ad reliquias vitæ lacerandas et distrahendas.

XVI. Itaque majores nostri raro id accidere voluerunt; prætores, ut considerate fieret, comparaverunt¹. Viri boni, quum palam fraudantur, quum experiundi potestas non est, timide tamen et pedetentim istuc descendunt, vi ac necessitate coacti, inviti, multis vadimoniis desertis, sæpe illusi ac destituti. Considerant enim, quid et quantum sit, alterius bona proscribere. Jugulare civem ne jure quidem quisquam bonus vult: mavult enim commemorare, se, quum posset perdere, pepercisse, quam, quum parcere potuerit, perdidisse. Hæc in homines alienissimos, denique inimicissimos, viri boni faciunt, et hominum existimationis, et communis humanitatis causa: ut, quum ipsi nihil alteri scientes incommodarint, nihil ipsis jure incommodi cadere possit. Ad vadimonium non venit. Quis? Pro-

piter acta vita honestæ mortis lande tegi potest; sed homini probri damnato ne illa quidem recuperandæ famæ ratio superest; quum moriatur quodam modo ante mortem. Ceterum quid de isto juvenili et ambitioso dicendi genere Cicero ipse sentiat, vid. in Orat.

4. *Magistri*. Sic dicebantur, qui bonis debitorum publice vendendis præerant, auctoritate prætoris (gall. *syndic des créanciers*). Domini autem creditores erant, qui bona vendi jubebant.

5. *Prædicat*. Cujus hominis nomen pronuntiat, et ejus ex bonis in auctione venditis confectam pecuniæ summam publice recitat.

6. *Indicitur* apud Grut. e quibusd. edd. et MSS. J. V. l. Male.

7. *Carnifices*. Videtur orator toto hoc loco ad veterem illum morem respicere, quo ex XII tabb. legibus licebat creditoribus debitorem, qui solvendo non erat, secare, et ejus membra inter se parti. Vid. A. Gell. XX, 1.

XVI. 1. *Comparaverunt*. Edictis constituerunt.

pinquus. Si res ista gravissima sua sponte videretur, tamen ejus atrocitas necessitudinis nomine levaretur.

Ad vadimonium non venit. Quis? Socius. Etiam gravius aliquid ei deberes concedere, quicum te aut voluntas congregasset, aut fortuna conjunxisset. Ad vadimonium non venit. Quis? Is, qui tibi præsto semper fuit. Ergo in eum, qui semel hoc commisit, ut tibi præsto non esset, omnia tela conjecisti, quæ parata sunt in eos, qui permulta male² agendi causa fraudandique fecerunt? Si dupondius³ tuus ageretur, Sex. Nævi, si in parvula re captionis aliquid vererere, non statim ad C. Aquillium, aut ad eorum aliquem, qui consuluntur, concurrisses? Quum jus amicitiae, societatis, affinitatis ageretur; quum officii rationem atque existimationis duci conveniret; eo tempore tu non modo ad C. Aquillium, aut L. Lucillum, sed ne⁴ ipsum⁵ quidem ad te retulisti? ne hæc quidem tecum loquutus es⁶? Horæ duæ⁷ fuerunt; Quintius ad vadimonium non venit: quid ago? Si mehercule hæc tecum duo verba fecisses, Quid ago? respirasset cupiditas atque avaritia paullulum; aliquid loci rationi et consilio dedisses; tu te collegisses⁸; non in eam turpitudinem venisses, ut hoc tibi esset apud tales viros confitendum, qua tibi vadimonium non sit obitum, eadem te hora consilium cepisse⁹, hominis propinqui fortunas funditus evertere.

2. Male agendi causa. Mala fide.

3. Dupondius. Duo asses. Vid. Numm. Tabul. nostri Liv. vol. XII, p. 113. — Tuus. Nempæ præconum, et olim Nævii merces. — Alii, unus.

4. Addebatur olim, «sed ne ipse quidem te consuluit», quod glossema est. At potuit servari «ne ipse quidem». J. V. L.

5. Alii, ipse. J. V. L.

6. Alii, «es. Horæ», sine interrogatione. J. V. L.

7. Horæ duæ. Secunda hora est elapsa, ex qua Quintium exspecto.

8. Te collegisses. A cupiditate ad rationem fuisses revocatus.

9. Consilium cepisse. Nota voces has cum infinitivo evertere conjunctas. Vid. Macrob. de differ. Gr. Lat. verb. p. 639, ed. Gronov.

XVII. Ego pro te nunc hoc consulo post tempus, et in aliena re, quod tu in tua re, quum tempus erat, consulere oblitus es. Quæro abs te, C. Aquilli, L. Luculle, P. Quintili, M. Marcelle : vadimonium mihi non obiit quidam socius et affinis meus, quicum mihi necessitudo vetus, controversia de re pecuniaria recens intercedit : postulone a prætore, ut ejus bona mihi possidere liceat? an, quum Romæ domus ejus, uxor, liberi sint, domum potius denuntiem¹? Quid est, quod hac tandem de re vobis possit videri? Profecto si recte vestram bonitatem atque prudentiam cognovi, non multum me fallit, si consulamini, quid sitis responsuri : primum, expectare²; deinde, si latitare ac diutius ludificare videatur, amicos convenire; quærere, quis procurator sit; domum denuntiare. Dici vix potest, quam multa sint, quæ respondeatis ante fieri oportere, quam ad hanc rationem extremam necessariam³ devenire. Quid ad hæc Nævius? ridet scilicet nostram amentiam, qui in vita sua rationem summi officii desideremus, et instituta bonorum virorum requiramus. Quid mihi, inquit, cum ista summa sanctimonia ac diligentia? viderint, inquit, ista officia viri boni : de me autem ita considerent⁴; non, quid habeam, sed quibus⁵ rebus invenerim, quærant; et quemadmodum natus, et quo pacto educatus sim, memini : vetus est⁶, « De scurra multo facilius divitem, quam patremfamilias⁷ fieri posse ». Hæc ille, si verbis non audet, re

XVII. 1. *Denuntiem*. Verbum forense. *Denuntiatio* est civilis interpellatio, quæ debitori solemniter fiebat, antequam conveniretur ad iudicem (gall. *signifier à domicile*).

2. *Expectare*. Subaud. respondere oportere.

3. Conjicit Hotom. « nec necessa-

riam »; Ernest. « necesse sit », J. V. L.

4. Schütz delet « ita considerent », ex libr. Ursini. Idem habet *meminerint*. J. V. L.

5. *Quibus rebus*. Qua ratione bona comparaverim. Verba sunt Nævii.

6. *Vetus est*. Subaud. adagium.

7. *Patremfamilias*. Latine paterfa-

quidem vera palam loquitur. Etenim si vult virorum bonorum instituto vivere, multa oportet discat, atque dediscat : quorum illi ætati utrumque difficile est.

XVIII. Non dubitavi, inquit, quum vadimonium desertum esset, bona proscribere. Improbe : verum, quoniam tu id tibi arrogas, et concedi postulas, concedamus. Quid, si numquam deseruit? si ista causa abs te tota per summam fraudem et malitiam ficta est? si vadimonium omnino tibi cum P. Quintio nullum fuit? quo te nomine appellemus? improbum? at etiamsi desertum vadimonium esset, tamen, in ista postulatione et proscriptione bonorum, improbissimus reperiebare: num malitosum? non¹ negas: fraudulentum? jam id quidem arrogas tibi, et præclarum putas: audacem? cupidum? perfidiosum? vulgaria et obsoleta sunt; res autem nova atque inaudita. Quid ergo est? vereor mehercule, ne aut gravioribus utar verbis, quam natura fert, aut levioribus, quam causa postulat. Ais esse vadimonium desertum. Quæsivit a te, statim ut Romam rediit, Quintius, quo die vadimonium istuc factum esse diceres: respondisti statim, nonis feb. Discedens in memoriam rediit Quintius, quo die Roma in Galliam profectus sit; ad ephemeridem² revertitur: invenitur dies profectionis, prid. kal. feb. Nonis feb. si Romæ fuit, causæ nil dicimus³, quin tibi vadimonium promiserit. Quid? hoc inveniri qui potest? Profectus est una L. Albius, homo cum primis honestus: dicet testimonium. Prosequuti sunt fami-

miliis quicumque sui juris est, h. l. vir probus et frugi significatur.

XVIII. 1. Aberat non, quam h. l. necessariam voculam ex Junt. Ernest. post Lamb. addidit. Habet etiam Garat.

2. Ephemeridem. Ἐφημερίδα, latine

I. Cic. pars secunda.

diarium, libellus est in quem quotidianæ actiones referantur.

3. Causæ nil dicimus. Non recusamus, non infitiamur. Notanda locutio. Sic Terent. « Non causam dicam, quin, quod meritis est, fiat ».

liares et Albium, et Quintium : dicent hi quoque testimonium. Literæ P. Quintii, testes tot, quibus omnibus causa justissima est, cur scire potuerint, nulla, cur mentiantur, cum adstipulatore⁴ tuo comparabuntur. Et in hac ejusmodi causa P. Quintius laborabit? et diutius in tanto metu miser periculoque versabitur? et vehementius eum gratia adversarii perterrebit, quam fides judicis consolabitur? Vixit⁵ enim semper inculte, atque horride; natura tristi⁶ ac recondita fuit; non ad solarium⁷, non in campo⁸, non in conviviis versatus est; id egit, ut amicos observantia, rem parcimonia retineret; antiquam officii rationem dilexit, cujus splendor omnis his moribus obsolevit. At, si in causa pari discedere inferior videretur, tamen esset non mediocriter conquerendum : nunc, in causa superiore, ne ut par quidem sit, postulat; inferiorem⁹ esse se patitur, duntaxat usque eo, ne cum bonis, fama, fortunisque omnibus, Sex. Nævii cupiditati crudelitatiue dedatur.

XIX. Docui, quod primum pollicitus sum, C. Aquilli, causam omnino, cur postularet, non fuisse; quod neque pecunia debebatur, et, si maxime deberetur, commissum nihil esse, quare ad istam rationem perveniretur. Attende nunc, ex edicto prætoris bona P. Quintii

4. *Adstipulatore*. Cum eo qui tuam calumniam testimonio suo confirmat. *Adstipulator* est is, qui facti vadimonii testis est.

5. *Vixit*. Totus hic locus eo spectat, ut adversarii gratiam, non virtute, sed luxu et profusis sumptibus quæsitam orator imminuat; et Quintii solitudinem ac innocentiam sublevet.

6. *Natura tristi*. Fuit severior et solitudinis amans, alienus a conventibus hominum.

7. *Solarium* (gall. *cadran solaire*). Tradit M. Varro primum *solarium*

statutum Romæ fuisse secundum Rostra, in columna a M. Valerio Messalla, anno Urbis 492. Plin. VII, 60. Censor. cap. 19. Ad solarium nobiles et otiosi homines deambulabant. Vid. Indic. Latinit.

8. *In campo*. Martio, in quo ludi et exercitationes omnium generum præbebantur.

9. *Inferiorem*. Quamvis in meliore causa sit Quintius, sibi vos minus favere quam Nævio non abnuat, dummodo non usque eo progrediatur hic favor, ut cum bonis Nævio impue

possideri¹ nullo modo potuisse. Recita edictum : QUI FRAUDATIONIS² CAUSA LATITARIT. Non est is Quintius; nisi si latitant, qui ad negotium suum, relicto procuratore, proficiscuntur. CUI HERES NON EXSTABIT. Ne is quidem. QUI EXSULII CAUSA SOLUM VERTERIT. [Dici³ id non potest. QUI ABSENS JUDICIO DEFENSUS NON FUERIT. Ne is quidem.] Quo tempore existimas oportuisse, Nævi, absentem Quintium defendi, aut quo modo? Tum, quum postulabas, ut bona possideres? Nemo affuit: neque enim quisquam divinare poterat, te postulaturum; neque quemquam attinebat id recusare, quod prætor, non fieri⁴, sed ex edicto suo fieri jubebat. Qui locus igitur absentis defendendi procuratori primus datus est? Quum proscribebas? Ergo affuit; non passus est; libellos dejecit Sex. Alphenus; qui primus erat officii gradus, servatus est a procuratore summa cum diligentia. Videamus, quæ deinde sint consequuta. Hominem⁵ P. Quintii deprehendis in publico; conaris abducere: non patitur Alphenus; vi tibi adimit; curat, ut domum reducatur ad Quintium. Hic quoque summe constat procuratoris diligentis officium. Debere tibi dicis Quintium: procu-

lacerandus permittatur. — Olim abfuit - se -. Dedit cod. Franc. J.V. L.

XXIX. 1. Alii, possidere. J. V. L.

2. Qui fraudationis. Hic et in sequentibus, subaudiendum est: « ejus bona possideri, vendique jubebo ».

3. Dici. Verba hæc uncis inclusa, ad sensum vero necessaria, ex Lamb. Desjard. Schütz et MS Hotom. reposuimus. Absunt a J. V. L., et Garat. quamvis in notis, illi hæc omnino recipienda censuerint.

4. Non fieri. Mire in h. l. hæserit multi. Optime tamen explicat Cujacius, nempe creditorem, etiamsi de-

creto prætoris non indigeat, ut mittatur in possessionem, jussu tamen permissuque prætoris indigere, qui nullus sit, nisi nominatim concipiatur. Atqui nullum erat prætoris hæc de re decretum speciale, quod permetteret Nævio nominatim Quintii bona possidere: ergo Quintius non debuit adesse, ut recusaret id quod ad se nominatim non pertinebat. Nemo putavit recusandum quod prætor fieri jubebat, non simpliciter, sed ex edicto suo. De Præt. edict. vide ad calc. Verr. I.

5. Hominem. Servum.

rator negat. Vadari vis⁶ : promittit. In jus vocas : sequitur. Judicium postulas : non recusat. Quid aliud sit absentem defendi, ego non intelligo. At quis erat procurator? Credo aliquem ejectum hominem, egentem, litigiosum, improbum, qui posset⁷ scurræ divitis quotidianum convicium sustinere. Nihil minus. Eques romanus locuples, sui negotii bene gerens; denique is, quem, quoties Nævius in Galliam profectus est, procuratorem Romæ reliquit.

XX. Et audes, Sex. Nævi, negare, absentem defensum esse Quintium, quum eum defenderit idem, qui te solebat? et, quum is judicium acceperit pro Quintio, cui tu et rem et famam tuam commendare proficiscens et concredere solebas; conaris hoc dicere, neminem existisse, qui Quintium iudicio defenderet? — Postulabam¹, inquit, ut satisdaretur. — Injuria postulabas. — Ita jubebare. — Recusabat Alphenus. — Ita; verum prætor decernebat. — Tribuni² igitur appellabantur. — Hic, te, inquit, teneo; non est istud³ iudicium pati, neque iudicio defendere, quum auxilium a tribunis⁴ petas. —

6. *Vadari vis.* Vades ab eo poscia sistendi in iudicio; vadimonium tu vis ut subeat.

7. *Qui posset.* Qui, quæ quotidie in eum jactantur a Nævio, maledicta potest perferre.

XX. 1. *Postulabam.* Dialogi forma inter Nævium et Ciceronem. *Næv.* Petebam ut Alphenus satisdaret. *Cic.* Non merito postulabas. *Næv.* Atqui jubebat prætor. *Cic.* Nihilominus recusabat Alphenus. *Næv.* Ita sane, verum pronuntiarat prætor. *Cic.* Itaque tribunos Alphenus appellavit. *Næv.* Hic te teneo, etc. — Loco *satisdaretur, jubebare* vulg. «satisdaret, videbare».

2. *Tribuni.* Illi magistratum om-

nium decretis intercedere poterant, ante Sullam, qui hanc eis intercessionem ademerat.

3. *Non est istud.* Non ita male illud Ciceroni objiciebatur; tribunos enim appellando, Alphenus iudicium magis recusare quam iudicio defendere videbatur. Ipsa vero de hac re manifesta erant edicti verba. Ideoque in hoc multus est orator, ut a procuratore non de iudicio, sed de satisfactione tantum appellatos tribunos ostendat. Ceterum non id juris erat Alpheni, procuratori quippe, ut satisfactionem declinaret. Vide Gaium, IV, 96 et 101.

4. *A tribunis petas.* In hoc ergo accusatur ab Hortensio Alphenus, quasi

Hoc ego, quum attendo qua prudentia sit Hortensius, dicturum esse eum non arbitror; quum autem antea dixisse audio, et causam ipsam considero, quid aliud dicere possit, non reperio. Fatetur enim, libellos Alphenum dejecisse, vadimonium promisisse, iudicium quin acciperet in ea ipsa verba⁵, quæ Nævius edebat, non recusasse; ita tamen⁶, more et instituto, per eum magistratum, qui auxilii causa constitutus est. Aut hæc facta non sint, necesse est; aut C. Aquillius, talis vir, juratus⁷, hoc jus in civitate constituat, cujus procurator non recusarit⁸ omnia iudicia, quæ quisque⁹ in verba postularit; cujus procurator a prætore tribunos appellare ausus sit, eum non defendi; ejus bona recte possideri posse; ei misero, absenti, ignaro, omnia¹⁰ fortunarum suarum, omnia vitæ ornamenta per summum dedecus et ignominiam deripi¹¹ convenire. Quod si probari nemini potest; illud certe probari omnibus necesse est, defensum esse iudicio absentem Quintium. Quod quum ita est, ex edicto bona possessa non sunt. At enim tribuni plebis ne audierunt quidem. Fateor, si ita est, procuratorem decreto prætoris oportuisse parere. Quid, si M. Brutus¹² intercessurum se dixit palam, nisi quid inter ipsum Alphenum et Nævium con-

vero iudicium per eos declinare voluerit. «Turbantes jura tribuni» ait Lucan. I, 177.

5. *Verba.* Concipiebatur formula iudicii ab actore; probabatur a reo, vel improbabatur.

6. *Ita tamen.* Manca videtur phrasis, quam supplendam proponit Grævius: «at recusavit satisfacere; ita tamen», ut more et instituto appellaret eum magistratum, etc. qui sensus, vel nullo interpolato verbo, satis patet.

7. *Juratus.* Sacramenti fide ad reli-

giose et sancte iudicandum obligatus.

8. Olim «acceperit», contra sensum. Cod. Franc. *recusarit*.

9. *Quæ quisque.* Ordo est: In verba quæ quisque postularit, i. e. secundum formulam quæ utrique actori et reo placuerit.

10. *Omnia.* Sic Hotom. cod. Vulg. abest.

11. *Alii, diripi.* J. V. L.

12. *M. Brutus.* Tribunus plebis, et is ipse, ut opinatur Hotom. quem in Cisalpina Gallia Cn. Pompeius interfecit.

veniret? videturne intercessisse appellatio tribunorum, non moræ¹³, sed auxilii causa?

XXI. Quid deinde fit? Alphenus, ut omnes intelligere possent, iudicio defendi Quintium, ne qua subesse posset aliena aut ipsius officio, aut hujus existimatione suspicio, viros bonos complures advocat; testatur, isto audiente, se pro communi necessitudine id primum petere, ne quid atrocius in P. Quintium absentem sine causa facere conetur; sin autem inimicissime atque infestissime contendere perseveret, se paratum esse omni recta atque honesta ratione defendere, quod petat, non deberi; se iudicium id¹, quod edat, accipere. Ejus rei conditionisque tabellas obsignaverunt viri boni complures: res in dubium venire non potest: fit, rebus omnibus integris, neque proscriptis, neque possessis bonis, ut Alphenus promittat Nævio, sisti Quintium. Venit ad vadimonium Quintius: jacet res in controversiis, isto calumniante², biennium, usque dum inveniretur, qua ratione res ab usitata³ consuetudine recederet, et in hoc singulare iudicium causa⁴ omnis concluderetur. Quod officium, C. Aquilli, commemorari procuratoris potest, quod ab Alphenio præteritum esse videatur? Quid affertur, quare P. Quintius absens negetur esse defensus? An vero id, quod Hortensium, quia nuper injecit, et quia Nævius semper id clamat,

13. *Moræ*. Tribunos appellavit Alphenus, non morandi et impediendi iudicii causa, sed tantum ut auxilium contra injustum decretum imploraret. Alii legunt *more*, frustra.

XXI. 1. Edd. vett. «se iudicio id». Lambinus, «in id q. e.» J. V. L. — Quum in jus ventum erat, formulam qua petitor agere vellet edebat; si eam probaret reus, dicebatur «iudicium accipere». Vid. ad calc. vol. de Iudiciis.

2. *Calumniante*. Ludificante, tergiversante.

3. *Consuetudine*. A more iudiciorum et actione rei pecuniariæ.

4. *Causa omnis*. Quæ plura iudicia desiderat, quoniam plura sint ejus capita; nempe de re pecuniaria primo; postea de deserto vadimonio, de bonorum possessione. — *Concluderetur*. Est translatio ab iis qui in angustias rediguntur.

dicturum arbitror, non fuisse⁵ Nævio parem certationem cum Alphenio, illo tempore⁶, illis dominantibus? Quod si velim confiteri, illud, opinor, concedent, non procuratorem P. Quintii neminem fuisse, sed gratiosum fuisse. Mihi autem ad vincendum satis est, fuisse procuratorem, quicum experiri posset. Qualis is fuerit, si modo absentem defendebat per jus⁷, et per magistratum, nihil ad rem arbitror pertinere. Erat enim⁸, inquit, illarum partium. Quidni? qui apud te esset educatus; quem tu a puero sic instituisses, ut nobili⁹, ne gladiatori quidem, cederet. Sicut tu semper summe concupisti, idem volebat Alphenus: ea re tibi cum eo par contentio erat. Bruti, inquit, erat familiaris; itaque is intercedebat. Tu contra Burrhieni, qui injuriam decernebat; omnium denique illorum¹⁰, qui tum et poterant per vim et scelus plurimum, et, quod poterant, id audebant. An omnes tu istos¹¹ vincere volebas, qui nunc, tu ut vincas, tantopere laborant? Aude id dicere, non palam, sed his ipsis, quos advocasti. Neque¹² enim

5. *Non fuisse.* Iniquos fuisse Nævio tribunos, apud quos gratiosi fuerunt Alphenus et Quintius, uterque Marianarum partium et popularis. Qua objectione utebatur Hortensius, ut Nævium Sullanum a Marianis oppressum ostenderet; illam vero mire in ipsum Nævium detorquet noster, istumque a victo Mario ad Sullam transfugisse invidiose arguit.

6. *Illo tempore.* L. Scipione, C. Norbano coss. qui bellum acerrimum cum L. Sulla gerebant.

7. *Per jus.* Ante prætorem. — *Per magistratum.* M. Brutum. — Alterum hoc per vulg. abest.

8. *Abest enim.* J. V. L. — *Illarum,* i. e. Marianarum.

9. *Nobili.* Ludit in verbo hoc, quod

et de iis usurpatur, qui genere clari sunt, et de iis, qui in quavis arte commendantur. Ita nobilitatis nomen ipsum oderat Nævius, ut nulli sive genere, sive arte nobili, ne gladiatori quidem cedere vellet. Quo verbo Nævii audacia et in nobilitatem odium designatur. — *Loco cederet olim hæeret, faveret, vereretur, uteretur.* Conjecit Hotom. *cederet.* Dedit Franc. cod.

10. *Illorum.* Nempe Marianorum, quibus tunc favebat Nævius, et quos postea per summam perfidiam deseruit, ut ad victorem Sullam transfugeret.

11. *Istos.* Sullanos, qui nunc te sua gratia ac potentia adjuvant.

12. *Neque... effecisti,* erant post *Tametsi... impetrabat.* Transposuit Ernesti. Beck et Schütz improbant.

inter studium vestrum quidquam, ut opinor, interfuit. Ingenio, vetustate, artificio tu facile vicisti : ut alia omittam, hoc satis est. Alphenus cum iis et propter eos periit ¹³, quos diligebat : tu, postquam, qui tibi erant amici, non poterant vincere, ut amici tibi essent, qui vincebant, effecisti. Tametsi nolo eam rem commemorando renovare, cujus omnino rei memoriam omnem tolli funditus ac deleri arbitror oportere.

XXII. Unum illud dico : si propter partium studium potens erat Alphenus ; potentissimus Nævius : si fretus gratia postulabat aliquid iniquius Alphenus ; multo iniquiora Nævius impetrabat. Quod si tum par tibi jus cum Alpheni fuisse non putas, quia tamen aliquem contra te advocare poterat ; quia magistratus aliquis reperiebatur, apud quem Alpheni causa consisteret ¹ : quid hoc tempore Quintio statuendum est ? cui neque magistratus adhuc æquus inventus est, neque iudicium redditum est usitatum ; non conditio, non sponsio, non denique ulla umquam intercessit postulatio, mitto æqua, verum ante hoc tempus ne fando quidem audita. De re pecuniaria cupio ² contendere. — Non licet. — At ea controversia est. — Nihil ad me attinet ; causam capitis dicas, oportet. — Accusa, ubi ita necesse est. — Non, inquit, nisi tu ante, novo modo, priore loco dixeris : dicendum ³ necessario est ; præstituendæ horæ ad arbitrium nostrum ; iudex ipse arcebitur ⁴. Quid tum ? tu aliquem patronum invenies, hominem antiqui offi-

Pro « vetustate » multi « venustate ».
J. V. L.

13. *Periit*. A Sulla proscriptus.

XXII. 1. *Consisteret*. Inveniret apud quem sine præiudicio causam agere posset Alphenus.

2. *Cupio*. Sic loqui fingitur Quintius, cui respondet Nævius.

3. *Dicendum*. Ego, ait Nævius, te priore loco dicere cogam ; tibi dicendi tempus circumscribam ; ipsi iudici leges imponemus.

4. *Arcessetur*, in vulgatis. Quod tamen Hotom. explicat, et defendit Garat. Duo MSS Lamb. unus Franc. edd. vett. habent *arcebitur*.

cii, qui splendorem nostrum, et gratiam negligat? Pro me pugnabit L. Philippus⁵, eloquentia, gravitate, honore florentissimus civitatis; dicet Hortensius, excellens ingenio, nobilitate, existimatione; aderunt autem homines nobilissimi ac potentissimi, quorum frequentiam et consessum non modo P. Quintius, qui de capite decernit, sed quivis, qui extra periculum sit, perhorrescat. Hæc est iniqua certatio, non illa, qua tu contra Alphenum velitabaris⁶; huic ne ubi consisteret quidem contra te, locum reliquisti. Quare aut doceas oportet, Alphenum negasse se procuratorem esse, non dejecisse libellos, judicium accipere noluisse; aut, quum hæc ita facta sint, ex edicto te bona P. Quintii non possedis concedas.

XXIII. Etenim si ex edicto¹ possedisti, quæro, cur bona non venierint; cur ceteri sponsores et creditores non convenerint. Nemone fuit, cui deberet Quintius? Fuerunt, et complures fuerunt: propterea quod C. frater aliquantum æris alieni reliquerat. Quid ergo est? homines erant ab hoc omnes alienissimi; et iis debebatur: neque tamen quisquam inventus est tam insignite improbus, qui violare P. Quintii existimationem absentis auderet. Unus fuit, affinis, socius, necessarius, Sex. Nævius; qui, quum ipse ultro² deberet, quasi eximio præmio sceleris exposito, cupidissime contendere, ut per se afflictum³ atque eversum propinquum suum, non modo honeste partis bonis, verum etiam

5. *L. Philippus*. De clarissimo hoc oratore adi Brut. 45, 47, 64, et Horat. Epist. I, 7.

6. Primæ edd. « equitabas ». J. V. L. — *Velitari*, leviter altercari, a verbo *velites*, qui expediti milites pugnae prælodant.

XXIII. 1. *Si ex edicto*. Argumen-

tum a consequentibus. Sequebatur possessionem bonorum venditio, ut creditoribus omnibus pecuniæ debitæ persolverentur.

2. *Ultro*. Quum insuper Nævius Quintio pecuniam deberet.

3. *Afflictum*. Sua opera oppressum. Præterita h. l. pro futuris accipiuntur.

communi luce privaret. Ubi erant ceteri creditores? denique hoc tempore ubi sunt? quis est, qui fraudationis causa latuisse dicat? quis, qui absentem defensum neget esse Quintium? Nemo invenitur. At contra omnes, quibuscum ratio huic aut est, aut fuit, adsunt, defendunt: fides⁴ hujus multis locis cognita; ne perfidia Sex. Nævii derogetur, laborant. In hujusmodi sponsonem testes dare oportebat ex eo numero, qui hæc dicerent: Vadimonium mihi deseruit; me fraudavit; a me nominis⁵ ejus, quod infitiatus esset, diem petivit: ego experiri non potui; latitavit, procuratorem nullum reliquit. Horum nihil dicitur. Parantur testes, qui hæc dicant. Verum, opinor, viderimus, quum dixerint: unum tamen hoc cogitent, ita se graves⁶ esse, ut si veritatem volent retinere, gravitatem possint obtinere; si eam negligent⁷, ita leves sint, ut omnes intelligant, non ad obtinendum mendacium⁸, sed ad verum probandum, auctoritatem adjuvare.

XXIV. Ergo hæc duo quæro: primum, qua ratione Nævius susceptum negotium non transegerit, hoc est, cur bona, quæ ex edicto possidebat, non vendiderit; deinde, cur ex tot creditoribus aliis ad istam rationem nemo accesserit: ut necessario confiteare, neque eorum tam temerarium quemquam fuisse, neque te ipsum id¹, quod turpissime suscepisses, perseverare et transigere potuisse. Quid si tu ipse, Sex. Nævi, sta-

4. Schütz, auctore Ernestio, corrigit: «Fidei.... cognita ne p. S. N. derogetur». J. V. L. Frustra. Latine enim dicitur *fidem alicui derogare*.—*Perfidia*. Per perfidiam.

5. *Nominis*. Sensus est: Quum delictum, quod infitiatus erat, probassem, et se condemnatum iri videret, tempus aliquod a me petiit.

6. *Graves*. Auctoritate præditi parantur testes; sed nisi verum dixerint, levis eorum auctoritas futura est, nec efficiet ut vincat mendacium.

7. Edit. 1480, «neglexerint». J. V. L.

8. *Obtinendum mendacium*. Efficiendum, ut mendacio credatur.

XXIV. 1. *Id*. Pendet a secundo

tuisti, bona P. Quintii ex edicto possessa non esse? opinor, tuum testimonium, quod in aliena re leve esset, id in tua, quoniam contra te est, gravissimum debet esse. Emisti bona Sex. Alpheni, L. Sulla dictatore vendente; socium tibi in hujus bonis² edidisti Quintium. Plura non dico. Cum eo tu voluntariam societatem coibas, qui te in hereditaria societate fraudarat? et eum judicio tuo comprobabas, quem spoliatum fama fortunisque omnibus arbitrabare?

Diffidebam mehercule, C. Aquilli, satis animo certo et confirmato me posse in hac causa consistere. Sic cogitabam, quum contra dicturus esset Hortensius, et quum esset attente auditurus Philippus, fore, uti permultis in rebus timore prolaberer. Dicebam huic Q. Roscio³, cujus soror est cum P. Quintio, quum a me peteret, et summe contenderet, ut suum propinquum defenderem, mihi perdifficile esse contra tales oratores non modo tantam causam perorare, sed omnino verbum facere conari. Quum cupidius instaret, homini pro amicitia familiarius dixi, mihi videri ore durissimo⁴ esse, qui præsente eo gestum agere conaretur; qui vero cum ipso contenderent, eos, etiam si quid antea recti aut venusti habere visi sunt⁵, id amittere: ne quid mihi ejusmodi accideret, quum contra talem artificem dicturus essem, me vereri.

verbo transigere, sitque per ζῆλον.

2. In hujus bonis. Subaud. emendis.

Hinc vide an melior Nævio Quintius fuerit. Cujus Alpheni opera tam bona fuerat usus, nunc ejus sector fit, et interempti spolia per summam injuriam a crudelissimo tyranno mercatur. Ceterum clientem suum non omnino hac in re actorem inducit Cicero.

3. Q. Roscio. Comædo, pro quo

exstat oratio; et cujus sororem habebat Quintidæ.

4. Ore durissimo. Summa impudentia. « Soleo, inquit in Orat. Cicero, sæpe mirari eorum impudentiam, qui agunt in scena gestum, spectante Roscio. »

5. Beck emendat « visi sint »; quod probat Schütz. Nec male forsân, quum non directa sit oratio.

XXV. Tum mihi Roscius et alia multa confirmandi mei causa dixit; et mehercule, si nihil diceret, tacito ipso officio et studio, quod habebat erga propinquum suum, quemvis commoveret. Etenim, quum artifex ejusmodi sit, ut solus dignus videatur esse, qui in scena spectetur; tum vir ejusmodi est, ut solus dignus videatur, qui eo non accedat¹. Verumtamen, quid si, inquit, habes ejusmodi causam, ut hoc tibi planum sit faciendum, neminem esse, qui possit biduo, aut summum triduo, septingenta millia passuum ambulare? tamenne vereris, ut possis hæc contra Hortensium contendere? Minime, inquam; sed quid id ad rem? Nimirum, inquit, in eo causa consistit. Quomodo? Docet me ejusmodi rem, et factum simul Sex. Nævii, quod, si solum proferretur, satis esse deberet. Quod abs te, C. Aquilli, et a vobis, qui adestis in consilio, quæso, ut diligenter attendatis: profecto intelligetis, illinc ab initio cupiditatem pugnasse et audaciam; hinc veritatem et pudorem, quoad potuerit, restitisse. Bona postulas ut ex edicto possidere liceat: quo die? te ipsum, Nævi, volo audire; volo, inauditum facinus, ipsius, qui id commisit, voce convinci. Dic, Nævi, diem. Ante v. kalend.² intercalares. Bene agis: quam longe est hinc in saltum vestrum Gallicanum? Nævi, te rogo. DCC millia³ passuum. Optime. De saltu dejicitur Quintius:

XXV. 1. *Eo non accedat.* Histionum ars turpis habebatur; quippe qui et tribu moverentur et a militia repellerentur. Hinc Laberii dolor apud Macrob. Saturn. II, 7. Togatarum et Atellanarum actores tamen videntur excipiendi. Vid. Liv. VII, 2. Digest. III, 2. August. de Civ. Dei, II, 11.

2. *V kalend.* Hoc est, die vigesimo februarii. Annus romanus, ex Numæ institutione, erat 355 dierum, qui ut

cum solis cursu quadraret, inter februarium ac martium, biennio quoque, unus intercalabatur mensis, qui alternis annis binos vicanosque, alternis ternos et vicanos haberet dies. Talis mensis intercalaris fuerunt hæ kalendæ. Vid. Macrob. Saturn. I, 15, et J. F. Gronov. Observat. II, 18.

3. *DCC millia.* Scilicet 103 myriam. Vid. Mens. Rom. tab. nostri Liv. vol. XII, pag. 111.

quo die? possumus hoc quoque ex te audire? Quid taces? dic, inquam, diem: pudet dicere? Intellego; verum et sero, et nequicquam pudet. Dejicitur de saltu, C. Aquilli, pridie kalend. intercalares: biduo post, aut, ut statim de jure⁴ aliquis cucurrerit, non toto triduo MCC millia passuum conficiuntur. O rem incredibilem! o cupiditatem inconsideratam! o nuntium volucrum! administri et satellites Sex. Nævii Roma trans Alpes in Sebusianos⁵ biduo veniunt. O hominem fortunatum, qui ejusmodi nuntios, seu potius Pegasos habeat!

XXVI. Hic ego, si Crassi¹ omnes cum Antoniis existant; si tu, L. Philippe, qui inter illos florebas, hanc causam voles cum Hortensio dicere, tamen superior sim necesse est. Non enim, quemadmodum putatis, omnia sunt in eloquentia: est quædam² tamen ita perspicua veritas, ut eam infirmare nulla res possit. An antequam postulasti, ut bona possideres, misisti, qui curarent, ut dominus de suo fundo a sua familia vi dejiceretur? Utrumlibet³ elige: alterum incredibile est; alterum nefarium, et ante hoc tempus utrumque inauditum. Septingenta millia passuum vis esse decursa biduo? dic: negas? ante igitur misisti: malo. Si enim illud diceres; improbe mentiri viderere: quum hoc confiteris; id te admisisse concedis, quod ne mendacio quidem tegere possis. Hoc consilium Aquillio, et talibus viris, tam cupidum, tam audax, tam temerarium probabitur? Quid hæc amentia, quid hæc festinatio,

4. *De jure.* De prætoris tribunali, ubi jus dicitur.

5. Alii malunt *Sepusianos*. J. V. L. Vid. Ind. Geogr.

XXVI. 1. *Crassi.* De Crasso et Antonio, celeberrimis oratoribus, sex abhinc annos occisis, vid. Cic. de clar. Oratoribus. — *Exsistant.* Exo-

riantur, tamquam ab inferis excitati.

2. *Est quædam.* Sic pro Cælio: « magna vis veritatis, quæ contra hominum ingenia, calliditatem, solertiam, contraque fictas hominum insidias facile se per se ipsa defendat ».

3. *Utrumlibet.* Vel dic misisse te in Galliam, antequam postulasti ut bona

quid hæc immaturitas⁴ tanta significat? non vim? non scelus? non latrocinium? non denique omnia potius, quam jus, quam officium, quam pudorem? Mittis injussu prætoris: quo consilio⁵? Jussurum sciebas. Quid? quum jussisset, tum mittere nonne poteras? Postulaturus eras. Quando? post dies xxx⁶. Nempe si te nihil impediret, si voluntas eadem maneret, si valeres, denique si viveres. Prætor jussisset. Opinor, si vellet, si valeret, si jus diceret, si nemo recusaret, quin⁷ ex ipsius decreto et satisfacere⁸, et judicium accipere vellet. Nam, per deos immortales, si Alphenus, procurator P. Quintii, tibi tum satisfacere; et judicium accipere vellet, denique omnia, quæ postulares, facere voluisset, quid ageres? revocares eum, quem in Galliam miseras? At hic⁹ quidem jam de fundo expulsus; jam a suis diis penatibus præceps ejectus; jam, quod indignissimum est, suorum servorum manibus, nuntio atque imperio tuo, violatus esset. Corrigeres¹⁰ hæc, scilicet, tu postea. De cujusquam vita¹¹ dicere audes, qui hoc concedas necesse est, ita te cæcum cupiditate et avaritia fuisse, ut, quum postea quid futurum esset ignorares, accidere autem multa possent, spem maleficii præsentis in incerto reliqui temporis eventu collocares? Atque hæc perinde loquor, quasi ipso illo tempore, quum te prætor jussisset ex edicto possidere, si in possessionem

possideres; vel dic DCC millia passuum esse decursa biduo.

4. *Immaturitas*. Intempestiva properatio.

5. Recte Facciolat. Garat. Beck, sustulerunt interrogandi notam. J. V. L.

6. *Post dies XXX*. Ironia et hyperbole in numero dierum, qua non necessariam Nævio properationem innuit, quippe qui ante prætoris jussum omnia peregisset.

7. E conjectura Lamb. Vulgo *qui*. J. V. L.

8. Alii, « satisfacere ». J. V. L.

9. *Hic*. Quintius.—*Diis penatibus*. Sui cuique civi ac patrifamilias domestici dii erant, qui ejus domum religione munirent et consecrarent.

10. *Corrigeres*. Ironia.

11. *De cujusquam vita*. Epiphonema. Et fraudatorem appellare audes Quintium, atque ejus vitam in peri-

misisses, debueris aut potueris P. Quintium de possessione deturbare.

XXVII. Omnia sunt, C. Aquilli, ejusmodi, quivis ut perspicere possit, in hac causa improbitatem et gratiam cum inopia et veritate contendere. Prætor te quemadmodum possidere jussit? opinor ex edicto. Sponsio quæ in verba facta est? SI EX EDICTO¹ PRÆTORIS BONA P. QUINTII POSSESSA NON SINT. Redeamus ad edictum. Id quemadmodum jubet possidere? Num quid est causæ, C. Aquilli, quin, si longe aliter possedit, quam prætor edixit, iste ex edicto non possederit, ego sponsione vicerim? Nihil opinor. Cognoscamus edictum: QUI EX EDICTO MEO IN POSSESSIONEM VENERINT. De te loquitur, Nævi, quemadmodum tu putas; ais enim te ex edicto venisse: tibi, quid facias, definit; te instituit; tibi præcepta dat: EOS ITA VIDETUR IN POSSESSIONE ESSE OPORTERE. Quomodo? QUOD IBIDEM RECTE² CUSTODIRE POTERUNT, ID IBIDEM CUSTODIANT; QUOD NON POTERUNT, ID AUFERRE ET ABDUCERE LICEBIT. Quid tum? DOMINUM, inquit, INVITUM DETRUDERE NON PLACET. Eum ipsum, qui fraudandi causa latitet; eum ipsum, quem judicio nemo defendat; eum ipsum, qui cum omnibus creditoribus suis male agat, invitum de prædio detrudi vetat. Proficiscenti tibi in possessionem prætor ipse, Sex. Nævi, palam dicit: Ita possideto, ut tecum simul possideat Quintius; ita possideto, ut Quintio vis ne afferatur³. Quid? tu id quemadmodum observas? mitto illud dicere, eum, qui non latitarit, cui Romæ do-

culum adducere, tu qui hoc fateri cogeris, etc.

XXVII. 1. Hotomannus jubet scribere «ni ex ed.», male, quum h. l. ipsam, qua Nævius in sponsione sua usus est, formulam recitet Cicero.

2. Recte. Convenienter. Custodire, sibi habere. Auferre dicitur de immobilibus; abducere, de mobilibus.

3. Sic Hotom. ex MSS. Olim «jus non auferatur», quod defendit Facciol. Frustra.

mus, uxor, liberi, procurator esset; eum, qui tibi vadimonium non deseruisset; hæc omnia mitto: illud dico, dominum expulsus esse de prædio; domino a familia sua manus allatas esse ante suos lares familiares: hoc dico⁴.....

XXVIII. Nævium¹ ne appellasse quidem Quintium, quum simul esset, experiri posset quotidie: deinde quod omnia judicia difficillima², cum summa sua invidia, maximoque periculo P. Quintii fieri mallet, quam illud pecuniarium iudicium, quod uno die transigi posset; ex quo uno hæc omnia nata et profecta esse concedit. Quo in loco conditionem tuli, si vellet pecuniam petere, P. Quintium iudicatum solvi satisdaturum³, dum ipse, si quid peteret, pari conditione uteretur. Ostendi, quam multa ante fieri convenerit, quam hominis propinqui bona possideri postularentur; præsertim quum Romæ domus ejus, uxor, liberi essent, et procurator æque utriusque necessarius. Docui, quum desertum esse dicat vadimonium, omnino vadimonium nullum fuisse; quo die hunc sibi promississe dicat, eo die ne Romæ quidem eum fuisse: id testibus me pollicitus sum planum facturum, qui et scire deberent, et causam, cur mentirentur, non haberent. Ex edicto autem non potuisse bona possideri, demonstravi; quod neque fraudandi causa latitasset, neque exsilii causa solum vertisse diceretur. Reliquum est, ut eum nemo iudicio defenderit: quod contra⁴

4. Desiderantur hic secundæ divisionis finis, et ea omnia quæ ad tertium partitionis membrum pertinebant, nempe « Nævium non possedisse ». Et præterea pauca quædam ex principio epilogi.

XXVIII. 1. *Nævium*. Subaudi, « probavi, dixi ».

2. *Difficillima*. Quæ gravate a iudicibus fiunt, ut, quum civis caput agitur.

3. *Satisdaturum*. Quam satisfactio-nem obtulit cap. 13.

4. *Quod contra*. Contra quam rem, plurimis argumentis eum defensum fuisse demonstravi.

copiosissime defensum esse contendere, non ab homine alieno, neque ab aliquo calumniatore atque improbo, sed ab equite romano, propinquo et necessario suo, quem ipse Sex. Nævius procuratorem relinquere antea consuesset: neque eum, si tribunos appellaret, idcirco minus iudicium pati paratum fuisse: neque potentia procuratoris Nævio jus ereptum; contra istum potentia⁵ sua tum tantummodo superiorem fuisse, nunc nobis vix respirandi potestatem dare.

XXIX. Quæsivi, quæ causa fuisset, cur bona non venissent, quum ex edicto possiderentur: deinde illud quoque requisivi, qua ratione ex tot creditoribus nemo neque tum idem fecerit, neque nunc contra dicat, omnesque pro P. Quintio pugnent; præsertim quum in tali iudicio testimonia creditorum existimantur ad rem maxime pertinere. Postea sum usus adversarii testimonio, qui sibi eum nuper edidit socium¹, quem, quo modo nunc intendit², ne in vivorum quidem numero tum demonstrat fuisse. Tum illam incredibilem celeritatem, seu potius audaciam, protuli: confirmavi necesse esse, aut biduo dcc millia passuum esse decursa, aut Sex. Nævium diebus compluribus ante in possessionem misisse, quam postulare, uti ei liceret bona possidere. Postea recitavi edictum, quod aperte dominum de prædio detrudi vetaret: in quo constitit, Nævium ex edicto non possedis, quum confiteretur ex prædio vi detrusum esse Quintium. Omnino³ autem bona possessa non esse constitui: quod bonorum

5. *Istum potentia.* Nævius, Mariæ dominantibus, nobis jam superior, nunc quum Sullani, ad quorum partes transfugit, omnia tenent, nos ita obruit, ut vix respiremus.

XXIX. 1. *Edidit socium.* In emendis Alpheni bonis.

2. *Intendit.* Ut quidem nunc arguit, et objicit absolute. Pro Milone, «intendere actionem».

3. *Omnino.* I. e. denique. Sic ex Hot. olim legebatur *omnia*. Hæc erat tertia pars confirmationis, quæ nunc tota fere desideratur.

possessio spectetur non in aliqua parte, sed in universis⁴, quæ teneri ac possideri possint. Dixi, Romæ domum fuisse, quo iste ne adspirarit⁵ quidem; servos complures, ex quibus iste possederit neminem, ne attigerit quidem; unum fuisse, quem attingere conatus sit; prohibitum fuisse, quievisse. In ipsa Gallia cognostis in prædia privata Quintii Sex. Nævium non venisse. Denique ex ipso saltu, quem, per vim expulso socio, possedit, servos privatos Quintii non omnes ejectos esse. Ex quo⁶, et ex ceteris dictis, factis, cogitatisque Sex. Nævii, quivis potest intelligere, istum nihil aliud egisse, neque nunc agere, nisi uti per vim, per injuriam, per iniquitatem judicii, totum agrum, qui communis est, suum facere possit.

XXX. Nunc causa perorata, res ipsa, et periculi magnitudo, C. Aquilli, cogere videtur, ut te, atque eos, qui tibi in consilio sunt, obsecret obtesteturque P. Quintius per senectutem¹ ac solitudinem suam, nihil aliud, nisi ut vestræ naturæ bonitatisque obsequamini; ut, quum veritas cum hoc faciat², plus hujus inopia possit ad misericordiam, quam illius opes ad crudelitatem. Quo die ad te judicem venimus, eodem die illorum minas, quas ante horrebamus, negligere cœpimus. Si causa cum causa contenderet, nos nostram perfacile cuivis probaturos statuebamus. Quod vitæ ratio³ cum ratione vitæ decerneret, idcirco nobis etiam magis te iudice opus esse arbitrati sumus. Ea res enim nunc

4. *In universis*. I. e. bona possideri ex edicto non dicuntur, nisi universa omnino possideantur.

5. *Adspirarit*. Cogitaverit.

6. *Ex quo*. Quo ex facto et ex ceteris illud constat, hoc unum sibi proposuisse Nævium, ut, etc.

XXX. 1. *Senectutem*. Annum tunc agebat Quintius sexagesimum.

2. *Faciat*. Pugnet. Sic Cæcin. «Auctoritas gravissimorum hominum nobiscum facit».

3. *Vitæ ratio*. Quum mores Nævii cum Quintii moribus committantur.

in discrimine⁴ versatur, utrumne possit se contra luxuriam ac licentiam rusticana illa atque inculta parcomonia defendere; an deformata, atque ornamentis omnibus spoliata, nuda cupiditati petulantiaque addicatur⁵. *⁶ Non comparat se tecum gratia P. Quintius, Sex. Nævi; non opibus, non facultate contendit; omnes tuas artes, quibus tu magnus es, tibi concedit. Fatetur se non belle dicere, non ad voluntatem⁷ loqui posse; non ab afflicta amicitia⁸ transfugere, atque ad florentem aliam devolare; non profusis sumptibus vivere; non ornare magnifice splendideque convivium; non habere domum clausam pudori et sanctimoniae, patentem atque adeo expositam cupiditati et voluptatibus: contra, sibi officium, fidem, diligentiam, vitam omnino semper horridam⁹ atque aridam cordi fuisse. Ista¹⁰ superiora esse, ac plurimum posse his moribus sentit. Quid ergo est? non usque eo tamen, ut in capite fortunisque hominum honestissimorum dominantur ii, qui relictæ bonorum virorum disciplina, et quæstum et sumptum Gallonii¹¹ sequi maluerunt, atque etiam, quod in illo non fuit, cum audacia perfidiaque vixerunt. Si licet vivere eum, quem Sex. Nævius non vult; si est homini honesto locus in civitate, invito Nævio; si fas est respirare P. Quintium, contra nutum ditionemque Nævii; si quæ pudore ornamenta

4. Sic multi codd. Vulgo legebatur - in discrimen -. J. V. L.

5. *Addicatur.* *Addicti* dicebantur, qui nexi creditoribus in servitatem dabantur.

6. * Hic in codd. Palatinis signum lacunæ est. Gruter.

7. *Ad voluntatem.* Adulantium more. Concessio ironica.

8. *Ab afflicta amicitia.* Pungit Nævium, Marianarum partium desertorem.

9. *Horridam.* Duram et austeram.

10. *Ista.* Istam Nævii vitam plurimum valere ad parandos amicos scit, sed non eo tamen ut, etc.

11. *Gallonii.* P. Gallonius olim, ut Nævius, præco, homo nequam et nepotum omnium profusissimus. Vid. Horat. Sat. II, 2, 47, et Cic. de Fin. II, 8, ubi Lucilii versus recitantur: « O Publi, o gurges, Galloni, es homo miser, etc. »

sibi peperit, ea potest contra petulantiam, te defendente ¹², obtinere : spes est, et hunc miserum atque infelicem aliquando tandem posse consistere. Sin et poterit Nævius id, quod libet, et ei libebit, quod non licet ¹³, quid agendum est? qui deus appellandus est? cujus hominis fides imploranda est? qui denique questus, qui mœror dignus inveniri in calamitate tanta potest?

XXXI. Miserum est ¹ exturbari fortunis omnibus; miserius est, injuria : acerbum est ab aliquo circumveniri; acerbius, a propinquo : calamitosum est bonis everti; calamitosius, cum dedecore : funestum est a forti atque honesto viro jugulari; funestius, ab eo, cujus vox in præconio quæstu prostitit ² : indignum est a pari vinci aut superiore; indignius, ab inferiore atque humiliore : luctuosum est tradi alteri cum bonis; luctuosius, inimico : horribile est causam capitis dicere; horribilius, priore loco dicere.

Omnia circumspexit Quintius, omnia periclitatus est, C. Aquilli : non prætorem modo, a quo jus impetraret, invenire non ³ potuit, atque adeo ne unde arbitrato ⁴ quidem suo postularet; sed ne amicos quidem Sex. Nævii : quorum sæpe et diu ad pedes jacuit stratus, obsecrans per deos immortales, ut aut secum

12. *Te defendente*. A te defensus iudice, C. Aquilli.

13. *Licet*. Licere, inquit Cicero in Tusc. id dicimus, quod legibus, quod more majorum, institutisque conceditur.

XXXI. 1. *Miserum est*. Modus exaggerandi per exclamationem cum gradatione, in quo Tullius summam quidem ubertatem explicat; sed non ita fastidio occurrit, ut non animum lasset repetita illa adjectivorum et

comparativorum series. Perorationis reliqua pars multo verior ac vehementior.

2. Sic edidit P. Manutius. Antea legebant « quæstum præstitit ». J. V. L.

3. Beck delet *non*, sequuntur MSS Palat. Paris. al. J. V. L.

4. *Arbitrato*. Non potuit Quintius iudicii formulam ex sententia impetrare : quum enim de re pecuniaria contendere cuperet, non ei licuit. Ceterum variae in una causa actiones

jure contenderent, aut injuriam⁵ sine ignominia sibi imponerent. Denique ipsius inimici vultum superbissimum subiit; ipsius Sex. Nævii lacrymans manumprehendit, in propinquorum bonis proscribendis exercitatum; obsecravit per fratris sui mortui cinerem, per nomen propinquitatis, per ipsius conjugem et liberos, quibus propior P. Quintio nemo est, ut aliquando misericordiam caperet; aliquam, si non propinquitatis, at ætatis suæ; si non hominis, at humanitatis rationem haberet; ut secum aliquid, integra sua fama, qualibet, dummodo tolerabili, conditione transigeret. Ab ipso repudiatus⁶, ab amicis ejus non sublevatus, ab omni magistratu agitatus atque perterritus, quem præter te appellet, habet neminem: tibi se, tibi suas omnes opes fortunasque commendat; tibi committit existimationem ac spem reliquæ vitæ. Multis vexatus contumeliis, plurimis jactatus injuriis, non turpis ad te, sed miser confugit. E fundo ornatissimo dejectus, ignominiiis omnibus appetitus, quum illum in suis paternis bonis dominari videret, ipse filiæ nubili dotem conficere non posset, nihil alienum⁷ tamen vita superiore commisit. Itaque te hoc obsecrat, C. Aquilli, ut, quam existimationem, quam honestatem in judicium tuum, prope acta jam ætate decursaque, attulit, eam liceat ei secum ex hoc loco efferre; ne is, de cujus officio nemo

intendi poterant; et ubi multiplex erat iudicium postulationes erant liberæ. E. g. si de furto ageretur, licebat actori res repetere « rei vindicatione », aut « conductione furtiva », aut « manifesto furto ». Tunc vero actor electæ actioni, propriam formulam intendebat, a qua si vel una syllaba descivisset, causam perderet. Vid. ad calc. volum. de ordin. exerc. judic.

5. *Injuriam*. Contenti exacta pecu-

nia, quam non deberet, quæ tamen erat summa injuria, non cogerent eum, sponsione facta, priore loco causam dicere, cum summa sua ignominia; quasi bona sua ex edicto prætoris possessa essent, vadimonii deserti causa.

6. *Repudiatus*. Repulsus.

7. *Alienum*. Indignum anteacta vita: hanc in sententiam supra dixit: « non turpis ad te, sed miser confugit! »

54 M. T. CICER. ORATIO PRO P. QUINTIO.

umquam dubitavit, sexagesimo denique anno, dedecore, macula, turpissimaque ignominia notetur; ne ornamentis ejus omnibus Sex. Nævius pro spoliis abutatur⁸; ne per te ferat⁹, quo minus, quæ existimatio P. Quintium usque ad senectutem perduxit, eadem usque ad rogum prosequatur.

8. *Abutatur.* Tamquam spolia, male judicio poenam subeat, ut non, etc.
utendo, consumat. *Ferre est accipere.* Sic Plant. Merc.

9. *Per te ferat.* Ne hanc ex tuo II, 3: "quod posces feres".

M. TULLII CICERONIS
PRO S. ROSCIO AMERINO
ORATIO

M. TULLII CICERO
PRO S. ROSCIO AMERICANO
ORATIO

ARGUMENTUM.

Quum proscribendi finem L. Sulla kalendis juniis anni 67a denuntiasset; septembri mense insequenti, S. Roscius Amerinus, illius quem defendit Cicero, pater, noctu rediens a cœna interfectus est. A quo incertum: sed neque proscriptus erat, nec esse poterat, quippe qui nobilitatis fautor, et Metellorum, ac Scipionum amicus, omni ope Sullanos semper adjuvisset.

Erant autem ei veteres inimicitiae cum propinquis duobus Rosciis, Capitone et Magno, qui statim, in ejus bona facto impetu, filium ejus S. Roscium nudum e paternis prædiis ejiciunt; et ut se potentioris nominis umbra protegant, societatem cum L. Sullæ liberto gratiosissimo Chrysogono ineunt, qui S. Roscii interfecti fortunas, quæ erant sexagies centena millia sestertium (1,230,000 fr.), duobus millibus sestertium (410 fr.) sibi a dictatore addicendas curat.

Quum autem vererentur, ne quando S. Roscii filius iniquissime ereptum patrimonium repeteret, nec eo superstite, tam opimis spoliis secure frui possent, insidias primo ejus vitæ parare cœperunt; quæ quum non processissent, et S. Roscius Romæ apud Metellos tutissimum haberet perfugium, tunc plenum sceleris ineunt consilium, et accusatorem subornant. Erucium quemdam, qui S. Roscii nomen de parricidio deferat. Et iste quidem illum ita accusavit, ut diceret causam ei suscipiendi maleficii fuisse odium patris, qui filium in rustica prædia relegarat, et etiam exheredare statuerat.

His adversariis brevi oppressus S. Roscius, vir rusticus, fuisset: quamvis enim ei faverent nobilissimi viri Metelli ac Scipiones, dictatoris metu ab illa suscipienda causa deterrebantur, in qua et sicariorum audacia et reipubl. mala essent deploranda. Terrebat in primis Chrysogonus ille «homo e catasta, sanguine Quiritum et proscriptionum licentia ditatus», Plin. XXXV, 18; qui Sullæ gratia ad inimicorum necem abuti posse videbatur. Sed exstitit Tullius, qui tot inimicitias suscipere non dubitans, non minore animo quam ingenio jacentem reum erexit. Noster ille juvenili elatus audacia, illaque fervens indignatione, qua bene natum pectus ad magna impellitur, quum tacerent ceteri

omnes, solus crimen in ipsos criminationis auctores retorsit; in Chrysogonum vehementissime est invectus, ita tamen, ut, dum libertum vere romana voce persequeretur, Sullam invidia purgaret, quasi ignaro illo et imprudente, tot facinora fuissent perpetrata. Conf. *Laharpe, Cours de Littér.* vol. III.

Causa publica est. Sic autem appellantur causæ, constitutæ de criminibus publicis, quæ toti reipublicæ injuriam afferunt, ad ejus perniciem valent, et quorum castigatio pertinet ad exemplum; qualia sunt ambitus, vis publicæ, de sicariis, etc. Præest huic judicio M. Fannius *quæsitō inter sicarios*, i. e. is prætor, cui hoc datum erat, ut eo anno, si quis tamquam sicarius accusaretur, de ea re quæstionem haberet ac judicaret. Prætoris vero in causis publicis illud erat munus, ut iudicium, qui assidebant, sententias colligeret, et ex eorum tabulis (ut apud nos *les jurés*) pronuntiaret. (De prætore urbano plura vide ad *calc. Verr. I.*) Assidebant porro M. Fannio iudices ex ordine senatorio, qui solus tunc judicia exercebat. Equestrem enim ordinem Sulla, lege Cornelia judiciaria, honore illo privaverat.

Acta causa est in foro, in conspectu totius populi, iudicium subsellia circumstantis, A. U. C. 673, L. Cornelio Sulla II, Q. Metello Pio *coss.*, Cicerone septimum et vigesimum annum agente.

Absolutus est S. Roscius, ut ex Plutarcho constat in *Cic. vit.* 3: Ἀναδείξιμος ὢν τὴν συνηγορίαν, καὶ κατορθώσας, θαυμάσθη. Et ex hac causa tantam consequutus est Cicero virtutis ac eloquentiæ laudem, ut non ulla esset causa quæ non ejus digna patrocinio videretur. *Brut. 90. De Offic. II, 14.* An vero in paterna bona restitutus fuerit Roscius, non liquet.

Ab hac statim causa Ciceronem profectum esse in Græciam, metu Sullæ dominantis, idem narrat Plutarchus, cui videtur Eusebius in *Chronico* suffragari. Sed refellit eos ipse Tullius in *Bruto*, cap. 91, ubi veram professionis suæ causam aperit. Anno præterea sequente, Arretinæ mulieris libertatem contra Cottam Romæ defendit.

SYNOPSIS.

Quæstio est in genere judiciali: an Sex. Roscius patrem suum occiderit.

Partes orationis hujus sunt quinque: Exordium, 1-5. Narratio, 6-12. Par-

titio, 13. Contentio, quæ tria capita continet. 1^o Refutationem objecti Roscio criminis, 14-29. 2^o Audaciam duorum Rosciorum, Capitonis et Magni, in quos crimen ita confert orator, ut eos esse cædis auctores multis suspicionibus et argumentis coarguat, 30-42. 3^o Chrysogoni insectationem, 43-49. Peroratio ad finem.

In EXORDIO, 1-5, Cicero exponit quid sit, quod quum tot summi oratores hominesque nobilissimi Roscium defendere potuissent, ipse ejus defensionem aggrediatur, qui cum illis neque ætate, neque ingenio, i. e. eloquentia, neque auctoritate sit comparandus. Illos scilicet alere, quia Chrysogoni, Sullæ liberti, potentiam timeant; eorumque neque dicta obscura esse possint, nec temere dictis concedi; ipse autem si quid liberius dixerit, vel occultum esse, vel ignosci adolescentiæ suæ posse. Præterea se rogatum esse, ut Roscium defenderet, ab illa, quorum neque benivolentiam erga se ignorare, nec auctoritatem aspernari, nec voluntatem negligere debeat, 1. Orat deinde iudices, ut attente bonaque cum venia verba sua audiant, quum ipse se de rebus tantis tamque atrocibus, neque satis commode dicere, neque satis graviter conqueri, neque satis libere vociferari posse intelligat. In primis eos obsecrat, ut hominis innocentissimi calamitatem misereantur, accusatorum autem audaciæ et malitiæ resistent, 2-5.

Sequitur NARRATIO rei gestæ prudentissime sic instituta, ut et innocentia Sex. Roscii eluceat, et cædes Roscii patriæ ab inimicis, qui ejus bona invaserint, perpetrata esse videatur, 6-12.

Absoluta narratione PARTITIONEM orationis facit Cicero, 13. Ita ut primum de crimine ab accusatore conficto, deinde de Rosciorum Capitonis et Magni audacia ad quos cædes Sex. Roscii patris pertinere videatur, denique de intolera-nda et perniciosa Chrysogoni potentia se dicturum ostendat.

Prima igitur parte docet Sex. Roscium a filio nec occisum esse, nec occidi potuisse; quippe qui neque causam, neque facultatem occidendi patri habuerit. Non enim esse adolescentulum corruptum, utpote qui annos quadraginta natus sit, non esse luxuriosum, non obæratum, non cupiditatibus obnoxium. Neque verum esse, quod Erucius dictitet eum patri displicuisse, aut odio fuisse; et quod exheredare pater filium voluerit, id prorsus fictum et commentitium esse, 13-19. Qua re demonstrata, Cicero digreditur ad malitiosam nonnullorum accusatorum, in his Erucii, audaciam; et calumniandi libidinem mire exagitat, 20, 21. Ubi simul ostendit, ad probandum patricidii crimen gravissimas et manifestissimas causas afferri debere, 22. Idque naturæ huic suspicioni reclamantis testimonio, exemplo filiorum T. Clælii, 23. Auctoritate poetarum, 24. Solonis dicto et legibus romanis de patricidarum supplicio, 25, 26, illustrat. Quem locum magnis populi clamoribus exceptum senior reprehendit Cicero (in Orat. cap. 30). Facultatem autem Sex. Roscium patris occidendi non habuisse demonstrat, quod cædem nec ipse, nec per alios sive liberos, sive servos perpetrare potuerit, 27-29.

Secunda parte Cicero ostendit cædem Sex. Roscii patris ad ejus inimicos T. Roscios Capitonem et Magnum, in primis ad Magnum, pertinere. Hunc enim tenuem, avarum, audacem, Sex. Roscio inimicissimum fuisse; itaque causas esse permultas, quæ eum ad cædem impellere potuerint, 30-32. Facultatem vero maleficii ei fuisse ostenditur, quod eo die, quò Sex. Roscius occisus est, Romæ, et quod in societate sicariorum et sectorum fuerit, 33. Denique a consequentibus demonstratur Roscios cædis auctores fuisse, quod Mallius Glaucia, Roscii Magni cliens, cædem Sex. Roscii patris Ameriam non filio, sed Capitoni nuntiaverit, quod hic Chrysogonum impulerit, ut Sex. Roscii nomen in proscriptorum tabulas referret, ejusque bonorum vilissimo pretio manceps fieret, ita ut tria prædia paullo post Capitoni daret, reliqua cum Roscio Magno communiter possideret. Denique Roscium Capitonem, quo minus legati Amerinorum Sullam adire potuerint impedivisse; Roscium Magnum vero Sex. Roscii servos in quæstionem postulatos recusare, 34-42.

Tertio loco Cicero demonstrat bona Sex. Roscii nullo jure a Chrysogono emi potuisse; quia jure venire haud potuerint, nec re vera venierint. Itaque quærit quare civis optimi bona venierint; deinde quare hominis ejus, qui neque proscriptus, neque apud adversarios occisus sit, bona venierint, quum in eos solos lex (Cornelia de proscriptis) scripta sit; deinde quare aliquanto post eam diem venierint, quæ in lege præfinita esset; denique cur tantulo venierint, 43-45. Verum tota hæc pars orationis, qua Cicero tria ista exsequutus erat, intercidit. Superest pars amplificationis, in qua Chrysogoni luxuries, potentia et superbia in odium et invidiam adducitur, 46-49.

In PERORATIONE petit a Chrysogono, ut Roscii filii, in summam miseriam adducti, opibus et pecunia contentus sit, sanguinem et vitam ne petat, 50, 51. Deinde iudices implorat, ut Roscii innocentiam et calamitatem in sua humanitate, justitia, misericordia præsidium invenire patiantur, 52, 53.

Dicendi genus subtile est et acutum; sæpius sententiis ac ornamentis copiosius; quippe quod, ut in præcedenti oratione, nondum deferbuerat, et ejus luxuries seniore stylo erat depascenda.

M. T. CICERONIS ORATIONES.

PRO SEX. ROSCIO AMERINO ORATIO.

ORATIO SECUNDA.

I. **C**REDO ego vos, iudices¹, mirari, quid sit, quod, quum tot summi oratores, hominesque nobilissimi² sedeant, ego potissimum surrexerim, is, qui neque ætate, neque ingenio, neque auctoritate sim cum iis, qui sedeant, comparandus. Omnes enim hi, quos videtis adesse in hac causa, injuriam novo³ scelere conflata⁴ putant oportere defendi⁵; defendere ipsi propter iniquitatem temporum non audent: ita fit, ut adsint, propterea quod officium sequuntur; taceant autem idcirco, quia periculum metuunt. Quid ergo? audacissimus⁵ ego ex omnibus? Minime. At tanto officiosior,

I. 1. *Judices*. Senatores intellige, ad quos Sulla judicia transtulerat.

2. *Nobilissimi*. Metelli, Servillii, Scipiones sedebant inter Roscii advocatos. — *Surrexerim*. Stantes enim et oratores in foro causam, et senatores in curia sententiam dicebant.

3. *Novo*. I. e. inaudito. Nam duo in uno scelere sunt: unum occidisse

Roscii patrem, qui proscriptus non erat; alterum tam horrendum facinus misero filio affingere; ita ut revera patris occisores filium accusent.

4. *Defendi*. Propulsari. — *Iniquitatem temporum*. Sullæ potentiam, cujus offensionem metuunt.

5. Schütz ita distinguit: « Quid? ergo audacissimus ». J. V. L.

quam ceteri? Ne istius quidem laudis ita sum cupidus, ut aliis eam præreptam velim. Quæ me igitur res præter ceteros impulit, ut causam Sex. Roscii reciperem⁶? Quia, si quis istorum dixisset, quos videtis adesse, in quibus summa auctoritas est atque amplitudo; si verbum de republica fecisset, id quod⁷ in hac causa fieri necesse est, multo plura dixisse, quam dixisset, putaretur. Ego etiamsi omnia, quæ dicenda sunt, libere dixero, nequaquam tamen similiter oratio mea exire, atque in vulgus emanare poterit. Deinde, quod ceterorum neque dictum obscurum potest esse, propter nobilitatem et amplitudinem; neque temere dicto concedi⁸, propter ætatem et prudentiam: ego, si quid liberius dixero, vel occultum esse, propterea quod nondum ad rempublicam accessi, vel ignosci adolescentiæ meæ poterit: tametsi non modo ignoscendi ratio, verum etiam cognoscendi⁹ consuetudo jam de civitate sublata est. Accedit illa quoque causa, quod a ceteris forsitan ita petatum sit ut dicerent, ut utrumvis¹⁰ salvo officio se facere posse arbitrantur; a me autem ii contenderunt, qui apud me et amicitia, et beneficiis, et dignitate plurimum possunt: quorum ego neque benivolentiam erga me ignorare, nec auctoritatem aspernari, nec voluntatem negligere debeam.

II. His de causis ego huic causæ patronus exstiti,

6. *Reciperem. Suscipere et recipere differunt: suscipimus sponte; recipimus rogati.* Adnotat Laharpe Cicero-nem semper subijcere quibus rationibus ad causam accesserit; nempe quod publicum munus erat et quoddam magistratus genus, patrociniatio, quæ secundum publicam existimationem erat habenda.

7. *Id quod.* Defendi enim Roscius non potest, nisi Chrysogonus accuse-

tur, nec iste accusari sine Sullæ offensione.

8. *Concedi.* Si quid temere dixerint, ignosci non potest.

9. *Cognoscendi.* Non inauditum condemnandi.

10. *Utrumvis.* Ut Roscium defenderent, ita rogati sunt, ut tamen iis liberum esset aut loqui, aut tacere; quod ab illis rogati sunt quibus erant minus obligati.

non electus unus, qui maximo ingenio, sed relictus ex omnibus, qui minimo periculo possem dicere : neque uti satis firmo præsidio defensus Sex. Roscius, verum uti ne omnino desertus esset.

Forsitan quærat, qui iste terror sit, et quæ tanta formido, quæ tot ac tales viros impediat, quo minus pro capite et fortunis alterius, quemadmodum consueverunt, causam velint dicere. Quod adhuc vos ignorare non mirum est, propterea quod consulto ab accusatoribus ejus rei, quæ conflavit hoc judicium, mentio facta non est.

Quæ res ea est? Bona patris hujusce Sex. Roscii, quæ sunt sexagies¹ : quæ de viro fortissimo et clarissimo, L. Sulla, quem honoris causa nomino, duobus millibus nummum² se dicit emisisse adolescens vel potentissimus hoc tempore nostræ civitatis, L. Cornelius³ Chrysogonus. Is a vobis, judices, hoc postulat, ut, quoniam in alienam pecuniam⁴, tam plenam atque præclaram, nullo jure invaserit, quoniamque ei pecuniæ vita Sex. Roscii obstare atque officere videatur, deleatis ex animo suo suspicionem omnem, metumque tollatis : sese, hoc incolumi, non arbitratur hujus innocentis patrimonium tam amplum et copiosum posse obtinere : damnato et ejecto, sperat se posse, quod adeptus est per scelus, id per luxuriam effundere atque consumere. Hunc sibi ex animo scrupulum⁵,

II. 1. *Sexagies*. Sub. centena millia sestertium (1,230,000 fr.)

2. *Nummum*. I. e. sestertiorum. Nam et *nummus* dicitur absolute et etiam conjuncte *nummus sestertius* (410 fr.). Plutarchus emptya dicit δισχυρίων δραχμῶν, duobus millibus denariorum (1,640 fr.). Vid. Ruald. Animadvers. XXVII.

3. *L. Cornelius*. Sullæ libertus, patroni nomen de more sumpserat.

4. *Pecuniam*. Bona. Nam *pecunie* nomine quandoque significantur bona omnia, tam immobilia quam mobilia.

5. *Scrupulum*. *Scrupulus* est lapillus in calceo latens, qui pressus pedem offendit. Hic sumitur metaphoricè pro ægritudine animi. — Loco

qui se dies noctesque stimulat ac pungit, ut evellatis postulat; ut ad hanc suam prædam tam nefariam ad- jutores vos profiteamini. Si vobis æqua et honesta postulatio videtur, judices, ego contra brevem postulationem affero, et, quomodo mihi persuadeo, aliquanto æquio- rem.

III. Primum a Chrysogono peto, ut pecunia fortune- que nostris contentus sit, sanguinem et vitam ne petat: deinde a vobis, judices, ut audacium sceleri resistatis, innocentium calamitatem levetis, et in causa Sex. Roscii periculum, quod in omnes intenditur, propulsetis.

Quod si aut causa criminis¹, aut facti suspicio, aut quælibet denique vel minima res reperietur, quam- obrem videantur illi nonnihil² tamen in deferendo nomine sequuti; postremo si præter eam prædam, quam dixi, quidquam aliud causæ inveneritis, non re- cusamus, quin illorum libidini Sex. Roscii vita dedatur: sin aliud agitur nihil, nisi ut iis ne quid desit, quibus satis nihil est; si hoc solum hoc tempore pugnatur, ut ad illam opimam præclaramque prædam damnatio Sex. Roscii, velut cumulus, accedat; nonne quum multa³ indigna, tum vel hoc indignissimum est, vos idoneos habitos, per quorum sententias jusque jurandum⁴ id assequantur, quod antea ipsi scelere et ferro assequi consuerunt? qui ex civitate⁵ in senatum propter digni-

« stimulat ac pungit » Ernest. « stimu- let ac pungat ».

III. 1. *Causa criminis*. Accusatio parricidii.

2. *Nonnihil*. Quamdam suspitionis umbram in accusando sequuti. Accu- sationis initium erat nominis ad præ- torem delatio. *Deferri nomen* dicitur, quum is, qui accusare vult quempiam

apud prætorem, v. g. interrogat: « Aio te patrem interfecisse », ut, si neget, ejus nomen in reos referatur, et instituatur accusatio.

3. *Quum multa*. Inter tot res indi- gnas, tum vel hoc indignissimum.

4. *Jusjurandum*. In leges jurabant judices, et religione erant obstricti.

5. *Ex civitate*. Sulla trecentis equi-

tatem, ex senatu in hoc consilium delecti⁶ estis propter severitatem, ab his hoc postulare homines sicarios, atque gladiatores, non modo ut supplicia vitent, quæ a vobis pro maleficiis suis metuere atque horrere debent, verum etiam ut spoliis Sex. Roscii hoc iudicio ornati auctique discedant?

IV. His de rebus tantis, tamque atrocibus, neque satis me commode dicere, neque satis graviter conqueri, neque satis libere vociferari posse intelligo: nam commoditati ingenium, gravitati ætas, libertati tempora sunt impedimento. Huc accedit summus timor¹, quem mihi natura pudorque meus attribuit, et vestra dignitas, et vis adversariorum, et Sex. Roscii pericula. Quapropter vos oro atque obsecro, iudices, ut attente, bonaque cum venia verba mea audiat.

Fide sapientiaque vestra fretus, plus oneris sustuli, quam ferre me posse intelligo. Hoc onus si vos aliqua ex parte allevabitis, feram, ut potero, studio et industria, iudices: sin a vobis, id quod non spero², deserar, tamen animo non deficiam, et id, quod suscepi, quoad potero, perferam: quod si perferre non potero,

tibus in senatum inductis, iudicia olim a C. Graccho (A. U. C. 630) romanis equitibus delata, senatui uni restituit. Quod ad prætorem Aurelium Cottam usque duravit, qui (A. U. C. 683) una cum coss. Pompeio, in iudiciis equites atque ærarii tribunos senatoribus immiscuit.

6. *Delecti*. Certum iudicum numerum, qui suspecti essent, rejiciebant accusator et reus. His rejectis, alios prætor subsortiebatur, quibus iudicum legitimus numerus compleretur. Qui ergo iudices post rejectionem relinquebantur cum iis qui per subsortitionem accesserant, dicebantur *delecti*.

I. *Cic. pars secunda*.

IV. 1. *Summus timor*. Id a natura Ciceroni inaitum fuit, ut dicendi initio maxime permoveretur. Vid. *Divin.* 13. *Cluent.* 18. Neque hunc dicendi timorem deinde aut usus, aut ætas imminuit. Cf. *Deiot.* c. 1, et de *Orat.* I, 26, ubi sub Crassi persona de se ipse ait: «in me ipso sæpissime expior, ut exalbescam in principiis dicendi, et tota mente atque omnibus artubus contremiscam».

2. *Non spero*. Subaud. *futurum*. Sperare enim idem est ac existimare. Vid. *Dnk.* ad *Flor.* III, 1. *Periz.* ad *Sanct. Minerv.* IV, 14, 6. — *Cum fide*. Propter opinionem de fide mea.

opprimi me onere officii malo, quam id, quod mihi cum fide semel impositum est, aut propter perfidiam abjicere, aut propter infirmitatem animi deponere. Te quoque magnopere, M. Fanni, quæso, ut, qualem te jam antea populo romano præbuiſti, quum huic idem quæſtioni³ iudex præesses, talem te et nobis, et populo romano hoc tempore impertias.

V. Quanta multitudo hominum convenerit ad hoc iudicium, vides; quæ sit omnium mortalium expectatio, quæ cupiditas, ut acria ac severa iudicia fiant, intelligis. Longo intervallo¹ iudicium inter sicarios² hoc primum committitur, quum interea cædes indignissimæ maximæque factæ sint. Omnes hanc quæſtionem, te prætore, de manifestis maleficiis quotidianoque sanguine haud remissius³ sperant futuram. Qua vociferatione in ceteris iudiciis accusatores uti consueverunt, ea nos hoc tempore utimur, qui causam dicimus⁴. Petimus abs te, M. Fanni, a vobisque, iudices, ut quam acerrime maleficia vindicetis; ut quam fortissime hominibus audacissimis resistatis; ut hoc cogitetis, nisi in hac causa, qui vester animus sit, ostendetis, eo prurumpere hominum cupiditatem, et scelus, et audaciam, ut non modo clam, verum etiam hic in foro, ante tri-

3. *Quæſtioni*. Id erat nomen publicis iudiciis, quod in eis *quæritur*, an reus nocens sit, an innocens. Quæſtionis iudex erat quasi vicarius prætoris. Iudices sortiebatur, in causis a prætore commissis præerat, testes audiebat, uno verbo ea omnia agebat, quæ essent cognitionis, hoc uno a prætore dissimilis, quod cum ceteris iudicibus iuratus sententiam ferret. Quamvis non inter magistratus id muneris adnumeraretur, ad ædilitios tamen plerumque viros pertinebat, et erat ad præturam gradus. Vid. orat. pro

Cluent. 33, et Rosin. lib. IX, c. 18.

V. 1. *Longo intervallo*. Ab anno 665, quo bellum Marianum coortum est. Vid. Flor. III, 21.

2. *Inter sicarios*. Vetus locutio pro, *de sicariis*. — *Committitur*. Exercetur.

3. *Laud remissius*. Non habitum iri mollius quam antea egisti. Frustra quibusdam corruptus videtur locus. Pro *haud remissius* invenit in schol. Garat. *dimissorum*, i. e. qui impositi hactenus dimissi fuerunt. Non feliciter.

4. *Causam dicimus*. Rei sumus, nos iudicio defendimus, ut infr. 29, 30.

bunal tuum, M. Fanni, ante pedes vestros, iudices, inter ipsa subsellia⁵ cædes futuræ sint.

Etenim quid aliud hoc iudicio tentatur, nisi ut id fieri liceat? Accusant ii, qui in fortunas hujus invaserunt: causam dicit is, cui, præter calamitatem, nihil reliquerunt. Accusant ii, quibus occidi patrem Sex. Roscii bono fuit: causam dicit is, cui non modo luctum mors patris attulit, verum etiam egestatem. Accusant ii, qui hunc ipsum jugulare summe cupierunt: causam dicit is, qui etiam ad hoc ipsum iudicium cum præsidio⁶ venit, ne hic ibidem ante oculos vestros trucidetur⁷. Denique accusant ii, quos populus poscit⁸: causam dicit is, qui unus relictus ex illorum nefaria cæde restat.

Atque ut facilius intelligere possitis, iudices, ea, quæ facta sunt, indigniora esse, quam hæc sunt, quæ dicimus, ab initio, res quemadmodum gesta sit, vobis exponemus; quo facilius et hujus hominis innocentissimi miseras, et illorum audaciam cognoscere possitis, et reipublicæ calamitatem.

VI. Sex. Roscius, pater hujusce, municeps Amerinus¹ fuit, quum genere, et nobilitate, et pecunia, non modo sui municipii, verum etiam ejus vicinitatis facile

5. *Subsellia*. Trina subsellia erant; iudicum, reorum, accusatorum. *Tri-bunal* autem locus erat editior, ex quo, sella curuli posita, magistratus jus dicebat.

6. *Præsidio*. Significat advocatorum consensum, qui vitam Roscii defendunt.

7. *Trucidetur*. Nam adversarii ad iudicium armati venerant.

8. *Poscit*. Ad supplicium propter cædes quotidianas.

VI. 1. *Municeps Amerinus*. Ex urbe

Ameria, municipio romano. Municipi- pes a munere capiendi dicuntur, qui in civitatem rom. recepti, ejus munere erant participes. Munerum istorum ratio erat duplex. Quibus civitas cum suffragio dabatur, ii Romanis vivebant legibus, et habebant jus Romæ petendi magistratus. Quibus autem civitas data erat sine suffragio, ii suis vivebant legibus, sed a vectigalibus et ceteris oneribus erant liberi. Ea varietas mansit ad bellum sociale, hoc est, ad annum 663, quo anno

primus, tum gratia atque hospitiiis² florens hominum nobilissimorum. Nam cum Metellis³, Serviliis, Scipionibus, erat ei non modo hospitium, verum etiam domesticus usus et consuetudo; quas, ut æquum est, familias honestatis⁴ amplitudinisque gratia nomino. Itaque ex suis omnibus commodis hoc solum⁵ filio reliquit: nam patrimonium domestici⁶ prædones vi ereptum possident; fama et vita innocentis ab hospitibus amicisque paternis defenditur.

Hic quum omni tempore nobilitatis fautor fuisset, tum hoc tumultu⁷ proximo, quum omnium nobilium dignitas et salus in discrimen veniret, præter ceteros in ea vicinitate eam partem causamque opera, studio, auctoritate defendit. Etenim rectum putabat, pro eorum honestate se pugnare, propter quos⁸ ipse honestissimus inter suos numerabatur. Posteaquam victoria constituta est, ab armisque recessimus, quum proscri-

municipiorum jus lege Julia exæquatum est.

2. *Hospitiis*. Tantum erat apud veteres hospitii jus, ut sanguinis nexni præferretur, et Jovem illi præesse arbitrantur. Virg. *Æn.* I, 734. Homer. *Odys.* VI, 207.

3. *Metellis*, etc. Significatur procul dubio P. Scipio, pater illius qui postea adoptatus a Q. Metello Pio, socer fuit Cn. Pompeii; et P. Servilius, qui Isauricus est dictus. Quinam Metelli fuerint dubitatur. Certe non erat Nepos consularis, ut Manutius placet, quum c. 28 post Scipionem nominetur. Ceterum hæ tres familiæ propinquitate conjunctæ erant. Nam Servilios et Scipiones fuisse Metellarum filios, et avum illis exstitisse Q. Metellum Macedonicum auctor est Cicero in orat. post Red. et pro Domo. Vid. Burmann. ad Patere. II, 11.

4. *Honestatis*. Vix operæ pretium est monere, numquam apud Romanos viventis cujusquam nomen citari, quin illud omni honoris specie prosequantur. De mortuis non item.

5. *Hoc solum*. Hæc pronuntians, gestum intendebat in nobiles viros S. Roscii advocatos. His autem verbis amolitur a Roscio invidiam tam frequentis ex omni nobilitate advocacy.

6. *Domestici*. Duo Titi Roscii, Sexti gentiles.

7. *Tumultu*. Hoc nomine proprie dicebatur bellum aliquod subitum, quod ob periculi magnitudinem, magnam Urbi trepidationem injiciebat. Hic bellum civile Marianum; quo tempore Cinna et Marius in Urbem recepti omnes nobiles trucidarunt.

8. *Propter quos*. Propter quorum familiaritatem.

berentur⁹ homines, atque ex omni regione caperentur ii, qui adversarii fuisse putabantur, erat ille Romæ frequens, atque in foro, et in ore omnium quotidie versabatur; magis ut exsultare victoria nobilitatis videretur, quam timere, ne quid ex ea calamitatis sibi accideret.

Erant ei veteres inimicitiae cum duobus Rosciis Amerinis, quorum alterum sedere in accusatorum subselliis video; alterum tria hujusce praedia possidere audio: quas inimicitias si tam cavere potuisset, quam metuere solebat, viveret. Neque enim, judices, injuria metuebat: nam duo isti sunt T. Roscii (quorum alteri Capitoni cognomen est; iste, qui adest, Magnus vocatur), homines ejusmodi: alter plurimarum palmarum vetus ac nobilis gladiator¹⁰ habetur; hic autem nuper se ad eum lanistam contulit, qui, quum ante hanc pugnam tiro esset scientia, facile ipsum magistrum scelere audaciaque superavit.

VII. Nam quum hic Sex. Roscius esset Ameriae, T. autem iste Roscius Romæ; quum hic filius assiduus in praediis esset, quumque se voluntate patris rei familiari vitaeque rusticæ dedisset, iste autem¹ frequens Romæ esset; occiditur ad balneas Palatinas², rediens a cœna, Sex. Roscius. Spero ex hoc ipso³ non esse obs-

9. *Proscriberentur*. Sulla primus, et utinam ultimus, exemplum proscriptionis invenit, fixa in foro tabula, in qua erant scripta eorum nomina, quos ad cædem quæri volebat. Hi proscripti dicebantur, quasi palam scripti.

10. *Gladiator*. Sicarius (ut est pro Quint. 7) peritus et in cæde non semel versatus; ita ut victor sæpe palmam reportarit.—*Lanista* vero est ludi gladiatorii magister. — *Contulit*. Ut interficiendorum hominum scientiam ediceret.

VII. 1. *Iste autem*. Iterat idem de Roscio Magno, ut suspicionem injiciat ejus insidiarum in vitam S. Roscii; et hæc est altera causa, unde suspicio nascitur; prima vero illa, quod S. Roscii inimicus.

2. *Palatinas*. Ad Palatinum montem sitas.

3. *Ex hoc ipso*. Quod occiditur S. Roscius, quum inimicus ejus Romæ esset. Itaque supra Sextum filium Ameriæ, Titum eo tempore Romæ fuisse non semel judicibus inculcat.

curum, ad quem suspicio maleficii pertineat. Verum id, quod adhuc est suspiciosum, nisi perspicuum res ipsa fecerit, hunc affinem culpæ judicatote.

Occiso Sex. Roscio, primus Ameriam nuntiat Mallius Glaucia quidam, homo tenuis, libertinus⁴, cliens et familiaris istius T. Roscii; et nuntiat domum, non filii, sed T. Capitonis, inimici; et, quum post horam primam⁵ noctis occisus esset, primo diluculo nuntius hic Ameriam venit. Decem horis nocturnis sex et quinquaginta millia⁶ passuum cisiis⁷ pervolavit; non modo ut exoptatum inimico nuntium primus afferret, sed etiam cruorem inimici quam recentissimum, telumque paullo ante e corpore extractum ostenderet.

Quatriduo, quo hæc gesta sunt, res ad Chrysogonum in castra L. Sullæ Volaterras⁸ defertur; magnitudo pecuniæ demonstratur; bonitas prædiorum (nam fundos decem et tres reliquit, qui Tiberim fere omnes tangunt⁹), hujus inopia et solitudo commemoratur: demonstrant, quum pater hujusce, Sex. Roscius, homo tam splendidus et gratosus, nullo negotio sit occisus, perfacile hunc hominem, incautum, et rusticum, et Romæ ignotum, de medio tolli posse; ad eam rem operam suam pollicentur. Ne diutius vos teneam, judices, societas coitur.

4. *Libertinus*. Ex servitute manumissus, differt a vocabulo *libertus*, quod libertinus dicitur respectu ad conditionem, libertus ad dominum qui manumisit. Sic homo libertinus; Tiro Ciceronis libertus.

5. *Horam primam*. Oriente sole numerabatur hora prima diei, et sic porro usque ad XII. Tum post occasum solis rursum hora prima noctis. Inæquales inde erant horæ, quæ et diurnæ et nocturnæ duodecim semper

fuerunt, dies sive longus esset, sive brevis.

6. *Sex et quinquaginta millia*. Ad nostram rationem 9 myriam. Vid. Tab. Mens. nostri Liv. vol. XII, p. III.

7. *Cisiis*. Vehiculi gallici genus erat.

8. *Volaterras*. Confluxerant Volaterras Mariani quidam a Sulla proscripti; qui, quatuor cohortibus armatorum constitutis, per biennium toleraverunt obsidionem. Strab. V.

9. *Tangunt*. Ergo fertiliores, et ideo

VIII. Quum jam proscriptionis¹ mentio nulla fieret, et quum etiam, qui antea metuerant, redirent, ac jam defunctos sese periculis arbitrarentur, nomen refertur in tabulas Sex. Roscii, hominis studiosissimi nobilitatis; manceps² fit Chrysogonus; tria prædia vel nobilissima Capitoni propria traduntur, quæ hodie possidet; in reliquas omnes fortunas iste T. Roscius, nomine Chrysogoni, quemadmodum ipse dicit, impetum facit. Hæc bona sexagies H-S emuntur duobus millibus nummum.

Hæc omnia, iudices, imprudente³ L. Sulla facta esse certo⁴ scio. Neque enim mirum, quum eodem tempore et ea, quæ præterita sunt⁵, et ea, quæ videntur instare, præparet; quum et pacis constituendæ rationem, et belli gerendi potestatem solus habeat; quum omnes in unum spectent, unus omnia gubernet; quum tot tantisque negotiis distentus sit, ut respirare libere non possit; si aliquid non animadvertat: quum præsertim tam multi occupationem ejus observent, tempusque aucupentur, ut, simul atque ille despexerit⁶, aliquid hujuscemodi moliantur. Huc accedit, quod, quamvis

meliores, quia fructus inde Romam navigiis deportari poterant.

VIII. 1. *Proscriptionis*. Kalendis enim juniis proscriptionum finis fuerat designatus; atqui S. Roscius circa septembris idus interfectus est. Vide inf. cap. 44.

2. *Manceps*. Sic dicitur qui aliquid in auctione emit, quasi *manuceps*, i. e. manu capiens, quia manu sublata, vel digito, licitationes fiebant. (Gall. *adjudicataire*.)

3. *Imprudente*. Non sciente. Oratorie et ad tempus, ut vitaret crudelissimam Sullæ offensionem. Constat enim multos qui nihil negotii cum

eo habuerant, ipso connivente, fuisse obtruncatos. Vid. Val. Max. IX., 2.

4. Rectius quam certe. J. V. L.

5. *Ea, quæ præterita sunt*. Sub. *corrigat, reparaet*. Sæpe enim idem verbum duobus nominibus ita adjicitur, ut alterutri tantum conveniat. Sic ad Att. X, 4: « horum ego summorum imperatorum non modo res gestas non antepono meis, sed ne fortunam ipsam, qua illi florentissima, nos duriore conflictati videmur ».

6. *Despexerit*. Oculos alio rejecerit; quod faciunt qui somno oppressi, oculos demittunt, vel alicui rei attendere desinunt.

ille felix⁷ sit, sicut est, tamen in tanta felicitate nemo potest esse in magna familia, qui neminem neque servum, neque libertum improbum habeat.

Interea iste T. Roscius, vir optimus, procurator Chrysogoni, Ameriam venit; in prædia hujus invadit; hunc miserum, luctu perditum, qui nondum etiam omnia paterno funeri justa⁸ solvisset, nudum ejicit domo, atque focus patriis diisque penatibus præcipitem, judices, exturbat; ipse amplissimæ pecuniæ fit dominus. Qui in sua re fuisset egentissimus, erat, ut fit, insolens in aliena. Multa palam domum suam aufererat; plura clam de medio removebat; non pauca suis adjutoribus large effuseque donabat; reliqua, constituta auctione, vendebat.

IX. Quod Amerinis usque eo visum est indignum, ut urbe tota fletus gemitusque fieret. Etenim multa simul ante oculos versabantur: mors hominis florentissimi, Sex. Roscii, crudelissima; filii autem ejus egestas indignissima, cui de tanto patrimonio prædo iste nefarius ne iter quidem¹ ad sepulcrum patrum reliquisset; bonorum emptio flagitiosa, flagitiosa possessio, furta, rapinæ, donationes. Nemo erat, qui non ardere omnia mallet, quam videre in Sex. Roscii, viri optimi atque honestissimi, bonis jactantem se, ac dominantem T. Roscium.

7. *Felix*. Ob perpetuos rerum successus, Sulla sibi cognomen *Felicitis* adscivit, filiumque *Faustum* appellavit. Imo senatus ei pro Rostris statuem equestrem auream posuit hoc titulo: L. CORNELIO SYLLÆ IMPERATORI FORTVNATO. De quo Plinius: « unus hominum ad hoc ævi Felicitis sibi nomen asseruit L. Sulla, civili nempe sanguine ac patriæ oppugnatione adoptatus. Et quibus felicitatis

inductus argumentis? quod proscribere tot millia civium ac trucidare potuisset! »

8. *Justa*. I. e. omne funerandi officium. Quæ pietas erga mortuos erat justitiæ genus.

IX. 1. *Ne iter quidem*. Sepulcra olim erant aut propter vias publicas, aut in agris; et ad ea iter necesse erat, propter religionem. Unde in vendendis prædiis jus itus, aditus, ambitus,

Itaque decurionum² decretum statim fit, ut decemprimi proficiscantur ad L. Sullam, doceantque eum, qui vir Sex. Roscius fuerit; conquerantur de istorum scelere et injuriis; orent, ut et illius mortui famam, et filii innocentis fortunas conservatas velit. Atque ipsum decretum, quæso, cognoscite. **DECRETUM DECURIONUM.** Legati in castra veniunt. Intelligitur, iudices, id quod jam ante dixi, imprudente L. Sulla scelera hæc et flagitia fieri: nam statim Chrysogonus et ipse ad eos accedit, et homines nobiles allegat³ iis, qui peterent, ne ad Sullam adirent, et omnia Chrysogonum, quæ vellent, esse facturum pollicerentur. Usque adeo autem ille pertimuerat, ut mori mallet, quam de his rebus Sullam doceri. Homines antiqui⁴, qui ex sua natura ceteros fingerent, quum ille confirmaret, sese nomen Sex. Roscii de tabulis exempturum, prædia vacua⁵ filio traditurum; quumque id ita futurum T. Roscius Capito⁶, qui in decem legatis erat, adpromitteret⁷, crediderunt: Ameriam re inorata reverterunt. Ac primo rem differre quotidie ac procrastinare illi cœperunt;

funeris faciendi causa, venditori nominatum excipiebatur; et sæpius in veterum tumulis inscriptum illud reperitur: **ADITVS. LIBER. EXCEPTVS. EST.** Ceterum illud juris Roscio adeptum erat, quod venditio facta erat non Roscii, sed Sullæ nomine.

2. *Decurionum.* *Decuriones* erant in municipiis et coloniis quod Romæ senatores. Sic dictos eos fuisse ait Pomponius Digest. L. 239, § 5, quod initio, quum colonie deducerentur, decima pars earum, consilii publici gratia, describeretur.—*Decemprimi* autem erant decuriones primi decem, quorum in administranda civitate præcipua erat auctoritas.

3. *Allegat.* Privatum ad illos mittit.

4. *Antiqui.* Antiqua fide et virtute. Sic ad Att. IX, 18: « vide quam sim antiquorum hominum ». Sic Græcis ἀρχαῖοι, παλαιοί.

5. *Vacua.* I. e. universa, tota. Formula apud JCtos usitata, qua significamus nos de nostro jure, deque possessione decedere, et omnino vacuum alteri tradere. Ne enim *vacua* eodem sensu intelligas, quo sequior ætas dixit *vacantia*.

6. *Capito.* Unus enim erat e primariis decurionibus.

7. *Adpromitteret.* *Adpromissor* est, qui, quod alter suo nomine promisit, idem pro eo quoque promittit. *Fest.*

deinde aliquanto lentius; nihil agere, atque deludere; postremo, id quod facile intellectum est, insidias vitæ hujusce Sex. Roscii parare; neque sese arbitrari posse diutius alienam pecuniam, domino incolumi, obtinere.

X. Quod is simul atque sensit, de amicorum cognatorumque sententia Romam confugit, et sese ad Cæciliam¹, Nepotis filiam, quam honoris causa nomino, contulit, qua pater usus erat plurimum: in qua muliere, judices, etiam nunc, id quod omnes semper existimaverunt, quasi exempli causa², vestigia antiqui officii remanent. Ea Sex. Roscium inopem, ejectum domo, atque expulsum ex suis bonis, fugientem latronum tela et minas, recepit domum; hospitique³ oppresso jam, desperatoque ab omnibus, opitulata est. Ejus virtute, fide, diligentia factum est, ut hic potius vivus in reos, quam occisus in proscriptos⁴ referretur.

Nam postquam isti intellexerunt, summa diligentia vitam Sex. Roscii custodiri, neque sibi ullam cædis faciendæ potestatem dari, consilium ceperunt plenum sceleris et audaciæ, ut nomen hujus de parricidio deferrent; ut ad eam rem aliquem accusatorem veterem⁵ compararent, qui de ea re posset dicere aliquid, in qua re nulla subesset suspicio; denique, ut, quoniam crimine non poterant, tempore⁶ ipso pugnarent. Ita loqui homines: Quod judicia tam diu facta non es-

X. 1. *Cæciliam*. Metellam, Q. Cæcili Metelli Nepotis filiam, Sullæ uxorem, quam ille constanter coluit, et ejus victus precibus, Roscium judicio defendi contra Chrysogonum passus est. Vid. Indic. Histor.

2. *Exempli causa*. Ut quasi testimonio sit olim fuisse homines tanto officio, et probitate præditos.

3. *Hospitique*. Supra dixit S. Roscio

patri hospitii necessitudinem fuisse cum Metellis.

4. *In proscriptos*. Ut pater, qui posteaquam interfectus est, in proscriptos est relatus.

5. *Veterem*. Multis in accusationibus versatum; quod invidiosum erat.

6. *Tempore*. Temporis uterentur opportunitate. Sic inf. 13, « potentia pugnat ».

sent⁷, condemnari eum oportere, qui primus in iudicium adductus esset; huic autem patronos propter Chrysogoni gratiam defuturos; de bonorum venditione, et de ista societate verbum esse facturum neminem; ipso nomine parricidii et atrocitate criminis fore, ut hic nullo negotio tolleretur, quum a nullo defensus esset. Hoc consilio, atque adeo hac amentia impulsus, quem ipsi, quum cuperent, non potuerunt occidere, eum jugulandum vobis tradiderunt.

XI. Quid primum querar? aut unde potissimum, iudices, ordiar? aut quod, aut a quibus auxilium petam? Deorumne immortalium, populine romani, vestramne, qui summam potestatem habetis, hoc tempore fidem implorem? Pater occisus nefarie, domus obsessa, ab inimicis bona adempta, possessa, direpta; filii vita infesta¹, sæpe ferro atque insidiis appetita: quid ab his tot maleficiis sceleris abesse videtur? Tamen hæc aliis nefariis cumulant atque adaugent; crimen incredibile confingunt; testes in hunc et accusatores hujusce pecunia comparant; hanc conditionem misero ferunt, ut optet², utrum malit cervices Roscio³ dare, an insutus in culeum⁴ per summum dedecus vitam amittere. Patronos huic defuturos putaverunt; desunt: qui libere dicat, qui cum fide defendat, id quod in hac causa est satis, quoniam quidem suscepi, non deest profecto, iudices. Et forsitan in suscipienda causa temere, impulsus adolescentia, fecerim: quoniam quidem semel

7. *Facta non essent.* Apparet inde hoc primum publicum iudicium fuisse, ex quo tempore Sulla dictaturam obtinebat.

XI. 1. *Infesta.* Periculo obnoxia. *Infestus* ancipiti significatione, tam de eo dicitur qui malum infert, quam

de eo cui infertur. A. Gell. IX, 2.

2. *Ut optet.* Ut eligat. Hinc *optio* potestas eligendi.

3. *Roscio.* Magno, qui hic adest.

4. *I. i. culeum, supplicium parricidarum.* Glossam Lamb. sustulit. J. V. L. — De hoc vid. infr. 24, 25.

suscepi, licet, hercules, undique omnes in me terrores, periculaque impendeant⁵ omnia, succurram, atque subibo. Certum est, deliberatumque, quæ ad causam pertinere arbitror, omnia non modo dicere, verum libenter, audacter, libereque dicere: nulla res tanta existet, iudices, ut possit vim mihi maiorem adhibere metus, quam fides. Etenim quis tam dissoluto animo est, qui, hæc quum videat, tacere ac negligere possit? Patrem meum, quum proscriptus non esset, jugulastis; occisum in proscriptorum numerum retulistis; me domo mea per vim expulstis; patrimonium meum possidetis. Quid vultis amplius? Etiamne ad subsellia cum ferro⁶ atque telis venistis, ut hic aut juguletis, aut condemnetis⁷ Sex. Roscium?

XII. Hominem longe audacissimum nuper habuimus in civitate, C. Fimbriam¹, et, quod inter omnes constat, nisi inter eos, qui ipsi quoque insaniunt, insanissimum. Is quum curasset, in funere C. Marii², ut Q. Scævola³ vulneraretur, vir sanctissimus atque ornatissimus nostræ civitatis (de cuius laude neque hic locus est ut multa dicantur, neque plura tamen dici possunt, quam populus romanus memoria retinet),

5. Græv. « impendant, succurram atque omnia subibo ». Male.

6. Cum ferro. Vid. sup. cap. 5.

7. Condemnetis. Per vim damnandum curetis.

XII. 1. C. Fimbriam. De Fimbria sic loquitur Cic. in Bruto: « omnia magna voce dicens, verborum sane bonorum cursu quodam incitato; ita furebat tamen, ut mirarere tam alias res agere populum, ut esset insano inter disertos locus ». C. Fimbria L. Flaccum, cuius erat legatus in Asia, interfecit, et imperium ad se transtulit. Ab exercitu postea desertus, Per-

gami, in templo Æsculapii, sua et servi manu, ipse est interfectus.

2. Funere C. Marii. Qui mense primo consulatus septimi decessit, A. U. C. 667.

3. Q. Scævola. Pontifex maximus, ad quem juris civilis studio M. Tullius se contulit adolescens. In funere Marii vulneratus, et triennio post, Carbone et Mario coss. in vestibulo ædis Vestæ trucidatus est jussu L. Damisippi prætoris. Cic. de Nat. Deor. III, 32. Vell. II, 26. Oros. V, 20. Damisippus autem, victoria constituta, L. Sullæ jussu est interfectus.

diem Scævola dixit⁴, posteaquam comperit eum posse vivere. Quum ab eo quæreretur, quid tandem accusaturus esset eum, quem pro dignitate ne laudare quidem quisquam satis commode posset: aiunt, hominem, ut erat furiosus, respondisse, quod non totum telum corpore recepisset; quo populus romanus nihil vidit indignius, nisi ejusdem viri mortem, quæ tantum potuit, ut omnes cives suos perdidit⁵ et affligerit; quos quia servare per compositionem⁶ volebat, ipse ab iis interemptus est.

Estne hoc⁷ illi dicto atque facto Fimbriæ non similimum? Accusatis Sex. Roscium: quid ita? quia de manibus vestris effugit, quia se occidi passus non est. Illud quia in Scævola factum est, magis indignum videtur; hoc, quia fit a Chrysogono, num est ferendum? Nam, per deos immortales! quid est in hac causa, quod defensionis indigeat? qui locus ingenium patroni requirit, aut oratoris eloquentiam magnopere desiderat? Totam causam, judices, explicemus, atque ante oculos expositam consideremus: ita facillime, quæ res totum iudicium contineat⁸, et quibus de rebus nos dicere oporteat, et quid vos sequi conveniat, intelligetis.

XIII. Tres sunt res, quantum ego existimare possum, quæ obstant hoc tempore Sex. Roscio, crimen adversariorum, et audacia, et potentia. Criminis confectionem accusator Erucius suscepit; audaciæ partes

4. *Diem dixit.* Ad populum accusare, privati hominis non erat, sed proprie tribunorum plebis, quo tum in magistratu Fimbriam fuisse credamus. Vid. Val. Max. IX, de factis sceleratis.

5. *Perdiderit.* Quia illo extincto invasit proscriptio; quum ille vivus forte composuisset conditionibus inæstima hæc bella et sic cives servasset.

Ernestius verba loco mota suspicatur. Frustra.

6. *Compositionem.* Conciliationem.

7. *Hoc.* Factum adversariorum nostrorum.—Rufinian. habet « Fimbriano simillimum », quæ lectio Ruhnkennio placet.

8. *Contineat.* Quod caput sit iudicii, de quo sit iudicandum.

Roscii sibi poposcerunt; Chrysogonus autem is, qui plurimum potest, potentia pugnat. De hisce omnibus rebus me dicere oportere intelligo. Quid igitur¹ est? non eodem modo de omnibus, ideo quod prima illa res ad meum officium pertinet; duas autem reliquas vobis populus romanus imposuit: ego crimen² oportet diluam; vos et audaciæ resistere, et hominum ejusmodi perniciosam atque intolerandam potentiam primo quoque tempore extinguere atque opprimere debetis.

Occidisse patrem Sex. Roscius arguitur. Scelestum, dii immortales! ac nefarium facinus, atque ejusmodi, quo uno maleficio scelera omnia complexa³ esse videantur! Etenim si, id quod præclare a sapientibus dicitur, vultu⁴ sæpe læditur pietas; quod supplicium satis acre reperietur in eum, qui mortem obtulerit parenti, pro quo mori ipsum, si res postularet, jura divina atque humana cogeant? In hoc tanto, tam atroci, tam singulari maleficio, quod ita raro⁵ exstitit, ut, si quando auditum sit, portentis ac prodigii simile numeretur, quibus tandem te, C. Eruci, argumentis accusatorem censes uti oportere? Nonne et audaciam ejus, qui in crimen vocetur, singularem ostendere, et mores feros, immanemque naturam, et vitam vitiis flagitiisque omnibus deditam, et denique omnia ad perniciem profl-

XIII. 1. *Quid igitur est?* Quid ergo? ideo de omnibus eodem modo loquar? Non ita: nam prima res, etc. — Frustra obscurus Hotomanno videtur locus.

2. *Crimen.* Criminationem.

3. *Complexa.* Præter consuetudinem, in patiendi significatione, pro « comprehensa ». Vid. Priscian. pag. 791, ed. Putsch.

4. *Vultu.* Importuno, qualis solet esse indignantium.

5. *Raro.* Romæ per annos sexcentos quinquaginta a Romuli temporibus nemo inventus est qui scelus tam immane perpetrasset. Primus omnium Publicius Malleolus, ob matrem interemptam, insutus culeo in mare est præcipitatus A. U. C. 652. Vide T. Liv. Epit. LXVIII. Rhet. ad Her. I, 13. Oros. V, 3.

gata⁶ atque perdita? quorum tu nihil in Sex. Roscium, ne objiendi quidem causa, contulisti.

XIV. Patrem occidit Sex. Roscius. Qui homo? Adolescentulus corruptus, et ab hominibus nequam inductus? Annos natus magis¹ quadraginta. Vetus videlicet sicarius, homo audax, et sæpe in cæde versatus? At hoc ab accusatore ne dici quidem audistis. Luxuries igitur hominem nimirum, et æris alieni magnitudo, et indomitæ animi cupiditates ad hoc scelus impulerunt. De luxuria purgavit Erucius, quum dixit hunc ne in convivio² quidem ullo fere interfuisse: nihil autem umquam debuit: cupiditates porro quæ possunt esse in eo, qui, ut ipse accusator objecit, ruri semper habitavit, et in agro colendo vixerit? quæ vita maxime disjuncta est a cupiditate, et cum officio conjuncta.

Quæ res igitur tantum istum furorẽ Sex. Roscio objecit³? Patri, inquit, non placebat. Patri non placebat? Quam ob causam? necesse est enim, eam quoque justam, et magnam, et perspicuam fuisse. Nam, ut illud incredibile est, mortem oblatam esse patri a filio sine plurimis et maximis causis; sic hoc verisimile non est, odio fuisse parenti filium sine causis multis, et magnis, et necessariis.

Rursus igitur eodem revertamur, et quæramus, quæ tanta vitia fuerint in unico⁴ filio, quare is patri displiceret. At perspicuum est, nullum fuisse. Pater. igitur

6. *Profligata*. Deducta. De verbo *profligare* consulendus A. Gellius, XV, 5.

XIV. 1. *Magis*. Sic latine dici negat Græv. Cur neget, nescio. Neque enim *magis natus* intellig. est, sed « annos natus magis quam XL ». Idem h. l. sonat ac *amplius quam*. Et de quantitate usurpatur, ut sæpe *plus, amplius*.

2. *In convivio*. De Romanorum intemperantia, vide Athen. IV.

3. *Objecit*. I. e. iniecit. Sic T. Liv. XXIX, 8. Sic « mortem offerre » in Vatin.

4. *Unico*. Pondus est hoc in verbo. Necesse est enim ingentia sint in unico filio vitia, ut parentum suorum in odium incurrat.

amens, qui odisset eum sine causa, quem procrearat. At is quidem fuit omnium constantissimus⁵. Ergo illud jam perspicuum profecto est, si neque amens pater, neque perditus filius fuerit, neque odii causam patri, neque sceleris filio fuisse.

XV. Nescio, inquit, quæ causa odii fuerit; fuisse odium intelligo: qui antea, quum duos filios haberet, illum alterum, qui mortuus est, secum omni tempore volebat esse; hunc in prædia rustica relegarat. Quod Erucio accidebat in mala nugatoriaque accusatione, idem mihi usu venit in causa optima. Ille, quomodo crimen commentitium confirmaret, non inveniebat; ego, res tam leves qua ratione infirmem ac diluam, reperire non possum.

Quid ais, Eruci? tot prædia, tam pulchra, tam fructuosa Sex. Roscius filio suo, relegationis ac supplicii gratia, colenda ac tuenda tradiderat? Quid hoc? patresfamilias, qui liberos habent, præsertim homines illius ordinis¹, ex municipiis rusticanis, nonne optatissimum sibi putant esse, filios suos rei familiari maxime servire, et in prædiis colendis operæ plurimum studiique consumere?

An amandarat hunc sic, ut esset in agro, ac tantummodo aleretur ad villam²? ut commodis omnibus careret? Quid? si constat, hunc non modo colendis prædiis præfuisse, sed certis fundis, patre vivo, frui solitum esse, tamenne hæc attentata³ vita, et rusticana, relegatio atque amandatio appellabitur? Vides, Eruci,

5. *Constantissimus*. Qui vel maxime sibi constabat animo.

XV. 1. *Illius ordinis*. Suorum municipiorum ditissimi ac nobilissimi, qualem fuisse S. Roscium dixit.

2. *Ad villam*. In villa. Sic Verr. I:

« hæc duo signa quæ nunc ad impluvium tuum stant », i. e. in impluvio.

3. *Attenta*. Subaud. *ad rem*. Integra locutio apud Terent. *Adelph. V, 8*: « attenti ad rem nimium in senectute sumus », i. e. nimium parci.

quantum distet argumentatio tua ab re ipsa, atque a veritate. Quod consuetudine patres faciunt, id, quasi novum, reprehendis; quod benivolentia fit, id odio factum criminaris; quod honoris causa pater filio suo concessit, id eum supplicii causa fecisse dicis. Neque hæc tu non intelligis; sed usque eo, quid arguas, non habes, ut non modo tibi contra nos dicendum putes, verum etiam contra rerum naturam, contraque consuetudinem hominum, contraque opiniones omnium.

XVI. At enim ¹, quum duos filios haberet, alterum a se non dimittebat, alterum ruri esse patiebatur. Quæso; Eruci, ut hoc in bonam partem accipias: non enim exprobrandi causa, sed commonendi gratia dicam. Si tibi fortuna non dedit, ut patre certo ² nascerere, ex quo intelligere posses, qui animus patrius in liberos esset, at natura certe dedit, ut humanitatis non parum haberes. Eo accessit studium doctrinæ, ut ne a literis quidem alienus esses. Ecquid tandem tibi videtur, ut ad fabulas veniamus, senex ille Cæcilianus ³ minoris facere Eutychem, filium rusticum, quam illum alterum, Chærestratum (nam, ut opinor, hoc nomine est)? alterum in urbe secum honoris causa habere? alterum rus supplicii causa relegasse? Quid ad istas ineptias abis? inquires. Quasi vero ⁴ mihi difficile sit quamvis multos nominatim proferre, ne longius abeam, vel tribules ⁵, vel vicinos meos, qui suos liberos, quos plurimi faciunt, agricolas assiduos esse cupiunt. Verum

XVI. 1. *At enim.* Objectio cujus sensus est: Si tu ex incerto patre natus, nescis quis sit patrius in liberos amor, tamen vel literis scire potuisti, a quibus non es alienus, quemadmodum filios patres diligant.

2. *Certo.* Legitimo. A matris infamia mordet Erucium.

3. *Cæcilianus.* Inductus a Cæcilio, qui, poeta comicus, Romæ florebat, Ennii temporibus, circa annum 180 ante Christum.

4. *Quasi vero.* Subjectio. Quasi penuria exemplorum ad fabulas decurrerim; non mihi difficile, etc.

5. *Tribules.* Qui ex eadem tribu

homines notos sumere odiosum est, quum et illud incertum sit, velintne hi sese nominari; et nemo vobis magis notus futurus sit, quam est hic Eutyclus; et certe ad rem nihil intersit, utrum hunc ego comicum adolescentem, an aliquem ex agro Veiente nominem. Etenim hæc conficta⁶ arbitror a poetis esse, ut effectos nostros mores in alienis personis, expressamque imaginem nostræ vitæ quotidianæ videremus. Age nunc, refer animum, sis⁷, ad veritatem, et considera non modo in Umbria atque in ea vicinitate, sed in his veteribus municipiis, quæ studia a patribus familias maxime laudentur: jam profecto te intelliges, inopia criminum, summam laudem Sex. Roscio vitio et culpæ dedisse.

XVII. At non modo hoc patrum voluntate liberi faciunt; sed permultos et ego novi, et, nisi me fallit animus, unusquisque vestrum¹, qui et ipsi incensi sunt studio, quod ad agrum colendum attinet; vitamque hanc rusticam, quam tu probro et crimini putas esse oportere, et honestissimam et suavissimam esse arbitrantur. Quid censes² hunc ipsum Sex. Roscium, quo studio, et qua intelligentia esse in rusticis rebus? Ut ex his propinquis ejus, hominibus honestissimis, audio, non tu in isto artificio accusatorio callidior³ es, quam hic in suo. Verum, ut opinor, quoniam ita Chrysogono videtur, qui huic nullum prædium reliquit, et

sunt mecum, et vicini urbis Arpini, meæ patriæ.

6. *Conficta*. Dixerat jam antea Livius Andronicus, qui primus apud Latinos docuit comœdias et tragœdias, « comœdiam esse quotidianæ vitæ speculum ». — Loco *videremus* edit. Venet. *videamus*.

7. *Sis*. Si vis: verbum comicum.

XVII. 1. *Unusquisque vestrum*. Sabaud. *novit*.

2. *Quid censes*. Trajectio Ciceroni non insolens. Ordo vult ut verbum *censes* collocetur post *esse*; et ut prima vox *Quid* pronuntietur per interrogationem: *Quid?* Sic de Orat. I, 27. Agrar. II, 17, etc.

3. *Callidior*. Peritior, exercitator.

artificium obliviscatur, et studium deponat, licebit⁴. Quod tametsi miserum et indignum est, feret tamen æquo animo, judices, si per vos vitam et famam potest obtinere. Hoc vero est, quod ferri non potest, si et in hanc calamitatem venit propter prædiorum bonitatem et multitudinem; et, quod ea studiose coluit, id erit ei maxime fraudi: ut parum miseræ sit, quod aliis coluit, non sibi; nisi etiam, quod omnino coluit, crimini fuerit.

XVIII. Næ tu, Eruci, accusator esses ridiculus, si illis temporibus natus esses, quum ab aratro¹ arcescebantur, qui consules fierent. Etenim, qui præesse agro colendo flagitium putes, profecto illum Attilium², quem sua manu spargentem semen, qui missi erant, convenerunt, hominem turpissimum atque inhonestissimum³ judicares. At hercule majores nostri longe aliter et de illo, et de ceteris talibus viris existimabant. Itaque ex minima tenuissimaque republica maximam et florentissimam nobis reliquerunt. Suos enim agros studiose colebant, non alienos cupide appetebant: quibus rebus⁴, et agris, et urbibus, et nationibus, rempublicam atque hoc imperium, et populi romani nomen auxerunt.

Neque ego hæc eo profero, quo⁵ conferenda sint cum hisce, de quibus nunc quærimus; sed ut illud intelli-

4. *Licebit.* Vehemens ironia, ex qua mox in vividissimam assurgit indignationem orator.

XVIII. 1. *Ab aratro.* De his plura vide apud Plin. maj. VIII, 4. A. Gell. IV, 12. Columell. præfat. *Viatoribus* autem nomen erat iis qui antiquitus Romanos procures ex villis et agris suis arcescebant.

2. *Attilium.* Qui a serendo Serranus dictus est. Virgil. *Æn.* VI, 844.

Consul fuit A. U. C. 496, et de Pœnis eodem anno triumphavit.

3. *Inhonestissimum.* *Honestus* dicitur qui honoribus seu dignitatibus quas aut ipse, aut majores ejus sunt assequuti, est insignis. Contra *inhonestus*, vilis et subjectæ sortis homo; vilis operarius.

4. *Rebus.* Artibus.

5. *Quo.* *Elegantius pro quod.* Sic orat. pro Quint. 11.

gatur, quum apud majores nostros summi viri, clarissimique homines, qui omni tempore ad gubernacula reipublicæ sedere debebant, tamen in agris quoque colendis aliquantum operæ temporisque consumpserint, ignosci oportere ei homini, qui se fateatur esse rusticum, quum ruri assiduus semper vixerit: quum præsertim nihil esset, quod aut patri gratius, aut sibi jucundius, aut revera honestius facere posset.

Odium igitur acerrimum patris in filium ex hoc, opinor, ostenditur, Eruci, quod hunc ruri esse patiebatur: numquid est aliud? Imo vero, inquit, est: nam istum exheredare in animo habebat. Audio: nunc dicis aliquid, quod ad rem pertineat: nam illa, opinor, tu quoque concedis levia esse, atque inepta. Convivia cum patre non inibat: quippe qui in oppidum⁶ quidem, nisi perraro, veniret. Domum suam istum non fere quisquam vocabat: nec mirum, qui neque in urbe viveret, neque revocaturus⁷ esset.

XIX. Verum hæc quoque tu intelligis esse nugatoria. Illud, quod coepimus, videamus; quo certius argumentum odii reperiri nullo modo potest. Exheredare pater filium cogitabat. Mitto quærere, qua de causa; quæro, qui¹ scias: tametsi te dicere atque enumerare causas omnes oportebat; et id erat certi² accusatoris officium, qui tanti sceleris argueret, explicare omnia vitia atque peccata filii, quibus incensus parens potuerit animum inducere, ut naturam ipsam vinceret; ut amorem illum penitus insitum ejiceret ex animo; ut

6. *Oppidum*. Ameriam.

7. *Revocaturus*. *Revocare* est eum, a quo vocatus ad convivium fueris, vicissim invitare. Vid. Phæd. I, 26. Lactant. VI, 12, et Martial. III, 27: « Numquam me revocas, venias quum

sæpe vocatus: Ignosco, nullam si modo, Galle, vocas ».

XIX. 1. *Qui*. Quomodo.

2. *Certi*. Fide digni, cui merito credas, quia certis argumentis accusationem suam probat.

denique patrem esse sese oblivisceretur: quæ sine magnis hujusce peccatis accidere potuisse non arbitror.

Verum concedo tibi, ut ea prætereas, quæ, quum taces, nulla esse concedis. Illum quidem voluisse exheredare, certe tu planum facere debes. Quid ergo affers, quare id factum putemus? Vere nihil potes dicere. Finge aliquid saltem commode, ut ne plane videaris id facere, quod aperte facis, hujus miseri fortunis, et horum virorum talium³ dignitati illudere. Exheredare filium voluit: quam ob causam? Nescio. Exheredavitne? Non. Quis prohibuit? Cogitabat. Cogitabat? cui dixit? Nemini. Quid est aliud, iudicio, ac legibus, ac majestate vestra abuti ad quæstum atque ad libidinem, nisi hoc modo accusare, atque id objicere, quod planum facere non modo non possis⁴, verum ne coneris quidem? Nemo nostrum est, Eruci, quin sciat, tibi inimicitias cum Sex. Roscio nullas esse: vident omnes, qua de causa huic inimicus venias; sciunt hujusce⁵ pecunia te adductum esse. Quid ergo est? ita tamen quæstus te cupidum esse oportebat, ut horum existimationem, et legem Remmiam⁶ putares aliquid valere oportere.

XX. Accusatores¹ multos esse in civitate utile est, ut metu contineatur audacia: verumtamen hoc ita est utile, ut ne plane illudamur ab accusatoribus. Inno-

3. *Virorum talium.* Judicium, quibus illudere videris.

4. *Non possis.* Modus efferendi potentialis, qui non ad Erucium refertur, sed generatim usurpatur, quasi dicat « non possit aliquis ». Judices enim alloquitur, ut apparet ex verbis « majestate vestra ».

5. *Hujusce.* T. Roscii Magni, qui hic adest, pecunia corruptum, ad accusandum S. Roscium descendisse.

6. *Remmiam.* De calumniatoribus. Vide Ind. Legum. Olim « Memmiam », vitiose.

XX. 1. *Accusatores.* Accusatorum Romæ triplex genus: nempe adolescentium, qui gloriæ spe, potentissimum quemque accusabant. Alterum genus fuit virorum fortium et in arte oratoria jam confirmatorum, qui aut privati odii causa, aut reip. studio adducti, alios persequerentur. Ter-

cens est quispiam : verumtamen², quamquam abest a culpa, suspicione tamen non caret. Tametsi miserum est, tamen ei, qui hunc accuset, possim aliquo modo ignoscere : quum enim aliquid habeat, quod possit criminosae ac suspiciosa dicere, aperte ludificari et calumniari sciens non videatur. Quare facile omnes patimur esse quam plurimos accusatores, quod innocens, si accusatus sit, absolvi potest; nocens, nisi accusatus fuerit, condemnari non potest. Utilius est autem absolvi innocentem, quam nocentem causam non dicere. Anseribus³ cibaria publice locantur, et canes⁴ aluntur in Capitolio, ut significant, si fures venerint. At fures internoscere non possunt : significant tamen, si qui noctu in Capitolium venerint; et quia id est suspiciosum, tametsi bestiae sunt, tamen in eam partem potius peccant⁵, quae est cautior. Quod si luce quoque canes latrent, quum deos salutatum aliqui venerint; opinor, iis crura suffringantur, quod acres sint etiam tum, quum suspicio nulla sit. Simillima est accusatorum ratio. Alii vestrum anseres sunt, qui tantummodo cla-

tium denique eorum qui accusatoriam vivebant vitam, improbam mercedem ex aliena calamitate quærentes. Hi *quadruplatores* appellati, quod quartam bonorum partem ejus qui fuerat damnatus, consequantur; postea Cæsarum temporibus *delatores* dici coeperunt. Sullanis vero temporibus ita pollutum fuerat accusatoris nomen, ut nemo illud, nisi pravissimus quisque usurparet.

2. Schütz leg. « verum, q. etc. », ut molestam repetitionem tollat. J. V. L.

3. *Anseribus*. Quorum clangore noctu ascendentes in Capitolium Galli proditi sunt. T. Liv. V, 47. Virg. *Æn.* VIII, 655. Et Plin. XX : « Est et an-

seri vigil cura, Capitolio testata defenso, per id tempus canum silentio proditis rebus. Quamobrem cibaria anserum censores in primis locant ».

4. *Canes aluntur*. Hoc, inquit Manutius, nulla traditur historia; et Hotomanno falsum videtur. Verum quis dubitet de Ciceronis fide? Neque enim quod canes silentio suo semel Capitolium prodidissent, idcirco ejiciendi erant, fidissimi ceteroquin custodes. Satis penarum dabant aliqui eorum quotannis in sambucea arbore fixi, in pristinae oblivionis supplicium. Plin. XXIX, 4.

5. *Peccant*. Ea parte peccant, quæ est magnæ diligentiae indicium.

mant, nocere non possunt; alii canes⁶, qui et latrare et mordere possunt. Cibaria⁷ vobis præberi videmus; vos autem maxime debetis in eos impetum facere, qui merentur: hoc populo gratissimum est. Deinde, si voletis, etiam tum, quum verisimile erit aliquem commisisse⁸, in suspitione latratote: id quoque concedi potest. Sin autem sic agetis, ut arguatis aliquem patrem occidisse, neque dicere possitis, aut quare, aut quomodo, ac tantummodo sine suspitione latrabitis; crura quidem vobis nemo suffringet⁹: sed si ego hos bene novi, literam illam¹⁰, cui vos usque eo inimici estis, ut etiam eas omnes¹¹ oderitis, ita vehementer ad caput affigent, ut postea neminem alium, nisi fortunas¹² vestras, accusare possitis.

6. *Alii canes.* Apposite Cicero hos canibus assimilat, tum ob impudentiam, unde et cynici philosophi, tum in primis quod omni eloquentia destituti, *latrarent* verius quam causas orarent. Vid. Verr. III, 11. Senec. de Brev. vit. 11. Colum. præf. lib. I.

7. *Cibaria.* Nempe in præmium accusationis, quartam partem bonorum ejus, qui fuerat damnatus, consequencebantur.

8. *Commisisse.* Subaud. *aliquid*.

9. *Suffringet.* De crurifragii pœna, vide Senec. de Ira, III, 18. Ceterum fuit pœne servile supplicium, canibus aptissimum, quamvis eis vere crura non frangerentur. Vid. Gruter. in Plant. Mil. II, 2.

10. *Literam illam.* Nempe literam K, quæ calumniatorum fronti inurebatur. *Kalumni* enim tum scribebatur.

11. *Eas omnes.* Subaud. *litteras*. Jocus ex ambiguo in hostes humanitatis et doctrinæ qui clamatores sunt, non oratores, canes non homines qui

in exilium et ad mortem doctrinam omnem projecisse velint. In quibusdam MSS legitur « kal. omnes », quæ erat Pighii Vossiique conjectura. Sic autem explicatur: Accusatores literam K, i. e. ejus literæ invasionem tantopere timere, ut etiam kalendas omnes oderint, quod ea litera scribantur. Erit quoque jocus, quod kalendis creditores æs alienum exigant, unde ab Horatio *tristes* vocantur, ab Ovidio *celer*, quod citius recurrant. Magno se nomine duæ interpretationes tuerentur, quum priori Hotomann. Lambin. Græv. posteriori vero Pigh. Vossius, Garaton. faveant. Mihi prior magis arridet, eo quod sibi universos fere MSS habeat, et magis cum Ciceronis ingenio consentire videatur. Neque contra eam facit, quod supra Erucium a literis non alienum dixit; quum nunc de omnibus generatim accusatoribus loquatur, qui et virtutem et doctrinam eodem prosequerentur odio.

12. *Fortunas.* Malam vestram for-

XXI. Quid mihi ad defendendum dedisti¹, bone accusator? quid hisce autem ad suspicandum? Ne exheredaretur, veritus est. Audio : sed qua de causa vereri debuerit, nemo dicit. Habebat pater in animo. Planum fac. Nihil est : non², quicum deliberarit, quem certiore fecerit, unde istud vobis suspicari in mentem venerit. Quum hoc modo accusas, Eruci, nonne hoc palam dicis? ego, quid acceperim, scio; quid dicam, nescio : unum illud spectavi, quod Chrysogonus aiebat, neminem isti patronum futurum; de bonorum emptione, deque ea societate neminem esse qui verbum facere hoc tempore auderet. Hæc te opinio falsa in istam fraudem impulit : non mehercule verbum fecisses, si tibi quemquam responsurum putasses. Operæ pretium erat, si animadvertistis, judices, negligentiam³ ejus in accusando considerare. Credo, quum vidisset, qui homines in hisce subselliis sederent, quæsisse, num ille aut ille defensurus esset; de me ne suspicatum quidem, quod antea causam publicam⁴ nullam dixerim : posteaquam invenit neminem eorum, qui possunt et solent, ita negligens esse cœpit, ut, quum in mentem veniret ei, resideret; deinde spatia⁵retur⁵; nonnumquam etiam puerum vocaret, credo, cui cœnam impe-

tunam tunc solummodo accusandi vobis erit locus. Quem enim iudex calumniatorem pronuntiaverat, is amplius accusare non poterat. Ludit orator in verbo *accusare*. Nam accusare nostras fortunas dicimur, quum de eis querimur.

XXI. 1. *Dedisti*. Dixisti quod a me sit refellendum.

2. *Non*. Scil. planum facis.

3. *Negligentiam*. Hiuc illud Ciceronis in M. Callidium, qui, quum indicia mortis se comperisse manifesto

diceret, solute tamen et oscitanter egerat : « Tu istuc Callidi, nisi fingeres, sic ageres ».

4. *Causam publicam*. Non semel jam causas oraverat Cicero (ut pro Quint. videre est cap. 1), sed tantum in privatis judiciis. *Publicam* vero causam, i. e. quæ de his habetur criminibus quorum castigatio ad remp. pertinet, nullam antea gesserat.

5. *Spatia⁵retur⁵*. Causas æquo in loco dicebant, et interdum inambulabant in spatio quod inter advocato-

raret : prorsus ut vestro consessu, et hoc conventu, pro summa solitudine abuteretur.

XXII. Peroravit aliquando¹; assedit; surrexi ego: respirare visus est, quod non alius potius diceret. Cœpi dicere. Usque eo animadverti, iudices, eum jocari, atque alias res agere², antequam Chrysogonum nominavi; quem simul atque attigi, statim homo se erexit: mirari visus est: intellexi, quid eum pupugisset. Iterum ac tertio nominavi. Postea homines cursare ultro et citro non destiterunt, credo, qui Chrysogono nuntiarent, esse aliquem in civitate, qui contra voluntatem ejus dicere auderet; aliter causam agi, atque ille existimaret; aperiri bonorum emptionem; vexari pessime societatem; gratiam³ potentiamque ejus negligi; iudices diligenter attendere; populo rem indignam videri.

Quæ quoniam te fefellerunt, Eruci, quoniamque vides versa esse omnia; causam pro Sex. Roscio, si non commode, at libere dici; quem dedi⁴ putabas, defendi intelligis; quos tradituros sperabas, vides judicare: restituere⁵ nobis aliquando veterem tuam illam calliditatem atque prudentiam; confitere te huc ea spe venisse, quod putares hic latrocinium, non iudicium futurum. De parricidio⁶ causa dicitur: ratio ab accusatore red-

rum subsellia reliquum erat. Sic Quintil. «ambulantem loqui ita deum oportet, in causis publicis, in quibus multi sunt iudices, si quod dicimus, quasi singulis peculiariter inculcare velimus». At paullo post «Ciceroni raro incessum, neque ita longum probari» subjicit.

XXII. 1. *Aliquando*. Tandem.

2. *Alias res agere*. Sic dicantur qui non attendunt.

3. *Gratiam*. Apud Sullam tunc re-

rum potentem. — *Potentiam*. Apud iudices.

4. *Dedi*. Tradi.

5. *Restitue*. Ostende veterem tuam calliditatem; dic aliquid nunc dignum te: confitere te antea oscitanter egisse, quod, etc. Interpolari vult Hotom. «aut confitere t. h.», quod recentiores edd. receperunt; sed non necessario.

6. *De parricidio*. Magnum scelus non temere, aut sine causa creditur.

dita non est, quam ob causam filius patrem occiderit.

Quod in minimis noxiis⁷, et in his levioribus peccatis, quæ magis crebra et jam prope quotidiana sunt, maxime et primum quæritur, quæ causa maleficii fuerit, id Erucius in parricidio quæri non putat oportere: in quo scelere, iudices, etiam quum multæ causæ convenisse unum in locum, atque inter se congruere videntur, tamen non temere⁸ creditur, neque levi conjectura res penditur, neque testis incertus auditur, neque accusatoris ingenio res judicatur. Quum multa antea commissa maleficia, tum vita hominis perditissima, tum singularis audacia ostendatur necesse est; neque audacia solum, sed summus furor atque amentia: hæc quum sint omnia, tamen exstent oportet expressa sceleris vestigia⁹, ubi, qua ratione, per quos, quo tempore maleficio sit admissum. Quæ nisi multa et manifesta sunt, profecto res tam scelestas, tam atrox, tam nefaria credi non potest.

Magna est enim vis humanitatis; multum valet communio sanguinis; reclamitat istiusmodi suspicionibus ipsa natura: portentum atque monstrum certissimum est, esse aliquem humana specie et figura, qui tantum immanitate bestias vicerit, ut, propter quos¹⁰ hanc suavissimam lucem adspexerit, eos indignissime luce

Parricidium est magnum scelus. Ergo, etc. Hactenus a Roscii persona probavit, causam parricidii non fuisse; jam argumentatur a re ipsa.

7. *Noxiis*. *Noxia* est leve peccatum. *Noxa*, pœna peccati. Hinc aliquem noxæ tradere, idem est, ac eum pœnæ tradere. Vid. Florid. de Latin. ed. Duker. p. 8, et Sanctii Minerv. IV, 4.

8. *Non temere*. Non nisi confessos, parricidarum supplicio affici, moris

fuisse observat Sueton. in Augusto, cap. 33.

9. *Vestigia*. Argumenta certa, quæ iudices ad verum ducant.

10. Facciol. *per quos*. J. V. L. — Non vero immutari locum necesse. Sæpius apud Ciceronem *propter* eodem sensu quo *per* usurpatur. Sic pro Milone, 22, «propter quos vivit», i. e. quorum opera. Et ead. orat. 30: «lugere eum, propter quem ceteri lætarentur».

privarit; quum etiam feras¹¹ inter sese partus, atque educatio, et natura ipsa conciliet.

XXIII. Non ita multis ante annis, aiunt, T. Coelium¹ quemdam Tarracinensem, hominem non obscurum², quum cœnatus cubitum in idem conclave cum duobus adolescentibus filiis isset, inventum esse mane jugulatum. Quum neque servus quisquam reperiretur, neque liber, ad quem ea suspicio pertineret; id³ ætatis autem duo filii propter cubantes ne sensisse quidem se dicerent: nomina filiorum de parricidio delata sunt. Quid postea⁴? erat sane suspiciosum, neutrum sensisse; ausum autem esse quemquam se in id conclave committere, eo potissimum tempore, quum ibidem essent duo adolescentes filii, qui et sentire et defendere facile possent. Erat porro nemo, in quem ea suspicio conveniret. Tamen quum planum iudicibus esset factum, aperto ostio, dormientes eos repertos esse, iudicio absoluti adolescentes, et suspicione omni liberati sunt. Nemo enim putabat, quemquam esse, qui, quum omnia divina atque humana jura scelere nefario polluisset, somnum statim capere potuisset⁵; propterea quod qui tantum facinus commiserunt, non modo sine cura quiescere, sed ne spirare quidem sine metu possunt.

XXIV. Videtisne, quos¹ nobis poetæ tradiderunt,

11. *Quum etiam feras.* Vid. de Offic. I, 4.

XXIII. 1. *T. Coelium.* Saut qui legant « T. Clœlium », ut apud Valer. Max. qui totam hanc narrationem desumpsit, VIII, 1, 13.

2. *Non obscurum.* In patria, sed Romæ incognitum, ut ex verbo *quemdam* apparet.

3. *Id ætatis.* Ea ætate. Græca locutio apud Latinos usitata.

4. *Quid postea?* Varie legitur h. l. in MSS, in quorum uno est: « quid poterat enim tam suspiciosum esse, aut neutrum sensisse, aut ausum »; in altero, « quod poterat satis esse suspiciosum, aut neutrum, etc. » Ceterum nihil ad sensum, qui per se patet.

5. Ernest. *posset.* J. V. L.

XXIV. 1. *Quos.* Orestem designat, qui in patris ultionem, matrem interfecit; et Alcæonem, qui, ob patrem

patris ulciscendi causa, supplicium de matre sumpsisse, quum præsertim deorum immortalium jussis atque oraculis id fecisse dicantur, tamen ut eos agitent furiaë, neque consistere usquam patiantur, quod ne pii² quidem sine scelere esse potuerunt? Sic se res habet, iudices. Magnam vim, magnam necessitatem³, magnam possidet religionem paternus maternusque sanguis: ex quo si qua macula concepta est, non modo elui non potest, verum usque eo permanat ad animum, ut summus furor atque amentia consequatur. Nolite⁴ enim putare, quemadmodum in fabulis⁵ sæpenumero videtis, eos, qui aliquid impie scelerateque commiserint, agitari et perterrerī Furiarum tædis ardentibus. Sua quemque fraus, et suus terror⁶ maxime vexat; suum quemque scelus agitat, amentiaque afficit; suæ malæ cogitationes, conscientiaëque⁷ animi terrent: hæ sunt impiis assiduæ domesticaëque Furiaë; quæ dies noctesque parentum pœnas a consceleratissimis filiis repetant. Hæc magnitudo maleficii facit, ut, nisi pæne manifestum parricidium proferatur, credibile non sit⁸; nisi turpis adolescentia, nisi omnibus flagitiis vita in-

Amphiaraum proditum, matrem Eriphylen occidit.

2. *Pii*. Quum jussis deorum parentem, et patrem ulciscerentur.

3. *Necessitatem*. H. l. est conjunctio sanguinis, et parentibus debitum officium, aliter *necessitudo*. Vide Manut. ad Div. II, 19.

4. *Nolite enim*. Sic de Leg. I: «At vero scelerum in homines, atque impietatum nulla expiatio est. Itaque pœnas luunt non tam iudiciis, ut eos agitant insectanturque furiaë, non ardentibus tædis, sicut in fabulis, sed angore conscientiaë fraudisque cruciatu». Conf. Pis. 20.

5. *In fabulis*. Tragœdiis. Fabularum enim nomine Latini æque et tragœdias et comœdias appellant.

6. *Suus terror*. Terror qui ex animo sibi sceleris conscio profisciscitur. Sic Juvenal. «diri conscia facti Mens habet attonitos, et surdo verberare cædit», quem conf. Sat. XIII.

7. *Conscientiaëque*. Casus pluralis animadversione dignus, quamvis apud Ciceronem non semel inveniatur.

8. *Credibile non sit*. Persæ pro notho et spurio habebant, si quis apud eos parricidii accusabatur; rati maleficium tam nefarium in eum, qui vere esset filius, cadere non posse. Herod. I, 137.

quinata, nisi sumptus effusi cum probro atque dedecore, nisi prorupta audacia, nisi tanta temeritas, ut non procul abhorreat ab insania. Accedat huc oportet odium parentis, animadversionis paternæ metus, amici improbi, servi conscii, tempus idoneum, locus opportune captus ad eam rem: pæne dicam, respersas manus sanguine paterno iudices videant oportet, si tantum facinus, tam immane, tam acerbum, credituri sint. Quare hoc, quo minus est credibile, nisi ostenditur, eo magis est, si convincitur, vindicandum.

XXV. Itaque quum multis ex rebus intelligi potest, majores nostros non modo armis plus, quam ceteras nationes, verum etiam consilio sapientiaque potuisse, tum ex hac re vel maxime, quod in impios¹ singulare supplicium invenerunt: qua in re quantum prudentia præstiterint iis, qui apud ceteros sapientissimi fuisse dicuntur, considerate. Prudentissima civitas Atheniensium, dum ea² rerum potita est, fuisse traditur: ejus porro civitatis sapientissimum Solonem³ dicunt fuisse, eum, qui leges, quibus hodie quoque utuntur, scripserit. Is quum interrogaretur, cur nullum supplicium constituisset in eum, qui parentem necasset, respondit, se id neminem facturum⁴ putasse. Sapienter fecisse dicitur, quum de eo nihil sanxerit, quod antea commissum non erat, ne non tam prohibere, quam admonere⁵ videretur. Quanto majores nostri sapien-

XXV. 1. *Impios.* Erga parentes sacrilegos. — *Singulare.* Illis proprium, peculiare.

2. *Dum ea.* Tempora liberæ Græciæ significat, quam deinde Philippus Macedo servire docuit. Prudentiam autem Atheniensium civitas cum imperio simul amisit.

3. *Solonem.* Atheniensium legislator Solon natus est Athenis ann. ante

Christ. 639. De quo olim Anacharsis: «viso Solone omnia vidisti: hæc sunt Athenæ, hæc est tota Græcia». Vide Lucian. Toxar. Plutarch. in Solone. Val. Max. V, 3.

4. *Neminem facturum.* Sic Laertius: Ἐρωτηθεὶς διὰ τί κατὰ πατροκτόνου νόμον οὐκ ἔθηκε, διὰ τὸ ἀπαίτιαται ἔφη. Cf. Plut. in Romul.

5. *Admonere.* In animos hominum

tius! qui quum intelligerent nihil esse tam sanctum, quod non aliquando violaret audacia, supplicium in parricidas singulare excogitaverunt; ut, quos natura ipsa retinere in officio non potuisset, ii, magnitudine poenæ, maleficio summoventur: insui voluerunt in culeum⁶ vivos, atque ita in flumen dejici.

XXVI. O singularem sapientiam, iudices! nonne videntur hunc hominem ex rerum natura sustulisse et eripuisse, cui repente cælum, solem, aquam, terramque ademerint; ut, qui eum necasset, unde ipse natus esset, careret iis rebus omnibus, ex quibus omnia nata esse dicuntur? Noluerunt feris corpus objicere¹, ne bestiis quoque, quæ tantum scelus attigissent, immanioribus uteremur²; non sic³ nudos in flumen dejicere, ne, quum delati essent in mare, ipsum polluerent, quo cetera, quæ violata sunt, expiari⁴ putantur. Denique

inducere, quod alioqui non cogitarent.

6. In culeum. Modestinus in l. 9 D. de parricid. ait, insui consuevisse cum cane, gallo gallinaceo, vipera et simia. Sed non tempore Ciceronis; non enim omisisset, quæ vim argumenti augere poterant. Neque sane ante Senecam exstat quisquam, qui culeo ullam adjiciat bestiam. Porro Justinianus, Inst. IV, 18, 6, hæc omnia Pompeiæ legi adscripsit. Hinc igitur totam parricidii poenam legi Pompeiæ tribuere deberemus, nisi probe sciremus, culei quanto sit usus antiquior, quum «more majorum fieri» dicat Cicero, i. e. ex summa vetustate atque ipsarum XII Tabb. lege. Nisi forte dixerimus bestias a Cæsare, qui de parricidarum bonis quædam graviora constituit, sequentibusve imperatoribus fuisse additas. Ceterum tam densa huic historię parti offusa caligo est, ut ni-

hil judicare satius videatur. Conf. ad Her. I, 13, de Inv. II, 50, de lege, cujus ea sunt verba: «qui parentem necasset, necaverit, caput obnubito, culeoque insutus in profluentem mergitor». Sulla autem nihil isti legi addidit, nisi quod aliquando peculiarem de parricidii causa prætorem assignari permittebat. Quod tamen hac in causa non exstitit. Vide Indic. Legum.

XXVI. 1. *Feris corpus objicere.* Quod deinde sub Cæsaribus factum est. Digest. XLVIII, 9, 9.

2. *Uteremur.* Verbum utor usurpatur tam in bonis, tum in malis.

3. *Sic.* Abundat h. l. particula, ut apud Horat. II, 11, 14: «sub pinu jacentes sic temere».

4. *Expiari.* Respicit orator ad Euripidis versum hunc, ex Iphig. Taur. 1193: Θάλασσα κλύει πάντα τᾶν θρώπων κακία: *Mare proluet omnia mortalium mala.*

nihil tam vile, neque tam vulgare est, cujus partem ullam eis reliquerint. Etenim quid⁵ tam est commune, quam spiritus vivis, terra mortuis, mare fluctuantibus, litus ejectis? Ita vivunt, dum possunt, ut ducere animam de cælo non queant; ita moriuntur, ut eorum ossa terra non tangat⁶; ita jactantur fluctibus, ut numquam alluantur⁷; ita postremo ejiciuntur, ut ne ad saxa quidem mortui conquiescant.

Tanti maleficii crimen, cui maleficio tam insigne supplicium est constitutum, probare te, Eruci, censes posse talibus viris, si ne causam quidem maleficii protuleris? Si hunc apud bonorum emptores ipsos accusares, eique judicio Chrysogonus præesset, tamen diligentius paratiusque venisses. Utrum, quid agatur, non vides? an, apud quos agatur? Agitur de parricidio, quod sine multis causis suscipi non potest. Apud homines autem prudentissimos agitur, qui intelligunt, neminem ne minimum quidem maleficio sine causa admittere.

XXVII. Esto : causam proferre non potes : tametsi statim vicisse debeo, tamen de meo jure decedam; et tibi, quod in alia causa non concederem, in hac concedam, fretus hujus innocentia. Non quæro abs te, quare patrem Sex. Roscius occiderit : quæro, quomodo occiderit. Ita quæro abs te, C. Eruci, quomodo; et sic

5. *Etenim quid*, etc. Hunc locum Cicero adducit et de eo judicium fert in Orat. 3o: « Quantis illa circumstantis populi clamoribus, adolescentuli diximus de supplicio parricidarum? Quæ nequaquam satis deferbuiſſe post aliquanto sentire cepimus. Sunt enim omnia sicut adolescentis, non tam re et maturitate, quam spe et exspectatione laudati ». Quintil. XII,

6, ait etiam totum hunc locum *juveniliter* esse tractatum. Quid enim in argutiis et antithetis commemorari de parricidio loquentem decet?

6. Cicero ipse, Orat. c. 3o: « terram non tangant ». J.V. L.

7. *Alluantur*. Ut numquam aqua undique madefiant, eaque penitus perfundantur, quod nisi culeus obstaret, fieri necesse erat. Quid vero admi-

tecum agam, ut in eo loco vel respondendi, vel interpellandi tibi potestatem ¹ faciam, vel etiam, si quid voles, interrogandi.

Quomodo occidit? ipse percussit, an aliis occidendum dedit? Si ipsum arguis, Romæ non fuit: si per alios ² fecisse dicis, quæro, servosne, an liberos? quos homines? indidemne ³ Ameria, an hosce ex urbe sicarios? Si Ameria; qui sunt hi? cur non nominantur? si Roma ⁴; unde eos noverat Roscius, qui Romam multis annis non venit, neque umquam plus triduo fuit? ubi eos convenit? quicum loquutus est? quomodo persuasit? Pretium dedit? cui dedit? per quem dedit? unde, aut quantum dedit? Nonne his vestigiis ⁵ ad caput malefici perveniri solet? Et simul tibi in mentem veniat facito, quemadmodum vitam hujusce depinxeris: hunc hominem ferum atque agrestem fuisse; numquam cum homine quoquam colloquutum esse; numquam in oppido constitisse.

Qua in re prætereo illud, quod mihi maximo argumento ad hujus innocentiam poterat esse, in rusticis moribus, in victu arido, in hac horrida incultaque vita, istiusmodi maleficia gigni non solere. Ut non omnem frugem, neque arborem in omni agro reperire possis, sic non omne facinus in omni vita nascitur. In urbe luxuries creatur: ex luxuria exsistat avaritia necesse est;

rabilius quam in medio mari non maderieri?

XXVII. 1. *Potestatem*. Quam potestatem non habebat accusator, nisi rei patrono permittente.

2. *Si per alios*. Argumentum ex partium enumeratione. Omnes autem, quorum opera Roscius interfici potuit, sic removet a reo, ut omnis aeleris suspicio in Roscios duo derivetur.

3. *Indidem*. Ex illo ipso loco, ex

eadem urbe Ameria. Sic T. Liv. «indidem ex Achaia», id est, ex eadem Achaia. Vid. Drakenb. ad T. Liv. XXV, 15; XXXIX, 8. Hoc verbum Ernestus omisit.

4. Sic recte edd. Codices multi, *Romæ*. Perperam. J. V. L.

5. *His vestigiis*. Translatum a venatoribus, qui ferarum vestigia persequentes tandem ad earum latebras perveniunt.

ex avaritia erumpat audacia : inde omnia scelera ac maleficia gignuntur. Vita autem hæc rustica, quam tu agrestem vocas, parcimoniæ, diligentia, justitiæ magistra est. Verum hæc missa facio.

XXVIII. Illud quæro, is homo, qui, ut tute dicis, numquam inter homines fuerit, per quos homines hoc tantum facinus, tam occultum¹, absens præsertim, conficere potuerit. Multa² sunt falsa, judices, quæ tamen argui suspiciose possunt : in his rebus si suspicio reperta erit, culpam inesse concedam. Romæ Sex. Roscius occiditur, quum in agro Amerino esset filius. Literas, credo, misit alicui sicario, qui Romæ noverat neminem. Arcessivit aliquem : at³ quando? Nuntium misit : quem? aut ad quem? Pretio, gratia, spe, promissis induxit aliquem? Nihil horum ne confingi quidem potest ; et tamen causa de parricidio dicitur.

Reliquum est, ut per servos id admiserit. O dii immortales! rem miseram et calamitosam! Quod in tali crimine innocenti saluti solet esse, ut servos in quæstionem⁴ polliceatur, id Sex. Roscio facere non licet. Vos, qui hunc accusatis, omnes ejus servos habetis : unus puer, victus quotidiani administer, ex tanta familia Sex. Roscio relictus non est. Te nunc appello, P. Scipio; te, Metelle : vobis advocatis, vobis agentibus⁵, aliquoties duos servos paternos in quæstionem ab adversariis Sex. Roscius postulavit. Meministine te,

XXVIII. 1. *Occultum*. Cujus auctor tantopere se debet occultare.

2. *Multa*. In aliis rebus multa sunt quæ, etsi carent crimine, non carent tamen suspicione; sed in causa S. Roscii, etc.

3. Abest at apud Priscianum, pag. 902, ed. Putsch. J. V. L.

4. *In quæstionem*. I. e. ultro per-

I. *Cic. pars secunda*.

missurum se dicat ut omni tormentorum genere de servis quæstio habeatur. Ex veterum Romanorum instituto de servis in dominos quærere non licebat, nisi de incestu et conjuratione. At reo domino postulante, dabantur in quæstionem. Vid. inf. 41, et orat. pro Milon. 22.

5. *Vobis agentibus*. Vestram ope-

T. Rosci, recusare? Quid? ii servi ubi sunt? Chrysogonum, iudices, sectantur; apud eum sunt in honore⁶ et in pretio. Etiam nunc, ut ex his quærat, ego postulo; hic orat, atque obsecrat: quid facitis? cur recusatis?

Dubitate etiam nunc, iudices, si potestis, a quo sit Sex. Roscius occisus: ab eone, qui propter illius mortem in egestate et insidiis versatur, cui ne quærendi quidem de morte patris potestas permittitur; an ab iis, qui quæstionem fugitant, bona possident, in cæde atque ex cæde⁷ vivunt. Omnia, iudices, in hac causa sunt misera, atque indigna; tamen hoc nihil neque acerbius, neque iniquius proferri potest: mortis paternæ de servis paternis quæstionem habere filio non licet; ne tamdiu quidem dominus erit in suos, dum ex iis de patris morte quærat. Veniam, neque ita multo post, ad hunc locum. Nam hoc totum ad Roscios pertinet; de quorum audacia tum me dicturum pollicitus sum, quum Erucii crimina diluissem.

XXIX. Nunc, Eruci, ad te venio. Conveniat mihi tecum necesse est, si ad hunc maleficiū istud pertinet, aut ipsum sua manu fecisse, id quod negas, aut per aliquos liberos, aut servos. Liberosne? quos neque ut convenire potuerit, neque qua ratione inducere, neque ubi, neque per quos, neque qua spe, aut quo pretio, potes ostendere. Ego contra ostendo, non modo nihil eorum fecisse Sex. Roscium, sed ne potuisse quidem facere, quod neque Romæ multis annis fuerit, neque de prædiis umquam temere¹ discesserit. Restare²

ram commodantibus, non in iudicio publico, sed privatim cum Roscii adversariis.

6. *In honore.* Ne prodant auctorem cædis. Vide inf. 41.

7. *In cæde.* Quia sicarii. *Ex cæde.* Quia quæstum inde colligunt, ut est in cap. seq.

XXIX. 1. *Temere.* Sine causa.

2. *Restare.* Illud tibi superasse vi-

tibi videbatur servorum nomen, quo, quasi in portum, rejectus a ceteris suspicionibus, confugere posses: ubi scopulum offendis ejusmodi, ut non modo ab hoc crimen resilire videas, verum omnem suspicionem in vosmet ipsos recidere intelligas.

Quid est ergo, quo tandem accusator, inopia argumentorum, confugerit? Ejusmodi tempus³ erat, inquit, ut homines vulgo impune occiderentur: quare tu hoc, propter multitudinem sicariorum, nullo negotio facere potuisti. Interim mihi videris, Eruci, una mercede⁴ duas res assequi velle: nos judicio perfundere⁵; accusare autem eos ipsos, a quibus mercedem accepisti. Quid ais? Vulgo occidebantur. Per quos? et a quibus? Nonne cogitas, te a sectoribus huc adductum esse? Quid postea⁶? Nescimus, per ista tempora, eos-

debatur, ut diceres Roscium per servos hanc cædem fecisse. At ego cupere Roscium ostendi, ut de servis quærat, nec tamen id licere, quia servos Chrysogonus apud se retineat. Sequitur allegoria sumpta de navigantibus. — *Ab hoc*, i. e. a S. Roscio. Elsev. et alii *ad hoc*, male.

3. *Ejusmodi tempus*. Nempe Sullanarum proscriptionum, quibus præmium percussoribus erat publice propositum.

4. *Una mercede*. Quum pro una accusatione pecuniam acceperis, ad duas simul res pervenire, et mercede Chrysogoni ipsum Chrysogonum accusare.

5. *Judicio perfundere*. I. e. judicio obscuro, in quo nihil clare liquidoque probetur, obnuere, ut h. l. facit Erucius, qui sine ullo argumento, Roscium dicit Romæ patrem per servos occidisse. Hinc *perfusorie dicere* apud Jctos. Ulpian. V, 1: « Debebit, et ita Labeo, et diem et horam denuntia-

tionem complecti, et ubi et quot opus sit, neque *perfusorie*, aut obscure dicere, etc. » Potest quoque esse, ut Faciolato placet, « speciem quamdam judicii offundere, revera autem eos accusare, etc. » Qua significatione usurpatur *perfusorius* a Seneca, ep. 23: « hæc quibus delectatur vulgus, tenuem habent ac *perfusoriam* voluntatem ». Species igitur judicii hujus offundebatur S. Roscio, ratio autem et vis interior tota videbatur in adversarios conversa; quum enim Erucius crimen cuius non longe quærendi auctores erant, in publicum proferret, et ipse a sicariis Roscium occisum fateretur, ipse veluti digito duo Roscios et Chrysogonum designare videbatur.

6. *Quid postea?* Sunt verba Erucii fatentis se a sectoribus accusatorem delectum, sed quærentis, « quid inde, quid tum? » Sequitur responsio: « nescimus, etc. »

dem fere sectores⁷ fuisse collorum, et bonorum? Ii denique, qui tum armati dies noctesque concursabant, qui Romæ erant assidui, qui omni tempore in præda et sanguine versabantur, Sex. Roscio temporis illius acerbitatem iniquitatemque objicient? et illam sicariorum multitudinem, in qua ipsi duces ac principes erant, huic⁸ crimini putabunt fore, qui non modo Romæ non fuit, sed omnino, quid Romæ ageretur, nesciret, propterea quod ruri assiduus, quemadmodum tute confiteris, fuit?

Vereor, ne aut molestus sim vobis, iudices, aut ne ingeniis vestris videar diffidere⁹, si de tam perspicuis rebus diutius disseram. Erucii criminatio tota, ut arbitror, dissoluta est: nisi forte expectatis, ut illa diluam, quæ de peculatu¹⁰, ac de ejusmodi rebus commentitijs, inaudita nobis ante hoc tempus ac nova objecit. Quæ mihi iste visus est ex alia oratione declamare, quam in alium reum commentaretur: ita neque ad crimen parricidii, neque ad eum, qui causam dicit, pertinebant. De quibus quoniam verbo arguit, verbo satis est negare. Si quid est, quod ad testes reservet; ibi nos quoque, ut in ipsa causa, paratiores reperiet, quam putabat.

XXX. Venio nunc eo, quo me non cupiditas ducit, sed fides. Nam si mihi liberet accusare, accusarem alios

7. *Sectores*. Ludit in ambiguo: *sector* est, qui universa damnati hominis bona emit, ut iis per partes vendendis lucrum faciat. Itaque nomen habet a *secando*, quod bona secatur et separatim dividit. Potest etiam *sicarium* significare. Optime autem verbum hoc duabus rebus accommodat h. l. Cicero, quod iidem proscriptis capita amputabant, et bona

eorum distrahebant. Vide plura in Indic. Latin.

8. *Huic*. Scil. S. Roscio.

9. *Diffidere*. Ne vos minus dociles, aut paullo tardiores ad verum perspicendum credere videar.

10. *Peculatu*. *Peculatus* est publicæ pecuniæ furtum. Hoc autem crimen qua de causa objecerit S. Roscio, divinare non possumus.

potius, ex quibus possem crescere¹ : quod certum est non facere, dum utrumvis licebit. Is enim mihi videtur amplissimus, qui sua virtute in altiore locum pervenit; non, qui adscendit per alterius incommodum et calamitatem.

Desinamus aliquando ea scrutari, quæ sunt inania: quæramus, ubi maleficium et est, et inveniri potest. Jam intelliges, Eruci, certum² crimen quam multis suspicionibus coarguatur: tametsi neque omnia dicam, et leviter unumquodque tangam. Neque enim id facerem, nisi necesse esset; et id erit signi, me invitum facere, quod non prosequar longius, quam salus hujus et mea fides postulabit.

Causam tu nullam reperiebas in Sex. Roscio. At ego in T. Roscio reperio: tecum enim mihi res est, T. Rosci, quoniam istic sedes, ac te palam adversarium esse profiteris. De Capitone³ post viderimus, si, quemadmodum paratum esse audio, testis prodierit: tum alias quoque suas palmas⁴ cognoscet, de quibus me ne audisse quidem suspicatur.

L. Cassius⁵ ille, quem populus romanus verissimum et sapientissimum judicem putabat, identidem in causis quærere solebat, cui bono fuisset. Sic vita hominum est, ut ad maleficium nemo conetur sine spe⁶ atque

XXX. 1. *Crescere*. Quorum ex detrimento ditior, potentior, aut certe elatior reddi possem.

2. *Lambin.* male conj. *incertum*. Nisi forte contraria velimus iuducere iis, quæ tractat auctor.

3. *De Capitone*. Observandum est, in judiciis publicis, tantum prodire testes, quam accusator et reus perorassent. In repetundarum causis aliter erat. Vide *Verz.* I, cap. ult.

4. *Palmas*. Successus: ironice. Sic

sup. cap. 6, « plurimarum palmarum gladiator ». Palmæ gladiatoribus in victoriæ signum dari solebant.

5. *L. Cassius*, consul A. U. C. 646, vir summæ severitatis, ejus tribunal scopulus reorum dicebatur. Val. Max. III, 7, 9. T. Liv. Epit. LXV. Sallust. Jug. 32. Vide Ind. Hist.

6. *Sine spe atque emolumento*. Nempe pervulgatum est: « nemo gratis est improbus ». Conf. *Lysias* λόγος ἀπιστοῦ τοῦ σίκου.

emolumento accedere. Hunc quæsitorem ac judicem fugiebant atque horrebant ii, quibus periculum creabatur; ideo quod, tametsi veritatis erat amicus, tamen natura non tam propensus ad misericordiam, quam implicatus⁷ ad severitatem, videbatur. Ego, quamquam præest huic quæstioni vir, et contra audaciam fortissimus, et ab innocentia⁸ clementissimus, tamen facile me paterer, vel illo ipso acerrimo iudice quærente, vel apud Cassianos iudices, quorum etiam nunc ii, quibus causa dicenda est, nomen ipsum reformidant, pro Sex. Roscio dicere.

XXXI. In hac enim causa quum viderent, illos amplissimam pecuniam possidere, hunc in summa mendicitate esse; illud quidem non quærent, cui bono fuisset: sed eo perspicuum¹ crimen, et suspicionem potius ad prædam adjungerent, quam ad egestatem. Quid si accedit eodem, ut tenuis antea fueris? quid si, ut avarus? quid si, ut audax? quid si, ut illius, qui occisus est, inimicissimus? num quærenda causa, quæ te ad tantum facinus adduxerit?

Quid ergo horum negari potest? Tenuitas hominis ejusmodi est, ut dissimulari non queat, atque eo magis luceat, quo magis occultatur. Avaritiam præfers, qui

7. *Implicatus*. Severitate præpeditus. Sic implicari morbo, qui arcte nos habet, interiusque pervadit. Sic dicitur amicus « benivolentia implicatus », qui eam non facile abjecerit. Ad Div. VI, 12. Quodammodo ita sua natura Cassius severitati immixtus erat, ut, etc. Frustra Grævius reponit « implacatus », probatque Ernestius quasi ita loqui latine sit, nec vulgata optime possit explicari.

8. *Ab innocentia*. Propter vitæ integritatem. Sic Att. VII, 15, « imparatus a militibus ».

T. Liv. V, 45, « a secundis rebus incauti ».

XXXI. 1. *Eo perspicuum*. Vocula eo negotium doctis facessit. Refingit Hotom. in *et*. Cl. Puteano et Lamb. placet « sed, eo perspicuo, crimen »; quod unice verum affirmat Schütz. Sed quum tam MSS quam editi libri nulla varietatis indicia præ se ferant, non recedendum a vulgata scriptura; atque eo hic est pro *adeo*, ut apud Plautum et ipsum Ciceronem; aut potius pro « ea re, per eam rem ».

societatem coieris de municipis cognatique fortunis cum alienissimo. Quam sis audax; ut alia obliviscar, hinc omnes intelligere potuerunt, quod ex tot societate, hoc est, ex tot sicariis, solus tu inventus es, qui cum accusatoribus sederes, atque os tuum non modo ostenderes, sed etiam offerres. Inimicitias tibi fuisse cum Sex. Roscio, et magnas rei familiaris controversias, concedas necesse est.

Restat, iudices, ut hoc dubitemus², uter potius Sex. Roscium occiderit, is, ad quem morte ejus divitiæ venerint, an is, ad quem mendicitas; is, qui antea tenuis fuerit, an is, qui postea factus sit egentissimus; is, qui ardens avaritia feratur infestus in suos, an is, qui semper ita vixerit, ut quæstum³ nosset nullum, fructum autem eum solum, quem labore peperisset; is, qui omnium sectorum audacissimus sit, an is, qui, propter fori judiciorumque insolentiam⁴, non modo subsellia, verum etiam urbem ipsam reformidet; postremo, iudices, id quod ad rem, mea sententia, maxime pertinet, utrum inimicus potius, an filius!

XXXII. Hæc tu, Eruci, tot et tanta si nactus esses in reo, quam diu diceres? quo te modo jactares? tempus, hercule, te citius, quam oratio deficeret. Etenim in singulis rebus ejusmodi materies est, ut dies singulos possis consumere. Neque ego non possum: non enim

Hinc apertus sensus: Quoniam videntur illos Roscios bona omnia possidere, hunc in summa paupertate vivere, manifestum ex ea re crimen cædis Sextianæ et de ejus auctore suspicionem, ad prædam potius adjungerent quam ad egestatem; i. e. illos potius suspectos haberent, qui præda potiti sunt, quam qui bonis ejectus mendicat.

2. *Dubitemus.* Consideremus, deliberemus.

3. *Quæstum.* *Quæstum* et *fructum* ita distinguit, ut ille sit qui ex opera et industria obvenit, hic vero qui ex agris.

4. *Insolentiam.* Quia non assuevit foro et judiciis. Sic pro Dejot. « moveor loci insolentia ». Terent. Andr. V, 4, 4: « quid tu Athenas insolens ».

mihi tantum derogo, tametsi nihil arrego, ut te copiosius, quam me, putem posse dicere. Verum ego forsitan, propter multitudinem patronorum, in grege annumerer¹; te pugna Cannensis² accusatorem sat bonum fecit. Multos cæsos non ad Trasimenum lacum, sed ad Servilium³ videmus. «Quis ibi non est vulneratus ferro Phrygio⁴?» Non necesse est omnes commemorare, Curtios, Marios, denique Memmios⁵, quos jam ætas⁶ a præliis avocabat: postremo Priamum⁷ ipsum,

XXXII. 1. *In grege annumerer.* Forsan ego unus de multis sum, qui patronorum gregem faciunt; tu vero nunc accusator sat bonus es, non propter eloquentiam, sed quia periire accusatores plerique.

2. *Pugna Cannensis.* Cum pugna Cannensi comparatur cædes Marianorum a Sulla facta, quæ etiam accusatores multos in ipsa strage involvit. Quemadmodum enim post illam pugnam coactus est senatus ipsos servos armare, propter civium inopiam, ut est apud T. Liv. XXII, 57, ita etiam post Sullanam stragem vel inepti homines cœperunt accusare, atque inopia bonorum videri boni.

3. *Ad Servilium.* Aquæ receptaculum fuit, Romæ a conditore Servilio dictum; ad quem locum Sullanis temporibus multorum senatorum capita ad ostentationem immanissimi facinoris pependerunt. Jul. Firm. I. Seneca autem in libro de Div. Prov. 3: «videant largum in foro sanguinem et supra Servilianum lacum (id enim proscriptionis Sullanæ spoliarium est) senatorum capita; et passim vagantes per Urbem percussorum greges, et multa millia civium rom. uno loco post fidem, imo per ipsam fidem truncata». — Al. *vidimus, facit.*

4. *Ferro Phrygio.* Versus ex veteri Ennii tragedia, quo excusat se Ulysses, quod vulneratus ex pugna fugerit in Achillis tentorium. Porro *Phrygium* forsân h. l. dicitur Sullæ ferrum, ut mores ejus notet; Phryges quippe impuri et flagitiosi.

5. *Memmios.* Nomina accusatorum, qui ad lacum Servilium cæsi sunt. Cicero in Brut. «Tum etiam C. et L. Memmii fuerunt oratores mediocres, accusatores acres atque acerbi: itaque in judicium capitis multos vocaverunt; pro reis non sæpe dixerunt». — Legitur *Mamecos* apud Hottomann. Græv. Garat. Sed contra faciunt duo codd. Lalle. et ed. 1480.

6. *Ætas.* Qui propter ætatem arma ferre non poterant, atque ita cum Marianis Sullanis partes non impugnarent, neque ad partes adversariorum pertinebant, ideo vero occidebantur, quia erant accusatores.

7. *Priamum.* Comparat Antistium Priamo, quia ut ille rex, summa senectute, in magna Trojanorum suorum strage occisus est; sic Antistius inter accusatores quasi rex quidam ac princeps, senex admodum in multa accusatorum cæde occubuit. Hunc in Bruto «rabulam sane probabilem» vocat Cicero. Conf. etiam Pat. II, 25.

senem Antistium, quem non modo ætas, sed etiam leges⁸ pugnare prohibebant. Jam, quos nemo propter ignobilitatem nominat, sexcenti sunt, qui inter sicarios et de veneficiis accusabant: qui omnes, quod ad me attinet, vellem viverent. Nihil enim mali est, canes ibi quam plurimos esse, ubi permulti observandi, multaue servanda sunt.

Verum, ut fit, multa sæpe, imprudentibus imperatoribus, vis belli ac turba molitur. Dum is in aliis rebus erat occupatus, qui summam rerum administrabat, erant interea, qui suis vulneribus⁹ mederentur; qui, tamquam si offusa reipublicæ sempiterna nox esset, ita ruebant in tenebris, omniaque miscebant: a quibus miror, ne quod judiciorum esset vestigium, non subsellia quoque esse combusta; nam et accusatores et iudices sustulerunt. Hoc commodi est, quod ita vixerunt, ut testes omnes, si cuperent, interficere non possent: nam, dum hominum genus erit, qui accuset eos, non deerit; dum civitas erit, judicia fient. Verum, ut cœpi dicere, et Erucius, hæc si haberet in causa, quæ commemoravi, posset ea quamvis diu dicere; et ego, iudices, possum: sed in animo est, quemadmodum ante dixi, leviter transire, ac tantummodo per-

8. *Leges*. Nullæ erant leges, quæ senes pugnare prohiberent; sed tantum eos cogi ad militiam vetabant. Ceterum in Antistio aliquod forsitan notatur vitium, quod eum a militia arcebat. Vide Lips. de Mil. Rom. I, 4. Aut etiam h. l. ad prælia forensia metaphorice refertur, a quibus turpi aut calumniæ iudicio exclusus fuerat. Vide sup. 20.

9. *Suis vulneribus*. Qui homines opulentos, qualis erat S. Roscius,

occidendo et illorum bona invadendo, suis rei familiaris vulneribus, h. e. egestati mederentur. Sic Græv. Malim Manutii sententiam: qui omnes occidendo providerent, ne quis postea esset qui de quotidianis suis cædibus eos accusaret, aut iudicaret; ita fore sperantes, ut scelerum vulneribus mederentur, h. e. pœnas effugerent. His verbis Chrysogonum et T. Roscios vult intelligi. In hanc quoque sententiam Hotom. et Desjard.

stringere¹⁰ unamquamque rem, ut omnes intelligant, me non studio¹¹ accusare, sed officio defendere.

XXXIII. Video igitur, causas esse permultas, quæ istum impellerent. Videamus nunc, ecqua facultas suscipiendi maleficii fuerit. Ubi occisus est Sex. Roscius? Romæ. Quid? tu, Rosci, ubi tunc eras? Romæ. Verum quid ad rem? et alii multi¹. Quasi nunc id agatur, quis ex tanta multitudine occiderit, ac non hoc quærat, eum, qui Romæ sit occisus, utrum verisimilius sit ab eo esse occisum, qui assiduus eo tempore Romæ fuerit, an ab eo, qui multis annis Romam omnino non accesserit.

Age, nunc ceteras facultates quoque consideremus. Erat tum multitudo sicariorum, id quod commemoravit Erucius, et homines impune occidebantur. Quid? ea multitudo quæ erat? opinor, aut eorum, qui in bonis² erant occupati; aut eorum, qui ab aliis conducebantur, ut aliquem occiderent. Si eos putas, qui alienum appetebant, tu es in eo numero, qui nostra pecunia dives es: sin eos, quos, qui levioe nomine appellant, percussores³ vocant; quære, in cujus fide⁴ sint, et clientela: mihi crede, aliquem de societate tua reperies. Et, quidquid tu contra dixeris, id cum defensione nostra contendito: ita facillime causa Sex. Roscii cum tua conferetur.

Dices: Quid postea⁵, si Romæ assiduus fui? Respon-

10. *Perstringere*. Leviter attingere, ut Verr. IV, 4, 7.

11. *Studio*. Non dedita opera, et mea indole; sed ratione officii ac defensionis.

XXXIII. 1. *Et alii multi*. Subaud. tunc erant Romæ. Dialogismus inter T. Roscium et Ciceronem.

2. *In bonis*. Occisorum diripiendis. Idem hi sectores bonorum conduce-

bant percussores ad cædem, mercede proposita.

3. *Percussores*. Istos, lege sua de sicariis, pœnæ exemerat Sulla. Sæton. Jul. 11.

4. *In cujus fide*. Chrysogoni scilicet. Vide inf. 37.

5. *Quid postea?* Si Romæ assiduus fui, quid inde sequitur? an concludas Roscium a me interfectum?

debo: At ego omnino non fui. — Fateor, me sectorem esse; verum et alii multi. — At ego, ut tute arguis, agricola, et rusticus. — Non continuo, si me in gregem sicariorum contuli, sum sicarius. — At ego profecto, qui ne novi quidem quemquam sicarium, longe absum ab ejusmodi crimine. Permulta sunt, quæ dici possunt, quare intelligatur, summam tibi facultatem fuisse maleficii suscipiendi: quæ non modo idcirco prætereo, quod te ipsum non libenter accuso; verum eo magis etiam, quod, si de illis cædibus velim commemorare, quæ tum facta sunt ista eadem ratione, qua Sex. Roscius occisus est, vereor, ne ad plures oratio mea pertinere videatur.

XXXIV. Videamus nunc strictim, sicut cetera, quæ post mortem Sex. Roscii abs te, T. Rosci, facta sunt; quæ ita aperta et manifesta sunt, ut medius fidius, judices, invitus ea dicam. Vereor enim, cuicuiusmodi¹ es, T. Rosci, ne ita hunc videar voluisse servare, ut tibi omnino non pepercerim. Quum hoc vereor, et cupio tibi aliqua ex parte, quod salva fide possim, parcere, rursus immuto voluntatem meam: venit enim mihi in mentem oris² tui. Tene, quum ceteri socii tui fugerent ac se occultarent, ut hoc iudicium non de illorum præda, sed de hujus maleficio³ fieri videretur, potissimum tibi partes istas depoposcisse, ut in iudicio versarere, et sederes cum accusatore? qua in re nihil aliud assequeris, nisi ut ab omnibus mortalibus audacia tua cognoscatur et impudentia.

XXXIV. 1. *Cuicuiusmodi*. Cuiuscumque modi es, sive probus, sive improbus. Sic Att. III, 22: «ad me velim omnia, cuicuiusmodi sunt, scribas». Vide Priscian. edit. Putsch. 959, et Voss. de Analog. I, 47.

2. *Oris*. Impudentiæ. Subaud. *recor-datio*.

3. *Hujus maleficio*. Roscii filii par-ricidio. — *Depoposcisse*. Fierine potuit, ut hanc personam potissimum agere velles, etc.

Occiso Sex. Roscio, qui primus Ameriam nuntiat? Mallius Glaucia, quem jam antea nominavi, tuus cliens et familiaris. Quid attinuit⁴ eum potissimum nuntiare, quod, si nullum jam ante consilium de morte ac de bonis ejus inieras, nullamque societatem neque sceleris, neque præmii cum homine ullo coieras, ad te minime omnium pertinebat? Sua sponte Mallius nuntiat. Quid, quæso, ejus intererat? An, quum Ameriam non hujusce rei causa venisset, casu accidit, ut id, quod Romæ audierat, primus nuntiaret? Cujus rei causa venerat Ameriam? Non possum, inquit, divinare. Eo rem jam adducam, ut nihil divinatione opus sit. Qua ratione Roscio Capitoni primum nuntiavit? quum Ameriæ Sex. Roscii domus, uxor, liberique essent, quum tot propinqui cognatique optime convenientes⁵, qua ratione factum est, ut iste tuus cliens, sceleris tui nuntius, T. Roscio Capitoni potissimum nuntiaret?

Occisus est a cœna rediens: nondum lucebat, quum Ameriæ scitum est. Quid hic incredibilis cursus? quid hæc tanta celeritas, festinatioque significat? Non quæro, quis percusserit: nihil est, Glaucia, quod metuas: non executio⁶ te, si quid forte ferri habuisti; non scrutor; nihil ad me arbitror pertinere: quoniam, cujus consilio occisus sit, invenio, cujus manu sit percussus, non laboro. Unum hoc sumo, quod mihi apertum tuum scelus, resque manifesta dat. Ubi, aut unde auditiv Glaucia? qui⁷ tam cito scivit? Fac audisse statim. Quæ res eum nocte una tantum itineris contendere coegit?

4. *Quid attinuit.* Quid opus fuit tibi nuntiari quod minime te spectabat, scil. occisum esse Roscium, nisi jam consilium iniisses, etc.

5. *Convenientes.* Inter se concordēs, et unanimes.

6. *Executio.* Non in vestibus quæro (gall. *fouiller*).

7. *Qui.* Quomodo. Ante Glaucia interrogationem delet Heusing. ita ut sit: Unde auditiv Glaucia, qui illud tam cito scivit?

quæ necessitas eum tanta premebat, ut, si sua sponte iter Ameriam faceret, id temporis Roma proficisceretur, nullam partem noctis requiesceret? Etiamne in tam perspicuis rebus argumentatio quærenda, aut conjectura capienda sit?

XXXV. Nonne vobis hæc, quæ audistis, cernere oculis videmini, iudices? Non illum miserum, ignarum casus sui, redeuntem a cœna videtis? non positas insidias? non impetum repentinum? Non versatur ante oculos vobis in cæde Glaucia? Non adest iste T. Roscius? non suis manibus in curru collocat Automedontem¹ illum, sui sceleris acerbissimi nefariæque victoriæ nuntium? non orat, ut eam noctem pervigilet? ut honoris sui causa laboret? ut Capitoni quam primum nuntiet?

Quid erat, quod Capitonem primum scire voluerit? Nescio: nisi² hoc video, Capitonem in his bonis esse socium; de tribus et decem fundis tres nobilissimos fundos eum video possidere. Audio præterea, non hanc suspicionem nunc primum in Capitonem conferri; multas esse infames palmas³: hanc primam esse tamen lemniscatam⁴, quæ Romæ deferatur⁵; nullum

XXXV. 1. *Automedontem*. Lepida antonomasia. Automedon Achilles auxilium fuit, Marti per velocitate. Hunc Achilles, victo Hectore, ire jussit ac nuntiare occisum infensissimum Græcorum hostem. Iliad. XVII, 536. *Eneid.* II, 477.

2. *Nisi*. Sed. Ut in Plaut. Stich. II, 1. Terent. Eun. III, 4, 10, etc.

3. *Palmas*. Nobiles et gloriosæ in victoria palmæ gladiatorum erant; hujus vero Capitonis fuerant infames, quippe qui gladiator cives tantum occidit.

4. *Lemniscatam*. *Ἀντίσκητος*, Syra-

cusana vox, teste Hesychio, unde latine *lemnisci*, i. e. tæniæ angustæ palmis seu coronis circumvolvi solitæ, ut in imperatorum nummis antiquis cernuntur. Sic obligata corona *lemniscata* dicebatur; ceteris erat nobilior, et nemini, nisi multis illustri victoriis, deferri solebat. Vide Plin. XXI, 3. Serv. ad Virgil. *Æn.* V, 269.

5. *Deferatur*. Capitoni. Nempe quod inde quæstus ingens, et hæc nefaria in filium calumnia ad patris cædem accesserit. Quamvis igitur multas turpes victorias retulerit Capito, nullam tamen majorem quam

modum esse hominis occidendi, quo ille non aliquot occiderit; multos ferro, multos veneno. Habeo etiam dicere, quem, contra morem majorum, minorem annis LX⁶, de ponte in Tiberim dejecerit. Quæ, si prodierit⁷, atque adeo quum prodierit (scio enim proditurum esse), audiet. Veniat modo; explicet suum volumen⁸ illud, quod ei planum facere possum Erucium conscripsisse: quod aiunt illum Sex. Roscio intentasse, et minitatum esse, se omnia illa pro testimonio esse dicturum. O præclarum testem, judices! o gravitatem dignam expectatione! o vitam honestam, atque ejusmodi, ut libentibus animis ad ejus testimonium vestrum jusjurandum accommodetis! Profecto non tam perspicue istorum maleficia videremus, nisi ipsos cæcos redderet cupiditas, et avaritia, et audacia.

XXXVI. Alter¹ ex ipsa cæde volucrem nuntium Ameriam ad socium atque ad magistrum suum misit: ut, si dissimulare omnes cuperent se scire, ad quem maleficiū pertineret, tamen ipse apertum suum scelus ante omnium oculos poneret. Alter², si diis³ immortalibus placet, testimonium etiam in Sex. Roscium dicturus est: quasi vero id nunc agatur, utrum, is quod

hanc Romæ per socium et alumnum T. Roscium Magnum reportavit.

6. *Minorem annis LX.* Qui suffragium erant dicturi, *septum* quoddam, in campo Martio cancellis conclusum, intrabant, trans ligneum pontem, ad tempus factum et aliquot pedes altum a terra, de quo sexagenarii dejiciebantur. Nemini quippe post annos sexaginta nato ferre suffragium licebat. Unde etiam « depontani senes » vocabantur. Jocatur inde Cicero (nescio an frigidius) in Capitonem, qui de ponte vere civem in Tiberim præcipitaverat, ac demerserat, contra morem majo-

rum, i. e. nefarie, et contra fas et jura.

7. *Si prodierit.* Si ad dicendum prodeat.

8. *Suum volumen.* Erucius dictaverat Capitori verba, quæ pro testimonio diceret, eaque Capito S. Roscio fuerat minitatus.

XXXVI. 1. *Alter.* T. Roscius Magnus, eodem temporis puncto quo cædes est peracta.

2. *Alter.* T. Roscius Capito.

3. *Si diis.* Forma loquendi ad indignationem plerumque, ut h. l. pertinens.

dixerit, credendum; an quod fecerit, vindicandum sit.

Itaque more majorum comparatum est, ut in minimis rebus homines amplissimi testimonium de sua re non dicerent⁴. Africanus, qui suo cognomine declarat tertiam partem orbis terrarum se subegisse, tamen, si sua res ageretur, testimonium non diceret: nam, illud in talem virum non audeo dicere, si diceret, non crederetur. Videte nunc, quam versa et mutata in peiorem partem sint omnia. Quum de bonis et de cæde agatur, testimonium dicturus est is, qui et sector est, et sicarius⁵; hoc est, qui et illorum ipsorum bonorum, de quibus agitur, emptor et possessor est, et eum hominem occidendum curavit, de cuius morte quæritur.

Quid tu⁶, vir optime? ecquid habes, quod dicas? Mihi ausculta: vide, ne tibi desis; tua quoque res permagna agitur. Multa scelerate, multa audaciter, multa improbe fecisti; unum stultissime, profecto tua sponte, non de Erucii sententia: nihil opus fuit te istic sedere. Neque enim accusatore muto, neque teste quisquam utitur eo, qui de accusatoris subsellio surgit. Huc accedit, quod paullo tamen⁷ occultior atque tectior vestra ista cupiditas esset: nunc quid est, quod quisquam ex vobis audire desideret, quum, quæ facitis, ejusmodi sint, ut ea, dedita opera, nobis⁸ contra vosmet ipsos facere videamini? Age, nunc illa videamus, iudices, quæ statim consequuta sunt.

4. *Non dicerent.* Nam nullus idoneus testis in re sua intelligitur, inquit Pompon. Digest. XXII, 5, 10.

5. *Sicarius.* Hinc colligitur sicarium dici, et eum qui occidit, et illum qui occidendum curat.

6. *Quid tu.* T. Roscium Magnum alloquitur, qui præsens assidet, non Capitonem qui absens est. Is supe-

rioribus Ciceronis dictis commotus, murmure fortasse speciem obloquunturi præbuit.

7. *Add. tamen* e MSS. J.V. L.

8. *Nobis.* Pro nobis pugnare. In vett. edd. et MSS quibusdam legitur *a vobis*, quod retinet Facciol. quasi sit, « ex vobis, sponte vestra », ut apud Græcos ἀφ' ὑμῶν. Malit Garat.

XXXVII. Ad Volaterras¹ in castra L. Sullæ mors Sex. Roscii, quadriduo, quo is occisus est, Chrysogono nuntiatur. Quæritur etiam nunc, quis eum nuntium miserit? Nonne perspicuum est, eundem, qui Ameriam? Curat Chrysogonus, ut ejus² bona veneant statim, qui non norat hominem³, aut rem. At qui ei venit in mentem prædia concupiscere hominis ignoti, quem omnino numquam viderat? Soletis, quum aliquid hujusmodi auditis, judices, continuo dicere: Necesse est, aliquem dixisse municipem, aut vicinum; ii plerumque indicant; per eos plerique produntur. Hic nihil est, quod suspicionem⁴ hanc putetis. Non enim ego ita disputabo: Verisimile est, Roscios istam rem ad Chrysogonum detulisse; erat enim eis cum Chrysogono jam ante amicitia: nam quum multos⁵ veteres a majoribus Roscii patronos hospitesque haberent, omnes eos colere atque observare destiterunt, ac se in Chrysogoni fidem et clientelam contulerunt.

Hæc possum omnia vere⁶ dicere; sed in hac causa conjectura nihil opus est. Ipsos certo scio non negare, ad hæc bona Chrysogonum accessisse impulsu suo. Si eum, qui, indicii⁷ partem acceperit, oculis cernetis, poteritisne dubitare, judices, qui indicarit? Qui sunt

a nobis, i. e. pro nobis, ut elegantius.

XXXVII. 1. *Volaterras*. Quod oppidum centum quinquaginta millibus passuum ab urbe Roma distabat. Hoc obsidebat oppidum Sulla, quod Marianis faverat. Victis et agros ademit, et jus civitatis romanæ. Ad Div. XIII, 4.

2. *Ejus*. Tanquam proscripti; et ne persequendi sceleris facultas filio superait.

3. *Hominem*. S. Roscium. *Rem*, i. e. ejus bona.

4. *Suspicionem*. Non est suspicio, quod dixi de proditis a Rosciis bonis S. Roscii, est ipsa veritas.

5. *Quum multos*. Ordo est: Quum T. Roscii, Capito et Magnus, haberent a majoribus suis multos, etc.

6. Tres codd. Oxoniens. « omnino vere ». Infra iidem codd. « quisquam ». J. V. L.

7. *Indicii*. Prædæ indicatæ. Explicat seipsum Tullius continuo subjungens « partem in istis bonis ». Sic Facciol. Desjard. Garat. Intelligunt

igitur in istis bonis, quibus partem Chrysogonus dederit? Duo Roscii. Num quisnam præterea? Nemo est, judices. Num ergo dubium est, quin ii obtulerint hanc prædam Chrysogono, qui ab eo partem prædæ tulerunt?

Age, nunc ex ipsius Chrysogoni judicio Rosciorum factum consideremus. Si nihil in ista pugna Roscii, quod operæ⁸ pretium esset, fecerant, quam ob causam a Chrysogono tantis præmiis donabantur? Si nihil aliud fecerunt, nisi rem detulerunt, nonne satis fuit his gratias agi? denique, ut perliberaliter ageretur, honoris⁹ aliquid haberi? Cur tria prædia tantæ pecuniæ statim Capitori dantur? Cur, quæ reliqua sunt, iste Roscius omnia cum Chrysogono communiter possidet? Nonne perspicuum est, judices, has manubias¹⁰ Rosciis Chrysogonum, re cognita, concessisse?

XXXVIII. Venit in decemprimis¹ legatus in castra Capito. Totam vitam, naturam, moresque hominis ex ipsa legatione cognoscite. Nisi intellexeritis, judices, nullum esse officium, nullum jus tam sanctum atque integrum, quod non ejus scelus atque perfidia violarit et imminuerit, virum optimum esse eum judicatote. Impedimento est, quo minus de his rebus Sulla doceatur; ceterorum legatorum consilia et voluntatem Chrysogono enuntiat; monet, ut provideat, ne palam res agatur; ostendit, si sublata² sit venditio bonorum, illum³ pecuniam grandem amissurum, sese capitis pe-

autem pro indicii præmio Hotom. et Ernest. Non ita bene.

8. *Quod operæ.* Quod utile esset Chrysogono.

9. *Honoris.* Præmii, remuneratio- nis. Sic Cæs. Bell. civ. II, « honores habere », pro, conferre præmia.

10. *Manubias.* Sic prædæ pars ea

dicebatur, quæ ad imperatorem pertinebat: venustissime dictum: quia duces illi in facinore fuere, ideo præmii manubias appellat.

XXXVIII. 1. *Decemprimis.* Vid. sup. cap. 9.

2. *Sublata.* Remota et abrogata.

3. *Illum.* Chrysogonum. — *Acuere.*

I. *Cic. pars secunda.*

riculum aditurum. Illum acuere; hos, qui simul erant missi, fallere: illum identidem monere, ut caveret; hisce insidiosè spem falsam ostendere: cum illo contra hos inire consilia; horum consilia illi enuntiare: cum illo partem suam depacisci; hisce, aliqua fretus⁴ hora, semper omnes aditus ad Sullam intercludere. Postremo isto hortatore, auctore, intercessore, ad Sullam legati non adierunt; istius fide, ac potius perfidia decepti, id quod ex ipsis cognoscere poteritis, si accusator voluerit⁵ testimonium eis denuntiare, pro re certa spem falsam domum retulerunt.

In privatis rebus si qui rem mandatam⁶ non modo malitiosius gessisset, sui quæstus aut commodi causa, verum etiam negligentius, eum majores summum ad-

Consilio suo instigare, et ad hanc rem tante et insidiosè tractandam impellere.

4. *Aliqua fretus hora.* Hunc locum, ut mendi suspectum, docti frustra sollicitant. Schütz *fretis* legit, et ad legatos refert; Hotom. et Lamb. *aura*; Gruter. «fretum ora»; Manut. «facta mora»; Græv. «aliqua ficta mora»; Beck. «fretus mora». Ernest. suspicatur *causa*. Sed retinenda vulgata lectio, quam præbent omnes MSS et edd. p. *Hora* sumitur hic pro negotio, cui hora diei certa sit vacandum. Sic a Quintiliano, VI, 4, dictus est Asinius Pollio «omnium horarum homo», quod idem semper esset, omnibusque negotiis tum seriis, tum ludicris accommodatus. Capito igitur aliqua semper Sullæ occupatione confusus, hanc prætexendo socios legationis eludebat. Semper aliquod Sullæ impedimentum comminiscébatur, quo fretus legatis aditum impediret. Sic Facciol. quæ nobis hujus loci verissima videtur sententia. Nihil mutat etiam Lalleu. sed diverso sensu: «aliqua fretus ho-

ra», nempe opportuna aliqua occasione adeundi Sullam, quum diceret, se «tentaturum aditus et mollia fandi Tempora», ut ait Virg. *Æn.* IV. Minus feliciter. Intelligit autem Garat. nihil aditus intercludendo Capitonem quærere, nisi ut horam aliquam auferret et lucraretur. Fretus igitur illa hora, illave mora (nam utrumque recipit) legatos ab Sullæ conspectu arcebat, id fore confidens, quod evenit, ut ii denique mendaciis ejus perfidiaque decepti, a castris, re infecta, abirent.

5. *Si accusator voluerit.* Nam reo denuntiandi testimonii potestas non dabatur. Quos produxerat testes, accusator et postea reus interrogabat; nunquam vero iudex.

6. *Rem mandatam.* Mandatum a JCtis definitur contractus quo negotium aliquod honestum procuratori gratis suscipienti committitur. Qui mandat *mandator* dicitur, et is cui mandatur, *mandatarius*, si negotium sit civile, et proprie *procurator*, si ad litem mandatum fuerit.

misisse dedecus existimabant. Itaque mandati constitutum est iudicium⁷, non minus turpe, quam furti : credo propterea quod, quibus in rebus ipsi interesse non possumus, in his, operæ nostræ vicaria, fides amicorum supponitur; quam qui lædit, oppugnat omnium commune præsidium, et, quantum in ipso est, disturbat vitæ societatem. Non enim possumus omnia per nos agere : alius in alia est re magis utilis. Idcirco amicitiae comparantur, ut commune commodum mutuis officiis gubernetur.

Quid recipis mandatum, si aut neglecturus, aut ad tuum commodum conversurus es? Cur mihi te offers, ac meis commodis, officio simulato, officiis et obstas? Recede de medio; per alium transigam. Suscipis⁸ onus officii, quod te putas sustinere posse; quod minime videtur grave iis, qui minime ipsi leves sunt. Ergo idcirco turpis hæc culpa est, quod duas res sanctissimas violat, amicitiam et fidem : nam neque mandat quisquam fere, nisi amico; neque credit, nisi ei, quem fidelem putat. Perditissimi est igitur hominis, simul et amicitiam dissolvere, et fallere eum, qui læsus non esset, nisi credidisset.

XXXIX. Itane est? in minimis rebus, qui mandatum neglexerit, turpissimo iudicio condemnetur necesse est : in re tanta, quum is, cui fama mortui, fortunæ vivi commendatæ sunt atque concreditæ, ignominia mortuum, egestate vivum¹ affecerit; is inter honestos

7. *Mandati iudicium.* Quo cognoscitur de ejus culpa, qui rem sibi mandatam negligenter, aut malitiosè egerit. De iudicio turpi, seu infamiam afferenti, vid. orat. pro Quint.

8. *Suscipis onus.* Per exprobrationem diluit tacitam prolepsim, atque Cicero mandati onus nec grave esse,

nisi hominibus levibus, nec visum esse grave ipsi suscipienti. H. l. deesse aliquid suspicatur Facciol. Nobis expressa manifeste satis videtur sententia.

XXXIX. 1. Aberant hæc dno verba. Recepimus e MS Garatonii. J.V. I. — Lacunam explorare tentaverant Hot.

homines, atque adeo inter vivos numerabitur²? In minimis privatisque rebus etiam negligentia mandati in crimen iudiciumque infamiae³ vocatur, propterea quod, si recte fiat⁴, illum negligere oporteat, qui mandarit; non illum, qui mandatum receperit: in re tanta, quæ publice gesta atque commissa sit, qui non negligentia privatum aliquod commodum læserit, sed perfidia legationis ipsius cærimoniam⁵ polluerit, maculaque affecerit, qua is tandem pœna afficietur? aut quo iudicio damnabitur?

Si hanc ei rem privatim Sex. Roscius mandavisset, ut cum Chrysogono transigeret atque decideret, inque eam rem fidem suam, si quid opus esse putaret, interponeret: ille, qui sese facturum recepisset, nonne, si ex eo negotio tantulum in rem suam convertisset, damnatus per arbitrum⁶, et rem restitueret, et honestatem omnem amitteret?

Nunc non hanc ei rem Sex. Roscius mandavit; sed, id quod multo gravius est, ipse Sex. Roscius cum fama, vita, bonisque omnibus a decurionibus publice Roscio

Lambin. Ernestius autem suppleverat «damno vivum», quæ verba ante «ignom. mort.» posuerat. Sed jam conjectura non opus est.

2. *Numerabitur.* Is non modo honestatem amittat, sed vitam ipsam. Dignus est, qui non modo ex honestorum, sed vivorum etiam numero expungatur, qui tanti criminis reus est.

3. *Infamiae.* In levibus rebus mandarii negligentia crimen habet mandati male gesti, ac etiam iudicio turpi punitur. Loco *infamiae* in vet. edd. legitur *infamia*, quam omnino expungit Græv. Hotomann. autem, Faern. Lambin. *infame*, Manut. *infamiae*. Facciol. «iudiciiue infamiam», quem

sequuntur Olivet. Lallemand. et Schütz.

4. *Si recte fiat.* Si is, cui res est mandata, munere fungatur probi viri, de ea re non jam debet esse sollicitus mandator, sed in ejus, cui mandata est, fide et diligentia acquiescere. Sic Lambin. et Manut. Heusingerus vero sic explicat: Si ratio sit aliqua, cur res mandata negligatur, non is negligere debet, cui ea sit mandata, sed qui mandarit. Sic etiam Ernest.

5. *Cærimoniam.* Sanctitatem inviolatam. Sic Tusc. I, 12: «cærimonia sepulcrorum».

6. *Arbitrum.* In ejus causis, quæ erant fidei bonæ arbitrii iudicabat,

mandatus⁷ est; et ex eo T. Roscius non paullum nescio quid⁸ in rem suam convertit, sed hunc funditus evertit bonis; ipse tria prædia sibi depactus est; voluntatem decurionum ac municipum omnium tantidem, quanti fidem suam, fecit.

XL. Videte jam porro cetera, judices, ut intelligatis, fingi maleficium nullum posse, quo iste sese non contaminarit. In rebus minoribus socium fallere¹, turpissimum est, æqueque turpe, atque illud, de quo ante dixi. Neque injuria: propterea quod auxilium sibi se putat adjunxisse, qui cum altero rem communicavit. Ad cujus igitur fidem confugiet, quum per ejus fidem læditur, cui se commiserit? Atqui ea sunt animadvertenda² peccata maxime, quæ difficillimè præcaventur. Tecti esse³ ad alienos possumus; intimi multa apertiora videant necesse est. Socium vero cavere qui possumus? quem etiam si metuimus, jus officii lædimus. Recte igitur majores eum, qui socium fefellisset, in virorum bonorum numero non putarunt haberi oportere.

At vero T. Roscius non unum rei pecuniariæ socium fefellit (quod, tametsi grave est, tamen aliquo modo posse ferri videtur); verum novem homines honestissimos, ejusdem muneris, legationis, officii, mandato-

non ex jure ac formula, ut judices; sed ex æquitate et conscientia. Vid. pro Rosc. Com. cap. 4. Datus erat a prætore, et apud eum quædam a litigantibus reponebatur pecuniæ summa, quam amitteret, qui ejus judicio acquiescere nolebat.

7. *Publice mandatus*. Publica auctoritate. — Roscio. Capitoni.

8. *Nescio quid*. Sæpius in contemptum dicitur de re parva.

XL. 1. *Fallere*. Transit a mandati

judicio ad illud pro socio: quia socios ejusdem legationis et mandati T. Roscius eluserat.

2. *Animadvertenda*. Graviter punienda.

3. *Tecti esse*. Muniti esse possumus adversus alienos; intimis autem patere multa necesse est; socii ipso societatis jure omnia sciunt. Itaque alienos cavere possumus, atque etiam intimos, quibus, etsi multa, tamen omnia non patent. Socium vero ca-

rumque socios, induxit, decepit, destituit, adversariis tradidit, omni fraude et perfidia fefellit: qui de ejus scelere suspicari nihil potuerunt; socium officii metuere non debuerunt; ejus malitiam non viderunt; orationi vanæ crediderunt. Itaque nunc illi homines honestissimi propter istius insidias parum putantur cauti providique fuisse: iste, qui initio proditor fuit, deinde perfuga, qui primo sociorum consilia adversariis enuntiavit, deinde societatem cum ipsis adversariis coit, terret etiam nos, ac minatur, tribus prædiis, hoc est, præmiis sceleris ornatus. In ejusmodi vita, judices, in his tot tantisque flagitiis, hoc quoque⁴ maleficium, de quo judicium est, reperietis.

Etenim quærere ita⁵ debetis: ubi multa avare, multa audacter, multa improbe, multa perfidiose facta videtis, ibi id scelus quoque latere inter illa tot flagitia putatote. Tametsi hoc quidem minime latet, quod ita promptum et propositum est, ut non ex illis maleficiis, quæ in illo constat esse, hoc intelligatur; verum ex hoc etiam, si quod illorum forte dubitabitur, convincatur. Quid tandem, quæso, judices? num aut ille lanista omnino jam a gladiis recessisse videtur, aut iste discipulus magistro tantulum de arte concedere? Par est avaritia, similis improbitas, eadem impudentia, gemina⁶ audacia.

XLI. Etenim, quoniam fidem magistri cognostis, cognoscite nunc discipuli æquitatem. Dixi jam antea, sæpenumero postulos esse ab istis¹ duos servos in

vere nullo modo possumus. Translatio a gladiatoribus ducta, ubi de insidiis cavendis agitur.

4. *Hoc quoque.* In vita Capitonis tam flagitiosa, reperietis etiam scelus illud, de quo nunc agitur, nempe cædem S. Roscii.

5. *Quærere ita.* Hanc sequi regulam in quærendo.

6. *Gemina.* Par, similis. Sic *gemellus* apud Horat. Sat. II, 3, 244.

XLI. 1. *Ab istis.* Ab adversariis, i. e. nos a duobus Rosciis postulasse. Vid. sup. 28.

quæstionem : tu semper, T. Rosci, recusasti. Quæro abs te, iine, qui postulabant, indignierant, qui impetrarent? An iste² non commovebat, pro quo postulabant? An res ipsa tibi iniqua videbatur? Postulabant homines nobilissimi atque integerrimi nostræ civitatis, quos jam antea nominavi; qui ita vixerunt, talesque a populo romano putantur, ut, quidquid dicerent, nemo esset qui non æquum putaret. Postulabant autem pro homine miserrimo atque infelicissimo, qui vel ipse sese in cruciatum dari cuperet, dum de patris morte quæreretur. Res porro abs te ejusmodi postulabatur, ut nihil interesset, utrum eam rem recusares, an de maleficio confiterere.

Quæ quum ita sint, quæro abs te, quam ob causam recusaris. Quum occiditur Sex. Roscius, ibidem fuerunt. Servos ipsos, quod ad me attinet, neque arguo³, neque purgo : quod a vobis hoc pugnari video, ne in quæstionem dentur, suspiciosum est; quod vero apud vos ipsos in honore tanto sunt, profecto necesse est, sciant aliquid, quod si dixerint, perniciosum vobis futurum sit. In dominos⁴ quæri de servis iniquum est. Anne quæritur⁵? Sex. enim Roscius reus est. Neque enim, quum de hoc quæritur⁶, vos dominos⁷ esse dicitis. Cum Chrysogono sunt. Ita, credo, literis eorum et urbanitate Chrysogonus ducitur, ut inter suos om-

2. *Iste*. S. Roscius, quem digito indicat. Legunt quidam *is te*.

3. *Arguo*. Puniri juste poterant, quod, domino ipsis præsentibus occiso, opem non tulissent. Ad Div. IV, 12.

4. *In dominos*. Objectio Roscium, qua de servis in dominos, h. e. in se et in Chrysogonum quæri iniquum esse contendunt.

5. *Anne quæritur?* Subaud. in dominos. Quæritur enim in reum, quem

dominum esse negatis : vos vero domini eorum haberi non vultis; dominum unum dicitis Chrysogonum.

6. *De hoc quæritur*. Quum quæritur, cujus in potestate sint.

7. *Dominos*. In dominos non quæri ait Cicero, quia in reum quæstio instituitur, non in accusatores : atqui in Sextum quæri quem dominum Roscii non dicerent. Neque sane si dominum, ut olim fuerat, vellent fateri,

nium deliciarum atque omnium artium puerulos, ex tot elegantissimis familiis⁸ lectos, velit hos versari, homines pæne operarios ex Amerina disciplina patris-familiæ rusticani.

Non est ita profecto, iudices; non est verisimile⁹, ut Chrysogonus horum literas adamarit, aut humanitatem; non, ut rei familiaris negotio diligentiam cognovit eorum, et fidem: est quiddam, quod occultatur; quod quo studiosius ab ipsis opprimitur et absconditur, eo magis eminet et apparet.

XLII. Quid igitur? Chrysogonus, sui maleficii occultandi causa, quæstionem de his haberi non vult? Minime, iudices: non in omnes arbitror omnia convenire: ego in Chrysogono, quod ad me attinet, nihil ejusmodi suspicor; neque hoc mihi nunc primum in mentem venit dicere. Meministis, me ita distribuisse initio causam, in crimen, cujus tota argumentatio¹ permissa Erucio est; et in audaciam, cujus partes Rosciis impositæ sunt; quidquid maleficii, sceleris, cædis erit, proprium id Rosciorum esse debebit: nimiam gratiam², potentiamque Chrysogoni dicimus et nobis obstare, et perferri nullo modo posse, et a vobis,

iniquam hanc rem dicere poterant, quum ultro is postularet. Iniquitatem igitur in præsentem dominos intelligebant; neque enim obscurum esse qui peteret, eum non adversus se petere, sed ad refutandos adversarios. Quod recte suspiciosum Tullius affirmat; nisi enim sibi timuissent, profecto dedissent. Varie h. l. emendarunt docti. Menardus legi volebat: « in vos dominos hoc esse dicetis ». Heusing. « q. d. h. q. in vos quæritur, neque enim vos dominos e. d. » Ernest. « q. d. h. q. de domino quæritur, vos enim d. e. d. » Beck. edidit: « vos

eum dominum esse dicitis ». Nos cum Lallem. Garat. vulgatam tuemur.

8. *Familiis*. Proscriptorum servis.

9. *Verisimile ut*. Durior videtur constructio; sequi enim solet accusativus cum infinitivo. Exempla tamen invenias Verr. IV, 6; pro P. Sext. 36, ubi legitur: « an verisimile est, ut civis rom. cum gladio in forum descenderit ante lucem, etc. »

XLII. 1. *Argumentatio*. Criminis arguendi ratio, argumentorum exco gitatio, tractatio.

2. *Gratiam*. Apud Sullam. *Potentiam* in judiciis.

quoniam potestas data est, non modo infirmari, verum etiam vindicari³ oportere.

Ego sic existimo, qui quæri velit ex iis, quos constat, quum cædes facta sit, affuisse, eum cupere verum invenire; qui recuset, eum profecto, tametsi verbo non audeat, tamen re ipsa de maleficio suo confiteri. Dixi initio, iudices, nolle me plura de istorum scelere dicere, quam causa postularet, ac necessitas ipsa cogeret. Nam et multæ res afferri possunt, et unaquæque earum multis cum argumentis dici potest. Verum ego, quod invitatus ac necessario facio, neque diu, neque diligenter facere possum. Quæ præteriri nullo modo poterant, ea leviter, iudices, attingi; quæ posita sunt in suspicionibus, de quibus, si cœpero dicere, pluribus verbis sit disserendum, ea vestris ingeniis conjecturæque committo.

XLIII. Venio nunc ad illud nomen aureum¹ Chrysogoni, sub quo nomine tota societas statuitur: de quo, iudices, neque quomodo dicam, neque quomodo taceam, reperire possum. Si enim taceo, vel maximam partem relinquo: sin autem dico, vereor, ne non ille solus, id quod ad me nihil attinet, sed alii² quoque plures læsos se esse putent. Tametsi ita se res habet, ut mihi in communem causam sectorum dicendum nihil magnopere videatur. Hæc enim causa nova profecto et singularis est.

Bonorum Sex. Roscii emptor est Chrysogonus. Pri-

3. *Vindicari*. Plane supprimi, ne nocere possit amplius.

XLIII. 1. *Aureum*. Jocus a notatione græci nominis, quod idem latine sonat, ac «*factus aureus*». Fit enim a χρυσός, aurum, et γένος, semen, factus. Hac vero ironia servile

et contemptissimum genus ei exprobrat; quod græca appellatione servi soli in ludibrium notarentur.

2. *Alii*. Nempe sectores, potentes homines, ut Crassus ille divitiis et triumviratu famosus, qui et ipsi proscriptorum bona coemerunt.

num hoc videamus, ejus hominis bona qua ratione venierint, aut quomodo venire potuerint? Atque hoc non ita quæram, judices, ut id dicam esse indignum, hominis innocentis bona venisse. Si enim hæc audientur, ac libere dicentur; non fuit tantus homo Sex. Roscius in civitate, ut de eo potissimum conqueramur. Verum hoc ego quæro, qui potuerunt ista ipsa lege, quæ de proscriptione est, sive Valeria³ est, sive Cornelia (non enim novi⁴, nec scio), verum ista ipsa lege, bona Sex. Roscii venire qui potuerunt?

Scriptum enim ita dicunt esse, « Ut eorum bona veniant, qui proscripti sunt »; quo in numero Sex. Roscius non est: « aut eorum, qui in adversariorum præsidiiis occisi sunt ». Dum præsidia ulla fuerunt, in Sullæ præsidiiis fuit: posteaquam ab armis recesserunt, in summo otio, rediens a cœna, Romæ occisus est. Si lege; bona quoque lege venisse fateor: sin autem constat, contra omnes non modo veteres leges⁵, verum etiam novas, occisum esse; bona quo jure, aut quo modo, aut qua lege venierint, quæro.

XLIV. In quem hoc dicam, quæris, Eruci? Non in eum, quem vis, et putas: nam Sullam et oratio mea ab initio, et ipsius eximia virtus omni tempore purgavit. Ego hæc omnia Chrysogonum fecisse dico, ut¹ emen-

3. *Valeria*. Qua L. Valerius Flaccus Sullam dictatorem perpetuum dixit. Vid. Ind. Leg.

4. *Non enim novi*. Quia leges istæ injustissimæ erant, fingit, per contemptum et indignationem, orator eas se ignorare, non sine Sullæ contumelia: quippe dum eas se non legisse, nec, quis tulerit, scire ait, non leges, sed tyranni edicta, putare significat.

5. *Veteres leges*. Porciam et Semproniam. Quarum alia vetabat civem rom. indemnatum necari, alia prohibebat de capite civis rom. nisi centuriatis comitiis judicari. Porcia lex virgas ab omnium civium corpore amovit.

XLIV. 1. *Fecisse dico, ut*, etc. I. e. ementitum fuisse, finxisse, dixisse, passum non esse. Et est latina constructio sæpius apud veteres usurpata. Sic ad Div. X, 17: « fecit ut

tiretur, ut malum civem Roscium fuisse fingeret, ut eum apud adversarios occisum esse diceret; ut hisce de rebus a legatis Amerinorum doceri L. Sullam passus non sit. Denique etiam illud suspicor, omnino hæc bona non venisse: id quod postea, si per vos², iudices, licitum erit, aperietur. Opinor enim esse in lege, quam ad diem proscriptiones, venditionesque fiant: nimirum ad kal. junias. Aliquot post menses et homo occisus est, et bona venisse dicuntur. Profecto aut hæc bona in tabulas publicas nulla redierunt³, nosque ab isto nebulone⁴ facetius eludimur, quam putamus; aut, si redierunt, tabulæ publicæ corruptæ aliqua ratione sunt. Nam lege quidem bona venire non potuisse constat. Intelligo me ante tempus, iudices, hæc scrutari, et propemodum errare, qui, quum capiti Sex. Roscii mederi debeam, rediviam⁵ curem. Non enim laborat de pecunia; non ullius rationem sui commodi ducit; facile egestatem suam se laturum putat, si hac indigna suspitione et ficto crimine liberatus sit.

Verum quæso a vobis, iudices, ut hæc pauca, quæ restant, ita audiatis, ut partim me dicere pro me ipso⁶ putetis, partim pro Sex. Roscio. Quæ enim mihi ipsi indigna et intolerabilia videntur, quæque ad omnes, nisi providemus, arbitror pertinere, ea pro me ipso,

Apellam ad me mitteret», id est, misit.

2. *Si per vos.* Si me audire volueritis, ea quæ ad causam pertinere puto, libere narrantem.

3. *Nulla redierunt.* Non in tabulis inscripta sunt, quas æarii quæstores asservabant, et in quibus pecuniam, quæ ex publicatis bonis redigebatur, perscribere solebant. — Ed. 1480, «nulla ratione redierunt».

4. *Nebulone.* Chrysogono, quem

paullo post et «hominem postremum» et «servum nequissimum» appellat.

5. *Rediviam.* Rebus majoris momenti neglectis, curam levioris mali suscipiam. Porro proverbium est: *redivia*, seu reluvium, morbus est, quo particula cutis circa ungues digitorum se resolvit. (Gall. *envie*.)

6. *Pro me ipso.* Meo nomine. Prudenter separat a causa Roscii quæ graviora dicturus est; ne illius salutis officiat propria oratoris audacia.

ex animi mei sensu ac dolore, pronuntio : quæ⁷ ad hujus vitæ casum, causamque pertineant, et quid hic pro se dici velit, et qua conditione contentus sit, jam in extrema oratione nostra, iudices, audietis.

XLV. Ego hæc a Chrysogono, mea sponte, remoto Sex. Roscio, quæro : primum, quare civis optimi bona venierint; deinde, quare hominis ejus, qui neque proscriptus¹, neque apud adversarios occisus est, bona venierint, quum in eos solos lex scripta sit; deinde, quare aliquanto post eam diem venierint, quæ dies in lege præfinita est; deinde, cur tantulo venierint. Quæ omnia si, quemadmodum solent liberti nequam et improbi facere, in patronum² suum voluerit conferre; nihil egerit : nemo est enim, qui nesciat, propter magnitudinem rerum multa multos [partim connivente³], partim imprudente L. Sulla, commisisse.

Placet igitur⁴ in his rebus aliquid imprudentia præteriri? Non placet, iudices, sed necesse est. Etenim, si Jupiter⁵ optimus maximus, cujus nutu et arbitrio cælum, terra, mariaque reguntur, sæpe ventis vehe-

7. *Quæ ad.* Quæ ad calamitatem S. Roscii, vitæ periculum, ejusque causam ac defensionem pertineant.

XLV. 1. *Neque proscriptus.* Hæc duo verba, in nullo veteri exemplari reperta, ex Hotomanno Lamb. Man. Gruter. Garat. reposuere.

2. *In patronum.* L. Sullam. Quæ dicuntur ad evitandam dictatoris offensionem.

3. Binæ hæ voces non sunt in MSS aut edd. veterimis, nec videntur auctoris, quum in sequentibus de sola imprudentia sermo sit, et illa Sullæ objecta conniventia, in pejorem sane partem accipi potuisset. Victorius et P. Manutius invexere, quod *partim* semper his ponendum esse arbitra-

bantur. Credit Garat. scripsisse Tullium « multa multos privatim, imprudente L. Sulla, commisisse ». Quod quum sæpe in MSS *ptim* legatur, inde profectum errorem *partim* legentium. Atque h. l. *privatim* significaret *ex se*, Sulla non partecipe, ipsos denique solos commisisse. Ceterum optime explicatur *partim*, ita ut verba illa quæ adduntur, nullo modo sint necessaria, sed tantum in audientium animis subintelligantur.

4. *Placet igitur.* Oportet igitur, ut multa prætereat qui remp. administrat? Non ita sane : verum ita cogit necessitas.

5. *Si Jupiter.* Si deus ille, cui maxima attribuitur et clementia, et po-

mentioribus, aut immoderatis tempestatibus, aut nimio calore, aut intolerabili frigore hominibus nocuit, urbes delevit, fruges perdidit; quorum nihil pernicipi causa divino consilio, sed vi ipsa⁶, et magnitudine rerum, factum putamus; at contra, commoda, quibus utimur, lucemque, qua fruimur, spiritumque, quem ducimus, ab eo nobis dari atque impertiri videmus: quid miramur, L. Sullam, quum solus rempublicam regeret, orbemque terrarum gubernaret, imperiique majestatem, quam armis receperat, legibus confirmaret, aliqua animadvertere non potuisse? nisi hoc mirum est, quod vis divina assequi non possit, si id mens humana adepta non sit.

Verum, ut hæc missa faciam, quæ jam facta sunt; ex iis, quæ nunc maxime fiunt, nonne quis potest intelligere, omnium architectum et machinatorem unum esse Chrysogonum, qui Sex. Roscii nomen deferendum curavit? Hoc iudicium⁷... cujus honoris⁸ causa accusare se dixit Erucius....

XLVI. (*Desunt non pauca.*)

.....¹ Aptam et ratione dispositam se habere existimant, qui in Salentinis, aut in Brutiis habent, unde

tentia, non omnia tamen mala avertit: multo minus Sulla. Magnifica comparatio, et ad vitandam Sullæ iram aptissima!

6. *Vi ipsa.* Vi magna naturæ, et æternæ legis aut fati imperio, cui dii ipsi erant obnoxii. Vid. de Offic. III, 28.

7. *Judicium.* Mancus locus, cujus tamen hic sensus esse videtur: « qui hoc iudicium totum conflavit ».

8. *Honoris.* Cujus mercede Erucius adductum esse se esse dixit ad accusandum. *Honor* pro remuneratione h. l. accipitur, ut supra c. 37.

XLVI. 1. Desideratur totus ille locus, in quo ostendebat orator bona S. Roscii neque venire potuisse, neque venisse: deinde amplificationis principium, qua Chrysogonum insectatur, ut omnium Sullæ libertorum opulentissimum ac potentissimum; quem cum ceteris libertis comparat, qui antea quoque egentissimi, non mediocres rei familiaris copias repente consequuti sunt. Sed quid ad Chrysogonum? hi secum bene actum seque omnino felices arbitrantur, si villas in extremo Italiæ angulo remotas ac devias habeant, ille vero, etc.

vix ter in anno audire nuntium possunt. Alter² tibi descendit de Palatio³, et ædibus suis; habet animi relaxandi causa rus amœnum et suburbanum, plura præterea prædia; neque tamen ullum, nisi præclarum et propinquum: domus referta vasis Corinthiis et Deliacis⁴, in quibus est authepsa⁵ illa, quam tanto pretio nuper mercatus est, ut, qui prætereuntes pretium⁶ enumerari audiebant, fundum venire arbitrentur. Quid præterea cælati argenti? quid stragulæ vestis? quid pictarum tabularum? quid signorum? quid marmoris apud illum putatis esse? tantum scilicet, quantum e multis splendidisque familiis in turba et rapinis coacervari una in domo potuit. Familiam vero quantam, et quam variis cum artificiis habeat, quid ego dicam? Mitto hasce artes vulgares, coquos, pistores, lecticarios: animi et aurium causa tot homines habet, ut quotidiano cantu vocum, et⁷ nervorum, et tibiæ, nocturnisque conviviis tota vicinitas personet. In hac vita, iudices, quos sumptus quotidianos, quas effusiones fieri putatis? quæ vero convivia? ho-

2. *Alter*. Chrysogonus. *Tibi*. Pleonasmus est, ad emphasim faciens et indignationem.

3. *Palatio*. Colle Palatino, ubi principes civitatis habitant; et ubi Chrysogonus aedes suas habere, quum servus fuerit, indignissimum videtur. Conf. Horatii Epod. IV, qua villasimum Pompeii libertum eadem audacia insectatur: verum curaverat Horatius ut hanc saltem intra chartas servaret.

4. *Corinthiis et Deliacis*. Vasa æris Corinthii celebratissima erant; illud ex Corinthii incendio conflatum, confuso quippe auro, argento et ære, credidit Florus; quam fabellam de æris Corinthiaci origine refellit ex

ipso Plinio, XXXIV, 3, 4, Bocharus Hierozoici, VI, 16. Secundum locum Delia obtinebant.

5. *Authepsa*. Ollæ genus coquendis cibis ac postea calefaciendis balneis accommodatum, ex coctili terra aut ferro (hic vero ex ære Corinthio): a græco αὐτὴς, ipse, et ἔψα, coquo, quasi per se coqueret, nec foco indigeret. Vid. Senec. Quæst. natur. III, 24.

6. *Pretium*. Pretii est enumeratio in auctione, ubi quantum singuli in foro licitarentur, ex præconis voce intelligere poterant prætereuntes. Loco *pretium* in Pal. prim. *præconi*.

7. *Nervorum*. Fidium quæ citharis aptantur.

nesta, credo, in ejusmodi domo: si domus hæc habenda est potius, quam officina nequitiae, et deversorium flagitiorum omnium. Ipse vero quemadmodum composito et delibuto capillo⁸ passim per forum volitet cum magna caterva togatorum⁹, videtis, judices; ut omnes despiciat; ut hominem præ se neminem putet; ut se solum beatum, solum potentem putet. Quæ vero efficiat, et quæ conetur, si velim commemorare, vereor, judices, ne quis imperitior existimet, me causam nobilitatis victoriamque voluisse lædere: tametsi meo jure¹⁰ possum, si quid in hac parte mihi non placeat, vituperare. Non enim vereor, ne quis alienum me animum habuisse a causa nobilitatis existimet.

XLVII. Sciunt ii, qui me norunt, me, pro illa tenui infirmaque parte¹, posteaquam id, quod maxime volui, fieri non potuit, ut componeretur, id maxime defendisse², ut ii vincerent, qui vicerunt. Quis enim erat, qui non videret, humilitatem³ cum dignitate de amplitudine contendere? Quo in certamine perdit civis erat, non se ad eos jungere, quibus incolumibus et domi dignitas, et foris auctoritas retineretur. Quæ perfecta esse, et suum cuique honorem, et gradum redditum, gaudeo, judices, vehementerque lætor; eaque omnia deorum voluntate, studio populi romani,

8. *Delibuto capillo.* Ad hujus loci explicationem faciunt, quæ habet Ursinus ad Ciacconii triclinium, p. 132.

9. *Togatorum.* Civium romanorum, quorum toga erat propria. Quo uno verbo et liberti arrogantiam, et clientium abjectam servitutem designat orator.

10. *Meo jure.* Quod satis constat, me partes Sullanæ semper sequutum fuisse: quod ipse Sullanarum partium sim fautor. Ceterum hac in re causæ

suz ac tempori servit Cicero, quum contra magno semper studio Marium sit prosequutus.

XLVII. 1. *Infirmaque parte.* Pro illa virium mearum infirmitate, pro mearum opum tenuitate. Male hoc retulerat Hotom. ad Marii, Cinnæ, Carbonis partes.

2. *Defendisse.* Omni asseveratione, palam probando, optando contendisse.

3. *Humilitatem.* Plebeios nempe cum nobilibus de potentia contendere.

consilio et imperio et felicitate L. Sullæ, gesta esse intelligo. Quod animadversum est in eos, qui contra omni ratione pugnarunt, non debeo reprehendere: quod viris fortibus, quorum opera eximia in rebus gerendis exstitit, honos habitus est, laudo: quæ ut fierent⁴, idcirco pugnatum esse arbitror, meque in eo studio partium fuisse confiteor. Sin autem id actum est, et idcirco arma sumpta sunt, ut homines postremi pecuniis alienis locupletarentur, et in fortunâs uniuscujusque impetum facerent, et id non modo re prohibere non licet, sed ne verbis quidem vituperare: tum vero in isto bello non recreatus, neque restitutus, sed subactus oppressusque populus romanus est. Verum longe aliter est; nihil horum est, judices: non modo non lædetur causa nobilitatis, si istis hominibus resistetis, verum etiam ornabitur.

XLVIII. Etenim qui hæc¹ vituperare volunt, Chrysogonum tantum posse queruntur; qui laudare volunt, concessum ei non esse commemorant. Ac jam nihil est, quod quisquam aut tam stultus², aut tam improbus sit, qui dicat, « Vellem quidem liceret, hoc « dixissem ». Dicas licet. « Hoc fecissem. » Facias licet: nemo prohibet. « Hoc decrevissem. » Decerne, modo recte: omnes approbabit. « Hoc judicasset. » Laudabunt omnes, si recte³ et ordine judicaris. Dum ne-

4. *Quæ ut fierent.* Ut domi dignitas, foris auctoritas retineretur.

XLVIII. 1. *Hæc.* Sullæ victoriam.

2. *Stultus.* Qui non metuenda timeat.—*Improbus.* Qui fingat metum, ut improbe judicet. Hæc judices sui officii admonent, quibus liberum esse affirmat, quæ sentiant dicere. Sed quæ de decernendo loquitur, et magistratu ac procuratore, ad M. Fannium

quæsitorem ac præsidem pertinere maxime videntur.

3. *Melius forte ratione,* ut cod. Lincoln. et ed. Venet. J. V. L. — Ceterum « recte et ordine » idem est quod non præpostere, re antea cognita, juste. Præterea formula erat approbantium et laudantium, qua senatus quotidie utebatur, ut notissimum est ex Brisson. Formul. II, 197.

cesse erat, resque ipsa cogebat, unus omnia poterat : qui posteaquam magistratus⁴ creavit, legesque constituit, sua cuique procuratio auctoritasque est restituta. Quam si retinere volunt ii, qui recuperarunt, in perpetuum poterunt obtinere : sin has cædes, et rapinas, et hos tantos tamque profusos sumptus aut facient, aut approbabunt; nolo in eos gravius quidquam, ne ominis quidem causa, dicere; unum hoc dico : nostri isti nobiles, nisi vigilantes, et boni, et fortes, et misericordes erunt, iis hominibus, in quibus hæc erunt, ornamenta sua concedant necesse est.

Quapropter desinant aliquando dicere, male aliquem loquutum esse, si quis vere ac libere loquutus sit; desinant suam causam cum Chrysogono communicare; desinant, si ille læsus sit, de se aliquid detractum arbitrari; videant, ne turpe miserumque sit, eos, qui equestrem splendorem⁵ pati non potuerunt, servi nequissimi dominationem ferre posse. Quæ quidem dominatio, iudices, in aliis rebus antea versabatur; nunc vero quam viam munitet⁶, quod iter affectet, videtis : ad fidem, ad iurandum, ad iudicia vestra, ad id, quod solum prope in civitate sincerum sanctumque restat.

Hicne⁷ etiam sese putat aliquid posse Chrysogonus? hic etiam potens esse vult? O rem miseram atque acer-

4. *Magistratus*. Sulla dictator comitia haberi, consules creari permisit, sed tantum ad speciem. Sua cuique auctoritas restituta non est, nisi anno 674, quo anno dictaturam abdicavit. Neque hæc ignorat Cicero, sed causæ suæ consulit.

5. *Equestrem splendorem*. Significat iudicia, quæ equestri ordini Sulla victor ademerat, et ad senatorium ordinem transtulerat.

6. *Munitet*. Sibi aperire cupiat, i. e. quid paret, quid moliat. Totum hoc e poeta desumptum Grutero videtur : nam pedes apparent trochaici versus : « quam viam Munitet, quod iter affectet ». Quod melius etiam demonstrat usurpatum verbum *munitet*, quod non alibi occurrit.

7. *Hic*. In iudiciis. Nempe putat Chrysogonus se iudicum animos ad nutum posse moderari.

bam! Neque mehercules hoc indigne fero, quod ve-
rear, ne quid possit: verum quod ausus est, quod
speravit, sese apud tales viros aliquid ad perniciem
posse innocentis, id ipsum queror.

XLIX. Idcircone expectata¹ nobilitas armis atque
ferro rempublicam recuperavit, ut ad libidinem suam
liberti servulique nobilium, bona, fortunas vestras
nostrasque vexare possent? Si id actum est, fateor me
errasse, qui hoc² maluerim; fateor insanisse, qui cum
illis senserim: tametsi inermis, iudices, sensi. Sin au-
tem victoria nobilium ornamento atque emolumento
reipublicæ, populoque romano debet esse; tum vero
optimo et nobilissimo cuique meam orationem gratis-
simam esse oportet. Quod si quis est, qui et se, et
causam lædi putet, quum Chrysogonus vituperetur;
is causam ignorat, se ipsum prope non novit³. Causa
enim splendidior fiet, si nequissimo cuique resistetur;
ille improbissimus Chrysogoni fautor, qui sibi cum illo
rationem communicatam putat, læditur⁴, quum ab hoc
splendore causæ separatur.

Verum hæc omnis oratio, ut jam ante dixi, mea est;
qua me uti respublica, et dolor meus, et istorum in-
juria coegit. Sed Roscius horum nihil indignum putat;
neminem accusat; nihil de suo patrimonio queritur;
putat homo imperitus morum, agricola et rusticus,
ista omnia, quæ vos per Sullam gesta esse dicitis, more,
lege, jure gentium facta: culpa liberatus, et crimine
nefario solutus cupit a vobis discedere. Si hac indigna
suspicionem careat, animo æquo se carere suis omnibus

XLIX. 1. Olim, *expectata*; et sic
nonnulli MSS. J. V. L.

2. *Hoc*. Ut nobiles vincerent.

3. *Non novit*. Non intelligit se no-
bilem esse, nihilque se cum Chryso-

gono, liberto homine, commune ha-
bere.

4. *Læditur*. Se ipse lædit, quum
se a splendida nobilium causa, volens
labensque separat.

commodis dicit : rogat, oratque te, Chrysogone, si nihil de patris fortunis amplissimis in suam rem convertit; si nulla in re te fraudavit; si tibi optima fide sua omnia concessit, annumeravit, appendit; si vestitum, quo ipse tectus erat, annulumque de digito⁵ suum tibi tradidit; si ex omnibus rebus se ipsum nudum, neque præterea quidquam exceperit; ut sibi⁶ per te liceat innocenti amicorum opibus vitam in egestate degere.

L. Prædia mea tu possides : ego aliena misericordia vivo; concedo, et quod animus æquus est, et quia necesse est : mea domus tibi patet, mihi clausa est; fero : familia mea maxima uteris, ego servum habeo nullum; patior, et ferendum puto. Quid vis amplius? quid insequeris? quid oppugnas? qua in re tuam voluntatem lædi a me putas? Ubi tuis commodis officio? quid tibi obsto? Si spoliiorum causa¹ vis hominem occidere, spoliasti : quid quæris amplius? Si inimicitiarum; quæ sunt tibi inimiciæ cum eo, cujus ante prædia possedisti, quam ipsum cognosti? Sin metuis²; ab eone aliquid metuis, quem vides ipsum ab sese tam atrocem injuriam propulsare non posse? Sin, quod bona, quæ Roscii fuerunt, tua facta sunt, idcirco hunc

5. *De digito.* Hanc elegantem correctionem, quæ Lambini est, sequuti sunt omnes. Porro intelligendus est aureus annulus quem locupletissimi ferebant, ut S. Roscius; hunc Chrysogono tradidit, quippe quem omnibus fortunis eversus, non jam gestare posset. Similia exempla in Verr. I invenies. Ceterum frustra turbat Manutius, quum ferreum tantum a Roscio gestari potuisse annulum dicat, quia non eques rom. erat. Ut enim Cicero- nem mittam, Isidorus aperte dicit : « annulo aureo liberi utebantur, libertini argenteo, servi ferreo ». Olim le-

gebatur « os suum tibi tradidit », unde erui comoda explicatio non poterat. Verburgius emendat « annulumque dedit, rus suum tibi tradidit », quod unice probat Otto, quamvis illud rus post vestitum et annulum satis imperite, nedum parum oratorie collocetur.

6. *Ut sibi.* Repete e superiori : « rogat, oratque te ».

L. 1. *Spoliiorum causa.* Jam loquitur ex persona sua Cicero.

2. *Sin metuis.* Ne aliqua in re noceat. — Franc. 1 : « ab eo ne aliquid metuas ». Vulg. abest *aliquid*.

illius filium studes perdere; nonne ostendis, id te vereri, quod præter ceteros tu metuere non debeas³, ne quando liberis proscriptorum bona patria reddantur⁴. Facis injuriam, Chrysogone, si majorem spem emptio-
nis tuæ in hujus exitio⁵ ponis, quam in his rebus, quas L. Sulla gessit. Quod si tibi causa nulla est, cur hunc miserum tanta calamitate affici velis; si tibi omnia sua, præter animam, tradidit, nec sibi quidquam pater-
num⁶, ne monumenti quidem causa, reservavit: per deos immortales, quæ ista tanta crudelitas est? quæ tam fera immanisque natura? quis umquam prædo fuit tam nefarius? quis pirata tam barbarus, ut, quum integram prædam sine sanguine habere posset, cruenta spolia detrahare mallet? Scis hunc nihil habere, nihil audere, nihil posse, nihil umquam contra rem tuam cogitasse: et tamen oppugnas eum, quem neque me-
tuere potes, neque odisse debes, nec quidquam habere jam reliqui vides, quod ei detrahare possis: nisi hoc indignum putas, quod vestitum sedere in ju-
dicio vides, quem tu e patrimonio, tamquam e naufragio, nudum expulisti. Quasi vero nescias, hunc et ali et vestiri a Cæcilia, Balearici filia, Nepotis sorore, spectatissima femina: quæ, quum patrem clarissimum⁷, amplissimos patruos, ornatissimum fratrem

3. *Non debeas.* Quum tantum apud Sullam gratia valeas, quantum in civitate nemo alius.

4. *Reddantur.* Quæ ne redderentur Valeria lege cantum erat.

5. *In hujus exitio.* Injuste facis, si spem certæ possessionis Roscianorum bonorum, quæ emisti, in erepta potius huic vita ponis, quam in lege Valeria, qua omnia Sullæ acta rata esse jubentur. Ea enim siquando abrogabitur, excidet tibi rapina,

etiamsi Sex. Roscii filium interfeceris.

6. *Quidquam paternum.* I. e. ne tantum quidem paterni agri, quantum adeundo patris sepulcro satis est: vel potius, quod satis sit ut cum paternis cineribus suos olim misceat.

7. *Clarissimum.* Cæciliæ gentis claritudo notatur ex eo, quod intra viginti quatuor annos consules aut censores fuere Metelli, aut triumpharunt, amplius quindecim. Plin. VII, 45. Vell. Pat. II, 111.

haberet, tamen, quum⁸ esset mulier, virtute perfecit, ut, quanto honore ipsa ex illorum dignitate afficeretur, non minora illis ornamenta ex sua laude redderet.

LI. An, quod diligenter defenditur, id tibi indignum facinus videtur? Mihi crede, si, pro patris ejus hospitiiis et gratia, vellent omnes hujus hospites adesse, et auderent libere defendere, satis copiose defenderetur: sin autem pro magnitudine injuriæ, proque eo, quod summa respublica¹ in hujus periculo tentatur, hæc omnes vindicarent, consistere mehercule vobis isto in loco non liceret. Nunc ita defenditur, non sane ut moleste ferre adversarii debeant, neque ut se potentia superari putent. Quæ domi gerenda sunt, ea per Cæciliam transiguntur; fori judiciiue rationem Messalla², ut videtis, judices, suscepit. Qui, si jam satis ætatis atque roboris haberet, ipse pro Sex. Roscio diceret: quoniam ad dicendum impedimento est ætas, et pudor, qui ornat ætatem, causam mihi tradidit, quem sua causa cupere³ ac debere intelligebat; ipse assiduitate, consilio, auctoritate, diligentia perfecit, ut Sex. Roscii vita, erepta de manibus sectorum, sententiis judicum permitteretur. Nimirum, judices, pro hac nobilitate⁴ pars maxima civitatis in armis fuit: hæc acta res⁵ est, uti nobiles restituerentur in civitatem, qui hoc facerent,

8. *Quum*. Quamvis. Sensu non novo.

LI. 1. *Summa respublica*. I. e. res in qua versatur totius reip. salus. Publica libertas in periculum vocatur; id agitur ut resp. evertatur, ut optimis quibusque civibus, qui sua virtute remp. sustinent, exitium afferatur. Nam si innocens ille damnatur, quis sicarius, quod libeat, id sibi non licere putaturus est? Vid. J. F. Gronov. ad T. Liv. XXVI, 9.

2. *Messalla*. De hoc loquitur Cice-

ro in Bruto, cap. 79, « M. Messalla minor natu quam nos, nullo modo inops, sed non nimis ornatus genere verborum, prudens, acutus, etc. »

3. *Quem sua causa cupere*. Mihi quem suæ causæ favere scit. Sic ad Div. XIII, 64. In priore *cupere* amor ostenditur, in posteriore *debere* officium. — J. V. L. *intelligat*.

4. *Hac nobilitate*. Nobilibus Messallæ similibus.

5. *Hæc acta res*. Arma sumpta sunt.

quod facere Messallam videtis; qui caput⁶ innocentis defenderent; qui injuriæ resisterent; qui, quantum possent, in salute alterius, quam in exitio, mallent ostendere. Quod si omnes, qui eodem loco nati sunt, facerent; et respublica ex illis, et ipsi ex invidia minus laborarent.

LII. Verum si a Chrysogono, judices, non impetramus, ut pecunia nostra contentus sit, vitam¹ ne petat; si ille adduci non potest, ut, quum ademerit nobis omnia, quæ nostra erant propria, ne lucem quoque hanc, quæ communis est, eripere cupiat; si non satis habet avaritiam suam pecunia explere, nisi etiam crudelitate sanguinis² perlitus sit: unum perfugium, judices, una spes reliqua est Sex. Roscio, eadem, quæ reipublicæ, vestra pristina bonitas et misericordia: quæ si manet, salvi etiam nunc esse possumus. Sin ea crudelitas, quæ hoc tempore in republica versata est, vestros quoque animos, id quod fieri profecto non potest, duriores acerbioresque reddidit; actum est, judices: inter feras satius est ætatem degere, quam in hac tanta immanitate versari. Ad eamne rem vos reservati³ estis? ad eamne rem delecti, ut eos condemnare-

6. *Caput*. Vitam, libertatem, extinctionem sine qua vita nulla putatur.

LII. 1. *Vitam ne petat*. Mirabilis locus in epilogis inducendus ad commovendam misericordiam. Similis ille pro Quintio, 30, in fine.

2. *Crudelitate sanguinis*. I. e. sanguine crudeliter effuso, crudeli cæde adpersus sit et perfusus. Quæ sane elata, ut in indignante, translatio est. Clericus autem Art. critic. III, 1, 8, audaciori hoc loquendi genere offensus legendum censet = crudelitati san-

guine perlitarit -, ita ut Crudelitati quasi deæ sacra faciat. Hoc recepit Sch. Ceterum ostendit Oliv. placere Ciceroni eas vocum commutationes, quæ grammaticis auribus forsitan non placeant, sed novitatem dictioni ac admirabilitatem concilient. Inde enim vis major et quædam colorandi efficacia a bonis oratoribus non minus quam poetis sæpius usurpata. — Loco *perlitus* in vet. edd. *præditus*. Pessime.

3. *Reservati*. Ex nobilium, quos Marius trucidavit, cæde servati. — *Delecti*. Judices constituti.

tis, quos sectores ac sicarii jugulare non potuissent? Solent hoc boni imperatores facere, quum prælum committunt, ut in eo loco, quo fugam hostium fore arbitrentur, milites collocent; in quos, si qui ex acie fugerint, de improvise incidant. Nimirum similiter arbitrantur isti bonorum emptores, vos hic, tales viros, sedere, qui excipiat eos, qui de suis manibus effugerint. Dii prohibeant, judices, ut hoc quod majores consilium publicum⁴ vocari voluerunt, præsidium sectorum existimetur! An vero, judices, vos non intelligitis, nihil aliud agi, nisi ut proscriptorum liberi quavis ratione tollantur, et ejus rei initium in vestro jurejurando, atque in Sex. Roscii periculo quæri? Dubium est, ad quem maleficio pertineat, quum videatis in altera parte sectorem, inimicum, sicarium, eundemque accusatorem hoc tempore; ex altera parte egentem, probatum suis⁵ filium, in quo non modo culpa nulla, sed ne suspicio quidem potuit consistere? Numquid hic aliud videtis obstare Roscio, nisi quod patris bona venierunt⁶?

LIII. Quod si id vos suscipitis, et eam ad rem operam vestram profitemini; si idcirco sedetis, ut ad vos adducantur eorum liberi, quorum bona venierunt: cavete, per deos immortales, judices, ne nova et multo crudelior per vos proscriptio instaurata esse videatur. Illam priorem, quæ facta est in eos, qui arma capere potuerunt, tamen senatus suscipere noluit¹, ne quid acrius, quam more majorum² comparatum est, pu-

4. *Consilium publicum.* Consensum judicum publicæ utilitati consulentium. Sic appellata publica omnia judicia. Sæpius etiam hoc nomen senatus tribuitur, ut infra.

5. *Suis.* Amerinis suis civibus.

6. *Venierunt.* Quæ retinere se posse non putant, incolumi filio.

LIII. 1. *Suscipere noluit.* Senatus consulto probare noluit.

2. *More majorum.* Respicit h. l. ad leges Porcias et Sempronias, quæ

blico consilio³ factum videretur. Hanc vero, quæ ad eorum liberos atque infantium puerorum⁴ incunabula pertinet, nisi hoc iudicio a vobis rejicitis et aspernamini, videte, per deos immortales, quem in locum rempublicam perventuram putetis. Homines sapientes, et ista auctoritate et potestate præditos, qua vos estis, ex quibus rebus maxime respublica laborat, iis maxime mederi convenit. Vestrum nemo est, quin intelligat populum romanum, qui quondam in hostes⁵ lenissimus existimabatur, hoc tempore domestica crudelitate laborare. Hanc tollite ex civitate, iudices; hanc pati nolite diutius in hac republica versari: quæ non modo id habet in se mali, quod tot cives atrocissime sustulit, verum etiam hominibus lenissimis ademit misericordiam⁶ consuetudine incommodorum. Nam quum omnibus horis aliquid atrociter fieri videmus, aut audimus, etiam qui natura mitissimi sumus, assiduitate molestiarum sensum omnem humanitatis ex animis amittimus.

securim a civium cervicibus, virgas a tergo removebant.

3. *Publico consilio.* Auctoritate senatus.

4. *Puerorum incunabula.* Hanc vehementissime insectatur legem in Sallustio Lepidus: «quin solus omnium (Sulla), post memoriam hominum, supplicia in postfuturos composuit, queis prius injuria quam vita certa

esset». Hanc postea Cæsar, rerum potius, abrogavit. Sueton. in Jul. c. 41.

5. *In hostes lenissimus.* Vide Cæsarem apud Sallust. in Bell. Catil. 50.

6. *Ademit misericordiam.* Monet iudices ne inviti ferme ad crudelitatem sint propensiores. Illud enim, ex bellorum civilium spectaculo trahitur, ut quodammodo humanitatis omnis hebescat sensus.

M. TULLII CICERONIS
PRO Q. ROSCIO COMOEDO
ORATIO

ARGUMENTUM.

Tradidit C. Fannius Chærea (homo, ut videtur, natione Græcus, C. Fannii cujusdam libertus, cujus de more nomen sibi adoptaverat) Q. Roscio, comædo nobilissimo, de quo fusius ad calcem hujus orationis dicitur, Panurgum servum suum, ea conditione ut arte histrionica ab illo institueretur, quæstusque inter eos esset communis. Panurgus autem, quum in ea arte jam aliquantum profecisset, et a multis, ut Roscii discipulus, in scena probaretur, a Flavio quodam Tarquiniensi occiditur. Flavium Roscius quum judicio vellet persequi, hanc provinciam Fannio dedit, cujus quoque illud intererat. Judicio autem constituto, pro sua parte decedit Roscius cum Flavio, et ab eo sestertium centum millia (20,500 fr.) pro damni illati injuria obtinet, neque tamen numeratam pecuniam, sed pro ea agrum accipit non magni æstimatum, nempe quod, Sulla hisce temporibus dominante, non certo bona emi aut possideri possent. Deinde Pisonis rogatu, quem arbitrum Fannius elegerat, Roscius Fannio pro opera, pro labore quod cognitor fuisset, quod vadimonium obiisset, certam pecuniam dedit, ea nimirum conditione, ut siquid et ipse pro servo interempto exegisset a Flavio, partem ejus dimidiam Roscio dissolveret. Repromisit Fannius; Flavio litem intendit, et sumpto hac in privata causa judice C. Cluvio equite romano, ab eo exegit H-S centum millia, cujus pecuniæ pars dimidia, quum Roscio ex convento deberetur, nulla dissoluta est. Imo Fannius, quarto anno post, Flavio interea mortuo, Roscio litem intendit, ab eoque H-S quinquaginta millia (10,250 fr.), dimidiam scilicet partem pretii, quo ager quem Flavius olim Roscio tradiderat, nunc æstinabatur, postulavit, quasi Roscius tum pro tota societate cum Flavio decidisset, et in animum induxisset socium dimidia parte, quæ ei deberetur, fraudare. Datus igitur judex a prætore C. Calpurnius Piso, triennio ante in eadem causa arbiter, et novem annis post hanc causam, h. e. anno 686 consul, et severissimæ legis Calpurniæ *de ambitu* auctor. Huic assidet in consilio M. Perperna, vir censorius et consularis, cui illud evenit, ut quum vixisset annos 98,

septem tantum in senatu reliquerit, moriens, ex iis quos censor legerat. Plin. VII, 48. Val. Max. VIII, 13, 4.

Acta videtur causa A. U. C. 677, Cn. Octavio, M. Scribonio Curione coss. quarto anno post causam Sex. Roscii Amerini defensam, quum Cicero ex Asia reversus annum ageret ætatis suæ primum et trigesimum. Fannii causam agit P. Saturius, cui rerum capitalium quæstionem A. U. 678 sortito ingenii, diligentiae, religionis laudem tribuit Cicero pro Cluentio, c. 38. Oratoriam autem ejus facultatem nunc irridet infra cap. 10; at adversarius adversarium pungit, et ea semper oratoribus lex est, ut causæ primum, dein veritati serviant.

Causa vicit Tullius, ex ea nempe ratione quod iudicibus demonstravit Fannium quoque pro *damni dati injuria* pecuniam a Flavio accepisse.

SYNOPSIS.

Hujusce orationis vix sexta pars ad nos pervenit integra. Deest enim exordium, narratio, maxima pars contentionis et peroratio.

Quod superest de contentione partes habet duas, confirmationem et confutationem.

Propositio CONFIRMATIONIS tria in argumenta distribuitur. Pecunia, quam Fannius petit, a Roscio non debetur, quia

1° Fannius mutuo nihil dedit Roscio.

2° Fannius societatis nomine pecuniam non expendit.

3° Fannio Roscius nihil promisit.

Primum argumentum, temporum injuria periit. Secundum non est integrum: in ea, quæ reliqua est parte, demonstratur non tabulis suis probare Fannium posse se societatis nomine pecuniam expendisse, 1, 2, 3. Si vere ei certa pecuniæ summa deberetur, non ad arbitrum primum, deinde ad iudicem iturum fuisse. Qui nempe ad arbitrum confugiunt, non definitam summam repetunt, sed plus aut minus impetrant, prout arbitro æquum videtur. Ergo male agit Fannius, qui nunc certum petit; et causa cadat necesse est. Iudex enim formula sua constringitur, et ab ea recedere ne uno quidem verbo potest; ita ut, etiam si plus aut minus H-S quinquaginta millibus deberi intelligat, ex formula tamen reum absolvat. De formulis vide plura ad calcem voluminis hujus, in excursu De ordine exercendorum iudiciorum.

Nunc confirmationi CONFUTATIONEM subjungit orator, 5. Demonstrat in Roscium, ut virum optimum, non cadere suspicionem, eum socium suum fraudare voluisse, contra in Fannii ingenium ejusmodi malitiam convenire,

6, 7. Porro causam non fuisse, cur Roscius Fannium fraudaret, quippe qui non solum locuples, sed etiam semper liberalissimus fuisset, 8. Confessum ipsum Fannium qui non eum hoc nomine sit persequutus, 9-11. Neque ab iis quæ Panurgi mortem sequuta sunt, argui posse Roscii fidem. Demonstratur enim Roscium illo tempore quo agrum a Flavio solutionis causa accepisset, cum eo pro sua parte, non pro tota societate pactionem fecisse, 12. Tum ostendit Fannium postea tantumdem, quantum Roscius a Flavio acceperat, ab eo exegisse; id quod T. Manilii et C. Luscii Ocreæ testimoniis confirmatur, qui hoc se ex Cluvio audisse dixerunt, 13-17. Postremo occurritur calumniæ Fannii, qui, quamvis partem suam a Flavio obtinuerit, quod sibi exegit Roscius, id commune societatis factum esse contendit.

Reliqua hujus orationis desiderantur, non sine magno dolore eorum, quibus oratio placet gravis et incitata, distincta luminibus sententiarum atque verborum.

M. T. CICERONIS ORATIONES.

PRO Q. ROSCIO COMOEDO ORATIO.

ORATIO TERTIA.

Multa, quæ desunt, quærenda.

..... I. ¹Malitiam naturæ, crederetur?..... Is scilicet vir optimus², et singulari fide præditus, qui, in suo iudicio, suis tabulis³ testibus uti conatur. Solent fere dicere, qui per tabulas homines..... citi⁴ pecuniam expensam tulerunt: Egone talem virum corrumpere potui, ut mea causa falsum in codicem

I. r. Deest principium orationis una cum narratione et prima parte confirmationis. — Primæ sententiæ conjicitur sensus: Illine fidem adhibebunt, qui malitiam ejus naturæ noscunt?

2. *Optimus*. Hoc ad C. Fannium ironice refertur, qui quum res ipsius agitur, quasi testes affert suas tabulas.

3. *Tabulis*. Mos erat patrumfamilias, quæcumque per singulos dies aut acciperent aut expenderent, ut

ea primum in codice quem *adversaria* vocabant, deinde eadem per otium in tabulis (*an registre*) perscriberent. Ex iis vero quinto quoque anno uniuscujusque civis census testimabatur. Vid. Vossii Etym. Sahms. de Usur. p. 147.

4. Ernestius conjicit «hominis certi»; P. Manutius, «honesti»; F. Ursinus, «acciti»; Ant. August. «sciti»; alii aliter, ut in omni hac parte orationis. J. V. L.

referret? Exspecto, quam mox Chærea hac oratione utatur: Egonè hanc manum, plenam perfidiæ⁵, et hos digitos meos impellere potui, ut falsum perscriberent nomen⁶? Quod si ille suas proferet tabulas, proferet suas quoque Roscius: erit in illius tabulis hoc nomen; at in hujus non erit. Cur potius illius, quam hujus, credetur? Scripsisset ille⁷, si non jussu hujus expensum tulisset? Non scripsisset hic, quod sibi expensum ferri jussisset? Nam, quemadmodum turpe est scribere, quod non debeatur; sic improbum est non referre, quod debeas: æque enim tabulæ condemnantur ejus, qui verum⁸ non retulit, et ejus, qui falsum perscripsit. Sed ego copia et facultate causæ confisus, vide, quo progrediar. Si tabulas C. Fannius accepti et expensi profert suas, in suam rem, suo arbitrato scriptas; quo minus secundum illum judicetis, non recuso. Quis hoc frater fratri, quis parens filio tribuit, ut, quodcumque retulisset, id ratum haberet? ratum habebit Roscius; profer: quod tibi fuerit persuasum, huic erit persuasum; quod tibi fuerit probatum, huic erit probatum. Paulo ante a M. Perperna P. Saturii⁹ tabulas

5. *Plenam perfidiæ.* Suspectum hoc habet Ernest. quum nemo sic in sua defensione dicat. Sed potest quasi a parte oratoris et intra parenthesis dici: et sæpius ita loquentes adversarios inducit Cicero ut propriam causam lædant. Sic Divin. 7 Hortensius « de infami et nefaria cera » ipse loquitur, quam olim dederat iudicibus.

6. *Nomen. Debitum.*

7. *Scripsisset ille.* Objectio. Anne scripsisset Chærea, si, non permitte Roscio, ejus debitum in tabulas tulisset? — Respondetur: Annon vicissim scripsisset Roscius, quod, etc. — *Expensum ferre*, est in tabulas

factum pro aliquo expensum s. sumptum referre. Inde *expensi* et *accepti* tabulæ (gall. *registre de dépense et de recette*).

8. *Verum.* Quod revera debet. — *Non retulit*, in suas tabulas.

9. Sic nonnullæ edd. vett. et un. cod. Oxon. et Pantagath. Vulgatam servant lectionem « M. Perpernae, P. Saturii tabulas » Græv. Ern. Beck. hoc potissimum argumento, quod duorum hominum « Perpernae et Saturii tabulæ » opponuntur « Fannii solius tabulis ». Ceterum a M. Perperna Saturii tabulas poscebant, non tamquam a iudice, sed tamquam a

poscebamus : nunc tuas, C. Fanni Chærea, solius flagitamus, et, quo minus secundum eas lis detur¹⁰, non recusamus. Quid ita non profers? Non conficit tabulas? Imo diligentissime. Non refert parva nomina in codices? Imo omnes summas. Leve et tenue hoc nomen? H-S cccicccc¹¹ sunt : quomodo tibi tanta pecunia extraordinaria¹² jacet? quomodo H-S cccicccc in codice accepti et expensi non sunt? Proh dii immortales! esene quemquam tanta audacia præditum, qui, quod nomen referre in tabulas timeat, id petere audeat? quod in codicem injuratus referre noluit, id jurare in litem¹³ non dubitet? quod sibi probare non possit, id persuadere alteri conetur?

II. Nimium cito, ait, me indignari de tabulis : non habere se hoc nomen in codice accepti et expensi relatum confitetur ; sed in adversariis¹ patere contendit. Usque eone te diligis, et magnifice circumspicis², ut

Roscii pariter et Chæræ amico, et extra judicium. Ille autem Saturius patronus erat Chæræ libertini, qui a prioris patroni nomine C. Fannius Chærea appellabatur. Tabulas istas Perperna, quasi arbiter, habere poterat, aut afferendas curare. Ceterum amissa orationis parte ad quam paullo ante refertur, hanc rem perspicere plane non possumus. — Dat J. V. L. Perperna ; verum in nota monet scribi rectius forte Perperna e MSS et nummis et Fastis Capitolinis.

10. *Lis detur.* I. e. pronuntiatur. Sic Val. Max. II, 8. Gell. V, 10.

11. cccicccc. Centum millia sesterium (20,500 fr.). Vide ad calc. hujus orat. de Romanorum notis numeralibus.

12. *Extraordinaria.* Non suo ordine in tabulas relata. Cf. Verr. I, 39.

I. *Cic. pars secunda.*

13. *Jurare in litem.* Est tanti rem æstimare, jurejurando delato. *Jusjurandum in litem*, vocant JCti, quum judex propter rei contumaciam et fraudem, actori, quanti litem illam, i. e. adversarii sui injuriam æstimet, jurare permittit. Porro in judicio societatis ob dolum in litem jurat actor, et in omnibus adeo judiciis bonæ fidei.

II. 1. *Adversariis.* Eæ dicuntur tabulæ, gall. *brouillon*, ad quotidianum usum paratæ, in quas cursim et negligenter conjicimus quæ postea in certas tabulas ordine perscribamus.

2. *Circumspicis.* Imago venusta, a pavonibus non sine joco translata, qui adverso sole plumis expansis se circumspiciunt, ac magnifice incedunt, ita ut majorem in modum sibi placere videantur.

10

pecuniam non ex tuis tabulis, sed ex adversariis petas? Suum codicem testis loco recitare, arrogantiae est: suarum perscriptionum³ et liturarum adversaria proferre non amentia est? Quod si eandem vim, diligentiam, auctoritatemque habent adversaria, quam tabulae; quid attinet codicem instituere? conscribere? ordinem conservare? memoriae tradere literarum vetustatem⁴? Sed si, quod adversariis nihil credimus, idcirco codicem scribere instituimus; quod etiam apud omnes leve et infirmum est, id apud judicem grave et sanctum esse ducetur? Quid est, quod negligenter scribamus adversaria? quid, est, quod diligenter conficiamus tabulas? Qua de causa? quia hae⁵ sunt menstrua, illae sunt aeternae; hae delentur statim, illae servantur sanctae; hae parvi temporis memoriam, illae perpetuae existimationis fidem et religionem amplectuntur; hae sunt dejecta⁶, illae in ordinem confectae. Itaque adversaria in iudicium protulit nemo: codicem protulit⁷, tabulas recitavit.

III. Tu, C. Piso, tali fide, virtute, gravitate, auctoritate ornatus¹, ex adversariis pecuniam petere non auderes. Ego, quae clara sunt consuetudine, diutius dicere non debeo. Illud vero, quod ad rem vehementer

3. *Perscriptionum*. Adversaria sua proferre, in quibus confuse, nec sine lituris dierum acta perscribuntur.

4. *Vetustatem*. Curare ut tabulae domesticae vetustatem habeant, ut earum memoria in longum aevum perduret, et vetusta debita conservet. *Litterae* pro tabulis privatis h. l. usurpantur, ut Verr. IV, 12.

5. *Hae*. Ad remotius referuntur, illae ad proximum, non praeter consuetudinem, ut ait Hotom. sed saepius apud Latinos, ut videre est, apud

Gron. Observ. III, 16. Sanct. Min. II, 9.—*Menstrua*. Ad singulos menses.

6. Cod. Ursini, «conjecta»; Hotom. Lamb. «dejecta». Guliell. «defecta». Ceterum adversaria dejecta idem facillimo sensu sonant, quod perturbatae paginae, dissipatae, nullo ordine digestae.

7. *Protulit*. Subaud. *quilibet*. Sic Horat. Sat. I, 1, 1 sqq.

III. 1. Frustra Guliellm. damnat ornatus. J. V. L.

pertinet, quæro : quam pridem hoc nomen, Fanni, in adversaria retulisti? Erubescit; quid respondeat, nescit; quid fingat extemplo, non habet. Sunt duo menses jam, dices. Tamen in codicem acceptum et expensum² referri debuit. Amplius sunt sex menses. Cur tamdiu jacet hoc nomen in adversariis? Quid si tandem amplius triennium³ est? quomodo, quum omnes, qui tabulas conficiant, menstruas pæne rationes in tabulas transferant, tu hoc nomen triennium amplius in adversariis jacere pateris? Utrum cetera nomina in codicem accepti et expensi digesta habes, an non? Si non; quomodo tabulas conficis? si etiam; quamobrem, quum cetera nomina in ordinem referebas, hoc nomen triennio amplius, quod erat in primis magnum, in adversariis relinquebas? Nolebas sciri, debere Roscium: cur scriberbas? Rogatus⁴ eras, ne referres: cur in adversariis scriptum habebas? Sed hæc⁵ quamquam firma esse video, tamen ipse mihi satisfacere non possum, nisi a C. Fannio ipso testimonium sumo, hanc pecuniam ei non deberi. Magnum est, quod conor; difficile est, quod polliceor: nisi eundem et adversarium et testem habuerit Roscius, nolo vincat.

IV. Pecunia tibi¹ debebatur certa, quæ nunc petitur

2. Ernest. « acceptum et expensum » omnino spurium esse opinatur, et e stulta glossa natum. Forte tamen vestuste, pro « acceptorum et expensorum ». J. V. L.

3. *Triennium*. Tantum temporis intercessit, ex quo Panurgus interfectus est, et Roscius ejus nomine sestertium centum millia ab interfectore accepit.

4. *Rogatus*. Ab ipso Roscio.

5. *Sed hæc*. Transit ad argumentum quod petitur ex ipsius Fannii testimonio.

IV. 1. *Pecunia tibi*, etc. Urgetur Fannius ab inconstantia suarum actionum. Tota autem loci hujus disputatio hæc est: Certa pecunia petitur ad judicem, incerta ad arbitrum: a judice ad arbitrum itur; quia judex formula sua constringitur, arbiter autem plus minusve dare potest. At Fannius statim ad arbitrum iit, et ab arbitro ad judicem confugit; primo incertam, deinde certam pecuniæ summam petit: ergo male egit, et judicavit ipse sibi pecuniam non deberi.

per judicem, in qua legitimæ² partis sponsio facta est. Hic tu³ si amplius [H-S] nummo petisti, quam tibi debitum est, causam perdidisti : propterea quod aliud est judicium, aliud arbitrium⁴. Judicium est pecuniæ certæ; arbitrium incertæ. Ad judicium hoc modo venimus, ut totam litem aut obtineamus, aut amittamus; ad arbitrium hoc animo adimus, ut neque nihil, neque tantum, quantum postulavimus, consequamur. Ejus rei ipsa verba formulæ testimonio sunt. Quid est in judicio? directum, asperum, simplex : SI PARET H-S 1000 DARI OPORTERE. Hic, nisi planum facit, H-S 1000 ad libellam sibi deberi, causam perdit. Quid est in arbitrio? mite, moderatum : QUANTUM ÆQUIUS⁵ MELIUS, ID DARI. Illud tamen⁶ confitetur plus se petere, quam

2. *Legitimæ*. I. e. lege seu edicto prætoris definitæ. Hæc autem pars in litibus, quibus certa pecunia petebatur, erat tertia totius summæ: in iis vero, quibus incerta petebatur ad arbitrum, legitima pars erat quinta, vel decima totius summæ, de qua lis erat. Vide ad calcem hujus voluminis in Excursu De ordine exercend. judic. § *de sponsione*.

3. *Hic tu*. Si ad judicem uno amplius sestertio petisti, etc. Nempe judices nullam judicandi potestatem habent, nisi ex prætoris formula. V. g. in hac causa dat judicem prætor C. Pisonem cum hac formula : « si paret H-S 1000 Fannio dari oportere a Roscio, eum tantæ pecuniæ condemnato ». Si, re diligenter examinata, compertum habuerit judex una libella plus aut minus deberi, quam petatum est, pronuntiat H-S 1000 non deberi; atque ita causa cadit actor, quia male petiit. Jcti id plus petere dicunt, quod fit quatuor modis. Re, si decem pro quinque petan-

tur : tempore, si ante diem petatur : loco, si alio loco, quam quo promissum est agitur; causa, si ex duabus rebus disjunctim promissis, altera præcipue petatur.

4. *Arbitrium*. *Arbitrium* est lati juris. Quum prætor litem dirimendam permittit arbitro ex bona fide, infinitam illi potestatem tribuit, ita ut in judiciis nempe bonæ fidei, vel totum, vel partem actori ille addicere possit. At *judicium* stricti juris est, ut ex sup. not. patet.

5. *Quantum æquius*. Verba prætoris ad arbitrum ex bona fide : jube non quantum petitur, sed quantum tibi bonum et æquum videbitur, petitori dari. In vulg. *et melius*. Sed in talibus formulis solemnibus Romanos copulas omittere Grævius merito adnotavit.

6. *Illud tamen*. I. e. quivis litigator, quamvis certam pecuniæ summam apud arbitrum designet, hoc tamen fatetur, etc. — Loco *illud*, Hotom. Græv. habent *ille*.

debeatur; sed satis superque habere dicit, quod sibi ab arbitro tribuatur. Itaque alter causæ confidit⁷, alter diffidit. Quæ quum ita sint, quæro abs te, quid ita de hac pecunia, de his ipsis H-S 1000, de tuarum tabularum fide compromissum⁸ feceris, arbitrum⁹ sumperis, quantum æquius et melius sit, dari, repromittive, si pareret? Quis in hanc rem fuit arbiter? Utinam is quidem Romæ esset! Romæ est. Utinam¹⁰ adesset in iudicio! Adest. Utinam sederet in consilio C. Pisonis! Ipse C. Piso est. Eumdemne tu arbitrum et iudicem sumebas? eidem et infinitam largitionem¹¹ remittebas, et eumdem in angustissimam formulam sponsionis concludebas? Quis umquam ad arbitrum, quantum petiit, tantum abstulit¹²? nemo: quantum enim æquius esset sibi dari, petiit¹³. De quo nomine ad arbitrum adisti, de eo ad iudicem venisti. Ceteri quum ad iudicem causam labefactari animadvertunt, ad arbitrum¹⁴

7. *Confidit*. Quia apud arbitrum plaris petitio nihil est obfutura. *Diffidit*. Quod apud iudicem, si plus petat quam debeatur, causa excidit actor.

8. *Compromissum*. *Compromissum* *facere* dicuntur, qui, sub poena certæ pecuniæ se arbitri sententiæ parituros promittunt. Vid. Digest. de receptis, qui arbitriam receperunt, IV, 8.

9. *Arbitrum*. Sensus est: Cur, quum hæc pecunia in tabulis esset scripta, arbitrum adiisti, quasi de incerta pecunia ageretur, ut, ex ejus sententia, quantum æquitas postularet, tantum tibi Roscius daret, vel se daturum promitteret, si modo appareret eum aliquid debere.

10. Nonnulli codd. *jam utinam*. *Al. nam utin*. Delent Grut. Græv. Lall.

11. *Largitionem*. Græv. ad h. l. legendum putat « potestatem permit-

tebas ». At nihil opus correctione. *Remittere* enim pro concedere ac permittere usurpari ostendunt Cujac. XXI, Obs. 29. Lips. ad Tac. Annal. I, 8. Duker. ad T. Liv. XXXII, 2. Itaque verba hæc: « infinitam largitionem remittebas », significant, arbitro latissimam potestatem tribuebas ex æquo statuendi. Sic orat. pro Muren. 20, « æquitatis largitio ».

12. *Abstulit*. Obtinuit, impetravit.

13. Schütz libenter legeret *accepit*. Nihil mutandum video. Hic *petiit*, quantum ad sensum spectat, idem valet. J. V. L.

14. *Ad arbitrum*. In eandem rationem Senec. de Benef. III: « melior videtur conditio causæ bonæ, si ad iudicem, quam si ad arbitrum mittatur, quia illam formulam includit, et certos quos non excedat, terminos ponit; hujus libera et nullis constricta viscum-

confugiunt; hic ab arbitro ad iudicem venire est ausus¹⁵: qui quum de hac pecunia, de tabularum fide arbitrum sumpsit, iudicavit sibi pecuniam non deberi. Jam duæ partes causæ sunt confectæ: annumerasse sese negat; expensum tulisse non dicit, quum tabulas non recitat. Reliquum est, ut stipulatum¹⁶ se esse dicat: præterea enim, quemadmodum certam pecuniam petere possit, non reperio. Stipulatus es? ubi? quo die? quo tempore? quo præsentem? quis sponpondisse¹⁷ me¹⁷ dicit? nemo.

V. Hic ego¹ si finem faciam dicendi, satis fidei et diligentiae meæ, satis causæ et controversiæ, satis formulæ et sponsioni, satis etiam iudici fecisse videar, cur secundum Roscium iudicari debeat. Pecunia petita est certa; cum tertia parte sponsio facta est. Hæc pecunia necesse est, aut data², aut expensa lata, aut stipulata sit. Datam non esse Fannius confitetur; expensam la-

lis religio est: detrudere aliquid potest, et adicere».

15. *Est ausus.* Quum tamen malam causam haberet; nam malæ causæ ad arbitrum melior est conditio, ut ex Seneca vidimus.

16. *Stipulatum.* *Stipulatio* est contractus verbalis constans interrogatione et congrua ad interrogationem responsione, qua nascitur obligatio quæ dicitur *verborum*, et quæ est stricti iuris. Instit. III, 16.

17. *Me.* Roscii nomine loquitur.

V. 1. *Hic ego.* Desunt sane multa quæ ad certi conditionem ex stipulato pertinent.

2. *Aut data.* Indicat tres obligationes, quibus certum peti possit, Re, Nominibus et Stipulatione. Porro *expensa lata* dicitur pecunia seu *expensilatio*, quum quis pecuniam alii

numerabat, nomenque illius, cui hanc pecuniam mutuum dederat, in tabulas referebat cum summa quam expensam tulerat. Hæc tabulæ domesticæ, in iudicio prolatae, fidem faciebant: quum autem debitum illud acceperat, tum acceptum in iisdem tabulis ferebat: inde expensi et accepti tabulæ dicebantur. Hæc erat mutui contrahendi obligatio quæ *nominibus* olim fieri dicebatur. Aliter contrahebatur debitum aut chirographis, aut syngraphis, aut testibus. Chirographum erat, quum debitor sua manu scribebat et subsignaret tabulas, quibus testabatur se tantum pecuniæ mutuum accepisse: syngrapha a tabellione publico scripta erat et a testibus obsignata. Ex tabulis agere dicebatur creditor, quum tabulas accepti et expensi producebat et recitabat, ut ait

tam non esse codices Fannii confirmant; stipulatam non esse taciturnitas testium concedit. Quid ergo est? quod et reus is est³, cui et pecunia levissima, et existimatio sanctissima fuit semper; et iudex est is, quem nos non minus bene de nobis existimare, quam secundum nos judicare velimus; advocatio⁴ ea est, quam, propter eximium splendorem, ut iudicem unum⁵ vereri debeamus: perinde ac si in hanc formulam omnia judicia legitima, omnia arbitria honoraria⁶, omnia officia domestica⁷ conclusa et comprehensa sint, perinde dicemus. Illa superior fuit oratio necessaria, hæc erit voluntaria: illa ad iudicem, hæc ad C. Pisonem⁸: illa pro reo, hæc pro Roscio⁹: illa victoriæ, hæc bonæ existimationis causa, comparata.

VI. Pecuniam petis, Fanni, a Roscio: quam? dic audacter et aperte. Utrum quæ tibi ex societate debeatur?

Cicero. Sic supra «adnumerasse sese negat», quia nullam syngrapham aut chirographum affert, quo se summam adnumerasse probaret iudicibus. In stipulatione testes quoque adhibebantur, ut h. l. ostendit Cicero.

3. Sic primus edidit P. Manutius, ann. 1540. Ante erat, «quod et res ejus est». J. V. L.

4. *Advocatio*. Consensus virorum illorum qui Roscio adsunt advocati. Ferratius putat h. l. significari eos quos sibi M. Piso in consilium advocaverat; quum alioquin non dubitaret Roscius quin de se bene sentirent illi qui præsentia sua reo suffragari voluissent. Verum si res ita esset, cur Cicero se illos quasi alterum iudicem vereri diceret, quum revera iudicium loco sint? Imo servandus *advocationi* prior sensus, dicendumque, quamvis Roscius optime advocatorum suorum benivolentiam erga se nosceret, illud

tamen velle, ne ex illa disceptatione, nubes aliqua existimationi suæ offunderetur.

5. Garaton. legendum censet, «ut iudicem ipsum». Conjecerat Ernest. «ut iudicem unicum». J. V. L.

6. *Honoraria*. Quæ honori sunt iis ad quos deferuntur. Inde arbitri a prætore dati *honorarii* appellantur.

7. *Domestica*. Quæ homines privatis sibi de disceptationibus præstare debent. Disceptatore domestico pleurumque controversiæ dijudicari solent. Et Cicero his tribus verbis diversa iudiciorum genera complectitur.

8. *C. Pisonem*. Quæ supra diximus nostram causam meliorem esse apud te probaverunt; nunc ita loquimur ut tuam non iudicis, sed privati, existimationem non demereamur.

9. *Pro Roscio*. Ad confirmandam, quam homines habent de Roscii integritate, opinionem.

an quæ ex liberalitate hujus promissa sit et ostentata ¹? quorum alterum est gravius et odiosius; alterum levius et facilius. Quæ ex societate debeatur ²? Quid ais? Hoc jam ³ neque leviter ferendum est, neque negligenter defendendum. Si qua enim sunt privata judicia summæ existimationis ⁴, et pæne dicam capitis, tria hæc sunt, fiducia, tutelæ, societatis. Æque enim perfidiosum et nefarium est, fidem ⁵ frangere, quæ continet ⁶ vitam; et pupillum fraudare, qui in tutelam pervenit; et socium fallere, qui se in negotio conjunxit ⁷. Quæ quum ita sint, qui sit, qui socium fraudarit et fefellerit, consideremus: dabit enim nobis jam tacite vita acta in alterutram partem firmum et grave testimonium. Q. Roscius ⁸? quid ais? Nonne, ut ignis in aquam coniectus continuo restinguitur et refrigescitur; sic reservens ⁹ falsum crimen in purissimam et castissimam vitam collatum statim concidit et exstinguitur? Roscius socium fraudavit? Potest hoc homini huic hæerere peccatum? qui medius fidius (audacter dico ¹⁰) plus fidei, quam artis, plus veritatis, quam disciplinæ possidet in se; quem populus romanus meliorem virum, quam histrionem esse arbitratur; qui ita dignissimus est scena propter artificium, ut dignis-

VI. 1. *Ostentata*. Ejus spes oblata.

2. Schütz legit, « Quæ ex societate debetur », et signum interrogandi expungit, quasi sit ipsa responsio Fan-
nii. J. V. L.

3. *Hoc jam*. Oratoria calliditate crimen exaggerat, quo minus sit probabile a viro bono admissum.

4. *Summæ existimationis*. In quibus agitur existimatio, et damnati infamiam subeunt.

5. Unus e codd. Oxoniensibus, *fiduciam*. J. V. L.

6. *Continet*. Sine qua nulla vita est.

7. *In negotio conjunxit*. Societatem iniiit negotiationis faciendæ causa.

8. *Q. Roscius*. Subaud. socium fraudavit. De societate vid. sup. pro Quintio.

9. *Reservens*. Ab aqua ferventi metaphoram ad crimen quasi improbitatis igne accensum transfert orator.

10. *Audacter dico*. Confidenter loquor. Sic Plaut. Amphit. « quæ non deliquit, decet audacem esse et confidentem pro se ».

simus sit curia propter abstinentiam. Sed quid ego ineptus de Roscio apud Pisonem dico? ignotum hominem scilicet pluribus verbis commendo. Estne quisquam omnium mortalium, de quo melius existimes tu? estne quisquam, qui tibi purior, pudentior, humanior, officiosior, liberaliorque videatur? Quid? tu, Saturi, qui contra hunc venis¹¹, existimas aliter? nonne quotiescumque in causa in nomen hujus incidisti, toties hunc et virum bonum esse dixisti, et honoris causa appellasti? quod nemo nisi aut honestissimo aut amicissimo facere consuevit. Qua in re mihi ridicule es visus esse inconstans, qui eundem et læderes, et laudares, et virum optimum, et hominem improbissimum esse diceres; eundem tu et honoris causa appellabas, et virum primarium esse dicebas, et socium fraudasse arguebas. Sed, ut opinor, laudem veritati tribuebas, crimen gratiæ concedebas: de hoc, ut existimabas, prædicabas; Chæreæ arbitrato causam agebas.

VII. Fraudavit Roscius. Est hoc quidem auribus animisque hominum absurdum. Quid? si tandem aliquem divitem¹ timidum, dementem, inertem nactus esset, qui experiri non posset? tamen incredibile esset. Verumtamen, quem fraudarit, videamus. C. Fannium Chæream Roscius² fraudavit. Oro, atque obsecro vos, qui nostis³, vitam inter se utriusque conferte; qui non nostis, faciem utriusque considerate: nonne ipsum

11. *Venis*. Subaud. in iudicium: qui hunc accusas. Vid. ad Att. I, 1.

VII. 1. *Divitem*. Sensus est: Si Roscius incidisset in divitem aliquem qui vel propter timiditatem non auderet, vel ob dementiam nollet, vel propter inertiam non posset litigare.

— Ursin. cod. *clementem*.

2. *Chæream Roscius*. Magna vis est

his in nominibus. Sic ab Vario quodam accusatus M. Scaurus respondit: Q. Varius Hispanus M. Scaurum, principem senatus, socios in arma ait concitasse. M. Scaurus princeps senatus negat: testis nemo est. Utri vos, Quirites, convenit credere?

3. Hot. placeret, si plenius scriptum esset, «qui utrumque nostis». J. V. L.

caput⁴, et supercilia⁵ illa penitus abrasa, olere malitiam, et clamitare calliditatem videntur? nonne ab imis unguibus usque ad verticem summum (si quam⁶ conjecturam affert hominibus tacita corporis figura) ex fraude, fallaciis, mendaciis constare totus videtur? qui idcirco capite et superciliis semper est rasis⁷, ne ullum pilum⁸ viri boni habere dicatur: cujus personam præclare Roscius in scena tractare consuevit; neque tamen pro beneficio ei par gratia refertur. Nam Ballionem⁹ illum improbissimum et perjurissimum lenonem quum agit, agit Chæream: persona illa lutulenta, impura¹⁰, invisae, in hujus moribus, natura, vitæque est expressa. Qui quamobrem Roscium similem sui in fraude et malitia existimarit, nihil¹¹ videtur: nisi forte¹², quod præclare hunc imitari se in persona lenonis animadvertit. Quamobrem etiam atque etiam considera, C. Piso, quis quem fraudasse dicatur. Roscius Fannium? quid est hoc? probus improbum, pudens impudentem, perjurum castus, callidum imperitus, liberalis avidum. Incredibile est. Quemadmodum, si Fannius Roscium fraudasse diceretur, utrumque ex utriusque persona verisimile videretur, et Fannium per malitiam fecisse,

4. *Caput*. Romani ad annum 454 intonsi fuere. Post quem annum barba radi, et coma cœpit detonderi. Plin. VII, 59. Vid. Hadr. Jun. in comment. de coma, p. 445 sqq. ed. ult.

5. *Supercilia*. Illa in luctu abradi moris erat. Extra luctum autem si raderentur, erat mollitiei specimen. A. Gell. VII, 12. Saet. August. 68.

6. *Si quam*. Quæ fuit opinio quorundam, quos Græci φυσιογνώμονας appellabant.

7. Ernestius arbitratur Ciceronem scripsisse *rasus*. J. V. L.

8. *Ullum pilum*. Ne vel minui re

virum probum referret. Sic Græci ἄλιος τριχός.

9. *Ballionem*. *Ballio* est leno in *Pseudolo*, Plauti comœdia, quam probabat in primis Plautus ipse. Cic. de Senect. cap. 14.

10. *Lutulenta, impura*. Alludit ad verba Plauti, act. I, scen. 3 *Pseud.* « Fraudulente, impure leno, cœnum ». Confer Rudent. II, 6.

11. *Nihil*. Non. Sic « nihil attinet », i. e. non attinet.

12. *Nisi forte*. Nisi putat sui similem Roscium, quod ille optime lenonem in comœdia imitatur.

et Roscium per imprudentiam deceptum esse : sic quum Roscius Fannium fraudasse arguatur, utrumque incredibile est, et Roscium quidquam per avaritiam appetisse, et Fannium quidquam per se¹³ bonitate amisisse.

VIII. Principia sunt hujusmodi : spectemus reliqua. H-S 1000 Q. Roscius fraudavit Fannium. Qua de causa? Subridet Saturius, veterator, ut sibi videtur. Ait propter ipsa¹ H-S 1000. Video; sed tamen cur ipsa H-S 1000 tam vehementer concupierit, quæro : nam tibi, M. Perperna, C. Piso², certe tanti non fuissent, ut socium fraudaretis. Roscio cur tanti fuerint, causam requiro. Egebat? Imo locuples erat. Debebat? Imo in suis nummis versabatur. Avarus erat? Imo etiam, antequam locuples, semper liberalissimus munificentissimusque fuit. Proh deum hominumque fidem! qui H-S 300000³ 300000 300000 quæstus facere noluit (nam certe H-S 300000 300000 300000 merere et potuit et debuit⁴, si potest Dionysia⁵ H-S 300000 300000 merere), is per summam fraudem, et malitiam, et perfidiam H-S 1000 appetiit? Et illa fuit pecunia immanis⁶, hæc parvula; illa honesta, hæc sordida; illa jucunda, hæc

13. Hotomann. conj. « per suam bonitatem », Grævio non probante. J. V. L.

VIII. 1. *Propter ipsa*. I. e. ut ista sibi haberet.

2. Schütz transponenda putat nomina sic, « C. Piso, M. Perperna », quoniam ille iudex erat, hic tantum iudici aderat. Sed hoc hominis dignitati tribuere potuit Cicero, quod M. Perperna consulatu et prætura esset defunctus.

3. H-S 300000, etc. Trecenta sestertium millia (61,500 fr.), ut inf. ducenta sestert. mill. (41,000 fr.),

quæ lucrari repudiavit Roscius, non quod, ut Manutio placet, artis suæ præstantia non dignum hunc quæstum judicaret; sed, ut optime explicant Ferrat. et Garaton., quia gloriam unice quærebat, et ab artificio quæstus infamiam removere præclarum existimabat.

4. *Debuit*. I. e. ex officio et religione potuit.

5. *Dionysia*. Notissima saltatricula, cujus nomine Hortensium Torquatus appellabat, quod in gestu plus artis haberet, quam decebat. A. Gell. I, 5.

6. *Immanis*. Immensa.

crimen aut objice, ubi licet agere; aut jacere⁵ noli, ubi non oportet. Tametsi jam hoc tuo testimonio crimen sublatum est. Nam, quo tu tempore illa formula uti noluisti, nihil hunc in societatem fraudis fecisse ostendisti. Fecit pactionem⁶. Num tabulas habet, an non? Si non habet, quemadmodum pactio est? si habet, cur non nominas⁷? Dic nunc Roscium abs te petisse, ut familiarem suum sumeres arbitrum: non petiit. Dic pactionem fecisse, ut absolveretur⁸: non pepigit. Quære, quare sit absolutus? quod erat summa innocentia et integritate. Quid enim factum est? venisti domum ultro Roscii; satisfacisti⁹, quod temere commisisses; in judicium ut denuntiaret rogasti, ut ignosceret; te affuturum negasti; debere tibi ex societate nihil clamitasti: judici hic denuntiavit; absolutus est¹⁰. Tamen fraudis ac furti mentionem facere audes? Perstat in impudentia. Pactionem enim, inquit, mecum fecerat. Idcirco¹¹ videlicet ne condemnaretur. Quid erat causæ,

5. *Jacere*. Tamquam tela, id est, objicere.

6. *Fecit pactionem*. Fannii verba: Volebam, inquit, litem persequi; sed Roscius metuens judicium, mecum stipulatus est.

7. *Nominas*. Profers nomen in tabulis scriptum.

8. *Absolveretur*. I. e. judicii molestia solveretur ac liberaretur, neque enim ab arbitro lata est sententia, remisso videlicet et renuntiato judicio.

9. Sic interpungimus Ernest. Sch. et J. V. L. sequenti. — *Ut ignosceret* abest in Schütz. Totius loci sensus est: Pro tua, in eo accusando, temeritate Roscio satisfacisti, i. e. excusationem attulisti, quod eum temere accusasses: ut illud judici significaret, rogasti,

et simul ut tibi Roscius ignosceret; te in jus non venturum affirmasti; nullo non audiente, nihil ex societate tibi a Roscio deberi pronuntiasti. Roscius judici denuntiavit te actionem deponere; itaque dimissus est et hoc judicio liberatus.—Fr. cod. habet «q. temere commisisses, id judici ut denuntiaret, rogasti ut ignosceret: te affuturum, etc. Censet Grævius semel excidisse *rogasti*, et sic legit «id judici ut denuntiaret rogasti; rogasti ut ignosceret», qui sensus nullo addito verbo satis intelligitur.

10. *Absolutus est*. Judicio liberatus est, ut supra.

11. *Idcirco*. Ciceronis ironia, ut Hotomanno placet; Fannii sermo, ut putat Ferratius. Priorem sensum malim.

cur metueret, ne condemnaretur? Res erat¹² manifesta; furtum erat apertum.

X. Cujus rei furtum factum erat? Exorditur¹ magna cum exspectatione veteris² histrionis exponere societatem. Panurgus, inquit, fuit Fannii³: is fuit ei cum Roscio communis. Hic primum questus est non leviter Saturius, communem factum esse gratis cum Roscio, qui pretio proprius fuisset Fannii. Largitus est scilicet homo liberalis, et dissolutus, et bonitate affluens Fannius Roscio? Sic puto. Quoniam ille hic constitit paullisper, mihi quoque necesse est paullum commorari. Panurgum tu, Saturi, proprium Fannii dicis fuisse. At ego totum Roscii fuisse contendo. Quid erat enim Fannii? corpus. Quid Roscii? disciplina. Facies non erat⁴, ars erat pretiosa. Ex qua parte erat Fannii, non erat H-S 1000⁵; ex qua parte erat Roscii, amplius erat H-S 300000⁶. Nemo enim illum ex trunco corporis spectabat, sed ex artificio comico aestimabat. Nam illa membra merere⁷ per se non amplius poterant duodecim æris; disciplina, quæ erat ab hoc tradita, locabat se non minus H-S 300000. O societatem captiosam et indignam! ubi alter H-S 1000, alter 300000

12. *Res erat.* Fannii responsum, in cuius nomine loquitur.

X. 1. *Exorditur.* Saturius, Fannii patronus, magna cum iudicum exspectatione, de Panurgo novitio illo histrione, quem Roscius informandum receperat, magno apparatu loqui incipit, quasi exercitatissimus fuisset Roscio traditus comædus. Nota ironiam toto in hoc loco.

2. *Veteris.* De nobili histrione. *Vetus* enim, longa doctus artis alicujus experientia, in bonam aut malam partem usurpatur.

3. *Fannii.* Servus. Ut Plaut. in Amph.

1, 2: «Ego sum Amphitruonis, Sosia.

4. *Facies non erat.* Totum Panurgi corpus non erat multi aestimandum; sed ars, quam Panurgo Roscius tradiderat, erat pretiosa. Ceterum magis rhetorem quam patronum sapit totus hic locus, et splendida subtilitate magis quam severo iudicio nititur.

5. H-S 1000. Non vendi poterat sestertiis quinquagies mille (circti. 10,250 fr.)

6. Codd. variant in numeris sæpissime vitiatis. J. V. L.

7. *Merere.* Lucrari. *Æris.* Subaud. nummos.

quod sit, in societatem affert: nisi idcirco moleste pateris, quod H-S 1000 tu ex arca proferebas, H-S 000000 ex disciplina et artificio Roscius promebat. Quam enim rem⁸ et exspectationem, quod studium, et quem favorem secum in scenam attulit Panurgus? Quod Roscii fuit discipulus. Qui diligebant hunc, illi favebant; qui admirabantur hunc, illum probabant; qui denique hujus nomen audierant, illum eruditum et perfectum existimabant. Sic est vulgus: ex veritate pauca, ex opinione multa aestimat. Quid sciret ille, perpauca animadvertabant; ubi didicisset⁹, omnes quærebant. Nihil ab hoc pravum et perversum produci posse arbitrabantur. Si veniret ab Statilio¹⁰, tametsi artificio Roscium superaret, adspicere nemo posset: nemo enim, sicut ex improbo patre¹¹ probum filium nasci, sic ex pessimo histrione bonum comædum fieri posse existimaret. Quia veniebat a Roscio, plus etiam scire, quam sciebat, videbatur.

XI. Quod item nuper in Erote comædo usu venit: qui posteaquam e scena non modo sibilis, sed etiam convicio explodebatur; sicut in aram, confugit in hujus domum, disciplinam, patrocinium, nomen. Itaque perbrevis tempore, qui ne in novissimis quidem erat histrionibus, ad primos pervenit comædos. Quæ res extulit eum? Una commendatio hujus: qui tamen Panurgum illum, non solum ut Roscii discipulus fuisse diceretur, domum recepit; sed etiam summo cum la-

8. Grævius probat conjecturam viri docti, qui corripiebat *spem*; probat etiam Ernestius. J. V. L.

9. *Ubi didicisset*. Verissima sententia, cujus vis ad nobiliores quam comædos pervadit! Ceterum hanc de pravis vulgi opinionibus sententiam sæpius apud Ciceronem inveneris.

10. *Statilio*. Non probato histrione, ut hic locus ostendit.

11. *Ex improbo patre*. Inde natum adagium: «nali corvi malum ovum». Et Euripides: Φεῦ φεῦ παλαιὸς αἶνεος ὡς καλῶς ἔχει· Οὐκ ἂν γένοιτο χρηστὸς ἐκ κακοῦ πατρός.

bore, stomacho¹, miseriaque erudiit. Nam, quo quisque est solertior et ingeniosior, hoc docet iracundius² et laboriosius: quod enim ipse celeriter arripuit, id quum tarde percipi videt, discruciat.

Paullo longius oratio mea provecta est hac de causa, ut conditionem societatis diligenter cognosceretis. Quæ deinde sunt³ consequuta? Panurgum, inquit, hunc, servum communem, Q. Flavius Tarquiniensis quidam interfecit: in hanc rem, inquit, me cognitorem⁴ dedisti. Lite contestata⁵, iudicio damni injuria⁶ constituto, tu sine me cum Flavio decidisti. — Utrum pro dimidia parte, an pro tota societate? planius dicam, utrum pro me, an⁷ pro me et pro te? Pro me potui: exemplo multorum licitum est; jure fecerunt multi; nihil in ea re tibi injuriæ feci. Pete tu tuum, exige, et aufer, quod debetur: suam quisque partem juris possideat et persequatur. — At enim tuum negotium gessisti bene. — Gere et tu tuum bene. — Magno tuam dimidiam partem decidisti. — Magno et tu tuam partem decide. — H-S cccicccc⁸ abstulisti. — Si sit hoc vero; H-S cccicccc tu quoque aufer.

XI. 1. *Stomacho.* Fastidio et ira.

2. *Iracundius.* Itaque de Orat. I, Crassus dicit: «Sæpe soleo audire Roscium, quum ita dicat, se adhuc reperire discipulum, quem quidem probaret, potuisse neminem: non quo non essent quidem probabiles, sed quia, si aliquid modo esset vitii, id ferre ipse non posset».

3. *Abest sunt* a multis edd. Restituit jam Grævius ex ed. Victor. et MS Fr. Sed legitur quoque in edd. pr. omnibus. J. V. L.

4. *Cognitorem.* Ille a procuratore differt, quod certis verbis in litem coram adversario substituitur; pro-

I. *Cic. pars secunda.*

curator vero nullis certis verbis in litem constituitur; sed ex solo mandato, et absente et ignorante adversario. Gaius, IV, 83, 84.

5. *Contestata.* Conserta. Causa summam ab utraque parte apud prætorem exposita, litigator uterque se liti persequendæ obstringebat apud iudicem a prætore constituendum, cujus rei testes erant præsentis viri. Inde *litem contestari*.

6. *Injuria.* I. e. per injuriam illati.

7. Beck addit *et e trib. codd. Ox.* J. V. L.

8. *Vulg. tu hic additur, et sæpius supra.* J. V. L.

XII. Sed hanc decisionem Roscii oratione et opinione augere licet; re et veritate mediocrem et tenuem esse invenietis. Accepit enim agrum temporibus iis, quum jacerent¹ pretia prædiorum: qui ager neque villam habuit, neque ex ulla parte fuit cultus; qui nunc multo pluris est, quam tunc fuit. Neque id est mirum: tum enim, propter reipublicæ calamitates, omnium possessiones erant incertæ; nunc, deum immortalium benignitate, omnium fortunæ sunt certæ²: tum erat ager incultus sine tecto; nunc est cultissimus cum optima villa. Verumtamen, quoniam natura tam malivola es, numquam ista te molestia et cura liberabo³. Præclare suum negotium gessit Roscius; fundum fructuosissimum abstulit: quid ad te? tuam partem dimidiam, quemadmodum vis, decide. Vertit hic rationem⁴, et id, quod probare non potest, fingere conatur. De tota re, inquit, decidisti.

Ergo huc universa causa deducitur, utrum Roscius cum Flavio de sua parte, an de tota societate fecerit pactionem. Nam ego Roscium, si quid communi nomine tetigit, confiteor præstare debere societati. Societatis⁵, non suas lites redemit, quum fundum a Flavio accepit. Quid ita? satis non dedit⁶, **AMPLIUS A** ⁷ **SE NE-**

XII. 1. *Jacerent.* Villæ essent, propter Sullæ proscriptiones. Quia bona erant incertissima, « et, quemadmodum inquit Sallustius, uti quisque aut domum, aut villam, postremo vas aut vestimentum alicujus concupiverat, dabat operam, uti is in proscriptorum numero esset ».

2. *Certæ.* Bona juris et legum præsidio sunt confirmata.

3. *Multæ* edd. vett. *liberabis*, et sic Oxon. codd. tres. J. V. L. — *Libero.* Extenuando nimirum pretium agri illius quem accepit.

4. *Rationem.* Subaud. *agendi.* Alio modo jam agere cœpit. Non jam dicit pro se tantum, sed pro tota societate Roscium decidisse. Franc. 1, *orationem*; et statim idem, *quod adprobare non potest.*

5. *Societatis.* Verba sunt Tullii ab Saturio dicta repetentis et explicantis.

6. *Satis non dedit.* Non cautionem, non sponsores dedit, neminem ab ipso Flavio de ea re petiturum. De satisfactione confer ad calcem volum. huj. De ordin. exerc. judic.

7. Lambinus rescribit *ab eo.* Vocu-

MINEM PETITURUM. Qui de sua parte decedit, reliquis integram relinquit actionem : qui pro sociis transigit, satisdat, neminem eorum postea petiturum. Quid ? ita Flavio sibi cavere non venit in mentem ? nesciebat videlicet Panurgum fuisse in societate ? Sciebat. Nesciebat Fannium Roscio esse socium ? Præclare : nam iste cum eo litem contestatam habebat. Cur igitur decedit, et non restipulatur, neminem amplius petiturum ? cur de fundo decedit⁸, et iudicio non absolvitur⁹ ? cur tam imperite facit, ut nec Roscium stipulatione alliget, neque a Fannio iudicio se absolvat ? Est hoc primum et ex conditione juris¹⁰, et ex consuetudine cautionis¹¹, gravissimum et firmissimum argumentum : quod ego pluribus verbis amplecterer, si non alia certiora et clariora testimonia in causa haberem.

XIII. Et, ne forte me hoc frustra pollicitum esse prædices ; te, te, inquam, Fanni, ab tuis subselliis contra te testem suscitabo¹. Criminatio tua quæ est ? Roscium cum Flavio pro societate decidisse. Quo tempore ? Abhinc annis iv². Defensio mea quæ est ? Roscium pro sua parte cum Flavio transegisse. Repromittis tu

las duas delendas esse Garaton. iudicat : Schütz delet. Malim, cum Boemorzæo, *amplius esse*. J. V. L.

8. *Decedit*, conjectura Passeratii, cui nunc favet unus e codd. Oxon. Ceterum non necessario. Fundus enim totius debiti Flaviani loco positus est ; quum eo fundo de universa lite societatis transactum Fannius contenderet. Sed Schütz putat verba, « cur de fundo..... absolvitur », superflua esse, ut e glossis conflata videantur.

9. *Non absolvitur*. Litibus non liberatur, quæ sibi a Fannio, Roscii socio, imminet.

10. *Juris*. Quia perpetua juris est

regula, solidum solventi hanc stipulationem interponere ; et hoc ex formula juris est constitutum.

11. *Ex consuetudine cautionis*. Quia hæc cautio et satisfactio in huiusmodi solutionibus exigi consuevit.

XIII. 1. MS Ursin. *excitabo*. J. V. L.

2. Olim edebatur xii manifesto mendo, quod est in omnibus MSS. Correxerit Hotom. numeralem iv reponeudo. Fortasse tamen inter decisionem Roscii et repromissionem Fannii plures anni intercesserunt, quia Cicero illam rem veterem appellat.

abhinc triennium Roscio. Quid? recita istam restipulationem clarius. Attende, quæso, Piso. Fannium invitum, et huc atque illuc tergiversantem, testimonium contra se dicere cogo. Quid enim restipulatio clamat? QUOD A FLAVIO ABSTULERO, PARTEM DIMIDIAM INDE ROSCIO ME SOLUTURUM SPONDEO. Tua vox est, Fanni. Quid tu auferre potes a Flavio, si Flavius nihil debet³? Quid hic porro nunc restipulatur, quod jampridem ipse exegit⁴? quid vero Flavius tibi daturus est, qui Roscio omne, quod debuit, dissolvit? cur in re tam veteri, in negotio tam confecto⁵, in societate dissoluta, nova hæc restipulatio interponitur? Quis est hujus restipulationis scriptor⁶? testis? arbiter? quis? tu, Piso. Tu enim Q. Roscium pro opera, pro labore, quod cognitor fuisset, quod vadimonia obisset, rogasti, ut Fannio daret H-S⁷ cccccc, hac conditione⁸, ut, si quid ille exegisset⁹ a Flavio, partem ejus dimidiam Roscio dissolveret. Satisne ista restipulatio dicere tibi videtur aperte, Roscium pro se decidisse? At enim forsitan hoc tibi veniat in mentem, repromisisse Fannium Roscio, si quid a Flavio exegisset, ejus partem dimidiam; sed omnino exegisse nihil. Quid? tu non exitum exactionis¹⁰, sed initium repromissionis spectare debes; neque, si ille

3. *Nihil debet.* Si tuam quoque partem Roscio dissolvit.

4. *Exegit.* Abstulit a Flavio, si de tota re decedit.

5. *Tam confecto.* Omnino absoluto. Jam conjiciebat Passerat. et Guilielm.

6. *Scriptor.* JCtorum opera his in rebus utebantur, qui ideo scribere dicuntur quum cavent.

7. *H-S*, etc. Sestertium centum millia. Manifestum vitium. Quomodo enim Roscius Fannio pro opera totam

summam, quam ipse a Flavio exegisset, daret? Corrigit Lamb. cccccc, i. e. quindecim millia. Manut. cccccc, decem millia. Ernest. cccc, quinquaginta millia. Codd. Oxon. IV habent ccccliii.

8. *Hac conditione.* Ergo pura repromissione et restipulatione.

9. *Exegisset.* Abstulisset a Flavio judicio damni injuriarum.

10. *Exactionis.* Hotomanno legendum videbatur *actionis*. Verum quod monuit Lambinus, *exitus exactionis*

persequi noluit, non, quod in se fuit, iudicavit, Roscium suas, non societatis lites redemisse. Quid, si tandem planum facio, post decisionem veterem Roscii, post repromissionem recentem hanc Fannii, H-S cccicccc Fannium a Q. Flavio, Panurgi nomine, abstulisse; tamen ¹¹ diutius illudere viri optimi existimationi, Q. Roscii, audebit?

XIV. Paulo ante quærebam, id quod vehementer ad rem pertinebat, qua de causa Flavius, quum de tota lite faceret pactionem, neque ¹ satis acciperet a Roscio, neque iudicio absolveretur a Fannio. Nunc vero, id quod mirum et incredibile est, requiro, quamobrem, quum de tota re decidisset cum Roscio, H-S cccicccc separatim Fannio dissolvit? Hoc loco, Saturi, quid pares respondere, scire cupio: utrum ² omnino Fannium a Flavio H-S cccicccc non abstulisse? an alio nomine et alia de causa abstulisse? Si alia de causa; quæ ratio tibi cum eo intercesserat? nulla. Addictus ³ erat tibi? non: frustra tempus contero. Omnino, inquit, H-S cccicccc a Flavio non abstulit, neque Panurgi nomine, neque cuiusquam. Si planum facio, post hanc recentem stipulationem Roscii, H-S cccicccc a Flavio te abstulisse; numquid causæ ⁴ est, quin ab iudicio abeas turpissime

est i. q. effectus exactionis. *Initium* autem *repromissionis* est origo et causa repromissionis Fannii; ideo enim repromisit, quia Roscium iudicabat pro sua parte, non pro societate decidisse. Sic optime Manut. Sensus ergo est: Tu, Saturi, non exitum in hac re, sed initium spectare debes. Si Fannius rem ad exitum, Flavium persequendo, perducere noluit, non ideo minus iudicavit Roscium pro sua tantum parte decidisse.

11. Lambini emendatio, *tamenne*. J. V. L.

XIV. 1. *Satis*. Scilicet cautionem.

2. Cod. Franc. 1, = utrum omnino Fannius a Flavio sest. ccclxi non abstulisset? an alio nomine abstulisset? Quod non damnat Grævius.

3. *Addictus*. Traditus a iudice, qui eum pecuniæ damnaverat. *Addicti* enim dicebantur, quos prætor damnatos neque solvendo iudicato pares creditori domum ducendos tradebat. Vid. Varr. de Ling. Latina, VI, sub finem. Quintil. VII, de Finitione. Val. Max. VI, 1.

4. Sic Turneb. emendavit e codd.

victus? Quo teste igitur hoc planum faciam? Venerat, ut opinor, hæc res in iudicium. Certe. Quis erat petitor? Fannius. Quis reus⁵? Flavius. Quis iudex? Cluvius. Ex his unus mihi testis est producendus, qui pecuniam datam dicat. Quis est ex his gravissimus? Sine controversia, qui omnium iudicio comprobatus est iudex. Quem igitur ex his tribus a me testem spectabis⁶? Petitorem? Fannius est: contra se numquam testimonium dicet. Reum? Flavius est: is jampridem est mortuus; si viveret, verba ejus audiretis. Judicem? Cluvius est. Quid is dicit? H-S cccccc Panurgi nomine Flavium Fannio dissolvisse. Quem tu si ex censu spectas, eques romanus⁷ est: si ex vita, homo clarissimus⁸ est: si ex te, iudicem sumpsisti: si ex veritate, id, quod scire potuit et debuit, dixit. Nega, nega nunc, equiti romano, homini honesto, iudici tuo, credi oportere. Circumspicit, æstuat; negat nos Cluvii testimonium recitaturos. Recitabimus; erras; inani et tenui spe te consolaris. Recita testimonium T. Manilii et C. Luscii Ocreæ⁹, duorum senatorum, hominum ornatissimorum, qui ex Cluvio audierunt¹⁰. TESTIMONIUM T. MANILII ET C. LUSCII OCREÆ.

Idem habet eod. Franc. I. Olim edebatur, « numquid causare ».

5. *Quis reus?* Unde petebatur.

6. Hotomann. conj. *expectabis*, quod receperunt Lamb. Olivet. Lallem. alii. Sch. correxit *expectas*. Manut. *expectatis*. Plurali non opus; Satorio enim loquitur.

7. *Eques rom.* Quamvis Cornelia lege senatoribus solis iudicia essent delata, in privatis tamen causis iudices eligi poterant vel equites vel plebei. Hoc autem in loco errat Manutius.

8. Lamb. conj. *castissimus*. Vulga-

tum *clarissimus* h. l. idem est quod, spectatæ et ab omnibus celebratæ integritatis. Paulo post vocat *hominem honestum*, h. e. qui propter spectatam fidem est in honore apud omnes.

9. Frustra Ant. Augustin. et F. Ursin. e codd. vestigiis conj. *Ocriculani*, quasi e tribu esset Ocriculana. Ocrea cognomen est Lusciorum.

10. *Audierunt*. Apparet, quum hæc ageretur causa, Cluvium abfuisse; nam si adesset, testimonium ejus recitaretur, non eorum, qui ex ipso audissent. Cluvii cujusdam, sed non

XV. Utrum dicis? Luscio et Manilio, an et Cluvio non esse credendum? Planius atque apertius dicam. Utrum Luscio et Manilio nihil de H-S ccciooo ex Cluvio audierunt? an Cluvius falsum Luscio et Manilio dixit? Hoc ego loco, soluto et quieto sum animo; et, quorsum recidat responsum tuum, non magnopere laboro. Firmissimis enim et sanctissimis testimoniis virorum optimorum causa Roscii communita est. Si jam tibi deliberatum est, quibus abroges fidem jurisjurandi, responde. Manilio et Luscio negas esse credendum? dic, aude: est tuæ contumaciæ, arrogantiae, vitæque universæ vox. Quid? exspectas, quam mox ego Luscium et Manilium dicam, ordine, esse senatores; ætate, grandes natu; natura, sanctos et religiosos; copiis rei familiaris, locupletes et pecuniosos? non faciam; nihil mihi detrahā¹, quum illis exactæ ætatis severissime fructum, quem meruerunt, retribuam: magis mea adolescentia indiget illorum bona existimatione, quam illorum severissima senectus desiderat meam laudem. Tibi vero, Piso, diu deliberandum et concoquendum² est, utrum potius Chæreæ injurato in sua lite, an Manilio et Luscio juratis in alieno judicio credas. Reliquum est, ut Cluvium falsum dixisse Luscio et Manilio contendat: quod si facit, qua impudentia est, eumne testem improbabit,

ejusdem, meminit Cic. ad Att. VI, 2; XIII, 46.

XV. 1. *Detrahā*. Sensus est: Non mihi ipse nocebo, quod facerem, si tantum mihi sumerem, ut viros tam grandes natu, tam graves laudare conarer, et de illorum exacta severissime ætate, adolescens ego, nulla auctoritate præditus judicium meum interponerem. Hoc loco utitur Ferratius ut juniorem, quam vulgo credi-

tur, Tullium hanc causam oravisse demonstrat: cui subscribit Garaton. neque putat ea modestia dicturum fuisse prætorium candidatum: et ille dicendi rationi contrariam in Verrinis audaciam opponit; oblitus sane privatam hic causam agi, quæ tanta auctoritate non egeat.

2. Sic editi et scripti libri. Grævius tamen malit *coquendum*, sine causa, ut Ernest. in Clave multis pro-

quem judicem probarit? ei negabit credi oportere, cui ipse crediderit? ejus testis³ ad judicem fidem infirmabit, cujus propter fidem et religionem judicis, testes comparabat? quem ego si ferrem⁴ judicem, refugere non deberet; quum testem producam, reprehendere audebit?

XVI. Dixit enim, inquit, injuratus¹ Luscio et Manilio. Si diceret juratus, crederes? At quid interest inter perjurum et mendacem²? Qui³ mentiri solet, pejerare consuevit. Quem ego, ut mentiatur, inducere possum; ut pejeret, exorare facile potero. Nam qui semel a veritate deflexit, hic non majore religione ad perjurium, quam ad mendacium perducere consuevit. Quis enim deprecatione⁴ deorum, non conscientiae fide commovetur? Propterea quæ poena ab diis immortalibus perjuro, hæc eadem mendaci constituta est. Non enim ex pactione⁵ verborum, quibus jusjurandum comprehenditur, sed ex perfidia et malitia, per quam

bat. Idem enim sonat ac valde pensitandum. A stomacho translatum, in quo non coqui cibi dicuntur, sed concoqui; quod est certe majus, atque omnem vim ejus rei ac laborem significat.

3. *Ejus testis.* Ordo est: An infirmabit apud judicem Pisonem fidem ejus testis, cujus, quum judex fuit, ob fidem et religionem, i. e. quia fidelem et religiosum eum judicem existimabat, testes comparabat.

4. *Ferrem.* Offerrem. In judiciis tum publicis, tum privatis judicem actorem, quem ei commodum erat, offerebat reo; reus aut recusabat, aut comprobabat. Comprobato ab utraque parte judici prætor judicandi potestatem faciebat, hac formula, *judex esto.*

XVI. 1. *Injuratus.* Nullo adhibito

sacramento; quum testem juratum esse oporteat.

2. *Perjurum et mendacem.* Cicero h. l. sententias ad causam accommodat; et hoc a stoicorum doctrina depromit, apud quos æqualia sunt peccata omnia. Vid. Parad. III.

3. Schütz verba, « qui..... consuevit », ex nota marginali in textum venisse putat. Idem frustra paullo inf. conjicit, « Quis enim deprecatione deorum moveatur, qui conscientiae fide non commovetur? » J. V. L.

4. *Deprecatione.* Imprecatione illa, qua si mentiamur, divini numinis poenam deposcimus. Quis enim deos perfidiae vindices pejerando metuat, quum fide et conscientia sua non retinetur? Errat omnino h. l. Manutius.

5. *Pactione.* Ex formula et certa

insidiæ tenduntur alicui, dii immortales hominibus irasci et succensere consuerunt. At ego hoc ex contrario contendo. Levior esset auctoritas Cluvii, si diceret juratus, quam nunc est, quum dicit injuratus. Tum enim forsitan improbis nimis cupidus⁶ videretur, qui, qua de re iudex fuisset, testis esset : nunc omnibus inimicis necesse est castissimus et constantissimus esse videatur, qui id, quod scit, familiaribus suis dicit. Dic nunc, si potes, si res, si causa patitur, Cluvium esse mentitum. Mentitus est Cluvius? Ipsa mihi veritas manum iniecit⁷, et paullisper consistere et commorari cogit. Unde hoc totum ductum et conflatum mendacium est? Roscius est videlicet homo callidus et versutus? hoc initio cogitare cœpit : quoniam Fannius a me petit H-S 1000, petam a C. Cluvio, equite romano, ornatissimo homine, ut mea causa mentiatur; dicat, decisionem factam esse, quæ facta non est; H-S 10000 a Flavio data esse Fannio, quæ data non sunt. Est hoc principium improbi animi⁸, miseri ingenii, nullius consilii. Quid deinde? Posteaquam se præclare confirmavit⁹, venit ad Cluvium. Quem hominem? levem? imo gravissimum : mobilem? imo constantissimum : familiarem? imo alienissimum. Hunc posteaquam salutavit¹⁰, rogare cœpit, blande et concinne, scilicet : Mentire mea causa, viris optimis,

sacramenti conditione, ac solemniter conceptis verbis.

6. *Cupidus*. Vel juvandi Roscium, vel nocendi Fannio. Sic sæpius in malam partem usurpatur : « Cupidissime falsum testimonium dicere ». Vatin. « Cupide condemnare ». Suet. in Jul. Gall. *avec passion*.

7. Ernestio placebat « iniecit ».

8. *Improbi animi*, quia ad fraudem spectat; *miseri ingenii*, quia dolus

est parum callide excogitatus; *nullius consilii*, quia facile prævideri poterat. — Edd. pr. « nulli consilii ». Ernest. sine causa putat Ciceronem forte scripsisse, « stulti consilii ». J.V.L.

9. *Confirmavit*. Animum corroboravit, sumpsit in corde confidentiam, ut ait Plautus.

10. *Salutavit*. Sic Enclio apud Plant. in Aulul. « Illic aurum me scit habere, eo me salutat blandius ».

tuis familiaribus præsentibus; dic, Flavium cum Fannio de Panurgo decidisse, qui nihil transegit; dic, H-S cccicccc dedisse, qui assem nullum dedit. Quid ille respondit¹¹? Ego vero cupide et libenter¹² mentiar tua causa; et, si quando me vis pejerare, ut paululum tu compendii facias, paratum fore scito: non fuit causa, cur tantum laborem caperes, et ad me venires; per nuntium hoc¹³, quod erat tam leve, transigere potuisti.

XVII. Proh deum hominumque fidem! hoc aut Roscius umquam a Cluvio petisset, si H-S millies¹ in iudicium² haberet? aut Cluvius Roscio petenti concessisset, si universæ prædæ particeps esset? Vix medius fidius tu, Fanni, a Ballione, aut aliquo ejus simili hoc expostulare³ auderes, et impetrare posses, quod quum est veritate falsum, tum ratione quoque est incredibile. Obliviscor enim, Roscium et Cluvium viros esse primarios; improbos temporis causa esse fingo. Falsum subornavit testem Roscius Cluvium: cur tam sero? cur quum altera pensio⁴ solvenda esset, non tum, quum prima? nam jam antea H-S icccc⁵ dissolverat. Deinde, si jam persuasum erat Cluvio, ut mentiretur; cur potius H-S cccicccc, quam cccicccc cccicccc cccicccc data dixit Fannio a Flavio, quum ex restipulatione pars ejus dimidia Roscii esset?

11. Non agnoscit Lambinus *respondit*; habent MSS. J. V. L.

12. Id. addit *inquit*, post *libenter*. J. V. L.

13. MS Franc. 1, « per nuntium hoc quidem tam leve, trans. pot. » Quod satis Grævio placet.

XVII. 1. H-S millies. Subaud. *centies millies* (20,500,000).

2. In iudicium. Sic in *Divinat.* « in amicitiam esse »; XV ad Attic.

« in Tusculanum futurus ». Vide Vossii Aristarch. de Construct. c. 75.

3. In multis edd. vet. est *postulare*; unde Garaton. conjicit *et postulare*. Aliis placet, « aut impetrare posses ». Ceterum *expostulo* est i. q. vehementer postulo. Cf. *Plant. Pers.* IV, 3.

4. *Altera pensio*. Altera pars pecuniæ promissæ.

5. H-S icccc. Error est in numeris. Vid. supr. c. 13, n. 3.

Jam intelligis, C. Piso, sibi soli⁶, societati nihil Roscium petisse. Hoc quum sentit Saturius esse apertum, resistere et repugnare contra veritatem non audet; aliud fraudis et insidiarum in eodem⁷ vestigio diverticulum reperit. Petisse, inquit, suam partem Roscium a Flavio confiteor; vacuum⁸ et integram reliquisse Fannii concedo: sed, quod sibi exegit, id commune societatis⁹ factum esse contendo. Quo nihil captiosius¹⁰, neque indignius potest dici. Quæro enim, potueritne Roscius ex societate suam partem petere, necne? Si non potuit, quemadmodum abstulit? si potuit, quemadmodum non sibi exegit? Nam quod sibi petitur, certe alteri non exigitur. An ita est? si, quod

6. *Sibi soli.* Siquidem Fannius Paurgi nomine a Flavio et ipse pecuniam accepit.

7. *In eodem vestigio.* Nihil mutato loco, ubi constiterat, ibidem, statim. Sic Cæs. Bell. civ. II: « vestigio temporis id factum ».

8. *Vacuum.* Liberam, nec occupatam. Vacuum enim sæpius est quod a nemine detinetur, ut pro Rosc. Am. cap. 10 observavimus.

9. *Commune societatis.* Ejus dimidiam partem socio præstandam.

10. *Nihil captiosius.* Potuisse videtur Roscius partem suam petere, qui potuit solidum; si tamen Roscius a Flavio quidquam exegit, nihil vero Fannius, quod Flavius solvendo esse desiit, nihil captionis est nec indignitatis respondere redigendum in commune quidquid Roscius exegerit. Ceterum ex hac tota disputatione apparet, jus illud, quod postea certum fuit, relatum quippe in Pandectas, Tullianis temporibus controversum fuisse. Incertum tunc erat omnino, an socius in judicio petere solidum pos-

set: quod ni fuerit, Roscii cognitor Fannius non esset factus. Solutiones transactionesque extra judicium factæ ad unumne socium, an ad societatem omnem pertinerent, id vero ex ipso erat facto, sociisque in gerendo negotio voluntate cognoscendum: quod cap. 12 optime Tullius præstitit. Nunc porro quum Saturius Roscium sibi soli excepisse concedat, sed id in societatem redigi contendat, aliam orator inire viam debet. Sumit igitur argumentum primum de hac ipsa concessione; deinde alterum de judicio. Fannium enim Roscii cognitorem cum Roscio parti oportuerat, non item cum Fannio Roscium, qui cognitor illius fuerat numquam. Roscius de eo quod per cognitorem judicio petierat, solus extra judicium, nullo Fannii mandato, decidit. Nihil ergo ex hac decisione Fannio debuit, quum suo nomine judicio petierit; nam per se petere, ac per cognitorem idem est. Illa differant per se petere et cognitorem alterius fieri: quam vero differrent, ipse, qui per se petierat, simul

universæ societatis fuisset, petisset; quod tum¹¹ redactum esset, æqualiter omnes partirentur: nunc¹², quum petierit, quod suæ partis esset; non, quod abstulit, soli sibi exegit?

XVIII. Quid interest inter eum, qui per se litigat, et qui cognitor est datus? Qui per se litem contestatur, sibi soli petit: alteri¹ nemo potest, nisi qui cognitor est factus. Itane vero? cognitor si fuisset tuus, quod vicisset iudicio, ferres tuum². Suo nomine petiit; quod abstulit, sibi³, non tibi exegit. Quod si quisquam petere potest alteri, qui cognitor non est factus; quæro, quid ita, quum Panurgus esset interfectus, et lis contestata⁴ cum Flavio damni injuria esset, tu in eam litem cognitor Roscii sis factus? quum præsertim ex tua oratione, quodcumque tibi peteres, huic peteres; quodcumque tibi exigeres, id in societatem recideret. Quod si ad Roscium nihil perveniret⁵, quod tu a Flavio abstulisses, nisi te in suam litem dedisset cognitorem; ad te pervenire nihil debet, quod Roscius pro sua parte exegit, quoniam tuus cognitor non est factus. Quid enim huic rei respondere poteris, Fanni? Quum de sua parte Roscius transegit cum Flavio, actionem⁶ tibi tuam reliquit, an non? Si non reliquit,

que fuerat Roscii hanc in litem cognitor Fannius optime noverat.

11. Conjecturam Pantagathi, « id quum », Schütz recepit. Sed lectio ipsa codd. Ox. quatuor, « quod cum », vulgatam confirmat: itaque nihil mutavimus. J. V. L.

12. P. Victorii editio, item antiquior omnis, et Palat. cod. « num quid petierit, quod suæ partis esset; num quid quum abstulit, etc. » J. V. L.

XVIII. 1. *Alteri*. Pro altero nemo petere potest.

2. *Ferres tuum*. Tibi haberes; quia tuo nomine, factus cognitor petiisset.

3. Hotom. Lamb. « tibi, non sibi exegit? » Quos sequeretur Grut. nisi eum libri vetarent.

4. *Contestata*. Vide supr. cap. 11, n. 4. — *Damni injuria*. Est damni dati nomine injuria.

5. *Nihil perveniret*. Argumentum a pari, quod enim in uno socio valet, valeat in altero.

6. *Actionem*. Facultatem tui juris persequendi.

quemadmodum H-S cccccc ab eo postea exegisti? si reliquit, quid ab hoc petis, quod per te persequi et petere debes? Simillima⁷ enim et maxime gemina societas hereditatis est. Quemadmodum socius in societate habet partem; sic heres in hereditate habet partem. Ut heres sibi soli⁸, non coheredibus petit; sic socius sibi soli, non sociis petit: et quemadmodum uterque pro sua parte petit, sic pro sua parte dissolvit, heres ex sua parte⁹, qua hereditatem adiit; socius ex ea, qua societatem coit. Quemadmodum suam partem Roscius suo nomine condonare potuit Flavio, ut eam tu non peteres: sic, quum exegit suam partem, et tibi integram petitionem reliquit, tecum partiri non debet; nisi forte tu, perverso more, quod hujus est, ab alio extorquere non potes, huic eripere potes. Perstat in sententia Saturius: quodcumque sibi petat socius, id societatis fieri¹⁰. Quod si ita est; qua, malum¹¹! stultitia fuit Roscius, qui ex jurisperitorum¹² consilio et auctoritate restipularetur a Fannio diligenter, ut, quod is exegisset a Fla-

7. *Simillima*. Societas et hereditas eodem omnino sunt jure inter se. Ceterum his argumentis magis causæ quam juri et æquitati servit orator. Societas enim consensu contrahitur; heredes autem sorte quadam fiunt. Vide sup. cap. 17, n. 10. Nobis autem de hoc toto loco certum judicium ferre non licet, nempe veteres hac de re leges et ipsam causæ constitutionem ignorantibus, quum in trunco et mutilo fragmento loci plurimi desiderentur, qui ceteris lucem addere potuissent.

8. *Sibi soli*. Nomina ipso jure dividuntur inter heredes. Itaque non potest heres agere, nisi pro ea parte,

qua heres est; neque ei sententia cum altero herede lata, quidquam aut prodest aut nocet. Quin imo pro parte qua non est heres, extraneus habetur.

9. *Ex sua parte*. Pro ratione partis quam habet in hereditate.— *Ex ea*. Socius vero pro ratione pecuniæ ejus qua societatem contraxit.

10. *Societatis fieri*. Si socii universorum honorum sunt; pariter enim ad utrumque et damnum et lucrum pertinet.

11. *Malum*! Interjectio indignantis.

12. *Jurisperitorum*. De Pisonis ipsius sententia. Causam restipulationis vid. cap. 13.

174 M. T. CICER. ORATIO PRO Q. ROSCIO.

vio, dimidiam partem sibi dissolveret : siquidem, sine cautione et repromissione¹³, nihilominus id Fannius societati¹⁴, hoc est, Roscio debebat!.....

Desiderantur non pauca.

13. *Cautione et repromissione.*
Cautio est Fannii, qui sibi cavit, quum restipulatus est; repromissio Fannii, qui restipulanti dissoluturum id spopondit.

14. *Societati.* Fannius in commune conferre debuisset, tum inter se et Roscium partiri. Nam ex his duobus societas constabat. Et ipse verbo sequenti explicat Cicero.

EXCURSUS I

DE Q. ROSCIO COMOEDO.

Q. ROSCIUS GALLUS, admirabilis ille comædus, qui oculos, aures, animosque omnium Romanorum tamdiu tenuit, de quo tam multa et honorate et honorifice, et graviter Tullius ipse prædicat, ex municipio fuit Lanuvino; natus, ut videtur, circa annum Urbis 620 aut 625, quandoquidem in oratione pro Archia poeta, quam habuit Cicero anno 692, legitur cap. 8, Roscium nuper esse mortuum senem. Aiunt puero Roscio futuram claritatem portentis prænuntiatam fuisse. Confer I de Divin. cap. 36, et II, cap. 31. Quum Roscius scenico artificio se tradidisset, brevi ad primos pervenit comædos; atque tanta celebritate famæ floruit, ut in quo quisque artificio excelleret, is in suo genere Roscius diceretur. Itaque, licet in scenam prodire et populo esse spectaculo, apud Romanos esset turpitudini; et quamvis homines scenici haberentur infames (Corn. Nep. in præfat.), hoc tamen excellenti hominis virtuti concessum est, ut a virorum Urbis principum consuetudine non removeretur. Q. Roscium dilexit Q. Catulus, cujus in eum est venustum sane epigramma, lib. I de Nat. Deor. cap. 28. Eumdem habuit carissimum Cicero; atque inter utrumque familiaritas consuetudine quotidiana sic fuit aucta, ut nihil esset ea conjunctius. Cicero numquam, nisi honorificentissime eum appellat, sive suis in orationibus, sive in libris de Oratore: «Propter virtutem, inquit pro Quintio, c. 25, «solus dignus videbatur esse Roscius, qui ad scenam non accederet; quum artifex esset ejusmodi, ut solus dignus videretur, qui in scena spectaretur: plus fidei quam artis,

plus veritatis quam disciplinæ possidebat in se: eum populus romanus meliorem virum, quam histriionem esse arbitrabatur: ita dignissimus erat scena propter artificium, ut dignissimus esset curia propter abstinentiam». Pro Comædo, cap. 6.

Talis fuit, si Tullio credis, Q. Roscius, Tullii amores et deliciæ, quem ipse contra Fannium Chæream defendit, et cujus hortatu Quintium antea defenderat (pro Quintio, cap. 24): cujus in disciplinam summus ille vir se tradiderat adolescens, ut ab illo in actione, quæ in dicendo una dominatur, et in qua ipse laborabat, exerceretur (Plutarch. in Cic. cap. 5): cum quo ludere postea solitus fuit, et, dum animum forensibus laboribus fatigatum recrearet, contendere utrum ille sæpius eamdem sententiam variis gestibus efficeret, an ipse per eloquentiæ copiam sermone diverso pronuntiaret. Quæ res ad hanc artis suæ fiduciam Roscium abstraxit, ut librum conscriberet, quo eloquentiam cum histrionia compararet. Macrob. Saturn. II, 10. Unde *doctum* eum vocat Horatius, Epist. II, 1, 81.

Sed quanta gratia floruerit et gloria Roscius, illud maxime indicat, quod eum L. Sulla dictator, cui carissimus fuit, annulo aureo donaverit, et mercedem diurnam de publico mille denarios, gall. 820 fr. sine gregalibus solus acceperit. Macrob. ib. Quod tamen de solis illis diebus interpretor, quibus in scenam prodibat: alioquin portenti simile esset, histrioni data fuisse denariorum 366,000 annua, gall. ferme 300,120 fr. Equidem immanem istam denariorum summam fere ad tertiam sui partem Tullius reducit, et aperte ostendit Roscio sexcenta sestertium millia, gall. 123,000 fr. annua decreta fuisse: quæ ille reip. remittebat, atque pro sua animi magnitudine condonabat. Neque enim ullam mercedem excelsus et erectus animus, præter hanc laudis gloriæque desiderat. Quo tempore defendit Q. Roscium Cicero, hoc est, anno 677, jam anni erant decem, ex quo gratuitam

operam in scena Romanis Roscius exhibebat. «Decem his annis proximis, inquit Cicero pro Roscio comædo, cap. 8, H-S sexagies honestissime consequi potuit. Laborem quæstus recepit; quæstum laboris rejecit. Populo romano adhuc servire non destitit: sibi servire jampridem destitit». Consentit ferme cum Cicerone Plinius, lib.VII, p. 396 edit. H. Ait enim «quingenta sestertia, mercedis nomine, singulis annis e publico Roscium acceperisse». Quæ summa decies multiplicata reddit quinquies mille sestertia; seu, quod idem est, quinquagies centena millia sestertium. Sed Cicero summam producit ad sexagies. Quare ut Plinio cum Cicerone conveniat, corrigendum Plinii locum censet clarissimus Harduinus et pro τῷ *quingenta* reponendum esse τὴν *sexcenta*. Ceterum sexcenta illa sestertia, quæ annua pensitabat Roscio respubl. merces licet et ipsa ingens, tolerabilior sane videbitur illa, quam ex Macrobio retulimus: et præ eo cum Cicerone Plinius magis est audiendus. Scripsit doctissimus abbas Fragnerius, qui Roscii vitam in Acad. Inscript. comment. vol. IV, gallice descripsit, illos mille denarios, diurnæ mercedis nomine Roscio attributos, conficere totis decem annis centum quinquaginta scutorum nostrorum millia. Sed qua ratione fretus eruditissimus vir id protulerit, non video: constat enim hanc summam protrahendam fuisse ferme ad 3,001,200 fr.

Larva, seu persona tragica, Q. Roscius, teste Diomede, primus uti cœpit, ad obtegendum oris vitium; erat enim Roscius perversissimis oculis. De Nat. Deor. I, 28.

Roscus mortuus est senex: eum luxit civitas omnis: quæ duo declarat Cicero pro Archia poeta, cap. 8, his verbis: «Quis nostrum tam animo agresti, ac duro fuit, ut Roscii morte nuper non commoveretur? qui quum esset senex mortuus, tamen propter excellentem artem, ac venustatem, videbatur omnino mori non debuisse».

Q. Roscii temporum æqualis fuit Æsopus, tragædiarum, ut ille comædiarum, actor celeberrimus; de quo sic Tul-

lius: «In Æsopo sæpe vidi tantum ardorem vultuum atque motuum, ut eum vis quædam abstraxisse a sensu mentis videretur», de Divinat. I, 80. Ut Roscio doctrinam, sic Æsopo gravitatem tribuit Horatius, ubi supra. Hunc Cicerone et suum et Quinti fratris sui, familiarem appellat ad Q. Fr. Epist. I, 2, 4. Istius familiaritatis meminit Macrobius ubi supra; et addit, Æsopum ex histrionia partum ducenties sestertium, gall. 4,100,000 fr. filio suo reliquisse.

DESJARDINS.

EXCURSUS II

DE NOTIS NUMERALIBUS.

NOTÆ numerales Romanorum erant omnino undecim, quarum quinque sunt simplices, sex sunt conjunctæ: omnes, literæ sunt, quæ ex hominum instituto singulæ per se certum numerum repræsentant: qui numerus pro varia literarum inter se collocatione vel crescit, vel minuitur.

Literarum simplicium potestas et figura, hæc est,

I		I
V		5
X	valet	10
L		50
C		100

Quod si ultra centum progrediendum sit, hisce figuris pro ratione summæ conjunctis, usque ad numerum 500 fit progressio. At numero huic, ut et millenario, et reliquis deinceps, solæ inserviunt conjunctæ duæ figuræ, I et C; ita tamen ut figura C semper ad figuram I sit conversa: et ex illius repetitione crescat numerus a dextris quidem,

a quibus incipitur, in quintuplum, a sinistris vero in duplum, hoc modo,

IO		500
CIO		1000
IOO		5000
CCIOO	valet	10000
IOOO		50000
CCCIOOO		100000

Figuris IO, et CIO, sæpe librarii substituunt D et M. Romani numeri ultra centum millia non progrediuntur: sed illa, quantum opus est, repetuntur. Verbi gratia, si trecenta millia velim exprimere, ter, ex veterum consuetudine repetam figuram superiorem ultimam hoc modo: CCCIOOO, CCCIOOO, CCCIOOO, vel etiam magis concise rem totam uno hoc verbo, ter, exprimam; ita tamen ut toties subaudiat, centum millia. Hinc locutiones istæ veteribus familiares, bis, ter, quater, quinquies, decies: in quibus omnibus subaud. centum millia.

Sunt qui credant lineam numeris simplicibus superductam millenarium numerum significare, verbi gratia, figura V, quinque notat; si vero lineola superaddatur, quinque notabit millia. Negant alii hanc numerandi rationem esse ex veterum consuetudine, sed perperam negant: passim enim occurrit apud Plinium, uti doctissimus ejus interpres pridem observavit.

Quemadmodum major crescit numerus, quum ei minor postponitur; sic, præposito minori numero, decrescit. Itaque si figuram C sequatur figura X, efficietur numerus denarius supra centum; si vero retraxeris eandem figuram X, hoc modo, XC, tunc e figura C detrahes decem, et novaginta tantummodo numerabis.

Dum his in numeris commoramur, pauca quædam de sestertiorum signis addere operæ pretium fore duxerimus. Sestertius nummus primo duos asses cum dimidio, seu

duas libras cum semisse, quum idem assis ac libræ pondus esset, apud Romanos valuit. Inde hoc ei inditum nomen est quasi *semistertius*, id est, ex tribus assibus, sublato dimidio, constans : quemadmodum Attici τρεῖς ἡμιτάλαντον, tertium semitalentum, dixere ut talenta duo et dimidium significarent. Inde quoque ea apud librarios fluxere signa, quæ sestertios indicarent LLS, hoc est, *libræ duæ cum semisse*, quæ cito hanc in formam HS ex celeritate et consuetudine scribendi degeneravit. Fuere etiam qui olim scriberent IIr, scilicet integræ duæ partes, seu libræ cum ejus dimidia; quæ etiam nota in hanc HS hodie vulgatissimam coaluit.

Nunc autem quoniam singuli asses sunt ad libram argenti, ut unum ad mille, sestertium pondus, h. e. duæ libræ cum dimidia, si argento conflatur, bis mille et quingentos asses, seu mille æreos sestertios, æquarint necesse est. Inde est quod dicitur *sestertium magnum*, et quod sæpius apud auctores latinos per genitivum exponitur. Itaque ut sestertiorum viginti millia significes, dici possunt *sestertia viginti* (magna), seu *sestertiūm* (parvorum) *viginti*, ita ut *millia* subintelligas. Nunc vero quum numerale adverbium occurrit multiplicandum, v. gr. ter, quater, decies, centies, etc. tunc compendiaria est locutio, et subaudias oportet *centena millia*, ut supra monstravit Desjard. Sic *sestertium decies* dicitur, pro *decies centenis millibus sestertium*. Ceterum hæc passim in notis explanavimus, atque etiam quoties occurrunt ad nostræ pecuniæ formam, ex nummorum tabula quæ apud T. Livii vol. XII nost. edit. pag. 115 invenitur, redeimus.

M. TULLII CICERONIS
IN Q. CÆCILII
ORATIO

DE ACCUSATORE IN C. VERREM CONSTITUENDO,
QUÆ DIVINATIO DICITUR

ARGUMENTUM

ASCONII PEDIANI.

Cn. Pompeio primum et M. Crasso coss. C. Verres perfunctus quæstura, legatione et prætura urbana, vivo patre C. Verre et prætextato filio, ac filia nupta, uxorem habens, quum successisset in Sicilia C. Sacerdoti prætori, eamque non succedente sibi Arrio, per triennium tenuisset, atque in ea fuisset libidinose, avare, crudeliterque versatus, succedente tandem in eadem provincia L. Metello, repetundarum reus ab Siculis postulatus est; qui omnes præter Syracusanos et Mamertinos M. Tullium illo tempore florentem defensionibus amicorum ad accusandum descendere compulerunt, jam pridem illis necessitudine copulatum, quod quæstor in Sicilia fuisset prætore Sex. Peduceo, et quod quum decederet, in illa oratione, quam Lilybæi habuit, multa iis benigne promisisset. Accessit his, non ignobilis futura de Verre victoria, quia a Metellis, Scipionibus et multis aliis nobilibus viris, et præcipue ab Hortensio ipso defenderetur, facile et principe in senatu propter nobilitatem, et in foro ob eloquentiam rege causarum, et eodem consule designato cum Q. Metello, fratre Metellorum, alterius prætoris Siculi, alterius prætoris urbani. His ita constitutis exstitit Q. Cæcilius Niger, domo Siculus, et quæstor Verris, et ejusdem, ut ipse dicebat, inimicus, qui se potius accusatorem contenderet constitui oportere, has afferens causas: unam quod ab eo læsus, et ob hoc jure illi sit inimicus, quare prævaricator esse non possit; alteram, quod, quum quæstor ei tum fuerit, etiam ipse in quæstura crimina noverit Verris; tertiam, quod Siculus pro Siculis agat. Hujuscemodi propositionibus Cicero designatus ædilis his sex capitibus respondet, accusatorem eum esse oportere, qui invitus cogitur religione officii, rogatus ab omnibus Siculis; qui pro republica agat; quem volunt, qui accusant; quem metuit, qui accusatur; qui idoneus est facundia et innocentia; qui hoc facit imitatione majorum.

1. Vulg. in *quæstione*. Gronovius conj. «etiam sine inquisitione».

Divisio principalis, una de se ipso, altera de contentione sui et Cæciliï.

Divinatio dicitur hæc oratio, quia non de facto quæritur et conjectura, sed de futuro, quæ est divinatio, ² uter debeat accusare. Alii ideo putant divinationem dici, quod injurati judices in hac causa sedeant, ut, quod velint, præsentire de utroque possint. Alii, quod res agatur sine testibus, et sine tabulis, et his remotis argumenta sola sequantur judices, et quasi divinent. Cogitur autem causa, senatoriis judiciis in invidia apud populum constitutis, corruptione multorum, vexatis provinciis omnibus, ac sociis populi romani fessis toto orbe terrarum, libidine et iniquitate romanorum magistratuum, accusatoribus prævaricatione infamibus, flagitante plebe judicia equestris ordinis, quæ fere ante annos X victor Sulla sustulerat, cognoscente de pecuniis repetundis M' Glabrione prætore, et amplissimis quibusque senatorii ordinis judicantibus, summa expectatione cunctorum.

Genus causæ honestum. Status qualitatis negotialis comparativa de constituendo accusatore, qui potissimum de duobus, aut qui solus accuset: dicit enim Cæcilius, aut a se accusandum esse Verrem, aut a se quoque.

2. Gron. legendum censuit: « quia non de facto quæritur, sed de futuro, quæ est divinatio et conjectura ».



ALIUD ARGUMENTUM.

Caius Cornelius Verres Caii filius, familia nobili ortus, quum post peractam juventutem turpissimam flagitiosissimamque, ad rempublicam accessisset, tandem Siciliae prætor, in hac provincia avare, ac libidinose versatus, per triennium prorogato propter successoris Arrii mortem imperio, nullam fere horam egit vacuum a furto, scelere, flagitio et crudelitate. Tot igitur tantisque injuriis afflicti et exhausti Siculi, post ejus discessum se ad M. Tullium Ciceronem contulerunt, qui in ea provincia quæsturam gesserat, seque moderatione et integritate provincialibus probaverat, eumque orare non destiterunt, ut Verrem repetundarum postularet. Cicero, quamvis ad hanc diem defensionibus tantum amicorum florisset, omninoque ab accusationibus abhorreret, hoc tamen tot hominum honestissimorum sui que amantium studio et flagitationi tribuit, ut Verris nomine delato, se Siculorum futurum patronum profiteretur. Illud præterea Ciceronem non minime accendebat, quod hac in causa summo cum oratore Hortensio de maximis rebus colluctaretur, et magnam sibi populi gratiam conciliari cerneret, si Verrem totius nobilitatis insolenti præsidio subnixum, nulla non fraude ad corrumpenda judicia abutentem, nihilominus prosterneret. Sed derepente exstitit Quintus quidam Cæcilius Niger, civis Romanus, homo Siculus, religione Judæus, quæstor Verris Lilybætanus, et ejusdem, ut ipse aiebat, inimicus, qui se potius accusatorem constitui oportere contenderet. Scilicet iste Verris scelerum adjutor et particeps, hanc accusationem, favente Hortensio, a iudicibus postulabat, ut hanc sibi commissam provinciam proderet, Verremque turpissima prævaricatione absolvendum curaret.

Inter istum igitur et Ciceronem quum decernendum esset, uter accusationem institueret, habita est oratio hæc, quæ *Divinatio* inscribitur. *Divinatio* autem est iudicium, quo duo, pluresve qui se proponi in accusando, sive de ambitu, sive de repetundis, seu de quovis alio crimine publico, volunt, de accusatione sibi deferenda contendunt. Nam, quum omnia iudicia de præteritis

instituantur, hic iudicēs non de præterito, sed de futuro statuunt, uter sit rectius accusaturus: quod totum quia conjectura nititur, *divinare* dicuntur, eorumque iudicium *divinatio* appellatur. Quintil. VII, 3. A. Gell. II, 4. Hotom. Proleg. ad h. orat. Hermog. Digest. XL, 16.

Forsan miretur quis, quod, quum Siculorum rogatu ad causam accedere Ciceronem constet, alius cum eo de hac re contendat. Quid igitur, nonne Siculis liberum fuit, parare sibi quem vellent, qui Verrem inimicum accusaret? Minime. Romæ enim in iudiciis publicis, quale erat istud Verris iudicium, cuivis e populo licebat, vel inconsultis iis, quorum intererat, accusare. Atque inde iudicia illa *publica* dicta sunt. Justin. Instit. IV, 18, § 1.

Hanc orationem Cicero, annum ætatis agens 37, designatus ædilis, habuit in foro, M. Licinio Crasso et Cn. Pompeio coss. A. U. C. 683, circa mensem aprillem, tres menses amplius antequam cœpit Verres accusari.

Opinatur Hotomannus iudicem quæstionis duntaxat, ei præfuisse contentioni. Ei aderant in consilio complures senatorii ordinis, ex eo numero iudicum, qui postea M'. Glabriori prætori in iudicio adfuerunt.

Eventus fuit felix. Cæciliï fraudem facile ostendit Cicero, et tenuem ejus in dicendo vim ita elusit, et per jocum elevavit, ut eum non solum non primas in accusando partes, sed ne secundas quidem aut tertias agere posse demonstraret.

SYNOPSIS.

Quæstio est in genere deliberativo, an Cicero sit eligendus accusator Verris, an Cæcilius: sed miscetur demonstrativum, quia Cæcilius vituperatur.

Partes hujus orationis sunt: Exordium adusque tertii capitis dimidiam partem. Constitutio causæ, ad tertii capitis finem. Contentio, quæ Confirmationem ad cap. 16, et Confutationem ad 21 complectitur; et Peroratio.

In Exordio invidiosum accusatoris nomen a se amoliri quærit Cicero, ostenditque se, qui tot annos in causis iudiciisque publicis versatus sit, ut defenderit multos, læserit neminem, propterea nunc ad accusandum Verrem descendere, quod hac accusatione scelestissimi ac audacissimi hominis, totius provinciæ Stollie defensio contineatur, simulque in ea versetur iudiciorum existimatio, 1, 2, 3.

Inde *causam constituit*, et ut haberent iudices, quod in eligendo actore sequi possint, demonstrat, si certamen inter aliquos sit, cui potissimum delatio detur, hæc duo in primis spectari oportere : quem maxime velint actorem esse ii, quibus factæ sunt injuriæ ; deinde quem minime velit is, qui eas injurias fecisse arguatur ; 3 sub fin.

Jam *confirmat* Siculos se ipsum actorem suæ causæ contra Verris injurias quæsiisse, 4. Eorumque voluntatem apud iudices valere oportere, 5. Præsertim quum Cæcilium fortunarum suarum defensorem habere prorsus nolint, 6. Deinde in altero *CONFIRMATIONIS* membro ostendit Verrem a se minime accusari velle ; nullam rem in se esse, quam ille contemnat ; nullam in Cæcilio, quam ille pertimescat, 7, 8. In accusatore vero esse oportere integritatem et innocentiam singularem, deinde firmitatem et veritatem ; neutrum in Cæcilio esse, quippe cui ipsi criminum permultorum cum Verre societas fuerit, 9-11. Præterea ei deesse justam agendi facultatem et dicendi consuetudinem, 12, 13. Quod eo gravius sit, quod ei cum homine disertissimo Q. Hortensio futurum sit certamen, 14. Neque id ideo compensari, quod subscriptores habeat exercitatos et disertos, 15.

Absoluta Confirmatione, sequitur *CONFUTATIO*. Triplici de causa contendebat Cæcilius Verris accusandi munus ad se pertinere, 1^o quia injuria affectus a Verre fuerat. 2^o Quia illi erat inimicus. 3^o Quia quæstor Verris fuerat.

Nihil esse docet Cicero, quod Cæcilius dicat injuriam sibi a Verre factam, seque ejus inimicum profiteatur, 16, 17. Et quod quæstor fuerit, tantum abesse, ut propterea sibi in accusando Verre antefendus sit, ut potius hanc unam ob causam repudiari eum oporteat, 18, 19. Denique multo magis a se quam a Cæcilio exspectari posse, causam hanc severe, accurate, ac diligenter actum iri, quod ipse nulla privatim injuria accepta, sociorum populi rom. injurias persequatur. Hic illustratur locus et amplificatur timore nocentium, ne ab imperitis et inertibus hominibus ad viros fortes et diligentes accusandi munus transferatur ; consuetudine majorum, et clarissimorum virorum exemplo, 20, 21.

In *PERORATIONE* amplificat pignora, seu rationes quibus reipubl. ipse, non vero Cæcilius, obstringitur ; iudicibus se commendat pulcherrimis virtutibus ; denique eis indignationem populi comminatur, si contra se judicent. Hunc in eorum animis aculeum relinquit, 21, 22.

M. T. CICERONIS ORATIONES.

IN Q. CÆCILIIUM DIVINATIO.

ORATIO QUARTA.

I. **S**I quis vestrum¹, iudices, aut eorum qui adsunt², forte miratur, me, qui tot annos³ in causis iudiciisque publicis ita sim versatus, ut defenderim multos, læserim neminem, subito nunc mutata voluntate, ad accusandum descendere⁴; is, si mei consilii causam rationemque cognoverit, una et id, quod facio, pro-

I. 1. *Si quis vestrum*. Videtur adumbrasse initium orationis Æschinis contra Timarchum, qui in eandem fere est sententiam. Monet Diomed. ed. Putsch. p. 464: « non deesse qui Ciceronem reprehendant, qui principio Divinationis metrum Sotadicum fecerit: *si quis...adsunt* ». Quid autem pervulgatius quam versus aliquando summis viris imprudentibus excidisse? Et, credo, omnes Ciceroni de tam bello versu ignoscent. Vid. Quintil. IX, 4.

2. *Adsunt*. Populum significat, qui stabat circum subsellia.

3. *Tot annos*. Undecim scilicet ex quo tempore S. Roscium Amerinum

defenderat. Sed ipse in Brut. hosce annos, omisis iis quos in Græcia egit, ad quinquennium redigit.

4. Habent codd. nonnulli *descenderim*, quod jam legerat Asconius. Lectionem hanc, Passeratio probatam, Beck. sublato commate post *miratur*, admisit. J. V. L. — Quum multorum inimicitias ii subirent qui alios accusabant, simulque accusandi munus olim nobile et præclarum, Sullanis temporibus, polluerant delatores, ideo hanc a se invidiam in principio purgat Cicero. Accusandi studium laudine an vitio duci oporteat, præclare disputat Quintil. lib. XII, cap. 7.

babit, et in hac causa profecto neminem præponendum esse mihi actorem putabit. Quum quæstor in Sicilia fuissem, iudices, itaque⁵ ex ea provincia decesissem, ut Siculis omnibus jucundam diuturnamque memoriam quæsturæ nominisque mei relinquerem⁶; factum est, uti quum summum in veteribus patronis⁷ multis, tum nonnullum etiam in me præsidium suis fortunis constitutum esse arbitrarentur. Qui nunc populati⁸ atque vexati, cuncti ad me publice⁹ sæpe venerunt, ut suarum fortunarum omnium causam defensionemque susciperem: me sæpe esse pollicitum, sæpe ostendisse dicebant, si quod tempus accidisset, quo tempore aliquid a me requirerent, commodis eorum me non defuturum. Venisse tempus aiebant, non jam ut commoda sua, sed ut vitam salutemque totius provinciae defenderem: sese jam ne deos¹⁰ quidem in suis urbibus, ad quos confugerent, habere; quod eorum simulacra sanctissima C. Verres ex delubris religiosissimis sustulisset: quas res luxuries in flagitiis, crudelitas in suppliciis, avaritia in rapinis, superbia in contumeliis efficere potuisset, eas

5. *Itaque.* Et ita. *Decedere* ex provincia dicuntur qui cum imperio aut potestate sunt; *discedere* vero privati.

6. *Relinquerem.* De sua quæstura in orat. pro Plancio, sic scribit: « non vereor ne quis audeat dicere, ullius in Sicilia quæsturam aut clariorem aut gratiorem fuisse, etc. »

7. *Patronis.* Siculi patronos primum habuerunt Marcellos, ab illo Marcello a quo captæ et servatæ sunt Syracusæ (T. Liv. XXV, 25); deinde Scipiones, ex quo P. Scipio Africanus, excisa Carthagine, Siciliae restituit ornamenta quæ Pœni victores

abstulerant (Verr. II, 35); Metellos denique. Mos fuit ut romani nobiles, civitates aut nationes devictas bello in fidem et clientelam reciperent, atque earum patroni essent. Vide de Offic. I, 35.

8. *Populati.* Avaritia Verris. *Vexati.* Eiusdem libidine et crudelitate.

9. *Publice.* Publica civitatum auctoritate. Soli non venerunt Mamerini, nec Syracusani.

10. *Deos.* Adducit h. l. Lactant. II, 4, et deridet: « Quasi vero, inquit, si Verres ex urbibus delubrisque simulacra deorum sustulerat, de cælo quoque deos sustulisset ». Vulgus qui-

omnes sese hoc uno prætore per triennium¹¹ pertulisse : rogare¹² et orare , ne illos supplices aspernarer, quos, me incolumi, nemini supplices esse oporteret.

II. Tuli graviter et acerbe, iudices, in eum me locum adductum¹, ut aut eos homines spes falleret, qui opem a me atque auxilium petissent²; aut ego, qui me ad defendendos homines ab ineunte adolescentia dedissem, tempore atque officio coactus ad accusandum traducerer. Dicebam, habere eos actorem³ Q. Cæciliū, qui præsertim quæstor in eadem provincia post me quæstorem fuisset. Quo ego adjumento sperabam hanc a me molestiam posse demoveri⁴, id mihi erat adversarium maxime. Nam illi multo mihi hoc facilius remisissent, si istum non nossent⁵, aut si iste apud eos quæstor non fuisset. Adductus sum, iudices, officio⁶, fide, misericordia, multorum bonorum exemplo, veteri consuetudine, institutoque majorum, ut onus hoc laboris atque officii, non ex meo⁷, sed ex meorum necessariorum tempore, mihi suscipiendum putarem. Quo in negotio tamen illa me res, iudices,

dem ipsa nūmina in simulacris habitare credebatur, cui errori prudentiores se accommodabant, licet animo longe aliter sentirent. Vid. Horat. od. I, 14. Sat. I, 8. Pers. VI, 29.

11. *Per triennium.* Annus erant prætoris provincie, sed quum successor exspectaretur Arrius, prorogatum Verri fuerat imperium. Vide ad calcem hujus orat. de provinciis.

12. *Rogare.* Est blande petentium. *Orare* est supplicum.

II. 1. Alii ex MSS adduci. J. V. L.

2. *Mavult* Hotom. Lamb. Manut. et Desjard. *exspectassent.* Contra sunt omnes MSS et edd. veteres.

3. *Actorem.* H. l. qui in iudicio causas agit. *Præsertim quæstor.* Cu-

jus si qua essent in Siculos merita, eorum memoria recentior esset quam meorum.

4. Sic Lambin. Græv. Olim *dimo- veri.*

5. *Non nossent.* Acerbe in Cæciliū, quem h. l. quasi aliud agens acerbissime punit.

6. *Officio.* Quod eorum petitionem non debeam aspernari, quorum quæstor fui; *fide*, quibus decedens de provincia promisi; *misericordia*, quorum me tempus et calamitas debeat commovere.

7. *Non ex meo.* Non ut meo tempore servirem, sed meis amicis subvenirem: non ut meas injurias persequer, ut Cæcilius persequi vult suas.

consolatur, quod hæc, quæ videtur esse accusatio mea, non potius accusatio, quam defensio est existimanda. Defendo enim multos mortales, multas civitates, provinciam Siciliam totam. Quamobrem, si mihi unus est accusandus, propemodum manere in instituto meo videor, et non omnino a defendendis hominibus sublevandisque discedere. Quod si hanc causam tam idoneam⁸, tam illustrem, tam gravem non haberem; si aut hoc a me Siculi non petissent, aut mihi cum Siculis causa tantæ necessitudinis non intercederet, et hoc, quod facio, me reipublicæ causa facere profiterer, ut homo singulari cupiditate, audacia, scelere præditus, cujus furta atque flagitia non in Sicilia solum, sed in Achaia⁹, Asia, Cilicia, Pamphylia, Romæ denique ante oculos omnium maxima turpissimaque nossemus, me agente in iudicium vocaretur: quis tandem esset, qui meum factum, aut consilium posset reprehendere?

III. Quid est, proh deum hominumque fidem! in quo ego reipublicæ plus hoc tempore prodesse possim? quid est, quod aut populo romano gratius esse debeat, aut sociis exterisque nationibus optatius esse possit, aut saluti fortunisque omnium magis accommodatum sit? Populatæ, vexatæ, funditus eversæ provinciae; socii¹, stipendiarii²que populi romani afflicti, miseri, jam non salutis spem³, sed exitii solatium quærunt. Qui iudicia manere apud ordinem senato-

8. *Idoneam*. Quia rogatus ad eam accedo. *Illustrem*. Propter provinciae Siciliae nobilitatem. *Gravem*. Propter maxima Verris crimina.

9. *In Achaia*. Vid. inf. Verr. I, 1, et passim.

III. 1. *Socii* incertum vectigal, ut *decumas*, seu decimam frugum par-

tem; *stipendiarii* certum pendebant, quod eis velut in victoriae monumentum imponebatur.

2. *Salutis spem*. Non sperant in pristinum statum se posse restitui; sed quærunt, ad exitii sui solatium, ut condemnentur ii, quorum scelere afflicti sunt et perdit.

rium volunt³, queruntur, accusatores se idoneos⁴ non habere; qui accusare possunt, iudiciorum severitatem desiderant. Populus romanus interea, tametsi multis incommodis⁵ difficultatibusque affectus est, tamen nihil æque in republica atque illam veterem iudiciorum vim gravitatemque requirit. Iudiciorum desiderio tribunitia potestas efflagitata est⁶; iudiciorum levitate⁷ ordo quoque alius ad res iudicandas postulatur; iudicum culpa atque dedecore etiam censorium⁸ nomen, quod asperius antea populo videri solebat, id nunc poscitur, id iam populare atque plausibile factum est. In hac libidine hominum nocentissimorum, in populi romani quotidiana querimonia, iudiciorum infamia, totius ordinis⁹ offensione, quum hoc unum his tot incommodis remedium esse arbitrarer, ut homines idonei atque integri causam reipublicæ legumque susci- perent; fateor; me, salutis omnium causa, ad eam par-

3. *Volunt.* In magna expectatione lex Aurelia erat, quum hæc dicerentur: flagrabat enim invidia ordo senatorius, qui, Sullana lege, per decem annos turpiter iudicia administrabat. Vid. sup. in Argum.

4. *Idoneos.* Nempe ingenio, probitate, constantia præditos.

5. *Incommodis.* Adeverat populo Sulla tribuniciam potestatem; censores sustulerat; transtulerat iudicia ab equestri ad solum ordinem senatorium.

6. *Efflagitata est.* Ut nempe tribunorum intercessionibus iudiciorum corruptela reprimeretur. Ante Sullam tribunis ea potestas erat, ut adversus iniquorum iudicum sententias intercederent, quemlibet qui accepta pecunia iudicasset, ad iudicium populi raperent, eique mulctam irrogarent.

Quæ potestas eis hoc ipso anno a Pompeio et Crasso coss. est restituta.

7. *Levitate.* Levis iudex est, qui facile movetur, et de recta iudicandi via facile deflectit. Huic opponitur *gravis* et constans iudex.

8. *Censurium nomen.* Censura, cuius olim vel nomen propter severitatem horrebant, nunc poscitur, ut hac ipsa severitate eos, qui corrupte iudicassent, notent et moveant senatus censores. Porro illi primum creati fuerant anno Urbis 312, ut morum disciplinæque romanæ penes eos esset regimen, et decoris dedecorisque discrimen sub eorum esset ditione. Porro per annos duodecim in republ. non fuerunt. Illos hoc eodem anno restituit Pompeius.

9. *Ordinis.* Senatorum nempe omnium.

tem¹⁰ accessisse reipublicæ sublevandæ, quæ maxime laboraret.

Nunc, quoniam, quibus rebus adductus ad causam accesserim, demonstravi¹¹, dicendum necessario est de contentione nostra, ut in constituendo accusatore, quid sequi possitis, habeatis.

Ego sic intelligo, iudices: quum de pecuniis repetundis nomen cujuspiam deferatur, si certamen inter aliquos sit, cui potissimum delatio detur, hæc duo in primis spectari oportere: quem maxime velint actorem esse ii, quibus factæ esse dicantur injuriæ, et quem minime velit is, qui eas injurias fecisse arguatur.

IV. In hac causa, iudices, tametsi utrumque esse arbitror perspicuum, tamen de utroque dicam, et de eo prius, quod apud vos plurimum debet valere, hoc est, de voluntate eorum, quibus injuriæ factæ sunt; quorum causa iudicium de pecuniis repetundis¹ est constitutum. Siciliam provinciam C. Verres per triennium depopulatus esse, Siculorum civitates vastasse, domos exinanisse, fana spoliasse dicitur. Adsunt, queruntur Siculi universi; ad meam fidem, quam habent spectatam jam et diu cognitam, confugiunt; auxilium sibi per me a vobis atque a populi romani² legibus petunt; me defensorem calamitatum suarum, me ultorem injuriarum, me cognitorem juris sui, me actorem causæ totius esse voluerunt. Utrum, Q. Cæcili, hoc dices, me non Siculorum rogatu ad causam ac-

10. *Ad eam partem.* Hoc munus, has partes sublevandæ reip. suscepisse. Manifestior sensus esset, si *sublevandam* darent codd. aliqui.

11. *Demonstravi.* De his vide quod sup. Rosc. Amer. I, not. 6, adnotavimus.

IV. 1. *Pecuniis repetundis.* Judi-

cium *repetundarum* inde dictum, quod eo iudicio socii pecunias sibi contra leges ereptas repetant, quas ex damnatorum litibus æstimatis, domum reportent.

2. Olim «populo romano» ex MSS compendio profectum errorem correxit Grævius.

cedere, an optimorum fidelissimorumque sociorum voluntatem apud hos³ gravem esse non oportere? Si id audebis dicere, quod C. Verres, cui te inimicum esse simulas, maxime existimari vult, Siculos hoc a me non petisse; primum causam inimici tui sublevabis⁴, de quo non præjudicium⁵, sed plane iudicium jam factum putatur, quod ita percrebuit⁶, Siculos omnes actorem⁷ suæ causæ contra illius injurias quæsisse. Hoc si tu, inimicus ejus, factum negabis, quod ipse, cui maxime hæc res obstat, negare non audet; videto, ne nimium familiariter⁸ inimicitias exercere videare. Deinde sunt testes, viri clarissimi nostræ civitatis, quos omnes a me nominari non est necesse: eos, qui adsunt, appellabo; quos, si mentirer, testes esse impudentiæ meæ minime vellem. Scit is, qui est in consilio, C. Marcellus; scit is, quem adesse video, Cn. Lentulus Marcellinus⁹: quorum fide atque præsidio Siculi maxime nituntur, quod omnino Marcello-
rum nomini tota illa provincia adjuncta¹⁰ est. Hi sciunt, hoc non modo a me petitum esse, sed ita sæpe et ita

3. *Apud hos.* Valere apud iudices.

4. *Sublevabis.* Levio-rem facies. Nam si nullum actorem petierunt Siculi, non igitur ita graves sunt eorum injuriæ, neque tam nocens est Verres, quam homines arbitrantur.

5. *Præjudicium.* Præsumptio. Neque causa ista præjudicata, sed omnino jam iudicata et damnata est. Præjudicium interdum est signum et indicium iudicii, ut hoc loco. De præjudiciis vid. Quintil. V, 2.

6. *Alii, percrebuit.* J. V. L.

7. *Menardus addit me.* J. V. L.

8. *Nimium familiariter.* Jocus. Caveto ne nimium amice inimicitias exerceas: ne, quamvis inimicum Verri haberi te velis, amicus tamen et om-

nino familiaris reipsa esse videaris.

9. *Marcellinus.* Ille ex gente Clodia, quæ est Marcellorum, in Corneliam adoptatus transierat. Fuit autem romani moris ut adoptati homines nomen familiæ ejus ex qua migrassent novo suo nomini jungerent, ita ut illud paullum deflecterent; sic a Marcellis Marcellinus, ab Æmiliis Æmilianus, ab Octaviis Octavianus dicebatur.

10. *Gulielm. aliique tentant ad- dicta, advincta.* Gruter. mallet *clien- ta*, vocem a Cicerone, ut videtur, alienam. Nihil mutandum. Terent. Adelph. I, 1, 47: «ille, quem beneficio adjungas», nempe *tibi* ut hic *nomini*, h. e. universæ familiæ.

vehementer esse petatum, ut aut causa mihi suscipienda fuerit, aut officium¹¹ necessitudinis repudiandum. Sed quid ego his testibus utor, quasi res dubia aut obscura sit? Adsunt homines ex tota provincia nobilissimi, qui praesentes vos orant atque obsecrant, iudices, ut in actore causae suae deligendo vestrum iudicium ab suo iudicio ne discrepet. Omnium civitatum totius Siciliae legationes adsunt, praeter duas civitates¹²: quarum duarum, si adessent, duo crimina vel maxima minuerentur, quae cum his civitatibus C. Verri communicata sunt. At enim cur a me potissimum hoc praesidium petiverunt? Si esset dubium, petissent a me praesidium, necne, dicerem, cur petissent. Nunc vero, quum id ita perspicuum sit, ut oculis¹³ iudicare possitis; nescio cur hoc mihi detrimento esse debeat, si id mihi obijciatur, me potissimum esse delectum. Verum id mihi non sumo, iudices, et hoc non modo in oratione mea non pono, sed ne in opinione quidem cujusquam relinquo, me omnibus patronis esse praepositum. Non ita est; sed uniuscujusque temporis¹⁴, valitudinis, facultatis ad agendum, ducta ratio est. Mea fuit semper haec in hac re voluntas et sententia, quemvis ut hoc mallet de iis, qui essent idonei, suscipere, quam me; me ut mallet, quam neminem.

11. *Officium*. Jus necessitudinis quale est inter patronum, clientes et hospites.

12. *Duas civitates*. Mamertinam et Syracusanam. Haec furtorum Verris adiutrix, illa receptrix fuit. Vid. inf. in Verrinis orat. passim. Haec sunt earum civitatum maxima crimina.

13. *Oculis*. Siculos enim, qui id a vobis petunt, praesentes videtis, et

potestis hac de re interrogare, utrum verum dixerim.

14. *Temporis*. Non contempnere Siculi veteres suos patronos; sed temporis habuerunt rationem, quia Marcellus iudex est; *valitudinis*, quod infirmior corpore est Marcellinus; *facultatis*, quod non est in altero Marcello facultas oratoria; juris enim studiosior erat ille quam eloquentiae.

V. Reliquum est jam, ut illud quæramus, quum hoc constet, Siculos a me petisse, ecquid hanc rem apud vos animosque vestros valere oporteat; ecquid auctoritatis apud vos in suo jure¹ repetundo socii populi romani, supplices vestri, habere debeant. De quo quid ego plura commemorem? quasi vero dubium sit, quin tota lex de pecuniis repetundis sociorum causa constituta sit. Nam civibus quum sunt ereptæ pecuniæ, civili fere actione² et privato jure repetuntur: hæc lex socialis est; hoc jus nationum exterarum est; hanc habent arcem, minus aliquanto nunc³ quidem munitam, quam antea; verumtamen, si qua reliqua spes est, quæ sociorum animos consolari possit, ea tota in hac lege posita est: cujus legis non modo a populo romano, sed etiam ab ultimis nationibus jampridem severi custodes requiruntur. Quis igitur est, qui neget oportere eorum arbitrato lege⁴ agi, quorum causa lex sit constituta? Sicilia tota, si una voce loqueretur, hoc diceret: Quod auri, quod argenti, quod ornamentorum in meis urbibus, sedibus⁵, delubris fuit; quod in unaquaque re, beneficio senati⁶ populi que romani, juris habui, id mihi tu, C. Verres, eripuisti atque abstulisti; quo nomine abs te sestertium millies⁷ ex lege repeto. Si universa, ut dixi, provincia loqui posset, hac voce uteretur: quoniam id non

V. 1. *In suo jure*. Nempe sociorum causa repetundarum judicium fuit institutum.

2. *Civili actione*. *Civilis actio* est ea, qua civis cum cive apud prætorem urbanum contendit. — *Jus privatum* illud dicitur, quod inter privatos prætor urbis dicit. H. l. sociali juri opponitur.

3. *Nunc*. Quia judicia flagitiose fiunt.

4. Ernest. putabat *lege* commode abesse posse; recte autem hoc negat Beckius, quia refertur ad *lex*, quod sequitur, et vim addit sententiæ. J. V. L.

5. Manut. conjicit *ædibus*. Quod mallet Desjard. J. V. L.

6. Alii, *senatus*. J. V. L.

7. *Millies*. Subaud. *centies millies* (20,500,000 fr.). Ita loquentem Sici-

poterat, harum rerum actorem, quem idoneum esse arbitrata est, ipsa delegit. In hujusmodi re quisquam tam impudens reperietur, qui ad alienam causam, invitis iis, quorum negotium est, accedere aut adspirare audeat?

VI. Si tibi, Q. Cæcili, hoc Siculi dicerent: Te non novimus; nescimus qui sis; numquam te antea vidimus; sine nos per eum nostras fortunas defendere, cujus fides est nobis cognita: nonne id dicerent, quod cuivis probare deberent? Nunc hoc dicunt: utrumque se nosse; alterum se cupere defensorem esse fortunarum suarum, alterum plane nolle. Cur nolint, etiam si tacent¹, satis dicunt; verum non tacent: tamen his invitissimis te offeres? tamen in aliena causa loquere? tamen eos defendes, qui se ab omnibus desertos potius², quam abs te defensos esse malunt? tamen his operam tuam pollicebere, qui te neque velle sua causa³, nec, si cupias, posse arbitrantur? Cur eorum spem exiguam reliquarum fortunarum, quam habent in legis et iudicii severitate positam, vi extorquere conaris? cur te interponis, invitissimis his, quibus maxime lex consultum esse vult? cur, de quibus in provincia non optime es meritus, eos nunc plane fortunis omnibus

liam inducit oratoria magis ratione, quam omnino exacta, et ex Siculorum querelis magis quam ex veris auctoritatibus. Ipse vero, postquam in Sicilia testimonia omnia collegerit, *sestertium quadringenties* (8,500,000 fr.) constituto iudicio repetet. Huic alteri summæ standum. Quia vero repetundarum damnati pœnam duplicem et majorem etiam aliquando, ut ex Jctorum libris et ex Asconio manifestum est, subibant, potuit Cicero h. l. ad *quadringenties*, quæ vera est furtorum

Verris æstimatio, sesquialterum *quadringenties*, pœnæ nomine, adjicere.

VI. 1. Multi, *taceant*; sed Asconius recte, *etiam si tacent*. J. V. L.

2. *Potius*. Abundat h. l. ut sæpius apud Plant. Terent. ipsumque Cic. Adi Vossium Art. Gramm. part. II, pag. 565.

3. Optime sic Naugerius, al. Quod idem est ut Desjard. monuit, quod «alteri studere ac favere». Recentiores male, *suam causam*. J. V. L. — Cæcilius operam suam iis pollicetur,

conaris evertere? cur his non modo persequendi juris sui, sed etiam deplorandæ calamitatis adimis potestatem? Nam⁴, te actore, quem eorum affuturum putas, quos intelligis, non ut per te alium, sed ut per aliquem te ipsum ulciscantur, laborare⁵?

VII. At enim solum¹ id est, ut me Siculi maxime velint: alterum illud, credo, obscurum est, a quo Verres minime se accusari velit. Ecquis umquam tam palam de honore, tam vehementer de salute sua contendit, quam ille, atque illius amici, ut ne hæc mihi delatio detur? Sunt multa, quæ Verres in me² esse arbitratur, quæ scit in te, Q. Cæcili, non esse: quæ cujusmodi in utroque nostrum sint, paullo post commemorabo. Nunc tantum id dicam, quod tacitus tu mihi assentiare: nullam rem in me esse, quam ille contemnat; nullam in te, quam pertimescat. Itaque magnus ille defensor³ et amicus ejus tibi [Hortensius⁴] suffragatur, me oppugnat; aperte ab iudicibus petit, ut tu mihi antepone; et ait, hoc se honeste, sine ulla invidia, ac sine ulla offensione contendere. « Non enim, inquit, illud peto, quod soleo, quum vehementius⁵ contendi, impetrare, reus ut absolvatur,

quibus non favet, quippe Verris amicus, neque, si maxime velit, propter tenuitatem præstare quidquam possit.

4. Græv. Ernest. *num* habent. Male. Nam refertur ad proxime antecedentia. Nolebant enim Siculi in iudicio adesse, et calamitatem suam deplorare, si neminem alium, quam Cæcilium actorem causæ suæ habere possent.

5. *Laborare*. Aliquem quærere, qui te castiget.

VII. 1. Schütz, Hotom. et Lamb. ducibus, prætulit *solidum*. Nescio an nimio amore inusitatæ locutionis. J.

V. L. — *Solum*. Ex duobus quæ in accusatore requirantur, hoc in me solum est et singulare, ut me maxime velint Siculi. Nunc autem absoluto divisionis uno membro, auctor aggreditur alterum.

2. *In me*. Honesta est significatio suæ in agendo fidei ac facultatis.

3. *Magnus ille defensor*. Famosus ille causarum patronus, cui nulla defensionis ratio videtur iniqua.

4. Abest a libris nonnullis, omisitque Grævius. J. V. L.

5. *Vehementius contendi*. *Vehementius contendere* h. l. et in ore Horten-

« non peto; sed ut ab hoc potius, quam ab illo accusetur, id peto. Da mihi hoc; concede, quod facile est, quod honestum, quod non invidiosum: quod quum dederis, sine ullo tuo periculo, sine⁶ infamia illud dederis, ut is absolvatur, cujus ego causa laboro. » Et ait idem, ut aliquis metus adjunctus sit ad gratiam, certos⁷ esse in consilio, quibus ostendi tabellas velit; id esse perfacile; non enim singulos ferre sententias, sed universos constituere⁸; ceratam⁹ unicuique tabellam dari cera legitima, non illa infami ac nefaria. Atque is non tam propter Verrem laborat, quam quod eum minime res tota delectat. Videt enim, si a pueris¹⁰ nobilibus, quos adhuc elusit; si a quadru-

sii, idem est, ac iudicium data pecunia corrumpere. Quod ideo honeste exprimit, quia loquentem inducit Hortensium. Ascon.

6. *Sine infamia.* Quia nulla hic suberit corruptelæ suspicio.

7. *Certos.* Ait Hortensius se in iudicum numero amicos habere, quibus velit ostendi tabellas priusquam in urnam mittantur (ut sciat an, promisso servato, quisque iudicum scriptum in tabula nomen Cæcilii habeat): illud vero non esse difficile, nam omnes simul sententias seu tabulas in cista deponere.

8. *Constituere.* Ad ferendam sententiam non singulos iudices vocari aut consurgere, sed simul et confuse universos. Non autem erat perdifficile, inter ferendas simul et confuse tabellas, alicui e consilio suas alios iudices furtim tabellas ostendere. Adnotat Asconius in divinationibus et causis majoribus, in cistam tabulas iudices coniecisse, in levioribus autem sententiam de tabula pronuntiasse.

9. *Ceratam.* Tabellæ iudicum erant

cera, in qua scriberetur, illitæ; et unius ferme coloris, h. e. albi aut subflavi, qui ceræ color est legitimus seu naturalis. At vero Hortensius, quum in iudicio Terentii Varronis, quem repetundarum reum ex Asia, nuper defenderat, corrupisset pecunia iudices; ab iisdem insuper exegerat, ut, in suffragio ferendo, tabellis uterentur discoloribus, quas a se accepissent; quo certius sciret ille an empti iudices pactionis fidem servassent; ea res quia cum totius iudicii infamia innotuerat, metum hisce iudicibus demit Hortensius. Non, inquit, hic discoloribus utar tabellis, ut olim: cerata unicuique vestrum tabella dabitur, quæ naturalem suum colorem retineat, et in qua nulla sit suspicio. Satis erit mihi, si tabellas vestras ostenderitis amicis quos habeo in consilio. Cf. scholiast. Acron. et Porphyryon. in Horat. Sat. II, 1.

10. *Pueris.* Accusabant enim illis temporibus soli adolescentes, aut delatores, tunc *quadruplatores* vocati, quod damnatorum de bonis quartam

platoribus, quos non sine causa contempsit semper, ac pro nihilo putavit, accusandi voluntas,¹¹ ad viros fortes, spectatosque homines translata sit, se in iudiciis dominari¹² non posse.

VIII. Huic ego homini jam ante denuntio, si a me causam hanc vos agi volueritis, rationem illi defendendi totam esse mutandam; et ita tamen mutandam, ut meliore et honestiore conditione sit, quam qua ipse esse vult; ut imitetur homines eos, quos ipse vidit, amplissimos, L. Crassum et M. Antonium¹; qui nihil se arbitrabantur ad judicia causasque amicorum, præter fidem et ingenium, afferre oportere. Nihil erit, quod, me agente, arbitretur, iudicium sine magno multorum periculo posse corrumpi. Ego in hoc iudicio mihi Siculorum causam receptam², populi romani susceptam esse arbitror: ut mihi non unus homo improbus opprimendus sit, id quod Siculi petiverunt, sed omnino omnis³ improbitas, id quod populus romanus jamdiu flagitat, extinguenda atque delenda sit. In quo ego quid eniti, aut quid efficere possim, malo in aliorum spe relinquere, quam in oratione mea ponere.

partem consequerentur. Vid. Rosc. Amer. cap. 20, not. 1.

11. Unus cod. *voluptas*, quod Facio nimis placet. J. V. L.

12. Lambin. e cod. Cujaciano recepit, « dominari diutius non posse ». J. V. L. — *Dominari in iudiciis* est ea ad nutum flectere et permovere, sive pecunia, sive eloquentia, sive aliis artibus.

VIII. 1. L. Crassum et M. Antonium. De illis disertissimis oratoribus adi de Oratore libros qui eorum laudibus sunt pleni. Confer etiam finem

Verrinæ secundæ, et initium quintæ.

2. *Receptam. Recipimus* rogati; *suscipimus* ultro. Sic in seq. orat. « ego quum hanc causam Siculorum rogatu recepissem, tum suscepto negotio, majus mihi quidquam proposui ». Susceperat autem reipsa Cicero populi rom. causam, quum iudiciis vim suam ac auctoritatem restituere vellet.

3. *Abeat omnis* a Græv. et Ernest. J. V. L. — Optime explicat Asconius, significari et corruptos iudices, et corruptores eorum, et sequestres, et

Tu vero. Cecili. quid potes? quo tempore. aut qua in re non modo specimen ceteris aliquod leuisti. sed tute nunc periculum fecisti? In mentem tibi non venit. quid negoti sit causam publicam sustinere? vicam alterius totam explicare? atque eam non modo in animis iudicium. sed etiam in oculis conspectuque omnium exponere? sociorum salutem. commoda provinciarum. vim legum. gravitatem iudiciorum defendere?

IX. *Cognosce ex me.* quoniam hoc primum tempus discendi nactus es. quam multa esse oporteat in eo. qui alterum accuset: ex quibus si unum aliquod in te cognoveris. ego jam tibi ipse istuc. quod expetis. mea voluisti concedam. Primum integritatem atque innocentiam singularem. Nihil est enim. quod minus ferendum sit. quam rationem ab altero vitæ reposcere enim. qui non possit suæ reddere. Hic ego de te plura non dicam: unum illud credo omnes animadvertere. te adhuc ab nullis. nisi a Siculis. potuisse cognosci: Siculos hoc dicere. quum eidem sint irati. cui tu te inimicum esse dicis. sese tamen. te actore. ad iudicium non affuturos. Quare negent. ex me non audies: hoc patere id suspicari. quod necesse est. Illi quidem. ut est hominum genus nimis acutum¹ et suspiciosum. non te ex Sicilia literas² in Verrem deportare³ velle arbitrantur. sed. quum⁴ iisdem literis illius prætura

interpretes. et emissarios. et omne quod vitii est.

4. *Tute tui.* Solus. remotis arbitrio. quæ tunc essent vires. per te ipse expertus es?

IX. 1. *Acutum.* Ingenii acumine Siculos valuisse ostendit sæpius in Verr. et in Brut. de Sicilia loquens. « quod esset. inquit. acuta illa gens et controversa natura ».

2. *Literas.* Testimonia. publicas civitatum tabulae.

3. *Deportare.* Ut accusationem instituas. Accusatori constituto potestas Acilia lege fidebat. omnia non modo Romæ. sed etiam in provinciis obsignandi ac deportandi. quæ ad instituendam accusationem pertinere existimaret.

4. *Habent quod* nonnulli codd. et

et tua quæstura consignata sit, asportare⁵ te velle ex Sicilia literas suspicantur. Deinde accusatorem fir-
mum⁶ verumque esse oportet. Eum ego si te putem
cupere esse, facile intelligo, esse non posse. Nec ea
dico, quæ, si dicam, tamen infirmare non possis : te,
antequam de Sicilia decesseris, in gratiam redisse cum
Verre; Potamonem, scribam et familiarem tuum, re-
tentum esse⁷ a Verre in provincia, quum tu decederes;
M. Cæcilium, fratrem tuum, lectissimum atque orna-
tissimum⁸ adolescentem, non modo non adesse, ne-
que tecum tuas injurias persequi, sed esse cum Verre,
cum illo familiarissime atque amicissime vivere. Sunt
hæc et alia in te falsi accusatoris signa permulta : qui-
bus ego nunc non utor: hoc dico, te, si maxime⁹ cu-
pias, tamen verum accusatorem esse non posse. Video
enim permulta esse crimina, quorum tibi societas cum
Verre ejusmodi est, ut ea in accusando attingere non
audeas.

X. Queritur Sicilia tota, C. Verrem ab aratoribus¹,
quum frumentum sibi in cellam imperavisset, et quum

Servius ad *Æn.* II, 788. Non aliter
Lambinus edidit. J. V. L.

5. *Asportare.* Auferre ut dealeantur;
ne tibi furtorum Verris participi no-
cere possint.

6. *Firmum.* Qui neque gratia, ne-
que ulla re ab officio dimovetur. *Ver-
rum.* Qui nullum crimen sciens omittit.

7. *Retentum esse.* Nam anno secun-
do Cæcilius de provincia decesserat.

8. *Ornatissimum.* Veram laudationem
putant Ascon. Hotom. Ferrat. quippe
quum Cicero ostendat, si ulla esset
Verris in Cæcilium inimicitia, non
mansurum illum cum Verre, sed fra-
tris inimicitias persequuturum. Iro-
niam credit Manut. quod multum de

hac laudatione detrahat cum perditis-
simo homine Verre fuisse.

9. *Si maxime.* Etiam si sincere Ver-
rem accusare velles, tamen in multis
capitibus seu articulis eum persequi
non posse.

X. 1. *Aratoribus.* Siculis nimirum,
qui, pro modo agri quem colebant,
quatuor frumenti genera populo ro-
mano ex foedere pendebant; nempe
decumanum gratuitum; *æstimatum* in
prætoris *cellam*, i. e. ad ejus et fami-
liæ usum; *emptum* lege Terentia; et
in alteras decumas ex senatusconsulto.
Pro his tribus frumenti generibus pe-
cuniam accipiebant. Vide ad calcem
Verr. III, De re frumentaria.

esset tritici modius H-S² II, pro frumento³, in modios singulos, duodenos sestertios exegisse. Magnum crimen, ingens pecunia, furtum impudens, injuria non ferenda. Ego hoc uno crimine illum⁴ condemnem necesse est : tu, Cæcili, quid facies? Utrum hoc tantum crimen prætermittes, an objicies? Si objicies, idne alteri crimini dabis, quod eodem tempore, in eadem provincia, tu ipse fecisti? audebis ita accusare alterum, ut, quo minus tute condemnere, recusare non possis? Sin prætermittes, qualis erit ista tua accusatio, quæ, domestici periculi metu, certissimi et maximi criminis non modo suspicionem, verum etiam mentionem ipsam pertimescat? Emptum⁵ est ex S. C. frumentum ab Siculis, prætor Verre : pro quo frumento pecunia omnis soluta non est. Grave est hoc crimen in Verrem : grave, me agente; te accusante, nullum. Eras enim tu quæstor : pecuniam publicam tu tractabas⁶ : ex qua, etiamsi cuperet prætor, tamen, ne qua deductio⁷ fieret, magna ex parte tua potestas erat. Hujus quoque igitur criminis, te accusante, mentio nulla fiet. Silebitur toto judicio de maximis et notissimis illius furtis et injuriis. Mihi crede, Cæcili, non potest in accusando socios vere defendere is, qui cum reo criminum societate conjunctus est. Mancipes⁸ a civi-

2. Multæ edd. in his Victoriana, H-S V; cod. Franc. 1, sestert. XI. Recepit novam lect. Manutius; adhibuit. Verr. III, 81. J. V. L. — Sensus est : Quum duobus sestertiis (41 centes. $\frac{1}{2}$) ab aratoribus venderetur tritici modius, frumenti loco Verres pecuniam sibi dari jussit, ita ut pro singulis modis duodeni sestertii (2 fr. 46 centes.) penderentur.

3. Delevit Schütz *pro frumento*, de Ernestii sententiâ. J. V. L.

4. *Condemnem*. Efficiam ut a iudicibus condemnatur.

5. *Emptum*. Tenebantur Siculi vectigales pop. romano frumenti quantum vellet, certo pretio vendere.

6. *Tractabus*. Ad quæstores pertinebat ærarii et pecuniæ ratio.

7. *Deductio*. Deminutio, quæ a Verre facta est diversis nominibus, ut in Verr. III videre est.

8. *Mancipes*. Sunt publicanorum principes, qui certo pretio decumas a

tatibus pro frumento pecuniam exegerunt. Quid? hoc Verre prætore factum est solum? non; sed etiam quæstore Cæcilio. Quid igitur? daturus es huic crimini, quod et potulisti prohibere, ne fieret, et debuisti? an totum id relinques? Ergo id omnino Verres in iudicio suo non audiet, quod quum faciebat, quemadmodum defensurus esset, non reperiebat⁹.

XI. Atque ego hæc, quæ in medio posita sunt, commemoro. Sunt alia magis occulta furta; quæ ille, ut istius, credo, animos atque impetus retardaret, cum quæstore suo benignissime communicavit¹. Hæc tu scis ad me esse delata: quæ si velim proferre, facile omnes intelligent, vobis inter vos non modo voluntatem fuisse conjunctam, sed ne prædam quidem adhuc esse divisam. Quapropter si tibi indicium² postulas dari, quod tecum una fecerit, concedo, si id lege permittitur; sin autem de accusatione dicimus, concedas oportet iis³, qui nullo suo peccato impediuntur⁴, quo minus alterius peccata demonstrare possint. Ac vide, quantum interfuturum sit inter meam atque tuam accusationem. Ego etiam quæ tu sine Verre commisisti,

prætore redimebant. De his et toto hoc crimine vide plura Verr. III.

9. *Non reperiebat.* Quia manifestum erat crimen, et pariter peccaverant prætor et mancipēs.

XI. 1. *Communicavit.* Ironia est.

2. *Indicium.* Index dicitur is, qui facinus, cuius ipse est conscius, impunitate proposita, defert. Postulat indicium qui ultro se offert ad socios criminis deferendos. Non senatoria persona, inquit Asconius, potest indicium profiteri (unde falso, opinor, senatorem fuisse Cæciliū existimant Desjard. et Auger.), neque repetundarum causa per indices agi solet. Si

postulas, inquit Tullius, potestatem tibi indicandi fieri, quod Verres te socium criminum habuerit, ut nimirum impunitatem consequare, hoc enim tibi restat unum; tunc accusare non potes. Notanda inde illa *indicii et accusationis* oppositio, quam non animadvertit Ernest.

3. *Iis.* Vitat arrogantiam, in multos transferens, quod de se ipse loquitur.

4. *Impediuntur.* Qui nulla criminis cum reo societate ac conscientia impediti, nullo modo prohibentur, etc. Tangit Cæciliū, qui peccati socius, accusare non potest.

Verri crimini daturus sum, quod te non prohibuerit, quum summam ipse haberet potestatem: tu contra ne quæ ille quidem fecit objicies, ne qua ex parte conjunctus cum eo reperiare.

Quid illa, Cæcili? contemnendane tibi videntur esse, sine quibus causa sustineri, præsertim tanta⁵, nullo modo potest? aliqua facultas agendi? aliqua dicendi consuetudo? aliqua in foro, judiciis, legibus aut ratio, aut exercitatio? Intelligo, quam⁶ scopuloso difficilique in loco verser: nam quum omnis arrogantia odiosa est, tum illa ingenii atque eloquentiæ multo molestissima. Quamobrem nihil dico de meo ingenio: neque est, quod possim dicere; neque, si esset, dicerem: aut enim id mihi satius est, quod⁷ est de me opinionis, quidquid est; aut, si id parum est, ego majus⁸ id commemorando facere non possum.

XII. De te, Cæcili (jam mehercule hoc¹, extra hanc contentiouem certamenque nostrum, familiariter tecum loquar²), tu ipse quemadmodum existimes, vide etiam atque etiam; et tu te collige; et qui sis, et quid facere possis, considera. Putasne te posse de maximis acerbissimisque rebus³, quum causam sociorum, fortunasque provinciæ, jus populi romani, gravitatem judicii legumque susceperis, tot res, tam graves, tam varias, vocæ, memoria, consilio, ingenio, sustinere? Putasne te posse, quæ C. Verres in quæstura, quæ in

5. *Tanta*. In qua maxima et acerbissima crimina sunt explicanda.

6. Cod. Franc. 1, «quam scopuloso, quam difficili loco». J. V. L.

7. *Quod est*. Ea qualiscumque de me est apud vos opinio.

8. *Majus*. Hominum opinione.

XII. 1. Rectius forte abest *hoc* apud Rufinian. de Figuris, cap. 10. J. V. L.

2. *Loquar*. De te quid sit judicandum, dicam tibi libere et amice, monendi potius quam contendendi causa, et sublata omni comparisonem aut litigationem. Aliud irridendi genus, quo Cæcilium tamquam discipulum edocet.

3. *Rebus*. Subaud. *dicere*. Quum de accusatore constituendo ambigatur, qualis accusatio esse debeat, ostendit,

legatione, quæ in prætura, quæ Romæ, quæ in Italia⁴, quæ in Achaia, Asia, Pamphyliaque patrarit⁵, ea, quemadmodum locis temporibusque divisa sint, sic criminibus et oratione distinguere? Putasne posse, id quod in ejusmodi reo maxime necessarium est, facere, ut, quæ ille libidinose, quæ nefarie, quæ crudeliter fecerit, ea æque acerba et indigna videantur esse iis, qui audient, atque illis visa sunt, qui senserunt? Magna sunt ea, quæ dico, mihi crede⁶: noli hæc contemnere. Dicenda, demonstranda, explicanda sunt omnia; causa non solum exponenda, sed etiam graviter copioseque agenda est; perficiendum est, si quid agere aut perficere⁷ vis, ut homines te non solum audiant, verum etiam libenter studioseque audiant. In quo si te multum natura adjuvaret; si optimis a pueritia disciplinis atque artibus studuisses, et in his elaborasses; si literas⁸ græcas Athenis, non Lilybæi, latinas Romæ, non in Sicilia, didicisses; tamen esset magnum, tantam causam, tam expectatam, et diligentia consequi, et memoria complecti, et oratione exponere⁹, et voce et viribus sustinere. Fortasse dices: Quid? ergo hæc in te sunt omnia? Utinam quidem essent! verumtamen ut esse possent, magno studio mihi a pueritia

ut proinde ac dicit, videatur acturus. Ascon.

4. *In Italia.* Quum esset prætor urbanus; is enim ad usque centesimum lapidem jus dicebat.

5. In multis codd. *pœccarit*, quod defendit Garat.

6. *Mihi crede.* Hæc tamquam impedito dicit, quibus et auctoritas loquentis et contemptus ostenditur audientis, ut animadvertit Donat. ad Terentii Adelph. I, 11, 21.

7. *Proficere.* Ex cod. Cuj. Lamb.

8. *Literas.* Sermone utebantur Siculi, neque plane græco, neque plane latino, sed qui ex utroque esset mixtus; quod e Ciccone et Asconio intelligi potest. Hinc Plaut. in Persa, «dabuntur dotis inde sexcenti tibi Logi, atque Attici omnes: nullum Siculum acceperis», et in Menechm. Prol. 12, fingit verbum *sicelissitare*, quod etiam abiit in proverbium in eos, qui Siculorum more, vitiose loquerentur.

9. Alii, *expromere.* J. V. L.

est elaboratum¹⁰. Quod si ego hæc, propter magnitudinem rerum ac difficultatem, assequi non potui, qui in omni vita nihil aliud egi: quam longe tu te ab his rebus abesse arbitrare, quas non modo antea nunquam cogitasti, sed ne nunc quidem, quum in eas ingrederis, quæ et quantæ sint, suspicari potes?

XIII. Ego, qui, sicut omnes sciunt, in foro iudiciisque ita versem¹, ut ejusdem ætatis aut nemo, aut pauci, plures causas defenderint; et qui omne tempus, quod mihi ab amicorum negotiis datur, in his studiis laboribusque consumam, quo paratior ad usum forensem, promptiorque esse possim: tamen, ita deos mihi velim propitios, ut quum illius temporis² mihi venit in mentem, quo die, citato reo, mihi dicendum sit, non solum commoveor animo, sed etiam toto corpore perhorresco³. Jam nunc mente et cogitatione prospicio, quæ tum studia hominum, qui concursus futuri sint; quantam expectationem magnitudo iudicii sit allatura; quantam auditorum multitudinem C. Verris infamia concitatura⁴; quantam denique audientiam orationi meæ improbitas illius factura⁵. Quæ quum cogito, jam nunc timeo, quidnam pro offensione hominum, qui illi inimici infensique sunt, et expectatione omnium, et magnitudine rerum dignum eloqui possim. Tu horum nihil metuis, nihil cogitas,

10. *Elaboratum*. Quantum autem elaborarit, ostendit in libro de clar. Orat. extremo.

XIII. 1. Alii codd. *versor*. J. V. L.

2. *Temporis*. Sic MSS multi et Priscian. lib. XVII, p. 1202, ed. Putsch. *Illius diei* dedit Manutius ex Asconio, quem sequuntur Desjard. Sch. etc. Nempe quod in Epp. ad Att. II, 12, « dies nullus erat quo die, etc. » Cur in tanto grammaticorum MStorumque

consensu quidquam mutemus non video. Ceterum in illis verbis abest verbum *recordatio*.

3. *Perhorresco*. De hoc Ciceronis metu vid. Cluent. 18; de Orat. I, 26. Plut. Cic. vit. Quintil. XII, 5.

4. *Concitur* legendum existimabat Gronovius pater ad Liv. XXXVIII, 33. Quamvis Tullianum esse *concitatura* sateretur.

5. *Factura sit* in ed. Ven.

nihil laboras; et si quid ex vetere⁶ aliqua oratione, JOVEM EGO OPTIMUM MAXIMUM, aut, VELLEM, SI FIERI POTUISSET, JUDICES, aut aliquid ejusmodi ediscere potueris, præclare te paratum in judicium venturum arbitraris.

Ac, si tibi nemo responsurus esset, tamen ipsam causam, ut ego arbitror, demonstrare non posses. Nunc ne illud quidem cogitas, tibi cum homine disertissimo, et ad dicendum paratissimo, futurum esse certamen; quicum modo disserendum⁷, modo omni ratione pugnandum certandumque sit. Cujus ego ingenium ita laudo, ut non pertimescam; ita probō, ut me ab eo delectari facilius, quam decipi putem posse.

XIV. Numquam ille me opprimet¹ consilio; numquam ullo artificio pervertet; numquam ingenio me suo labefactare atque infirmare conabitur²: novi omnes hominis petitiones rationesque dicendi; sæpe in iisdem, sæpe in contrariis causis versati sumus. Ita contra me ille dicet, quamvis sit ingeniosus, ut nonnullum³ etiam de suo ingenio judicium fieri arbitretur. Te vero, Cæcili, quemadmodum sit elusurus, quam

6. *Ex vetere.* Quales Catonis Censorii orationes, qui solebat in omnibus procæmiis deorum mentionem facere. Cf. Serv. ad Æn. VII, 259. Festive Cæcilium irridet, quem causidicorum imperitorum more, translatitio exordio usurum esse ait, et exorsurum vel ab alicujus numinis invocatione, vel a superiorum temporum reprehensione.

7. *Disserendum.* Disserere est argumentari, rem subtiliter explicare. *Pugnare* est vim et copiam orationis exercere.

XIV. 1. *Opprimet.* Numquam me solertia sua impugnet. Nota hoc in

capite allegoriam a gladiatoribus translatam.

2. *Conabitur.* Non me eloquentiæ viribus obruere tentabit, quod tecum faceret.

3. *Nonnullum.* Ut me de illius ingenio judicare posse sentiat. Non tanta dicit confidentia, ut putet sibi cum homine imperito, et qui de illius ingenio judicare non possit, esse negotium. Sic Desjard. Interpretatur vero Manut. ut de suo ingenio judicaturum populum arbitretur; ut certamen metuat cujus erit judex populus. Prior sensus mihi magis cum antecedd. et seqq. verbis congruere videtur.

omni ratione jactaturus, videre jam videor; quoties ille tibi potestatem optionemque facturus sit, ut eligas utrum velis; factum esse, necne; verum esse, an falsum; utrum dixeris⁴, id contra te futurum. Qui tibi æstus, qui error⁵, quæ tenebræ, dii immortales! erunt, homini minime malo? Quid? quum accusationis tuæ membra dividere⁶ cœperit, et in digitis suis singulas partes causæ constituere? quid? quum unumquodque transigere⁷, expedire, absolvere? ipse profecto metuere incipies⁸, ne innocenti periculum facesseris. Quid? quum commiserari, conqueri, et ex illius invidia deonerare aliquid, et in te trajicere cœperit? commemorare quæstoris cum prætore necessitudinem constitutam? morem majorum⁹? sortis religionem¹⁰? poterisne ejus orationis subire invidiam? Vide modo; etiam atque etiam considera: mihi enim videtur periculum fore, ne ille non modo verbis te obruat, sed gestu ipso ac motu corporis præstringat¹¹ aciem ingenii tui, teque ab institutis tuis cogitationibusque abducat. Atque hujusce rei judicium jam continuo

4. *Utrum dixeris.* Sive factum affirmaveris, sive negaveris.

5. Cod. Franc. 1, *qui furor.* Sed error magis convenit homini minime malo. J. V. L. — Significat h. l. gall. *étourdisement*; quod convenit sicut et tenebræ, iis quorum plaga aliqua gravi caput est afflictum; aut qui metu subito sunt percussi. Vid. Ovid. Met. II, 181.

6. *Dividere.* Ita insequitur Cæcilius, ut irrideat etiam Hortensium, ut sæpe alias. Vid. pro Quint. c. 10. Brut. c. 88.

7. *Transigere.* Quæ manifesta sunt, extra controversiam ponere. — *Expedire.* Ambigua definitionibus explicare.

— *Absolvere.* Explicata colligere et concludere.

8. *Metuere incipies.* Mira patroni imperiti descriptio, cui persuaderi possit, vera esse ea omnia quæ adversarius affert.

9. Gronovio placet, « constitutam more majorum? » Non ita Garatonio. J. V. L.

10. *Religionem.* Religionis vincula quæ te cum prætore, qui tibi sorte in eadem provincia regenda obtigit, constringunt. *Sors* sæpe idem est ac provincia, quia plerumque solebant provincias sortiri. Vide inf. cap. 19, n. 4.

11. *Præstringat.* Obtenebret. Frustra Lamb. corr. *præstringuat.*

video futurum. Si enim mihi hodie respondere ad hæc, quæ dico, potueris; si ab isto libro, quem tibi magister ludi¹², nescio qui, ex alienis orationibus compositum dedit, verbo uno discesseris; posse te et illi quoque iudicio non deesse, et causæ atque officio tuo satisfacere arbitror: sin mecum, in hac prolu- sione, nihil fueris; quem te in ipsa pugna, cum acer- rimo adversario, fore putemus?

XV. Esto: ipse nihil est, nihil potest; at venit pa- ratus cum subscriptoribus¹ exercitatis et disertis. Est tamen hoc aliquid: tametsi non est satis. Omnibus enim rebus is, qui princeps in agendo est, ornatissi- mus et paratissimus esse debet. Verumtamen L. Apu- leium esse video proximum² subscriptorem, hominem non ætate, sed usu forensi atque exercitatione tiro- nem. Deinde, ut opinor, habet Allienum, hunc tamen a subselliis³: qui, quid in dicendo posset, numquam satis attendi; in clamando quidem video eum esse bene robustum atque exercitatum. In hoc spes tuæ sunt omnes; hic, si tu eris actor constitutus, totum judi-

12. *Magister ludi*. Is qui præest ludo literario sen scholæ. *Ludus* fre- quentissime accipitur pro ipso loco, in quo aut vires corporis, aut ingenii acumen exercetur. Hinc ludus litera- rius, ludus gladiatorius.

XV. 1. *Subscriptoribus*. Hi scilicet erant qui secundas, tertias criminis accusandi partes agebant; sic dicti, quod nomen suum accusatoris nomini apud prætorem subcribebant. Itaque quasi secundi in agenda causa erant, qui hoc ipso testabantur se accusato- rem primarium et probare et tueri. Sæpius autem *custodes* ex lege appo- nebantur, qui, qua ratione instrueren- tur accusatio, observarent. Illi non so- lum adjuvandi, sed etiam custodiendi

accusatoris causa erant lege adhibiti, ne corruptus ille prævaricaretur. Vid. inf. cap. 16, et pro Cluent. cap. 70.

2. *Proximum*. Qui primus post Cæ- cilium accusatorem, surget ad dicen- dum.

3. *A subselliis*, i. e. saltem in ju- diciis exercitatum, qui subsellis foren- sia diu trivit. Quo in loco errat Asco- nius. Totius loci sensus est: Quis accusabit? Q. Cæcilius. At numquam in causis est versatus. L. Apuleius? At, quamvis senex, in usu forensi novitius est. Allienus igitur? Tandem unum aliquem nominastis, qui in ju- diciis sit versatus; sed tamen ita ver- satus, ut *clamator* potius quam *decla- mator*, dici possit.

cium sustinebit. At⁴ ne is quidem tantum contendet in dicendo, quantum potest : sed consulat laudi et existimationi tuæ ; et ex eo, quod ipse potest in dicendo, aliquantum remittet, ut tu tamen aliquid esse videare. Ut in actoribus Græcis⁵ fieri videmus ; sæpe illum, qui est secundarum aut tertiarum partium, quum possit aliquanto clarius dicere, quam ipse primarum⁶, multum summittere⁷, ut ille princeps quam maxime excellat : sic faciet Allienus ; tibi serviet, tibi lenocinabitur ; minus aliquanto contendet, quam potest. Jam hoc considerate, cujusmodi accusatores in tanto iudicio simus habituri : quum et ipse Allienus ex ea facultate, si quam habet, aliquantum detractus sit ; et Cæcilius tum denique se aliquid futurum putet, si Allienus minus vehemens fuerit, et sibi primas in dicendo partes concesserit. Quartum⁸ quem sit habiturus, non video, nisi quem forte ex illo grege moratorum⁹, qui subscriptionem sibi postularunt, cui-cumque¹⁰ vos delationem dedissetis. Ex quibus alie-

4. *Ac ne*. Ald. Oliv. Lalleu. Ox.

5. *Græcis*. Valkenarius in diatr. in Eurip. Fragm. p. 182, legi vult *tragicis*. Vulgatum enim *Græcis* nihil facere ad rem. Sed refragantur et MSS et edd. omnes, et ipse Cicero, qui pro Flacc. cap. 27 memorat in comædiis græcis servos primarum partium. Hoc autem loco de histrionibus loquitur qui fabulas agunt palliatis, i. e. quarum argumentum græcum est ; quales Plauti Terentique fabulæ.

6. *Ipse primarum*. Quam ille ipse qui primas partes agit.

7. *Summittere*. Subaud. *vocem aut gestum*.

8. *Quartum*. Mendosum locum suspicatur Desjard. quod duos tantum nominavit orator, L. Apuleium et Al-

lienum : neque ei placet quod ait Asconius : quartum scilicet istum esse ab accusatore. Dicit autem simplicius potest ductam esse ab histrionibus, ut supra, metaphoram : Cæcilio secundas partes agere Apuleium ; tertias Allienum ; nunc ergo de quartis agi. Sic nos genuina locutione dicimus : *prendre pour second, pour troisième*, etc.

9. *Moratorum*. Obturbatores, sordidosque causidicos significat, qui adhibebantur ad moram faciendam, dum meliores advocati recrearentur, et se denuo compararent ad dicendum. Sic optime Asconius. Olim legebatur *oratorum*. Pessimo mendo.

10. *Cuicumque*. Sive mihi, sive Cæcilio.

nissimis¹¹ hominibus, ita paratus venis, ut tibi hospes aliquis sit recipiendus. Quibus ego non sum tantum honorem habiturus, ut ad ea, quæ dixerint, certo loco, aut singulatim unicuique respondeam: sic breviter, quoniam non consulto, sed casu in eorum mentionem incidi, quasi præteriens satisfaciam universis.

XVI. Tantane vobis inopia videor esse amicorum, ut mihi non ex his, quos mecum adduxerim, sed de populo subscriptor addatur? vobis autem tanta inopia reorum est, ut mihi causam præripere conemini potius, quam aliquos a columna Mænia¹, vestri ordinis reos, reperiatis? Custodem², inquit, Tullio me apponite. Quid? mihi quam multis custodibus opus erit, si te semel ad meas capsas³ admisero? qui non solum, ne quid enunties, sed etiam ne quid auferas, custodiendus sis. Sed de isto custode toto sic vobis bre-

11. *Alienissimis.* A tribunali et a foro. Qui nihilo magis sunt in causis versati, quam hospes et peregrinus, qui forum numquam viderit. Ita imparatus venia, inquit Tullius, ut nulum subscriptorem habeas ex iis patronis, qui solent in tribunalibus causas agere, sed qui hospites in iis sunt, inquit, quippe qui imi subsellii homines. Sic Ascon. et Græv. Manutius autem putat *alienissimos* opponi amicis ex quibus subscriptores delecturum se ait Cicero, non vero de populo quemvis recepturum, quod utique facturus erat Cæcilius. Ex his alienissimis, inquit, hominem aliquem ad intimam domum admittes, ut hospitem; amicum et familiarem de alienissimo repente habebis; tam bene paratus venis. Sic simplicius Manut. et Garat. atque, ut puto, verius.

XVI. 1. *Columna Mænia.* Mænius quum domum suam venderet Catoni

et Flacco censoribus (A. U. C. 569), ut ibi basilica ædificaretur, exceperat sibi jus unius columnæ, super quam tectum projiceret ex provolantibus tabulatis, unde ipse et posteri ejus, spectare munus gladiatorium possent, quod etiam tum in foro dabatur. Ad hanc autem columnam triumviri capitales infimorum hominum, ut furum, et servorum nequam, crimina cognoscebant, sumique de damnatis supplicium jubebant. Vide Horat. Epod. 4, 11.

2. *Custodem.* Hic unum ex istis caudiciis loquentem inducit, et petentem ut Ciceroni subscriptor ac custos apponatur. Male hæc ad Cæcilium refert Ferratius, quum paullo post, ejecto illo et infamia notato moratorum grege, ad Cæcilium se redire declaret.

3. *Capsas.* In quibus literas et testimonia ex Sicilia deportata, recondita habebo, si ad me accusatio defertur.

vissime respondebo : non esse hos tales viros⁴ commissuros, ut ad causam tantam, a me susceptam, mihi creditam, quisquam subscriptor, me invito, adspirare possit. Etenim fides mea custodem repudiat, diligentia speculatorem reformidat.

Verum, ut ad te, Cæcili, redeam, quam multa te deficiant, vides : quam multa sint in te, quæ reus nocens in accusatore suo cupiat esse, profecto jam intelligis. Quid ad hæc dici potest? non enim quæro, quid tu dicturus sis : video mihi non te, sed hunc librum⁵ esse responsurum, quem monitor tuus hic tenet ; qui, si te recte monere volet, suadebit tibi, ut hinc discedas, neque mihi verbum ullum respondeas. Quid enim dices? an id, quod dictitas, injuriam tibi fecisse Verrem? Arbitror : neque enim esset verisimile, quum omnibus Siculis faceret injurias, te⁶ illi unum eximium, cui consuleret, fuisse. Sed ceteri Siculi ultorem suarum injuriarum invenerunt : tu, dum tuas injurias per te, id quod non potes, persequi conaris, id agis, ut ceterorum quoque injuriæ sint impunitæ atque inultæ : et hoc te præterit, non id solum spectari solere, qui debeat, sed etiam illud, qui possit ulcisci ; in quo utrumque sit, eum superiorem esse⁷ ; in quo alterum⁸, in eo non, quid is velit, sed quid facere possit, quæri solere. Quod si⁹ ei po-

4. *Tales viros.* Judices nostræ contentionis. Scilicet patroni subscriptores offerebant, a iudicibus plerumque admissos ; sed invito patrono numquam subscriptores dabantur, nisi custodiæ causa, quum de ejus fide esset suspicio.

5. *Hunc librum.* Vid. sup. cap. 14 : « si ab isto libro, quem, etc. »

6. *Te illi.* Te, qui Siculus eras, ita

ei visum eximium ut tibi parceret : non eodem te loco habuisse, quo reliquos omnes Siculos, te solum excepisse.

7. *Superiorem esse.* Præferri oportere.

8. *Alterum.* Secundum.

9. *Quod si.* Argumentum ipsum in Q. Cæcilium retorquet : dicis ad injuria affectos accusationem pertinere.

tissimum censes permitti oportere accusandi potestatem, cui maximam C. Verres injuriam fecerit; utrum tandem censes hoc iudices gravius ferre oportere, te ab illo esse læsum; an provinciam Siciliam esse vexatam ac perditam? Opinor, concedis, multo hoc et esse gravius, et ab omnibus ferri gravius ¹⁰ oportere. Concede igitur, ut tibi anteponatur in accusando provincia: nam provincia accusat, quum is agit causam, quem sibi illa defensorem sui juris, ultorem injuriarum, actorem causæ totius adoptavit.

XVII. At eam ¹ tibi C. Verres fecit injuriam, quæ ceterorum quoque animos posset alieno ² incommodo commovere. Minime: nam id quoque ad rem pertinere ³ arbitror, qualis injuria dicatur; quæ causa inimicitiarum proferatur. Cognoscite ex me: nam iste eam profecto, nisi plane nihil sapit, numquam proferet. Agonis est quædam, Lilybætana, liberta ⁴ Veneris Erycinæ: quæ mulier, ante hunc quæstorem, copiosa

Provincia autem maximis est afflictata injuriis; est igitur præponenda.

10. *Ferri gravius.* Graviore et atrociores existimari injurias.

XVII. 1. *At eam.* At diols, Cæcili, non esse privatam injuriam, qua a Verre affectus sis, sed publicam et ad omnes pertinentem, quod magistratui populi rom. sit facta.

2. *Alieno incommodo.* Ob alienam calamitatem.

3. *Pertinere.* Subaud. ut vos cognoscatis.

4. *Liberta Veneris.* Quum præcipuum aliquod numen civitas quæque coleret, Siculi peculiarem cultum Veneri tribuebant, cujus pulcherrimum templum in Erycini montis vertice totius provinciæ frequentia colebatur. Porro diis multi se suosque liberos

mancipabant, et inde sanorum servi (græce ἀπόδουλοι), aut etiam addito numinis cognomento dicebantur; ut a Venere *Veneri*; et in Italia, Martis erant publici quidam ministri, *Larini Martiales* nomine. Vid. pro Cluent. 15. Ita non erant servi conditione, sed liberi homines, qui aut ipsi se suæque servituti alicujus numinis addixerant, religionis causa, aut hanc servitutem a parentibus acceperant, aut ab iis quorum fuerant heredes. Hi quum sumptum præstarent ad sacrorum functionem, non leve sustinebant onus. Quod quum pecunia redemissent, dicebantur *liberti* et *libertæ* illius dei, cujus fuerant servi. Sic in inscriptionibus commemoratur «libertus virginum Vestalium C. Sextilius», et «libertus numinis Æsculapii Hermes,

plane et locuples fuit. Ab hac præfectus Antonii⁵ quidam symphoniacos servos abducebat per injuriam, quibus se in classe uti velle⁶ dicebat. Tum illa, ut mos in Sicilia est omnium Venereorum, et eorum, qui a Veneris se liberaverunt, ut præfecto illi religionem Veneris nomenque objiceret, dixit et se et omnia sua Veneris esse. Ubi hoc quæstori Cæcilio⁷, viro optimo et homini æquissimo, nuntiatum est; vocari ad se Agonidem jubet: judicium dat⁸ statim, si pareret⁹, eam, se et sua Veneris esse, dixisse: judicant recuperatores¹⁰ id, quod necesse erat; neque enim erat cuiquam dubium, quin illa dixisset. Iste in possessionem bonorum mulieris mittit; ipsam Veneri in servitutem adjudicat; deinde bona vendit; pecuniam redigit. Ita, dum pauca mancipia, Veneris nomine, Agonis, ac religione, retinere vult, fortunas omnes libertatemque suam istius injuria perdidit. Lilybæum Verres venit postea; rem

etc. « Horum non absimiles fuere qui « monasteriis et ecclesiis ita sese offerebant, donabant, ac mancipabant, ut ipsi pro servis Ecclesiæ deinceps haberentur ». Vide *Du Cange* Glossar. III, pag. 1287; IV, pag. 299 et 1282 sqq. ac Lipsium in *Lovan.* II, 4. Jam vero non sine ritualibus cærimoniis fano consecrabantur hieroduli; neque enim fas fuisset ut quivis ad arbitrium religioni se obtruderet; et ut perpetuum devotionis signum præ se ferrent, numini suo per notas inustas consecrabantur. Vide *Lucian.* de dea Syria. *Philon.* de Monar. *Spanheim.* de Numism. Dissert. III.

5. *Antonii.* Antonius M. Antonii oratoris filius, triumvir pater, « homo perdundæ pecuniæ genitus », inquit *Sallust.* Hist. III, 15. Curationem natæ anno 679 tuendæ totius oræ ma-

ritimæ, Siciliam et provincias ipse ac per comites late depopulatus est. Vid. *Verr.* II, 3.

6. *Uti velle.* Ut vel modulis et cantibus remiges excitarent; vel ut pugnantibus classicum canerent.

7. *Anton.* Augustinus, teste *Ursino*, maluit, « Ubi hoc Q. Cæciliæ ». *J. V. L.*

8. *Judicium dat.* Judices constituit certa verborum formula, si appareret, etc. Notabis quæstorem non potuisse dare judicium in provincia, nisi prætor hanc ei potestatem fecisset.

9. Falso olim, *si pateret.* Correxerunt *Lambin.* et *Manutius.* *J. V. L.* — Post formulam h. l. subintelligitur *condemnato.*

10. *Recuperatores.* Gall. *des commissaires.* A recuperando dictos appareret, quod per eos suum jus privati

cognoscit; factum improbat; cogit quæstorem suum, pecuniã, quam ex Agonidis bonis redeget, eam mulieri omnem annumerare et reddere. Est adhuc, id quod vos omnes admirari video, non Verres, sed Q. Mucius¹¹. Quid enim facere potuit elegantius ad hominum existimationem? æquius ad levandam mulieris calamitatem? vehementius ad quæstoris libidinem coercendam? Summe hæc omnia mihi videntur esse laudanda. Sed repente e vestigio, ex homine, tamquam aliquo Circæo poculo¹², factus est Verres; redit ad se atque ad mores suos: nam ex illa pecunia magnam partem ad se vertit¹³; mulieri reddidit quantum visum est.

XVIII. Hic tu, si læsum¹ te a Verre esse dices; patiar et concedam: si injuriam tibi factam quereris; defendam et negabo. Deinde de injuria, quæ tibi facta sit², neminem nostrum graviorem vindicem esse oportet, quam te ipsum, cui facta dicitur. Si tu cum illo postea in gratiam redisti; si domi illius aliquoties fuisti³; si ille apud te postea cœnavit, utrum te perfidiosum⁴, an prævaricatorem existimari mavis? Video esse ne-

homines recuperarent. In privatis autem judiciis, arbitrato prætoris aut judex dabatur unus, qui de facto cognosceret; aut recuperatores tres.

11. Q. Mucius. Alter Q. Mucius Scævola, qui Asiã ita abstinenter administravit, ut virtutis ac modestiæ exemplum proponeretur.

12. Circæo poculo. Nota fabula Circes, quæ medicatis potionibus Ulyssis socios in sues mutavit. Odyss. X. Ludit in ambiguum Verres nomen, qui et suem non exsectum, et hominem significat. Rufinianus legit « tamquam epoto Circæo », quod recepit Schütz addito poculo.

13. Lambin. Fr. Fabrit. mallent averrit, propter agnominationem. Gruter. verriit.

XVIII. 1. Si læsum. Si tibi damnum et incommodum allatum dices a Verre; concedam: sed si injuste ab eo actum dices, negabo.

2. Facta sit. Quam factam esse dicit.

3. Vulgo abest fuisti. J. V. L.

4. Perfidiosum. Si eum vehementer accusas, cum quo redisti in gratiam; prævaricatorem, si, quia amicus est, remisse et leniter eum persequeris. Illud ad C. Verrem, hoc ad Siculos refertur.

cesse alterutrum : sed ego tecum in eo non pugnabo, quo minus, utrum velis, eligas. Quid, si ⁵ ne injuriæ quidem, quæ tibi ab illo facta sit, causa remanet? quid habes, quod possis dicere, quamobrem non modo mihi, sed cuiquam antepone? nisi forte illud, quod dicturum te esse audio, quæstorem illius fuisse. Quæ causa gravis esset, si certares mecum, uter nostrum illi amicior esse deberet : in contentione suscipiendarum inimicitiarum, ridiculum est putare, causam necessitudinis ad inferendum periculum justam videri oportere. Etenim, si plurimas a tuo prætore injurias accepisses; tamen eas ferendo, majorem laudem, quam ulciscendo, mererere : quum vero nullum illius in vita rectius factum sit, quam id, quod tu injuriam appellas; hi statuent, hanc causam, quam ne in alio quidem probarent, in te justam ad necessitudinem violandam videri? qui, si summam injuriam ab illo accepisti, tamen, quoniam quæstor ejus fuisti, non potes eum sine ulla vituperatione accusare; si vero nulla tibi facta est injuria, sine scelere eum accusare non potes. Quare quum incertum sit de injuria, quemquam esse horum putas, qui non malit, te sine vituperatione⁶, quam cum scelere discedere?

XIX. Ac vide ¹, quid differat inter meam opinionem ac tuam. Tu, quum omnibus rebus inferior sis, hac una in re te ² mihi anteferri putas oportere, quod quæ-

5. *Quid si.* Quid erit, si ista pecunia tibi adempta, postea a Verre tibi reddita est. Quod si Verres eam pecuniam ad te rursus transtulit, injuriæ causa non remanet. Satis habet orator judices conicere de pecunia Cæcilio data, aut non data.

6. *Sine vituperatione.* Si non accusas prætorem tuum, vituperatio nulla

est; si accusas, quum ejus in te injuria sit incerta, homines scelus a te committi arbitrabuntur.

XIX. 1. *Vulg. At vide.* Sed quæ sequuntur non opponuntur antecedentibus. Meliorem ergo lectionem, jam a Lambino præsumptam, dedit Lall. e MSS regis, et post eum Beck.

2. *Te e* codd. restituit Græv.

stor illius fueris : ego , si superior ceteris rebus esses , hanc unam ob causam te accusatorem repudiari putarem oportere. Sic enim a maioribus³ nostris accepimus , prætorem quæstori suo parentis loco esse oportere ; nullam neque justio rem , neque gravio rem causam necessitudinis posse reperiri , quam conjunctionem sortis⁴ , quam provinciæ , quam officii , quam publicam⁵ muneris societatem. Quamobrem si jure eum posses⁶ accusare , tamen , quum is tibi parentis numero fuisset , id pie facere non posses⁷ : quum vero neque injuriam acceperis , et prætori tuo periculum crees ; fatearis necesse est , te illi injustum impiumque bellum inferre conari. Etenim ista quæstura⁸ ad eam rem valet , ut elaborandum tibi in ratione reddenda sit , quamobrem , qui quæstor ejus fueris⁹ , accuses ; non , ut ob eam ipsam causam postulandum sit , ut tibi potissimum accusatio detur. Neque fere umquam

3. *A maioribus.* Sic ep. ad M. Brutum 13 , « Quum ad te tuus quæstor M. Varro proficisceretur , commendatione egere eum non putavi ; satis enim commendatum eum arbitrabar ab ipso more majorum ; qui , ut te non fugit , hanc quæsturæ conjunctionem liberorum necessitudini proximam voluit esse ».

4. *Conjunctionem sortis.* Quum enim consules et prætores provincias et ex S. C. quæstores sortirentur ; divinitus eam muneris officiique publici societatem accidisse putabant. Inde supra « religionem sortis » dicit Cicero. Ut autem observavit Gronov. ad Tacit. Annal. III , 32 , *sors* sæpius est provincia sorte alicui assignata. Sed h. l. malim illi divinæ cujusdam sortis sensum attribuere , quum postea de provinciæ societate loquatur Cicero.

5. *Publicam.* Hotom. et Lambin. mallent *publici*. Temere. Publica enim societas , ea est quæ publice , i. e. ex sententia et voluntate senatus ac populi rom. est inita. Erant autem et societates privatarum , quæ non publico nomine coierant , ut in orat. pro Quint. vidimus.

6. *Alii , possis.* J. V. L.

7. *Non posses.* Sic pro Cluentio , « Facile intelligo non modo reticere homines parentum injurias , sed etiam æquo animo ferre oportere ».

8. *Ista quæstura.* Propter istud quæstoris nomen tibi reddenda ratio est , cur eum accusare audeas , cujus fuisti quæstor ; nedum titulus ille te in tua postulatione adjuvare possit.

9. *Ascon. habet « eum cui quæstor fueris ».* Receperunt Hotom. et Lamb. Probat Schütz.

venit in contentionem de accusando, qui quæstor fuisset, quin repudiaretur. Itaque neque L. Philoni ¹⁰ in C. Servilium nominis deferendi potestas est data, neque M. Aurelio Scauro in L. Flaccum, neque Cn. Pompeio ¹¹ in T. Albucium : quorum nemo propter indignitatem repudiatus est; sed ne libido violandæ necessitudinis auctoritate iudicum comprobaretur. Atque ille Cn. Pompeius ita cum C. Julio ¹² contendit, ut tu mecum. Quæstor enim Albucii fuerat, ut tu Ver-
ris. Julius hoc secum auctoritatis ad accusandum af-
ferebat, quod, ut hoc tempore nos ab Siculis, sic tum ille ab Sardis rogatus, ad causam accesserat. Semper hæc causa plurimum valuit; semper hæc ratio accu-
sandi fuit honestissima, pro sociis, pro salute pro-
vinciæ, pro exterarum nationum commodis inimicitias suscipere, ad periculum accedere, operam, studium, laborem interponere.

XX. Etenim si probabilis est eorum causa, qui in-
jurias suas persequi volunt; qua in re dolori suo, non reipublicæ commodis serviunt; quanto illa causa ho-
nestior, quæ non solum probabilis videri, sed etiam grata esse debet, nulla privatim accepta injuria, so-
ciorum atque amicorum populi romani dolore atque injuriis commoveri? Nuper quum in P. Gabinium¹ vir fortissimus et innocentissimus, L. Piso delationem nominis postularet, et contra Q. Cæcilius² peteret,

10. *L. Philoni*. Omnia exempla sunt quæstorum, quibus suos prætores accusare non est permissum. Vid. Ind. Histor.

11. *Cn. Pompeio*. Straboni. Pompeii Magni pater fuit.

12. *C. Julio*. Cæsare oratore, qui lepore et facetiis excelluit. Alius fuit ac dictator. Vid. de Orat. II, 58, et

maxime de Offic. II, 14, ubi de hac re disputatur. Qua morte fuerit sublatus narratur de Orat. III, 3.

XX. 1. *P. Gabin.* Prætor fuit anno 665. Inde Achaia foede administrata, ab Achæis repetundarum est postu-
latus.

2. *Q. Cæcilius*. Metellus, Numidicus.

isque se veteres inimicitias jam diu susceptas persequi diceret : quum auctoritas et dignitas Pisonis valebat plurimum , tum illa erat causa justissima , quod eum sibi Achæi patronum adoptarant. Etenim quum lex ipsa de pecuniis repetundis sociorum atque amicorum populi romani patrona³ sit ; iniquum est, non eum legis iudicii⁴que actorem⁴ idoneum maxime putari, quem actorem causæ suæ socii, defensoremque fortunarum suarum potissimum esse voluerunt. An, quod ad commemorandum est honestius, id ad probandum non multo videri debet æquius? Utra igitur est splendidior, utra illustrior commemoratio : « Accusavi eum, « cui⁵ quæstor fueram, quicum me sors, consuetudoque majorum, quicum me deorum⁶ hominumque « iudicium conjunxerat ; » an « Accusavi rogatu sociorum atque amicorum ; delectus sum ab universa « provincia, qui ejus jura fortunasque defenderem? » Dubitare quisquam potest, quin honestius sit, eorum causa, apud quos quæstor fueris, quam eum, cujus quæstor fueris, accusare? Clarissimi viri nostræ civitatis, temporibus optimis, hoc sibi amplissimum pulcherrimumque ducebant, ab hospitibus clientibusque suis, ab exteris nationibus, quæ in amicitiam populi romani ditionemque essent⁷, injurias propulsare, eorumque fortunas defendere. M. Catonem⁸ illum sa-

3. Vulgo *causa parata sit*. Ernest. *patrona* e cod. Guelf. restituit, collat. etiam Orat. II, 48. J. V. L.

4. *Actorem*. Qui susceptam legis et iudicii causam defendit.

5. In MS Ursin. *cuicum* ; unde alii *quicum*, ut paullo infra.

6. *Deorum*. Qui sorti præsent. — *Hominum*. Populi romani, qui provincias decernit.

7. Cod. Ursin. *venissent*. Rectius

forte Gœrenz. ad Cic. Academ. II, 4, conj. *issent*. J. V. L. — Non semel tamen occurrit apud veteres *in* cum accusativo, quamvis quietem significet. Vid. Sanct. Minerv. Sciopp. Parad. Voss. Aristarch. de Construct. 65.

8. *M. Catonem*. Ille Serg. Galbam et P. Furium Lusitanorum nomine accusavit. Celeberrimus est ejus consulatus, bellum Hispanicum, et triumphus. Consul Hispaniam sortitus est,

pientem, clarissimum virum et prudentissimum, cum multis graves inimicitias gessisse accepimus propter Hispanorum, apud quos consul fuerat, injurias. Nuper⁹ Cn. Domitium scimus M. Silano diem dixisse propter unius hominis, Egritomari, paterni amici atque hospitis, injurias.

XXI. Neque¹ enim magis animos hominum nocentium res umquam ulla commovit, quam hæc majorum consuetudo², longo intervallo repetita ac relata: sociorum querimoniarum delatarum ad hominem non inertissimum; susceptarum ab eo, qui videbatur eorum fortunas fide diligentiaque sua posse defendere. Hoc timent homines³; hoc laborant; hoc institui, atque adeo institutum referri ac renovari, moleste ferunt: putant fore, uti, si paullatim hæc consuetudo serpere ac prodire cœperit, per homines honestissimos virosque fortissimos, non imperitos adolescentulos, aut illiusmodi quadruplatores, leges judiciorumque administrantur. Cujus consuetudinis atque instituti patres majoresque nostros non poenitebat tum, quum P. Lentulus⁴ is,

quum consulari et duce et exercitu opus esset, ut ait Liv. XXXIII, 43. Hinc Cicero «apud quos consul fuerat», nempe in consulatu.

9. *Nuper*. Anno 649, C. Mario, C. Fimbria coss. triginta et quatuor annis ante hanc orationem habitam, Cn. Domitius tribunus plebis, M. Silano, qui quinquennio ante consul fuerat, pro Transalpiuo hospite Egritomaro, diem dixit.—Olim legebatur *Decimo Silano*. Correx. Hotom. ex Verrinæ II, 47 codice, in qua factum idem narratur.

XXI. 1. Abundat conjectura Hotomanni, *Neque vero*. J. V. L.

2. *Consuetudo... querimoniarum*. I. e. mos ille, quo querimoniarum deferantur

ad, etc. — *Non inertissimum*. Modestius laudare se non potuit; quamquam locutio negativa majorem quam affirmativa significationem sæpius habeat.

3. *Homines*. Scil. nocentes illi, de repetundis accusati. Lamb. ait fuisse qui vocem *homines* ex adnotatione natam putarent. Falso.

4. *P. Lentulus*. Avus ejus Lentuli, qui conjuravit cum Catilina. — *Princeps senatus* erat is, quem censores, in recitando, senatorem primum legisent. Primus ille sententiam rogatus dicebat. Qui maximus honor habebatur, sed nullo imperio, nec potestate. Sic princeps equestris ordinis, quem in recitandis equitum centariis, primum appellassent.

qui princeps senatus fuit, accusabat M'.⁵ Aquillium, subscriptore C. Rutilio Rufo; aut quum P'.⁶ Africanus, homo virtute, fortuna, gloria, rebus gestis amplissimus, posteaquam bis consul et censor fuerat, L. Cottam in iudicium vocabat. Jure tum florebat populi romani nomen; jure auctoritas hujus imperii, civitatisque majestas, gravis habebatur. Nemo mirabatur in Africano illo, quod in me nunc, homine parvis opibus ac facultatibus prædito, simulant⁷ sese mirari, quum molestè ferant. Quid sibi⁸ iste vult? accusatoremne se existimari, qui antea defendere consueverat; nunc præsertim, ea jam ætate⁹, quum ædilitatem petat? Ego vero ætatis non modo meæ, sed multo etiam superioris, et honoris amplissimi¹⁰ puto esse, et accusare improbos, et miseros calamitososque defendere. Et profecto¹¹ aut hoc remedium est ægrotæ ac prope

5. *M'. Aquillium.* Repetundarum reum, patrem ejus quem M. Antonius orator defendit; de quo vid. Verr. V, 13; de Orat. II, 47. M'. Aquillius pater consul fuit an. 624: quo anno P. Africanus minor exstinctus est.

6. *P. Africanus.* Minor, Pauli Æmilii filius, repetundarum L. Cottam privatus accusavit; qui absolutus est, ne tanti adversarii potentia oppressus fuisse videretur. Pro Mur. cap. 28. Brut. cap. 21. Tacit. Ann. III, 66, et Valer. Maxim. VIII, 1, 11. Porro Cotta ille significatur, qui adeptus est consulatum triennio post Scipionis mortem, et causam illam repetundarum dixit, prætorius, non consularis, ut plerique, non servata temporis ratione, existimarunt. FRR.

7. *Simulant.* Non mirantur, sed ideo mirari se simulant, quia molestè ferunt: cur autem quod Africano, summo viro, licuit, id mihi non liceat,

homini parvis opibus ac facultatibus prædito?

8. *Quid sibi.* Adversarios loquentes inducit.

9. *Ea jam ætate.* Hoc dicitur, non quia ætate admodum grandi tunc fuerit Tullius, annos tantum natus 37; sed quia non, nisi in adolescentia, solebant accusare; quam adolescentiam Cicero in defendendis amicis transegerat.

10. *Honoris amplissimi.* Consulatus. Objecerant adversarii non recte ad accusationem descendere Ciceronem; præsertim quum ædilitatem petat. Respondet, non ædilis solum esse, sed et consulis, accusare improbos.

11. *Et profecto.* Postquam præclarissima temporum veterum laudatione, nomen suum cum maximis viris, qui accusare non detrectarunt, veluti consociavit, illud etiam ad reip. salutem pertinere demonstrat.

desperatæ reipublicæ, judiciisque corruptis¹² ac contaminatis paucorum vitio ac turpitudine, homines ad legum defensionem, judiciorumque auctoritatem, quam honestissimos¹³ et integerrimos diligentissimosque accedere; aut, si ne hoc quidem prodesse poterit, profecto nulla umquam medicina his tot incommodis reperietur. Nulla salus reipublicæ major est, quam eos, qui alterum accusant, non minus de laude, de honore, de fama sua, quam illos, qui accusantur, de capite ac fortunis suis pertimescere. Itaque semper ii diligentissime laboriosissimeque accusarunt, qui se ipsos in discrimen existimationis venire arbitrati sunt.

XXII. Quamobrem hoc statuere, iudices, debetis, Q. Cæcilium, de quo nulla umquam opinio¹ fuerit, nullaque in hoc ipso iudicio expectatio futura sit; qui neque, ut ante collectam² famam conservet, neque uti reliqui temporis spem³ confirmet, laborat; non nimis⁴ hanc causam severe, non nimis accurate, non nimis diligenter acturum: habet enim nihil, quod in offensione⁵ deperdat; ut turpissime⁶ flagitiosissimeque discedat, nihil de suis veteribus ornamentis requiret. A nobis multos obsides⁷ habet populus romanus, quos ut incolumes conservare, tueri, cou-

12. *Corruptis*. Propter eos qui acceperunt pecuniam; *contaminatis*, propter iudicum infamiam quos *maculosos senatores* appellat Cic. ad Att. I, 13.

13. *Honestissimos*. Ad personam refertur, et ad excludendum Cæcilium valet.

XXII. 1. *Opinio fuerit*. Quem nemo umquam in patronorum numero habuerit.

2. *Collectam*. Quam nullam collegit.

3. *Spem*. Quæ de eo nulla est.

4. *Non nimis*. Parum, minus quam oporteat.

5. *In offensione*. Si quid peccaverit, si ab officii sui religione declinaverit, nihil est illi, quod perdat.

6. *Ut turpissime*. Etiam si infamia et perfidiæ crimine notatus, ex illa causa discederet, non tamen pristinos honores (quos numquam habuit), posset amittere.

7. *Obsides*. Multa Cicero apud populum pignora deposuit. Nempe et existimationem a se collectam, et

firmare ac recuperare possimus, omni ratione erit dimicandum. Habet honorem, quem petimus; habet spem, quam propositam nobis habemus; habet existimationem, multo sudore, labore, vigiliisque collectam: ut, si in hac causa nostrum officium ac diligentiam probaverimus, hæc, quæ dixi, retinere per⁸ populum romanum incolumia ac salva possimus; si tantulum offensum titubatumque sit, ut ea, quæ singulatim ac diu collecta sunt, uno tempore universa perdamus. Quapropter, judices, vestrum est deligere, quem existimetis facillime posse magnitudinem causæ ac iudicii sustinere fide, diligentia, consilio, auctoritate. Vos si mihi Q. Cæcilium anteposueritis, ego me dignitate⁹ superatum non arbitrabor: populus romanus ne, tam honestam, tam severam, diligentemque accusationem neque vobis placuisse, neque ordini¹⁰ vestro placere, arbitretur, providete¹¹.

magistratus, vel quos jam adeptus est, vel quos exspectat; ut mox dicturus est.

8. *Per populum.* Cujus suffragiis magistratus dabantur.

9. *Dignitate.* Non mihi prælatum a vobis fuisse Cæcilium, propter meritum, existimabo; non putabo vos id fecisse, quod Cæcilium digniorem qui accuset existimetis; vos vero timete, ne populus rom. tam honestam, pro sociis scilicet, contra eorum prædonem, tam severam, quam mea futura est, accusationem, neque vobis,

ut a Verre corruptis, neque ordini vestro, seu senatorio, quia Verri favet, placere existimet.

10. *Ordini vestro.* In eandem suspicionem, si sibi Cæcilius præferatur, senatum universum adducit, male jam judiciorum nomine audientem.

11. *Providete.* Vestra causa, non mea. Non sine aculeo hoc verbo orationem claudit, et demonstrat eorum multo plaris quam sua referre se ab eis ad accusandum deligi, nisi forte in populi rom. offensionem omnino venire velint.

EXCURSUS

DE PROVINCIIS.

QUUM lege vetustissima annui essent Romæ magistratus, annua quoque provinciarum administratio erat, quæ a solis magistratibus regi poterant; idque satis manifestum est ex omnibus historiis. Verum bellis undique urgentibus, cæpti sunt consules, et prætores in provinciis retineri post elapsum annum sui magistratus, et, prorogato imperio, illi proconsules, hi proprætores fere dicebantur. Quod quum esset extra ordinem, præter senatus decretum, populi etiam rogatio necessaria erat, ut cuiquam prorogaretur imperium in provincia, teste Dione lib. XXXVI, et Asconio ad orationem pro C. Cornelio: qui dicunt, antiqua consuetudine receptum fuisse, ut ex S. C. populus solveret legibus, hoc est, aliquid permetteret contra legum præscripta. Idem etiam constat ex Livio pluribus locis, ut lib. VIII: «Actum cum tribunis est, ad populum ferrent, ut quum P. Philo consulatu abiisset, proconsul rem gereret, quoad debellatum cum Græcis esset». Et lib. X: «L. Volumnio ex S. C. et scito plebis prorogatum in annum imperium est». Lib. XXVII: «Quod in L. Veturio, idem in C. Aurunculeio decretum ab senatu, latumque ad populum est de prorogando imperio». Et quamvis lib. XXXI dicantur Patres prorogasse imperium T. Quintio; id non jure suo fecerunt, sed quia rem illam tribuni pl. iudicio Patrum permiserant. Ceterum, sicut in mandandis extraordinariis provinciis, de quibus alio loco, ita in prorogando imperio, illud sibi postea senatus usurpavit, ut hoc etiam præstaret sine ulla populi rogatione; quod multis exemplis ostenditur. Apud Sallustium de Bello Jug. «Sed paullo ante senatus Metello

Numidiam decreverat»; hoc est, prorogaverat: decretam enim sibi consuli jam per biennium eandem provinciam obtinuerat. Apud Plutarchum in Gracchis: «Ut igitur Patres Gracchum diutius in Sardinia detinerent, ut Orestes consul in Sardinia maneret, decreverunt»; prorogarunt scilicet ultra annum imperium Oresti, cujus erat quæstor C. Gracchus. Apud Appianum lib. I de Bello civili: «Sex. Cæsar, quum deponendi muneris (consulatus) tempus accessisset, proconsul a senatu electus est». Ex quibus locis patet, senatum aliquando imperium prorogasse iis temporibus, sine populi rogatione. Quæ quum ita se haberent, lata deinde est lex Cornelia de imperio a L. Sulla dictatore: «Ut qui provinciam haberet, is tamdiu obtineret imperium, quoad in Urbem introiisset», referente Cicerone epistola 9 lib. I: qua lege factum est, ut nemini in posterum prorogaretur imperium, quod non amplius ad annum daretur, sed ad tempus indefinitum. Etenim quum prætores provinciarum obtinerent imperium, quoad in Urbem rediissent, quid opus erat prorogare ipsis imperium ante reditum eorum in Urbem? Contra tamen quispiam: An, si numquam rediissent, imperium numquam deposuissent? minime; nam ubi senatus successorem misisset, decedendum erat eadem lege Cornelia, qua triginta tantum dies concedebantur magistratui ad decedendum, postquam successorem in provinciam ingressum noverat, teste Cicerone epist. 7, lib. III, ad Appium: «Sed eo discessisti, quo ego te ne persequi quidem possem triginta diebus, qui tibi ad decedendum lege, ut opinor, Cornelia constituti essent»; adeoque perspicuum est, quemlibet tamdiu obtinuisse provinciam cum imperio sine prorogatione, quamdiu successor missus esset. Advertendum tamen est, et quidem ex supra dictis, legem Corneliam gratiosam fuisse magistratibus, non onerosam; ut, si nihil novi senatus statuisset, retinere possent imperium, qui vellent; decedere de provincia, qui otium Urbis præoptarent.

Hoc idem, quamvis ex Cicerone satis constare videatur, confirmare conabor multis aliis tum conjecturis, tum veterum testimoniis, ne quispiam suspicari possit, legem illam Corneliam fuisse aliquando abrogatam... In primis, quum L. Lucullus septem annos Ciliciæ, et Asiæ præfuerit, Ciliciæ triennium P. Lentulus, ac deinde totidem annos Ap. Claudius, Macedoniæ biennium Piso, Syriæ triennium Gabinius, ne singulos persequar; cur ne verbum quidem apud historicos de imperii prorogatione? Ante Sullam nusquam fere memorant, remansisse aliquem in provincia, quin de prorogatione mentionem etiam faciant: cur hoc nusquam attigit, aut Cicero ita in Epistolis accuratus, aut Plutarchus et Appianus ita in historia verbosi? Nimirum, quod lege Cornelia sublata fuerat prorogatio imperii, et retinebantur provinciæ, donec successor advenisset... Secundo, Cæsari per legem quidem Vatiniæ data fuerat a populo Gallia citerior, sed ulteriorem senatus dederat, ut patet ex oratione de provinciis. At quare in eadem oratione Cæsaris inimici esse mittendum successorem censent, quum multo æquiore sententia uti possent, non esse prorogandum Cæsari imperium, maxime ultra triennium, quod attinebat ad Galliam ulteriorem? Videamus, quid eo loco respondeat orator: « Simul, inquit, et illud facit, ut quod illi a populo datum sit, id non violet; quod senatus dederit, id senator properet auferre ». Quinam hic est loquendi modus? id senator auferre dicendus est, quod novo suo beneficio non proroget? et post triennium properabat auferre, quod, finito anno, jure, ac lege cessabat, nisi prorogatio accessisset? Itaque nullum verbum de prorogando Cæsari imperio in ulteriore Gallia, factum est in senatu, quod lege Cornelia obtinebat, nisi missus esset successor: atque adeo oratione pro Balbo Cicero ait: « Lege Sempronia succedendum non censuit »; epist. 7, lib. I, ad Lentulum: « et ne lege Sempronia succederetur facile perfectum est »; nullum verbum

de prorogatione... Tertio, epistola 9, lib. I, hæc habetur controversia : Quum Appius minitaretur, se successurum Lentulo in provincia Cilicia sine lege curiata de imperio, venit in dubium, possetne Lentulus retinere provinciam, et ab ejus ingressu prohibere Appium sine curiata lege illuc venientem ; qua de re ita Cicero : « Varias esse opiniones intelligo : sunt qui putent, posse te non decedere, quod sine lege curiata tibi succedatur ». Hinc vero disputare quispiam possit : senatus decreverat Ciliciam Appio, non ergo prorogaverat Lentulo ; nam ridiculum fuisset eandem provinciam uni decernere, et alteri eodem tempore prorogare. Imperium tamen non prorogatum retinere poterat Lentulus, si jure potuisset non tradere provinciam successor sine curiata lege venienti, quod unum dubium erat ; non igitur necessaria erat prorogatio... Quarto : C. Verres ex prætura urbana Siciliæ præfuit per triennium, additque causam Asconius : « Quia successor non est profectus » ; decreverat autem senatus Siciliam Arrio cuidam, primo anno elapso, ut ex Verrinis colligitur ; qui quum aut non potuerit, aut noluerit ire in provinciam, retinuit imperium Verres sine ulla prorogatione. Quid enim Verri senatus prorogaret, quod Arrio successor mandaverat ?... Quinto : quum Pisoni et Gabinio acerrimus inimicus esset Cicero, eosque quam primum vellet de provinciis decedere, his fere interrogationibus utitur oratione de provinciis : « Huic non submittetis ? hos de provinciis, si non aliquando deducendi essent, diripiendos non putaretis ? » et nusquam loquitur de prorogatione, quum tamen multo acrius posset urgere his verbis ; hos non modo non revocabitis, sed ultra biennium, quasi bene de rep. meriti essent, prorogabitis etiam imperium ? Præterea multa habet Cicero in eadem oratione, quæ, si requiratur prorogatio, aut falsa sunt, aut absurda ; ait enim : « Restituissetis vestram auctoritatem, iis, per quos erat amissa, revocatis ; et iis ipsis præmiis extor-

tis, quæ erant pro eversione patriæ consequuti ». Patres ne extorsissent provincias Pisoni, et Gabinio, si ultra annum non prorogassent imperium? si quidem per adversarios necessaria erat prorogatio: « Numquam succedetur illis, nisi quum ea lege referetur, qua intercedi de provinciis non licebit»: infra contra eos, qui censuerant, alteram Galliam cum Syria decernendam esse: « Attamen his sententiis, Piso in provincia permanebit ». Utrumque falsum est, si prorogationem admittamus; nam licet in decernendis provinciis aliud statuisset senatus, poterat nihilominus Cicero impedire decretum de prorogando imperio Pisoni et Gabinio, si necessarium illud erat ad hoc, ut illi provincias retinerent... Sexto: P. Sextius quæstoriæ provinciam consularem sortitus, metuens, ne post annum sibi eriperetur provincia, quam administrabat, Ciceroni amico significavit, sibi gratum fore, si eam retinere diutius posset: ad quem ita Cicero epist. 6, lib. V: « Quum ad me Decius librarius tuus venisset, egissetque mecum, ut operam darem, ne tibi hoc tempore succederetur »; quum uti posset commodiore verbo, et de prorogando potius imperio, quam de non succedendo mentionem facere, quod majus erat beneficium. Sic epist. 29, lib. XIII, de Antistio: « Qui quum forte quæstor Macedoniam obtineret, neque ei successum esset »... Septimo: ex oratione in Pisonem aliud argumentum deducitur; nam hæc ibi habentur: « Quum tibi spe falsa quod Q. Ancharium non esse successurum putares, animos rumor inflasset ». Quæris, cur eo rumore adeo lætaretur Piso? quia, si Ancharius sibi successor destinatus in provinciam non venisset, retinisset ipse adhuc imperium in Macedonia sine ulla prorogatione, quam a Patribus sibi inimicis ne impetrare quidem potuisset; sed jam noverat, nihil agendum fore de prorogatione... Octavo: quum magistratus essent annui, et a solis magistratibus vetere lege provinciæ regerentur, prorogatio imperii erat aliquid extraordinarium; proindeque, si

tollamus legem Corneliam de imperio, fateri opus est, præter senatus decretum necessariam fuisse populi rogationem, post illam tribunitiam legem Corneliam de solvendo legibus, cujus meminere Dio et Asconius, ut cuiquam ultra annum imperium prorogaretur: tum vero multo majorem vim habebunt conjecturæ, quæ allatæ sunt. Nemo enim sibi persuadeat, tantum hac de re futurum silentium apud omnes; quum sæpe adeo et consuli senatus, et rogari populus de prorogatione debuerit... Ultimo: lex Julia de provinciis examinanda est, qua lata a dictatore Cæsare, lex illa Cornelia de imperio sublata esse videtur; ea igitur cavebatur: « Ne prætoriae provinciæ plus quam annum, neve plus quam biennium consulares obtinerentur ». Cicero Philipp. I. Et hac ratione contraxisse Cæsarem ad biennium consuli-
bus, ad annum prætoribus provinciarum, imperiique tempus certum est, quod antea erat lege Cornelia indefinitum, ut alibi fusius ostendam.

Ad hanc de lege Cornelia doctrinam absolvendam, operæ pretium est exponere, quo putem consilio eam promulgatam fuisse; nam quid re ipsa perscriberet, satis patet. Quum igitur maximæ quandoque utilitati reip. fore arbitrarentur, si ab eodem imperatore idem bellum conficeretur; non semel ad tempus indefinitum prorogarunt imperium. Sic Philoni ex Livio, lib. VIII, prorogatum est imperium: « Quoad debellatum cum Græcis esset »; P. Scipioni, lib. XXX: « donec debellatum in Africa foret »; deinde T. Quintio in Macedonia, lib. XXXII: « donec successor ei venisset ». Insuper, si quando evenisset, ut quispiam ultra annum obtineret provinciam absque eo, quod prorogatum ipsi fuisset imperium, dubitari poterat, essetne ille vere, et jure proconsul. Quam omnino dubiam controversiam attigit Appianus lib. I de Bello civili, quum de Sulla loquitur his verbis: « Visus est et ipse proconsul in Mithridatem constitutus nondum dignitatem exuisse »; neque certe ab inimicis, qui

remp. occupaverant, prorogatum illi fuisse imperium, dicendum est, quod tanto post ex Asia reversus in Italiam, adhuc retinere videbatur. Hinc legislator, quum indefinitum provincialium magistratuum tempus fecit, et dubiam controversiam diremit, et in Patrum potestate esse voluit revocare post annum, misso successore, aut per plures annos detinere in provinciis prætores, nihil decernendo, prout resp. postularet.

Quædam obijci possunt, et, ne quidquam videar prætermisisse, singula referam, iisque breviter satisfaciam... Primo contra est illud Ciceronis de provinciis: « Ut et prætores annuas provincias habeant »; ex quo colligi potest, annuam tantum fuisse provinciarum administrationem. Sed respondeo, idcirco annuas dici provincias, quia sicut intra annum neque poterat prætor, inconsulto senatu, de provincia decedere, neque revocari ipse a senatu sine causa; ita elapso jam anno, et revocari a senatu, misso successore, et sponte sua decedere poterat, suumque vel legatum, vel quæstorem præponere provinciæ; quia illud tempus legibus erat præscriptum, reliquum arbitrium: sed et prætores revocabantur plerumque post annum; consules, ut diutius retinerentur, magis gratia valebant... Deinde opponunt Treboniam legem, ut per quinquennium Pompeio Hispania, Crasso Syria, Cæsari Galliæ darentur; cui adde Vatiniam de Gallia citeriori, et Gabiniam, qua bellum adversus piratas per triennium Pompeio delatum est, ut refert Dio lib. XXXVI. Quibus tamen legibus illud unum præstiteri tribuni pl. ut adimerent facultatem senatui mittendi intra illud tempus successoris, ut notat Calvinus ad legem Treboniam, et manifeste patet ex oratione de provinciis. Mox obijcitur Cicero, qui sæpe in epistolis tum ad Atticum, tum ad diversos, et sibi annuam datam provinciam dicit, cui supra satisfacimus quadam ex parte; et admodum se timere affirmat, ne senatus sibi in provincia prorogaret imperium.

Sic et Q. Tullio fratri Ciceronis manendum fuit in Asiae prætura per triennium propter senatus decretum, non modo præter suam voluntatem, sed etiam adversus amicorum contentionem, qui, ut ei successor decerneretur, operam dederant. Notandum tamen est, nullam quidem fuisse prorogationem, ut a volentibus obtineretur imperium ultra annum; necessariam autem fuisse, ut invitus quispiam remanere cogeretur. Elapso itaque anno a legibus constituto, si senatus misisset successorem, necessario erat decedendum; si prorogasset imperium, necessario manendum; si neutrum, liberum erat prætori tum decedere, tum manere. Cicero epist. 10, lib. II: « Quare, mi Rufe, vigila, primum ut mihi succedatur; sin id erit, ut scribis, et ut ego arbitrator, spissius, illud, quod facile est, ne quid mihi temporis prorogetur ». In primis enim ex eo, quod de utroque laborat, patet, utrumque potuisse non contingere; deinde primum petit, ut sibi succedatur, ut necessario sibi, et sine ulla reprehensione decedendum sit; hoc si fieri nequeat, ne quid temporis prorogetur, ne sibi necessitas permanendi imponatur. Tandem loquitur de prorogatione temporis, non imperii; quia non prorogabatur imperium, sicut ante legem Corneliam, sed tempus manendi in provinciis.

Quæ vero de Cicerone dicuntur, accuratius explicanda sunt: nam Pompeio tertium consule factum est senatusconsultum, teste Dione lib. XL: « Ne consules et prætores irent in provincias intra quinquennium », quo privati, atque etiam ipse Cicero coacti sunt ire in provincias; et ille quidem invitus; quid enim id privatus ambiret, quod prætor et consul repudiasset? Quum igitur inviti mitterentur, ad eorum solatium, illud singulare additum puto senatusconsulto, ut annuas tantum haberent provincias. Sic epist. 7, lib. XV, ad Marcellum: « Ne quid accedat temporis ad id, quod tu mihi et S. C. et lege finisti ». Ibid. ep. 14, ad Cassium: « Ad hanc provinciam, quam et senatus, et populus annuam esse vo-

luit ». Epist. 7, lib. II, ad Curionem : « Eaque mihi conditio maneat, qua profectus sum ». Ibid. ep. 15, ad Caelium : « Non me plane post annum, ut senatus voluit, ex provincia decessisse »; ad Atticum epist. 3, lib. VII : « Etsi cupidissime expressum, et expetitur a me sit, et approbatum a te, ne diutius anno in provincia essem ». Ex quibus colligitur, fuisse hoc expressum a Cicerone in S. C. ut eae provinciae per annum administrarentur; quod in aliis usitatum non erat, nullaque fiebat mentio temporis, ut apparet ex ep. 7, lib. VIII, et ex Philipp. II, de Cassio. Quamobrem, si fuit hoc singulare de Cicerone, aliisque cum ipso in provincias mittendis, multo minus mirari debemus, et ita saepe eum scribere, decretam sibi fuisse annuam provinciam, et adeo pro impedienda temporis prorogatione laborasse. Quamquam non est negandum, potuisse Ciceronem non decedere, etiamsi nihil actum fuerit de prorogatione. Epist. 5, lib. VIII, ait Caelius non futuram successionem provinciarum; deinde subjicit : « Tametsi hac de re puto, te constitutum, quid factururus esses, habere »; quod si necessario decedendum fuisset, non id constituisset, quasi capto consilio. Ep. 6, lib. VI, ad Atticum : « Dum impendere Parthi videbantur, statueram fratrem relinquere, aut etiam reip. causa contra S. C. ipse remanere ». Imperium igitur adhuc obtinebat. Epist. 17, lib. II, ad Caninium : « De successore nihil audiui, nec quemquam fore arbitror; quin ad diem decedam, nulla causa est, praesertim sublato metu Parthico; commoraturum me nusquam sane arbitror » : innuitque se omnino quidem velle decedere, remanere tamen etiam potuisse. Imo postquam de provincia decessit, semper se ipse imperatorem appellavit, eam ob causam videlicet, quod lege Cornelia imperium haberet, quoad in Urbem introisset; id autem non praestitit, nisi victo Pompeio.

Caesar denique affertur, qui saepe dicitur apud Plutarchum, Appianum, et alios, illud a senatu postulas-
 se, ut

sibi in Galliis tempus (nusquam vero imperium) prorogaretur, quodque id illi negaretur, arma idcirco movisse. Sed facilis est responsio, si ea, ut revera gesta sunt, diligenter examinemus. Cæsar itaque consul anno ab U. C. 691, Vatinia lege Galliam citeriorem a populo obtinuit per quinquennium, quumque ea lex promulgata fuerit circiter kalendas mart. non poterat Cæsari imperium eripi, nisi kalendis mart. anni 696, Domitio et Appio coss. idque constat ex oratione de provinciis: «Præfinit enim successori diem»; et infra: «Kalendis ei denique mart. nascetur repente provincia»; ut scilicet servaretur lex Vatinia, kalendis mart. prædicti anni mittendum censebat successorem senator ille consularis. Quum autem anno superiore, Pompeio consule, itidem circiter kalendas mart. lata fuisset lex Trebonia, qua per aliud quinquennium in Galliis datum est imperium Cæsari, sublatus est annus unus ex quinquennio legis Vatiniae, cœpitque per alteram legem Treboniam obtinere Gallias kalendis mart. anni 695, adeoque usque ad kalendas mart. anni 700, qui consules habuit L. Paullum et C. Marcellum. Hinc epist. 7, lib. VIII, M. Marcello consule, h. e. anno 699, mense septembri hæc loquutum Pompeium refert Cælius: «Se ante kal. mart. non posse sine injuria de provinciis Cæsariis statuere; post kal. mart. se non dubitaturum»; ut scilicet lex Trebonia servaretur. Apud Appian. lib. II de Bello civili, ad annum 700: «C. Marcellus successorem Cæsari in provinciam mitti postulabat; jam enim tempus ejus muneris ad finem venisse aiebat»: quoniam kal. mart. illius anni quinquennium Treboniae legis effluxerat. Neque obstat, quod addit infra idem Appianus: «Adversantibus multis, ac non æque Pompeio tempus effluxisse dicentibus», quum tamen eodem tempore de utriusque quinquennio lata fuerit lex Trebonia: patet enim, Pompeio tertium consuli prorogatum fuisse ultra quinquennium tempus imperii, ex Dione et Appiano, qui de Pompeii ter-

tio consulatu hæc habet: « Quæ omnia quum in senatu summa laude extollerentur, ei duas denuo legiones, et tempus ad aliarum gentium imperium attribuit ». Cæsar ipse lib. I de Bello civili ita scribit: « Provinciæ privatis decernuntur, duæ consulares, reliquæ prætoriæ, Scipioni Syria, Domitio Gallia obvenit »; retulerat autem de provinciis Lentulus consul statim post kalendas januar. Quamobrem, si Cæsari non effluxisset tempus imperii kalendis mart. anni 700, decretus illi fuisset successor ante tempus lege Trebonia præscriptum, quippe ante kalend. mart. anni 701, quum factum fuerit decretum de successione statim post kalend. jan. hujus anni; ideoque non dissimulasset Cæsar tantam injuriam, quum ibidem alia minora queratur: « In se novi generis imperia constitui, in se jura magistratuum commutari, ne ex prætura, etc. » neque verbum facit de misso ante legitimum tempus successore. Constat igitur, quinquennium legis Treboniæ non excessisse kalendas mart. anni 700, et Cæsari decretum fuisse successorem Domitium post kalend. januar. anni 701, ex Cæsaris Commentariis, et aliis auctoribus. Jam vero peteretur ab adversariis, quoniam jure per decem illos menses, qui numerantur a quinquennio jam elapso usque ad successorem, Cæsar obtinuerit Gallias: si dicant, quod nondum a senatu venisset successor, legem Corneliæ admittunt; si vero, quod imperium vi retinuit, jam tum ergo judicandus fuerat hostis, non postquam ultra fines provinciæ duxit exercitum. Nam si kalendis mart. anni 700 imperium Cæsari nullum erat, utpote non prorogatum a senatu, cur non hoc apud historicos exprobrant Cæsaris inimici, qui leviam etiam persequuntur? cur proconsulem et imperatorem adhuc appellant? cur non hanc belli causam prætendunt? Jure nimirum retinebat imperium, sed contra leges successorem recusabat, quod unum illi objici solebat.

FERRATIUS.

M. TULLII CICERONIS
IN C. VERREM
ACTIÓNIS PRIMÆ
PROOEMIUM

ARGUMENTUM

ACTIONIS PRIMÆ IN C. VERREM,

EX ASCONIO PEDIANO.

Victo Cæcilio, et accusatione ad se delata, Cicero, quum inquisitionis tempus in Siciliam postulasset dies CX, et cum filio patru sui Tullii totam provinciam colligendis literis in Verrem, et denunciandis testimoniis peragrasset diebus L, quia pedestre iter ex Sicilia et propter fugitivos et propter Verris insidias devitabat¹, a Vibone transit. Tum repente adveniens, quum videret id agi, ut a M'. Glabrione prætore, et ab iis iudicibus, qui tunc erant, ad alium annum, aliumque prætorem res tota transiret, eripereturque sibi reus patrocinio Hortensii ac Metelli, qui tunc consules futuri erant (per hos enim Verres eludendi iudicii fiduciam sumpserat), hoc commentus est rationis, ut orationem longam prætermitteret, neque in criminibus declamatione cumulandis tempus absumeret, sed tantummodo citaret testes ad unumquodque crimen expositum, et eos Hortensio interrogandos daret. Qua arte ita est fatigatus Hortensius, ut nihil, contra quod diceret, inveniret, ipse etiam Verres, desperato patrocinio, sua sponte discederet in exilium.

Hoc igitur laborat in oratione hac tota Tullius, ut ostendat, non dolo, nec astutia, sed necessitate facere, id quod facit; et magis adversariorum fraudibus occurrat, quam ut ipse sit captiosus. Vult enim, ut diximus, omne hoc tempus, quod est ante kalend. januar. dispensare in totius causæ actionem, ne ad alium prætorem, aliosque iudices novis consulibus veniendum sit. Toto igitur hoc libro exhortatio iudicum continetur, ad vere iudicandum; minæ in adversarios diriguntur, omnia tentantes ad corrumpendum iudicium: et expositiones Ciceronis consilii sui iudicibus exhibentur, quasi inter eos tractentur communiter; ubi brevitatis quoque objiciendorum criminum mira arte conficitur.

1. Vulgo *dubitabat*.

Status, quantum ad crimina causæ repetundarum pertinet, conjectura multiplex inest omnibus libris; quantum ad specialem intentionem libri hujus refertur, qualitas negotialis extra scriptum in particula juris est constituta; inducitur enim postulatio de agendi novo genere; si quidem petit permitti sibi, non uti oratione perpetua, sed breviter crimina proponere, et ad singula testes dare.

Sunt autem capita orationis hæc : an talis reus, cujus damnatio prosit reipublicæ; an talia ejus consilia ad corrumpendum judicium; an talia et tam manifesta crimina ad patrocinium desperandum; an hujusmodi ab eo, et ab ejus suffragatoribus et dicta et facta ad eludendam accusationem, ut novo genere sit agendum Tullio. Quarum rerum quasi per narrationem facit demonstrationem. Expositio consilii sui, ut cum judicibus deliberatio videtur inducta; in qua ostenditur certandum cum Hortensii astutia, non utendo horis omnibus ad dicendum; ad tollendam, si fieri possit, comperendinationem, per testes crimina comprobando. Facit hoc Cicero, ut hæc res non solum compendio ac brevitate moram temporis tollat, sed etiam circa artificium dicendi breviter etiam in hac parte vim oratoris ostendat.

ALIUD ARGUMENTUM.

Accusator constitutus, Cicero sibi centum et decem dies petierat, quibus in Sicilia testimonia, et tabulas conquireret; quum autem vix quinquaginta diebus tota peragrata Sicilia, omnium populorum ac privatorum injurias cognosceret, Romam repente regressus, intellexit Verrem et ejus amicos nova ratione efficere studere, ut res in annum proxime sequentem duceretur. Quum enim sibi a M'. Glabrionis prætoris ceterorumque judicium severitate timeret Verres, unicam illam salutis viam patere sentiebat, si rem per tres menses ad decembris nonas variis excusationibus prolatando, integram causam ad M. Metellum prætorem sibi amicissimum et alios judices deferret, quo tempore a consulibus Q. Hortensio et L. Metello defenderetur. Porro nonæ sextiles erant quibus prima actio institui cœperat: et quum decem tantum dies superessent ante diversos ludos qui prope quadraginta dies erant ablaturi, ita calculum ponebant Verris patroni, ut post hoc duntaxat tempus Ciceronis accusationi responderent, et deinde dicendo et excusando ad Victoriæ ludos ducerent, quibus peractis dies paucissimi ad usque novorum magistratuum electionem reliqui essent futuri. Ita refrigerata accusatione sperabant rem totam ad M. Metellum venturam. Quod ne fieret, Cicero rem ita instituit, ut omissis longis et continuis orationibus, singulis criminibus pauca præmitteret, testes citatos interrogaret, quorum auctoritate crimina firmarentur; et veritatis vi obrutum Verrem judicium sententiis traderet condemnandum.

Hæc est *prima actio*, cujus quasi proœmium seu principium est brevis oratio, quæ sequitur; qua id in primis sibi propositum habuit, ut astuta adversariorum consilia ostenderet, causasque quibus illi ad differendum, ipse autem ad perficiendum judicium duceretur. Nec nisi admirabili prorsus brevitate obiter Verris res gestas attingit. Ceterum multus est in judicibus ad recte judicandum commonendis, quin et terrendis, ita ut non tam habenda sit accusatio, quam præparatio quædam ad ipsam accusationem instituendam, quæ in testibus interrogandis tabulisque proferendis constaret.

Principio gratulatur iudicibus orator de accusatione, qua conceptam per annos decem infamiam iudiciorum licet illis eluere; ad invidiam enim ordinis senatorii (penes quem tum iudicia erant) maxime pertinere, ne reus omnium jam opinione damnatus absolvatur, 1. Verrem enim omnem spem salutis in spe vel eludendi vel corrumpendi iudicii ponere, 2, 3. Etsi vita ejus tot vitiis flagitiisque convicta sit, ut nemo eum aliqua ex parte defendere possit, 4, 5.

Tum narrantur ea, quæ Verres machinatus sit atque etiam nunc moliatur, ut hujus prætoris horumque iudicum severitatem effugiat, et ut res ita ducatur, ut anno proximo apud M. Metellum prætorem sibi faventem causa dicatur, 6-10. Cui rationi satis astutæ ut occurrat, Hortensio denuntiat, se consilium cepisse necessarium, ut perpetuam orationem in alia tempora reservet, nunc autem Verrem tabulis, testibus, privatis publicisque literis auctoritatibusque accuset. Hortensii rationem esse, ut secundum binos ludos sibi respondere incipiat, suam, ut reum ante primos ludos comperendinet, h. e. eum in diem perendinum adesse jubeat, ad causam iterum dicendam, 11. Omnino autem sibi propositum esse, anno proximo, quo ædilis futurus erat, iis hominibus resistere, quorum improbitate et audacia senatorius ordo prematur et urgeatur infamia iudiciorum, 12, 13. Tantum abesse, ut in hoc ipso iudicio aliquid committi patiatur, quod malam hominum existimationem de senatorum iudiciis, præsertim ubi de pecuniis repetundis agatur, confirmare possit, 14. Postremo iudices ad severitatem excitat, in primis prætorem M'. Acilium Glabrimonem rogat, ut in hoc iudicio causam severitatis, integritatis, fidei, religionis, causam denique senatus suscipiat, 15-17. Iterumque denuntiat se prima actione hoc acturum, ut omissa perpetua oratione, breviter explicatis criminibus, singula statim interrogando, argumentis atque oratione firmet, ad eaque testes accommodet, 18.

Habita est hæc oratio in foro ad ædem Castoris, eodem anno quo superior, M'. Glabrione prætore, cui sorte obtigerat quæstio de repetundis, et lectissimis ex senatu iudicibus. Senator autem ex hoc anno erat Cicero, quippe quem censores Gellius et Lentulus, qui tum erant, in senatum legerant. Agi autem

coepit causa nonis sextilibus, duravitque novem diebus ad xix kal. sept.

Tam vehementi Ciceronianæ accusationis impetu exterritus est Hortensius, ut Verris desperata salute, defensionem omnem omitteret, et ipse Verres non alteram actionem exspectans, sua sponte abierit in exsilium, in quo quum consenuisset, eum proscriptio triumviralis, quæ Ciceronem jam antea sustulerat, abstulit. Proscriptum Verrem ab Antonio fuisse narrat Plinius, XXXIV, 3, quod Corinthiis vasis se ei cessurum negavisset.

Non absurdum fuerit monere Plutarchum, in vita Ciceronis, de tota Verris lite sic loqui, ut plane hospes et peregrinus in historia romana esse videatur. Vide ad Cic. vit. Rualdi Animadv. XXX, et ultim. ad hanc orat. notam.

•



M. T. CICERONIS ORATIONES.

IN C. VERREM ACTIO PRIMA.

PROŒMIUM.

ORATIO QUINTA.

I. **Q**UOD erat optandum maxime, iudices, et quod unum ad invidiam vestri ordinis¹, infamiamque iudiciorum sedendam, maxime pertinebat; id non humano consilio, sed prope divinitus datum atque oblatum, vobis summo² reipublicæ tempore videtur. Inveteravit enim jam opinio pernicio³sa reipublicæ, vobisque⁴ periculosa, quæ non modo Romæ, sed et apud exterarum nationes omnium sermone percrebruit, his iudiciis⁵, quæ nunc sint, pecuniosum hominem, quamvis sit

1. 1. *Vestri ordinis*. Senatorii, penes quem decem ab hinc annis erant iudicii. — Alii, *nostri*. J. V. L.

2. *Summo*. I. e. maxime necessario, in quo vertitur totius reip. salus. Sic ad Att. I, 1, « summam existimationem », pro re, a qua omnis pendet existimatio. Vid. Gronov. ad Liv. XXVI, 10. Ruhnken. ad Rutilium Lupum, p. 27.

3. *Pernicio*. Quia spe impunitatis effrenatur futura est improbitas.

4. Sic MSS et edd. quam plurimæ. Sed *nobisque* est in cod. Franc. prim. et in ed. Lambin. Græv. Beck. etc. J. V. L. — Male, ut arbitror. Nam, quamvis in senatum adscitus, Cicero curat suum nomen, quod erat popolare, a senatorum causa separandum.

5. *His iudiciis*. Senatorii ordinis.

nocens, neminem posse damnari. Nunc, in ipso discrimine⁶ ordinis judiciorumque vestrorum, quum sint parati, qui concionibus⁷ et legibus hanc invidiam senatus inflammare conentur, reus in iudicium adductus est C. Verres, homo vita atque factis, omnium jam opinione, damnatus, pecuniæ magnitudine, sua⁸ spe ac prædicatione, absolutus. Huic ego causæ, iudices, cum summa voluntate et exspectatione populi romani actor accessi, non ut augerem⁹ invidiam ordinis, sed ut infamiæ communi succurrerem. Adduxi enim hominem, in quo reconciliare existimationem judiciorum amissam, redire in gratiam cum populo romano, satisfacere exteris nationibus possetis; depeculatorem¹⁰ ærarii, vexatorem Asiæ¹¹ atque Pamphyliae, prædonem juris¹² urbani, labem¹³ atque perniciem provinciae Siciliæ. De quo si vos severe¹⁴ religioseque judicaveritis; auctoritas ea, quæ in vobis remanere debet, hæ-

6. *Discrimine*. Periculum enim erat, ne iudicia a senatoribus ad equites transferrentur; et de hac re legem C. Anrelius Cotta prætor jam promulgaverat, quæ lex in proximo erat, ut ferretur.

7. *Concionibus*. L. Quintium significat tribunum plebis, hominem maxime popularem ac factiosum. Quem ita in Cluentiana oratione describit Cicero: «L. Quintius homo maxime popularis, qui omnes rumorum et concionum ventos colligere consuesset, etc.» Et infra: «habetur una et altera concio, vehemens et gravis; accepisse pecuniam iudices, ut innocentem reum condemnarent, tribunus plebis clamitabat: agi fortunas omnium dicebat, nulla esse iudicia: qui pecuniosum inimicum haberet, incolorem esse neminem posse ».

8. *Sua spe*. Ut sperat et prædicat.

9. *Augerem*. Et ipse oratione mea, senatorem Verrem accusando. Sic optime Hotom. Errat autem hoc in loco Manut. qui ita interpretatur: Non ut quemquam aut ipse corrumperem, aut a reo corrumpi sinerem.

10. *Depeculatorem*. Furem, quum esset Cn. Carbonis quæstor.

11. *Vexatorem Asiæ*. Quum legatus et proquæstor Dolabellæ, Ciliciam obtineret, unde Asiam quoque est depopulatus.

12. *Prædonem juris*. Violatorem romani juris, quum prætor urbanus esset.

13. *Labem*. Propter flagitia. — *Perniciem*. Ob latrocinia. — *Siciliæ*. Provinciæ cui per triennium præfuit.

14. *Severe*. Secundum leges. — *Religiose*. Ex jurisjurandi vestri religione.

rebit : sin istius ingentes divitiæ judiciorum religionem veritatemque¹⁵ perfregerint; ego hoc tamen assequar, ut iudicium potius reipublicæ, quam aut reus iudicibus, aut accusator reo defuisse videatur.

II. Equidem, ut de me confitear, iudices, quum multæ mihi a C. Verre insidiæ¹ terra marique factæ sint, quas partim mea diligentia devitarim, partim amicorum studio officioque repulerim; numquam tamen neque tantum periculum mihi adire visus sum, neque tantopere pertimui, ut nunc in ipso iudicio. Neque tantum me expectatio accusationis meæ, concursusque² tantæ multitudinis, quibus ego rebus vehementissime perturbor, commovet, quantum istius insidiæ nefariæ, quas uno tempore mihi, vobis³, M'. Glabrioni prætori, sociis⁴, exteris nationibus, ordini, nomini denique senatorio facere conatur : qui ita dictitat, iis esse metuendum, qui, quod ipsis solis satis esset, surripuissent; se tantum rapuisse, ut id

15. Malebat Manutius *severitatem*. Male. Quum eodem sensu *veritas* usurpetur.

II. 1. *Insidiæ*. Cicero, quum rediret e Sicilia, quam colligendis in Verrem testimoniis peragraverat, noluit a Rhegio terra iter facere propter Verris insidias : a Vibone, quæ est urbs in agro. Bruttio, Veliam, Lucaniæ oppidum, parvulo navigio transiit. Conf. Verr. II, 40.

2. *Concursus*. Nam hoc tempore propter ludos et lustrum plebs rustica Romam convenerat.

3. *Vobis*. De ipsis iudicum personis. — *Ordini*. De universo senatu dicitur. Frustra voculam *vobis* contra MSS fidem rejiciendam censet Græv.

4. *Sociis*. Siculis : eos per consulem deterrendo ab accusatione. Inf. c. 9.

— *Exteris nationibus*. Legem de repetundis earum causa latam, quantum in se est, tollendo. Vid. cap. 14. — *Ordini*. Faciendo, ut iudicia senatoribus auferantur. — *Nomini*. Ut illud non jam honori sit, sed potius ignominia. Planum est quod insidiarum genus his omnibus strueret Verres : et ipse orator paullo infra, cap. 3, explicat. Iste olim postquam pecunia Ciceronem frustra oppugnare, et ædilitatem ei corruptis suffragiis adimere tentasset (inf. 9), alia nunc ratione usus, sese ei, tempus terendo, conabatur subducere, opportunos iudices expectans, quos corrumpere. Ista autem si ei succederet fraus, tunc tantæ infamiæ et iudices, et prætor, et senatus consilii esse videbantur : itaque metum Cicero cum his omni-

multis satis esse possit; nihil esse tam sanctum, quod non violari, nihil tam munitum⁵, quod non expugnari pecunia possit. Quod si, quam audax est ad conandum, tam esset obscurus⁶ in agendo; fortasse aliqua in re nos aliquando fefellisset. Verum hoc adhuc percommode cadit, quod cum incredibili ejus audacia singularis stultitia conjuncta est. Nam ut apertus in corripiendis pecuniis fuit, sic in spe corrumpendi iudicii perspicua sua consilia conatusque omnibus fecit. Semel, ait, se in vita pertimuisse, tum, quum primum reus⁷ a me factus sit: quod, quum e provincia recens esset, invidiaque et infamia non recenti, sed vetere⁸ ac diuturna flagraret, tum ad iudicium corrumpendum tempus alienum⁹ offenderet. Itaque quum ego diem¹⁰ in Siciliam inquirendi perexiguam postu-

bus communicat; horum enim omnium maxime aut ad gloriam, aut ad utilitatem intererat, iudicia minime corrumpi. Si enim in errorem Hortensii artibus iudices inducti fuissent, quamvis non pecunia tentati, ad differendum iudicium, non tamen apud populum corruptionis famam vitabant, neque illam apud bonos justam invidiam, quod reum nocentissimum ad certam turpemque absolutionem dimisissent.

5. *Munitum*. Alludere videtur orator ad dictum illud Philippi Macedonis: « nullum esse oppidum tam munitum quod non expugnaretur, modo aellus auro onustus posset in illud ascendere ». Att. I, 16. Conf. locum similem Demosthen. in Theocrin.

6. *Obscurus*. Occultans sua facinora. Sic Horat. Epist. I, 18: « plerumque modestus Occupat obscuro speciem, taciturnus acerbi ».

7. *Reus*. A me nomen ejus ad praetorem est delatum.

8. *Vetere*, invidia et infamia. Quae

incepta ab istius quaesturae tempore, per continuos quatuordecim annos mansit ad hanc diem.

9. *Alienum*. Adversum, contrarium, quia reus a me factus esset: quo actore, non erat quod in divitiis suis ullam spem collocaret; quia ante tam severum tribunal sistebatur, quod pecunia non corrumpi posset.

10. *Diem*. *Dies* femineo genere, tempus significat, inquit Asconius; at *dies* horarum duodecim generis est masculini. Porro dies ad inquirendum postulavit Cicero centum et decem. Quibus ei datis, Verris amici quum vellent causam istius in annum sequentem protrahere, quo anno praetor futurus esset M. Metellus, consulis frater, Verris amicissimus (infr. cap. 7 et 8), subornarunt Rupilium quemdam, sive Oppium, qui senatorem, nescio quem, reum faceret, et tantummodo centum et octo dies postularet. In ea malitia hoc erat eis commodi: Rupilius scilicet, ratione temporis quod

lavissem, invenit iste, qui sibi in Achaïam biduo breviorē diem postularet: non ut is¹¹ idem conficeret diligentia et industria sua, quod ego meo labore et vigiliis consequutus sum. Etenim ille Achaïcus inquisitor ne Brundisium quidem pervenit; ego Siciliam totam quinquaginta diebus sic obii, ut omnium populorum privatorumque literas¹² injuriasque cognoscerem: ut perspicuum cuivis esse posset¹³, hominem ab isto quæsitum esse, non qui reum suum adduceret¹⁴, sed qui meum tempus obsideret.

III. Nunc¹ homo audacissimus atque amentissimus hoc cogitat. Intelligit, me ita paratum atque instructum in judicium venire, ut non modo in auribus vestris, sed in oculis omnium, sua furta atque flagitia defixurus sim. Videt, senatores multos esse testes audaciæ suæ; videt multos equites romanos, frequentes præterea cives atque socios, quibus ipse insignes injurias fecerit. Videt etiam tot tam² graves ab amicissimis civitatibus legationes cum publicis auctoritatibus³ ac

brevius postulaverat, priorem agendi locum obtinebat; et dum ejus ex Achaïa reditus exspectaretur, dum accusando tempus tereret, suos Ciceroni dies adimebat, et causa Verris facile ad prætorem alium, aliosque judices, perveniebat. Vid. argum. et inf. 11. — Ernest. habet « diem in Sicilia ».

11. Abest *is*. Dedit Lambin. — Non quod se tam diligentem et industrium putabat, sed ut meum tempus obsideret; non id ei propositum fuit, quod ego meo labore ac meis vigiliis in Sicilia præstiti, ut in Achaïa investigaret et colligeret, ea quæ ad condemnandum reum pertinebant, sed id spectavit ut mihi tempus eriperet.

12. *Literas*. Testimonia publica, tabulas publicas.

13. Sic Græv. Lall. etc. Alii, *possit*.

14. *Adduceret*. In judicium; non qui revera eum accusare vellet, quem reum fecisset, et cujus causa tempus illud postulasset, sed qui meum tempus impediret, et occuparet.

III. 1. *Nunc*. Verres audacia simul et dementi quodam furore impulsus, illas jam meditatur insidias, quæ ad totam remp. pertinent, ut supra dixit Cicero.

2. Grævius addidit *tam*, quod habet vetus interpretes. Habent quoque MSS Parisienses. J. V. L.

3. *Auctoritatibus*. Literis a communi civium datis.

testimoniis convenisse. Quæ quum ita sint, usque eo de omnibus bonis male existimat; usque eo senatoria judicia perdita⁴ profligataque esse arbitratur, ut hoc palam dictitet, non sine causa se cupidum pecuniæ fuisse, quoniam tantum in pecunia præsidium experiatur esse; sese (id quod difficillimum fuerit) tempus ipsum emisse⁵ iudicii sui; quo cetera facilius emere posset: ut, quoniam criminum⁶ vim subterfugere nullo modo poterat, procellam temporis devitaret. Quod si non modo in causa, verum in aliquo honesto præsidio, aut alicujus eloquentia, aut gratia, spem aliquam collocasset; profecto non hæc omnia colligeret atque aucuparetur; non usque eo despiceret contemneretque ordinem senatorium, ut arbitrato ejus deligeretur ex senatu, qui reus fieret⁷: qui, dum hic, quæ opus essent, compararet⁸, causam interea ante eum diceret. Quibus ego rebus quid iste speret, et quo animum intendat, facile perspicio. Quamobrem vero se confidat aliquid perficere posse, hoc [Glabrione⁹] prætore, et hoc consilio¹⁰, intelligere non possum. Unum illud intelligo, quod populus romanus¹¹ in rejectione¹² iudicum iudicavit, ea spe istum fuisse præditum, ut omnem rationem salutis in pecunia poneret; hoc

4. *Perdita*. Omnino nulla. *Profligata*. Violata, addicta, nummaria.

5. *Emisse*. Effecisse pecunia sua, ut, interposito illo inquisitore Achaico, res duceretur in annum sequentem; quo anno ab hoc prætore, et ab horum iudicum magna parte ad alios causa transferretur.

6. *Criminum*. Quæ a me proferentur. — *Procellam temporis*. Ab optimo prætore et severissimis iudicibus impendentem.

7. *Qui reus fieret*. Quem accusan-

dum ab isto Achaico prætore curaret, sive innocentem, sive nocentem, ut ipse tempus protraheret.

8. *Compararet*. Largitione et corruptela.

9. Verbum hoc *Glabrione* e glossamate natum. Asconius et cod. unus Paris. omittunt.

10. *Consilio*. Consensu iudicum.

11. Vulg. *prætor i. r.* Natus error e compendio P. R. J. V. L.

12. *Rejectione*. Utrumque certus numerus iudicum ab accusatore et reo

erepto præsidio, ut nullam sibi rem adiumento fore arbitraretur.

IV. Etenim quod est ingenium tantum? quæ tanta facultas dicendi et copia, quæ istius vitam, tot vitiis flagitiisque convictam¹, jam pridem omnium voluntate iudicioque damnatam², aliqua ex parte possit defendere? Cujus ut adolescentiæ maculas ignominiasque præteream; quæstura, primus gradus honoris, quid aliud habet in se, nisi Cn. Carbonem³ spoliatum a quæstore suo pecunia publica? nudatum⁴ et proditum consulem? desertum exercitum? relictam provinciam? sortis⁵ necessitudinem religionemque violatam? cujus legatio⁶ exitium fuit Asiæ totius et Pamphyliæ: quibus in provinciis multas domos, plurimas urbes⁷, omnia fana depeculatus est, quum in Cn. Dolabellam scelus⁸ suum illud pristinum renovavit et instauravit quæstorium; quum eum, cui legatus et pro quæstore fuisset, et in invidiam suis maleficiis adduxit, et in ipsis periculis non solum deseruit, sed etiam oppugnavit ac

rejeciebatur: Verres optimos quosque rejecerat, quos nullo modo corrumpi posse arbitrabatur. Vide infra ad cap. 6, not. 7.

IV. 1. *Convictam*. Quæ tot monumentis vitiorum et iudiciis convincitur. Gradus est ad *damnatam*, quod sequitur. Frustra autem Lambin. ex MSS, qui *conjunctam* habebant, conjecit *coinquinatam*.

2. *Damnatam*. Quam omnes jam damnatam vellent, et damnandam esse judicant.

3. *Cn. Carbonem*. Eadem fusius narrantur inf. cap. 13.

4. *Nudatum*. Vehementer rem iterando anget orator, quasi parum antea fuisset dictum. Hanc periodum laudat Diomedes, edit. Putsch. 463,

«quæ compositione adeo decoratur, ut, si quid solvere et commutare voveris, pereat omnis rerum atque verborum et dignitas atque potestas». Ceterum ille verba quædam loco mutat, nempe quod e memoria recitaret.

5. *Sortis*. Vide Divin. cap. 19.

6. *Legatio*. Post quæsturam legatus fuit Verres Dolabellæ, cui Cilicia provincia constituta fuerat. Verr. I, cap. 17.

7. Lambin. malit «plurimas domos, multas urbes». Quod probat Grævius, si libri subscriberent.

8. *Scelus suum*. Ut enim Cn. Carbonem, dum quæstor ejus esset, spoliavit; sic Dolabellam insidiis oppugnavit et accusatum prodidit. Verr. I, 15, 38.

prodidit. Cujus prætura urbana, ædium⁹ sacrarum fuit publicorumque operum depopulatio; simul in jure dicundo, bonorum¹⁰ possessionumque, contra omnium instituta, addictio, et condonatio. Jam vero omnium vitiorum suorum plurima et maxima constituit monumenta et indicia in provincia Sicilia: quam iste per triennium ita vexavit ac perdidit, ut ea restitui in antiquum statum nullo modo possit; vix autem per multos annos, innocentesque prætores aliqua ex parte recreari aliquando posse videatur. Hoc prætore Siculi neque suas leges, neque nostra senatusconsulta, neque communia jura tenuerunt¹¹: tantum quisque habet in Sicilia, quantum hominis avarissimi et libidinosisissimi aut imprudentiam subterfugit¹², aut satietati superfluit.

V. Nulla res per triennium, nisi ad nutum istius, judicata est; nulla res tam patria¹ cujusquam atque avita fuit, quæ non ab eo, imperio istius, abjudicaretur². Innumerabiles pecuniæ ex aratorum³ bonis novo nefarioque instituto coactæ; socii⁴ fidelissimi in hostium numero existimati; cives romani servilem in modum cruciati et necati; homines nocentissimi propter

9. *Ædium sacrarum*. Verr. I, 49 et seqq.

10. *Bonorum*. Bona et possessiones, Verres quum jus diceret, addixit ac tradidit quibus voluit, neglectis eorum, qui ante se prætores fuerant, edictis et institutis. Verr. I, 41, et seqq.

11. *Tenuerunt*. Contra Verris libidinem Siculis neque suæ leges, neque nostra S. C., ne commune quidem gentium jus opem ullam attulerunt.

12. *Subterfugit*. Nihil est Siculis reliqui, nisi quod, ignorante illo, aut lassato et satiato, servaverunt.

V. 1. *Tam patria*. Tam legitimo jure possessa, qualia sunt quæ ab avis ad parentes, atque inde ad filios hereditario jure veniunt.—Manut. habet *patria*.

2. *Abjudicaretur*. Ejus judicis sententia auferretur.

3. *Aratorum*. Aratores frumenti decimam populo rom. dabant; hos tribus amplius decumis per publicanos a se subornatos Verres exhaustit. Verr. III. Ceterum breviter hic percurrit quæ fusius suo loco, in accusatione explicat.

4. *Socii*. De his et seqq. vid. Verr. V.

pecunias iudicio liberati; honestissimi atque integer-
rimi, absentes rei facti, indicta causa damnati et
ejecti⁵; portus munitissimi⁶, maximæ tutissimæque
urbes piratis prædonibusque patefactæ; nautæ mili-
tesque Siculorum, socii nostri atque amici, fame ne-
cati; classes optimæ atque opportunissimæ⁷ cum
magna ignominia populi romani amissæ et perditæ.
Idem iste prætor monumenta antiquissima partim re-
gum locupletissimorum, quæ illi ornamento⁸ urbibus
esse voluerunt, partim etiam nostrorum imperato-
rum, quæ victores civitatibus Siculis aut dederunt⁹,
aut reddiderunt, spoliavit nudavitque¹⁰ omnia. Neque
hoc solum in statu is ornamentisque publicis fecit, sed
etiam delubra omnia, sanctissimis religionibus conse-
crata, depeculatus est; deum denique nullum Siculis,
qui ei paullo magis affabre atque antiquo artificio
factus videretur, reliquit. In stupris vero et flagitiis
nefarias ejus libidines commemorare, pudore deter-
reor: simul illorum calamitatem commemorando au-
gere nolo, quibus liberos conjugesque suas integras
ab istius petulantia conservare non licitum est. At
enim¹¹ hæc ita commissa sunt ab isto, ut non cognita
sint ab omnibus. Hominem esse arbitror neminem,
qui nomen istius audierit, quin facta quoque ejus ne-
faria commemorare possit: ut mihi magis timendum

5. *Ejecti*. In patriam redire prohibiti.

6. *Portus munitissimi*. Syracusas per αὐξήσιον h. l. significat, quarum in portum victores piratæ sunt ingres-
si. Verr. V, cap. 37.

7. *Opportunissimæ*. Quarum, ad belli et mercaturæ usum, maxima erat opportunitas. — *Ignominia*. Quia fugientem populi romani classem incenderunt.

8. MS Franc. 1, «ornamenta».

9. *Dederunt*. Quum captis urbibus ea, quæ belli jure ad se pertinebant, Siculis relinquere et conservare; quæ vero Carthaginienses e Sicilia asportaverant, ea veteribus dominis restituerunt.

10. Palat. pr. «connudavitque», quod videtur probare Gruterus. J. V. L.

11. *At enim*. Obiectio per ironiam.

sit, ne multa crimina prætermittere, quam ne qua in istum fingere existimer. Neque enim mihi videtur hæc multitudo, quæ ad audiendum convenit, cognoscere ex me causam voluisse, sed ea, quæ scit, mecum recognoscere.

VI. Quæ quum ita sint, iste homo amens ac perditus alia mecum ratione pugnat: non id agit, ut aliqujus eloquentiam mihi opponat; non gratia, non auctoritate cujusquam, non potentia nititur: simulat his se rebus confidere; sed video, quid agat; neque enim agit occultissime. Proponit inania¹ mihi nobilitatis², hoc est, hominum arrogantium nomina; qui non tam me impediunt, quod nobiles sunt, quam adjuvant, quod noti³ sunt: simulat se eorum præsidio confidere, quum interea aliud⁴ quiddam jam diu machinetur. Quam spem nunc habeat in manibus, et quid molitur, breviter jam, judices, exponam: sed prius, ut ab initio res ab eo constituta sit, quæso, cognoscite. Ut primum e provincia rediit, redemptio⁵ est hujus

VI. 1. *Inania*. Vana et futilia, quum ab eis virtus absit. Sic ad Appium: «Etiamne tu ullam Appietatem, aut Lentulitatem valere apud me plus quam ornamenta virtutis existimas? Quum ea consequutus nondum eram, quæ sunt hominum opinionibus amplissima, tamen ista vestra nomina, numquam sum admiratus; viros eos, qui ea vobis reliquissent, magnos arbitrabar».

2. *Nobilitatis*. Hominum nobilium qui Verri favebant. Ii erant Q. Hortensius, patronus ejus, consul designatus; tres Metelli, quorum Quintus consul erat designatus, Marcus prætor designatus, Lucilius Siciliæ præerat; C. Curio consularis; Q. Metellus Pius Scipio a Metello Pio, Numidici filio

adoptatus, ac præterea Scipiones omnes, et Marcelli.

3. *Noti*. I. e. infames. Acerbe dictum per agnominationem verborum *nobilis* et *notus*. Sic pro Cælo. «Clodia muliere non solum nobili, sed etiam nota», et pro Flacco. «homines apud nos noti, inter suos nobiles».

4. *Ascon*. «a. quiddam diu». Unde Ern. conj. «a. quid jam diu». J. V. L.

5. *Redemptio*. Homines, corruptoriorum judiciorum artifices, grandi mercede a Verre redemerunt procurationem corruptoriorum judiciorum, operam suam, in ejus absolutione præstanda, vendiderunt. Contumeliose ducta metaphora ab operariis, qui opus aliquid faciendum, certo pretio, redimunt, seu conducunt. Sic Pis. 36.

judicii facta grandi pecunia : ea⁶ mansit in conditione atque pacto usque ad eum finem, dum iudices rejecti sunt⁷. Posteaquam rejectio iudicum facta est, quod et in sortitione istius spem⁸ fortuna populi romani, et in rejiciendis iudicibus mea diligentia istorum impudentiam vicerat, renunciata est tota conductio⁹. Præclare se res habebat : libelli nominum vestrorum consiliique hujus in manibus erant omnium ; nulla nota¹⁰, nullus color, nullæ sordes videbantur his sententiis allini posse : quum iste repente ex alacri atque læto sic erat humilis atque demissus, ut non modo populo romano, sed etiam sibi ipse condemnatus videretur. Ecce autem repente, his diebus paucis¹¹, comitiis¹² consularibus factis, eadem illa vetera consilia pecunia majore repetuntur, eademque vestræ famæ fortunisque omnium

Inde apparet non ita novas esse eas societates quas nos *assurances* vocamus, multoque hac in parte nobis solertiores fuisse Romanos, qui non grandinem, seu incendium, sed ipsam mortem atque infamiam redimerent.

6. Abest *ea*. J. V. L.

7. *Rejecti sunt*. Iudicum nomina primo in urnam sortito mittebantur, ut de pluribus necessarius numerus conficeretur ; postea accusator ac reus, ex illo numero rejiciebant, quos sibi aut iniquos, aut ex aliqua re incommodos fore putarent. Tunc in eorum locum, qui rejecti fuerant, subsortiebatur prætor alios, quibus iudicum legitimus numerus completur. His perfectis, nomina selectorum iudicum in libellis seu tabellis palam inscribebantur, ne pravi aliqui se inter eos obtruderent.

8. *Istius spem*. Sperabat Verres improbos senatores ex urna educendos : fecit fortuna populi romani, ut optimi

cujusque nomen educeretur. *Diligentia* Ciceronis fuit in rejiciendis suspectis ; *impudentia* Verris in retinendis qui aperte erant improbi.

9. *Asconius conditio*, quod probant Gronov. et Ernest. — *Renunciata*. Postquam rejecti sunt iudices, displicuit negotium redemptoribus, et resiliunt a conditione et pacto.

10. *Nota*. Nullus fraudi locus in hoc iudicio, qualem in Varroniano illo adhibuit Hortensius. H. l. intelliges ex annot. ad Divin. cap. 7.

11. *His diebus paucis*. Familiare Ciceroni pro « paucis post diebus ». Sic Catull. « cenabis bene, mi Fabulle, paucis, si di dederint, diebus ».

12. *Comitiis consularibus*. Quibus Hortensius Verris defensor et Q. Metellus consules designati fuerant. Fiebant autem comitia consularia vulgo ante diem vi kal. sextil. (27 jul.) ; accusationis vero primus dies fuit nonæ sextiles. Inf. cap. 10.

insidiæ¹³ per eosdem homines comparantur. Quæ res primo, iudices, pertenui nobis argumento indicioque¹⁴ patefacta est : post aperto suspicionis introitu ad omnia intima istorum consilia sine ullo errore pervenimus.

VII. Nam ut Hortensius, consul designatus, domum reducebatur e campo, cum maxima frequentia ac multitudine¹ : fit obviam casu ei multitudini C. Curio²; quem ego hominem, honoris potius quam contumeliæ causa, nominatum volo. Etenim ea dicam, quæ ille, si commemorari nolisset, non tanto in conventu, tam aperte palamque dixisset : quæ tamen a me pedetentim³ cauteque dicentur; ut et amicitiae nostræ, et dignitatis illius habita ratio esse intelligatur. Videt ad ipsum⁴ fornicem Fabianum in turba Verrem; appellat hominem, et ei voce maxima gratulatur⁵; ipsi Hortensio, qui consul erat factus, propinquis necessariisque ejus⁶, qui tum aderant, verbum nullum facit; cum hoc consistit, hunc amplexatur, hunc jubet sine cura esse : « Renuntio, inquit, tibi, te hodiernis comitiis esse absolutum ». Quod quum tam multi homines honestissimi audissent, statim ad me defertur : imo

13. *Insidiæ*. De differendo iudicio. Vide plura ad cap. 2.

14. Alii, « iudicioque ». J. V. L.

VII. 1. Sic plur. codd. et vet. edd. Gruter. antem cum Pall. et Vict. « a multitudine ».

2. *C. Curio*. Consularis et triumphalis vir, pater C. Curionis violentissimi illius tribuni plebis, quem Cæsar defensorem tanta pecunia paravit. Sueton. in Jul. cap. 29.

3. *Pedetentim*. Prudenter : ne odio aut ira impulsus videar.

4. *Fornicem*. Arcum triumphalem. Fornix Fabianus erat in Sacra via

constructus a Fabio censore (A. U. C. 645), qui, devictis Allobrogibus, Allobrogicus est cognominatus, ut videre est apud Velleium, II, 10 : « Fabio Pauli nepoti ex victoria cognomen Allobrogico inditum ». Adde Plin. XXXIII, 2, 50. Val. Maxim. VI, 9.

5. Addunt multi *victoriam*. Quæ vox commodius abest a pl. MSS. J. V. L. — Præsertim quum paullo infra sit « renuntio... te absolutum »; frigidius esset ».

6. *Ejus*. Hortensii, non C. Verris, ut putat Hotom.

vero, ut quisque me viderat, narrabat. Aliis illud indignum, aliis ridiculum videbatur : ridiculum iis, qui istius causam in testium fide, in criminum ratione, in iudicum potestate, non in comitiis consularibus positam arbitrabantur; indignum iis, qui altius perspiciebant, et hanc gratulationem ad iudicium corrumpendum spectare arbitrabantur⁷. Etenim sic ratiocinabantur, sic honestissimi homines inter se et mecum loquebantur : aperte jam ac perspicue nulla esse iudicia : qui reus pridie jam ipse se condemnatum putabat, is, posteaquam defensor ejus consul est factus, absolvitur. Quid igitur? quod tota Sicilia⁸, quod omnes Siculi, omnes negotiatores⁹, omnes publicæ privatæque literæ Romæ sunt, nihilne id valebit? — nihil¹⁰, invito consule designato. Quid iudices? non crimina, non testes, non existimationem populi romani sequentur? — non : omnia in unius potestate ac moderatione¹¹ vertentur.

VIII. Vere loquar, iudices : vehementer me hæc res commovebat. Optimus enim quisque ita loquebatur : «iste quidem tibi¹ eripietur; sed nos² non tenebimus iudicia diutius : etenim quis poterit, Verre absoluto, de transferendis iudiciis recusare?» Erat omnibus molestum : neque eos tam istius hominis perditum subita lætitia, quam hominis amplissimi³ nova gratulatio

7. Olim videbant. Inde quum hexametrum oriretur, Lamb. coniecit *arbitraretur*, quod in MS pl. est inventum.

8. *Quod tota Sicilia.* Non semel nobis illud mirandum occurrit, qua arte Cicero loquentes ceteros inducat, ita ut non jam oratorem audire, verum diversis hominum colloquiis adesse videamur.

9. *Negotiatores.* Cives romani, qui

in Sicilia negotiantur; testimonia denique tum publica, tum privata.

10. *Nihil.* Fingit hæc orator h. l. et infra a Verris amicis responderi.

11. *Moderatione.* Unus Hortensius omnia reget ac moderabitur.

VIII. 1. *Tibi.* Te accusante, a iudicio per consulem liberabitur.

2. *Nos.* Senatores.

3. *Amplissimi.* Curionis.

commovebat. Cupiebam dissimulare me id moleste ferre; cupiebam animi dolorem vultu tegere, et taciturnitate celare. Ecce autem illis ipsis diebus, quum prætore designati sortirentur, et M. Metello obtigisset, ut is de pecuniis repetundis quæreret⁴; nuntiatur mihi, tantam isti gratulationem esse factam, ut is quoque domum⁵ mitteret, qui uxori suæ nuntiarent. Sane ne hæc quidem res mihi placebat: neque tamen, quid tantopere in hac sorte⁶ metuendum mihi esset, intelligebam. Unum illud ex hominibus certis, ex quibus omnia comperi, reperiēbam: fiscos⁷ complures cum pecunia Siciliensi a quodam senatore⁸ ad equitem romanum esse translato; ex his quasi X fiscos ad senatorem illum relictos esse, comitorum meorum⁹ nomine; divisores¹⁰ omnium tribuum noctu ad istum vocatos. Ex quibus quidam, qui se omnia mea causa debere¹¹ arbitrabatur, eadem illa nocte ad me venit; demonstrat, qua iste oratione usus esset: com-

4. *Quæreret.* Quæsitores esset, in annum sequentem. Designati enim prætores, antequam magistratum inirent, sortiri solebant, de diversis quæstionibus in Urbe exercendis; vide ad calc. Verr. I, de Præt. urban.

5. *Pueros d. m.* Sed abest a pluribus MSS. J. V. L.

6. *Sorte.* In hoc munere, quod M. Metello prætori sorte obtigerat.

7. *Fiscos.* Sportas, pecunia refertas, quam Verres ex Siciliæ furtis conflaverat.

8. *Senatore.* Suspiciantur senatorem alii Crassum, alii Hortensium; equitem vero Publicium quemdam temporibus illis in dividenda populo pecunia famosum.

9. Sic recte Ascon. et Manut. Vulgo abest *meorum*. — Hoc autem loco co-

mitia ædilitis significantur, quæ post consularia et prætorialia fiebant. Verres pecuniam hanc dederat, ut, nempe corruptis suffragiis, ædilitate deiceretur Cicero, quam petebat.

10. *Divisores.* Ex h. l. patet suum cuique tribui fuisse *divisorem*, i. e. hominem qui pecuniam, quum quis candidatus largitione in populum uti vellet, in tribu sua viritum *divideret*. Initio per se non turpis res erat; benignitate enim populum conciliari leges sinebant. Sed postquam per hos corruptæ sunt tribus, eam tandem ob causam infame et suspectum *divisoris* nomen factum est, atque in convicii loco dictum. Verr. III, 69. Muren. 26, etc.

11. Alii, « facere debere ». Locutio Ciceroni familiaris, qua subaud. *facere*.

memorasse istum, quam liberaliter¹² eos tractasset etiam antea, quum ipse præturam petisset, et proximis¹³ consularibus prætoriisque comitiis; deinde continuo esse pollicitum, quantam vellent pecuniam, si me ædilitate deiecissent. Hoc alios negasse audere¹⁴; alios respondisse, non putare id perfici posse; inventum tamen esse fortem amicum ex eadem familia Q. Verrem, Romilia¹⁵, ex optima divisorum disciplina, patris istius discipulum atque amicum, qui, H-S quingentis millibus depositis¹⁶, id se perfecturum polliceretur; et fuisse tamen¹⁷ nonnullos, qui se una facturos esse dicerent. Quæ quum ita essent, sane benivolo animo me, ut magnopere caverem, præmonebat.

IX. Sollicitabar rebus maximis¹ uno atque eo per exiguo tempore: urgebant comitia; et in² his ipsis oppugnabar grandi pecunia. Instabat iudicium; ei quoque negotio fisci Sicilienses minabantur. Agere, quæ ad iudicium pertinebant, libere, comitiorum metu³ deterrebar; petitioni toto animo servire, propter

12. *Quam liberaliter.* Dederat Verres sestertiū octoginta millia (16,400 fr.), ut prætore renuntiaretur.

13. *Proximis.* Novissimis. Non semel suspicionem eandem injicit orator Verris pecunia corrupta fuisse comitia, ut M. Metellus prætore, Q. Hortensius et Q. Metellus consules renuntiarentur.

14. Lambin. addit *se.* J. V. L.

15. *Romilia.* Subaud. *ex tribu.* Moris erat ut quum minus notus appellaretur Romanus, a tribu sua designaretur.

16. *H-S quingentis mill.* (102,500 fr.) *depositis.* A Verre apud sequestres, ad corruptenda suffragia.

17. Lambin. edidit *tandem* e conjectura Hotomanni. J. V. L.

IX. 1. *Rebus maximis.* Petitione

ædilitatis, et accusatione: quæ duo quam sibi contraria sint pro Muren. cap. 21, explicat, ubi hæc maxime ad istum locum faciunt: « nescio quo pacto semper hoc fit, neque in uno atque altero animadversum est, sed jam in pluribus, simul atque candidatus accusationem meditari visus est, ut honorem desperasse videatur ». Et multa in hanc sententiam.

2. Vulg. abest *in.* Ernest. post Lambinum e MSS addidit. J. V. L.

3. *Comitiorum metu.* Quia accusatio libertatem et minas exigit; *petitio* blandimenta et preces; et ut pro Muren. loc. supra cit. ait « accusandi terrores et minæ, et populi opinionem a spe adipiscendi avertant, et amicorum studia debilitant ».

judicium, non licebat. Minari denique divisoribus ratio non erat, propterea quod eos intelligere videbam, me hoc iudicio districtum atque obligatum futurum. Atque hoc ipso tempore Siculis denuntiatum esse audio, primum ab Hortensio, domum ad illum ut venirent; Siculos sane in eo liberos fuisse, qui, quamobrem arcesserentur, quum intelligerent, non venisse⁴. Interea comitia nostra, quorum iste se, ut ceterorum hoc anno comitiorum dominum esse arbitrabatur, haberi cœpta sunt. Coursare iste, homo potens, cum filio blando et gratioso⁵, circum tribus; paternos⁶ amicos, hoc est, divisores, appellare omnes et convenire. Quod quum esset intellectum et animadversum; fecit animo libentissimo populus romanus, ut, cujus divitiæ me de fide deducere non potuissent, ne ejusdem pecuniæ de honore deicerent⁷. Posteaquam illa petitionis magna cura liberatus sum, animo cœpi multo magis vacuo ac soluto, nihil aliud, nisi de iudicio, agere et cogitare. Reperio, iudices, hæc ab istis consilia inita et constituta, ut, quacumque opus esset ratione, res ita duceretur, ut apud M. Metellum prætorem causa diceretur; in eo esse hæc commoda: primum M. Metellum, amicissimum; deinde Hortensium consulem non

4. *Venisse*. Ad hunc locum animadvertit Asconius, inconsequentem esse locutionem similemque solœcismi, siquidem « non venisse » legeris: nam si « non venissent », errorem non esse. Sic etiam scripsit Desjard. et proponit J. V. L. J. F. Gron. Obs. I, 12, scribi voluit « Siculos s. i. e. liberos fuisse, quemadmodum arcesserentur quum intelligerent, non venisse ». Hunc sequutus est Græv. Schütz. autem duas voculas « fuisse, qui » omnino delet. Quum vero facillimum semper fuerit, obstantia verba abicere et am-

putare, quærit Garat. veterem lectionem tueri, si nimirum « qui quum intelligerent » positam existimemus pro « quum hi intelligerent », quod sæpius occurrit eloquendi genus. Quid id est, sensus est apertus.

5. *Blando et gratioso*. Feminis ac maxime meretricibus blanditiæ conveniunt, gratia vero quæ potest in adolescentibus esse sine infamia? Ascon.

6. *Paternos*; alii, *patronos*.

7. *Pecunia d. h. deicerer*. Sic codex Guelferbytanus. J. V. L. — « Pecuniis d. h. deicerer » Desjard. « pecuniæ

solum, sed etiam Q. Metellum; qui quam isti sit amicus, attendite: dedit enim *prærogativam*⁸ suæ voluntatis ejusmodi, ut isti pro *prærogativis* eam reddidisse videatur. An me taciturnum tantis de rebus existimavistis? et, in tanto reipublicæ existimationisque meæ periculo, cuiquam consulturum potius, quam officio et dignitati meæ? Arcessit alter consul⁹ designatus Siculos: veniunt nonnulli, propterea quod L. Metellus esset prætor in Sicilia. Cum iis ita loquitur: se consulem esse; fratrem suum alterum Siciliam provinciam obtinere, alterum esse quæsiturum de pecuniis repetundis; Verri ne noceri possit, multis rationibus esse provisum.

X. Quid est, quæso, Metelle, iudicium corrumpere, si hoc non est? testes, præsertim Siculos, timidos homines et afflictos, non solum autoritate deterrire, sed etiam consulari metu, et duorum prætorum potestate? Quid faceres pro homine innocente et propinquo, quum, propter hominem perditissimum atque alienissimum, de officio ac dignitate decedis; et committis, ut, quod ille dictitat, alicui, qui te ignorat,

de honore deicerent * Græv. Ern. Gar.

8. *Prærogativam*. Ludit Tullius in voce *prærogativa*. Sic enim dicebatur centuria, seu tribus, quæ «præ ceteris rogabatur», i. e. quæ prima ex censu, seu ex ordine quo in censorum tabulis fuerat descripta, suffragium in comitiis ferebat. In *prærogativa* tantum erat momenti, ut, quem elegerat magistratum, aliz numquam rejicerent. Hinc *prærogativa* quandoque, ut h. l. pro nomine secundo, certo signo, indicioque ac pignore, et quasi arrhabone futuræ rei optatæ usurpatur. Vid. J. F. Gronov. Obs. IV, 1. Sensus ergo est: Metellus, arcessendo Siculos, dedit

Verri *prærogativam*, i. e. indicium eorum, quæ salutis illius gratia esset facturum, pro *prærogativis*, i. e. ut corruptarum a Verre centuriarum mercedem solveret, ut beneficium Verris persolveret, qui *prærogativarum* centuriarum suffragia redemerat, quibus consul ipse Metellus, et frater ejus prætor factus est.

9. *Alter consul*. Q. Metellus. Scilicet tres Verri favebant Metelli, unus designatus consul cum Hortensio, alter prætor urbanus, cui obtigerat in annum sequentem de repetundis quæstio, et qui tunc inter iudices (c. 10) erat; tertius Siciliæ prætor.

verum esse videatur? Nam hoc Verrem dicere aiebant, te non fato¹, ut ceteros ex vestra familia, sed opera sua, consulem factum. Duo igitur consules et quæsitores erunt ex illius voluntate. Non solum effugiemus, inquit, hominem in quærendo nimium diligentem, nimium servientem populi existimationi, M'. Glabronem: accedet nobis etiam illud. Iudex est M. Cæsonius, collega nostri accusatoris, homo in rebus judicandis spectatus et cognitus; quem minime expediat esse in eo consilio, quod conemur aliqua ratione corrumpere: propterea quod jam antea, quum iudex in Juniano² consilio fuisset, turpissimum illud facinus non solum graviter tulit, sed etiam in medium protulit. Hunc iudicem ex kal. januar. non habebimus³. Q. Manlium et Q. Cornificium, duos severissimos atque integerrimos iudices, quod tribuni plebis tum erunt, iudices non habebimus. P. Sulpicius, iudex tristis et integer, magistratum ineat⁴ necesse est nonis decembr. M. Crepereius, ex acerrima⁵ illa equestri familia et disciplina; L. Cassius, ex familia tum ad ceteras res, tum ad iudicandum severissima; Cn. Tremellius, homo summa religione et diligentia: tres hi homines veteres⁶ tribuni militares sunt designati: ex kal. januar. non iudicabunt.

X. 1. *Non fato*. Alludit ad facete dictum Nævii poetæ: « Fato Metelli Romæ fiunt consules », cui tunc Metellus consul iratus responderat: « Dabunt malum Metelli Nævio poetæ ».

2. *Juniano*. Quum Oppianicus, iudice quæstionis Junio, damnatus est: tunc enim Cæsonius iudex corruptos iudices indicavit. Vide pro Cluent.

3. *Non habebimus*. Quia erit ædilis, et magistratus iudicium partes sustinere per leges non possunt.

4. *Lambin. oportet*. J. V. L. — *No-*

nis decembr. Tribuni plebis mense decembri magistratum inibant: quarto idus, secundum Livium, XXXIX, 52, et Dionys. Hal. VI; nonis vero, ætate Ciceronis, ut h. l. patet.

5. *Ex acerrima*. Ex familia equestri natus, nunc autem senator; quod ex eo liquet, quia iudex est. Severis vero institutus disciplinis, quæ in equestri ordine vigeant.

6. *Veteres*. Antiquæ severitatis. — *Tribuni militares* ab imperatoribus ad annum usque 393; postea vero Romæ

Subsortiemur etiam in M. Metelli locum, quoniam is huic ipsi quæstioni præfuturus est. Ita secundum kal. januar. et prætore, et prope toto consilio commutato, magnas accusatoris minas, magnamque iudicii expectationem ad nostrum arbitrium libidinemque eludemus. Nonæ sunt hodie sextiles; hora nona convenire cœpistis. Hunc diem jam ne numerant quidem⁷. Decem dies sunt ante ludos votivos⁸, quos Cn. Pompeius factururus est; hi ludi dies quindecim auferent; deinde continuo⁹ Romani consequentur. Ita prope XL¹⁰ diebus interpositis, tum denique se ad ea, quæ¹¹ a nobis dicta erunt, responsuros esse arbitrantur, deinde se ducturos et dicendo, et excusando¹², facile ad ludos Victoriæ¹³. Cum his plebeios¹⁴ esse conjunctos: secundum quos¹⁵ aut nulli, aut pauci dies ad agendum futuri sunt. Ita defessa ac refrigerata accusatione, rem integram ad M. Metellum prætorem esse venturam. Quem ego hominem, si ejus fidei diffisus essem, iudicem non retinuissem: nunc tamen eo animo sum, ut eo

in comitiis sunt creati. T. Liv. VII, 5.

7. *Ne numerant quidem.* Quia proximum est ut, præcone admonente, iudicium solvatur. « Majores novam relationem post horam decimam in senatu fieri vetabant. » Sen. de Tranq. an. 15.

8. *Ludos votivos.* Quos voverat Cn. Pompeius, si Sertorium vinceret; et quos factururus est die XVI sextil. qui postea Augustus.

9. *Continuo.* Oratorie. Nam post ludos votivos quatuor toti vacui sequebantur dies, ante *Romanos*, seu *magnos ludos*.

10. *Prope XL diebus.* Nempe XXXVIII.

11. *Quæ a nobis.* Diebus illis decem ante votivos ludos, et illis quatuor

ante ludos Romanos, quibus agere licuerit.

12. *Excusando.* Aut occupationem, aut valitudinem. Lambinus dedit *recusando*. MS Gud. *accusando*. J. V. L.

13. *Ludos Victoriæ.* Hos Sulla instituit, Telesino Samnitum duce dubia pugna victo. Vell. Pat. II, 27. Celebrabantur XXVII sept. per quinque dies.

14. *Plebeios.* Plebei ludi, regibus exactis, pro libertate populi instituti, per triduum in Circo edebantur. Sequebantur, quadriduo interposito, Victoriæ ludos et mittebantur die v octobris.

15. *Secundum quos.* Post ludos plebeios ad nonas decembres, quo die tres ex iudicibus magistratum inituri erant, aut nulli, aut pauci ad iudican-

judice, quam prætor, hanc rem transigi malim; et jurato¹⁶ suam, quam injurato aliorum tabellas committere.

XI. Nunc ego¹, judices, jam vos consulo, quid mihi faciendum putetis: id enim consilii mihi profecto taciti dabit, quod egomet mihi necessario capiendum intelligo. Si utar ad dicendum meo legitimo² tempore, mei laboris, industriæ diligentiaque capiam fructum; et ex³ accusatione perficiam, ut nemo umquam post hominum memoriam paratior, vigilantior, compositior⁴ ad iudicium venisse videatur. Sed in hac⁵ laude industriæ meæ, reus ne elabatur, summum periculum est. Quid est igitur, quod fieri possit? non obscurum, opinor, neque absconditum. Fructum istum laudis, qui ex perpetua oratione percipi potuit, in alia tempora reservemus: nunc hominem tabulis, testibus, privatis publicisque literis auctoritatibusque accusemus. Res omnis mihi tecum erit, Hortensi. Dicam aperte. Si te mecum dicendo ac diluendis criminibus in hac causa contendere putarem; ego quoque in accusando, atque in explicandis criminibus operam consumerem: nunc, quoniam pugnare contra me instituisti, non

dum dies futuri sunt propter ferias, festosque dies.

16. *Jurato*. Judices jurabant; prætor non jurabat. Mavult Cicero, ut Metellus sit iudex et suam ipse ferat sententiam, quam ut sit prætor et in sua potestate habeat tabellas omnium iudicium.

XI. 1. Schütz, post Ernestium, malit «Non ego». Frustra. J. V. L.

2. *Legitimo tempore*. Viginti diebus: tot enim dabat lex ad accusandum, totidemque defensori ad respondendum. Ascon.

3. *Ex hoc loco* non de latina consuetudine dicitur, estque mihi suspectum. An fuit, «ea accusatione»? Ernest. J. V. L.

4. Græv. malit, ex interprete veteri, *copiosior*; ita tamen ut optime vulgata lectionem explicari posse fateatur. Nam *compositior* ad oratoriam in componendis argumentis diligentiam refertur. Sic «cognoscere et compere causas» est meditari et præparare quid in causa dicendum sit.

5. *In hac laude*. Dum quæro hanc laudem.

tam ex tua natura, quam ex istius tempore⁶ et causa, malitiose; necesse est istiusmodi rationi aliquo consilio obsistere. Tua ratio est, ut secundum⁷ binos ludos mihi respondere incipias; mea, ut ante primos ludos comperendinem⁸. Ita fiet, ut tua ista ratio existimetur astuta; meum hoc consilium, necessarium.

XII. Verum illud, quod institueram dicere, mihi rem tecum esse, huiusmodi est. Ego, quum hanc causam, Sicularum rogatu, recepissem, idque mihi amplum et præclarum existimassem, eos velle meæ fidei diligentiaque periculum facere¹, qui innocentia abstinentiaque fecissent: tum, suscepto negotio, majus mihi quiddam proposui; in quo meam in rempublicam voluntatem populus romanus perspicere posset. Nam illud mihi nequaquam dignum² industria conatuque meo videbatur, istum a me in iudicium jam omnium iudicio condemnatum vocari, nisi³ ista tua intolerabilis potentia, et ea cupiditas, qua per hosce annos in quibusdam iudiciis usus es, etiam in istius hominis desperati causa⁴ interponeretur. Nunc vero, quoniam hæc te omnis dominatio regnumque iudiciorum tætopere delectat, et sunt homines⁵, quos libidinis infamiaque suæ neque pudeat, neque tædeat; qui

6. *Ex istius tempore.* Quia Verris periculum, et mala ejus causa id postulant.

7. *Secundum.* Post ludos votivos et Romanos.

8. *Comperendinem.* Ut causa semel a nobis utrimque dicta, faciam iudicibus comperendinandi potestatem. *Comperendinant* iudices, quum, causa semel utrimque dicta, jubent ut perendie, i. e. in diem tertium reus et accusator revertantur, causam iterum dicturi. Vid. inf. cap. 18.

XII. 1. *Periculum facere.* In accusando Verre.

2. *Nequaquam dignum.* Humilius mihi videbatur, quam ut eo mihi descendendum esset.

3. *Nisi.* Si non cum istius causa confunderetur immensa illa Hortensii potentia, et nimium suarum partium studium, quæ simul insectaretur.

4. *Edit. Venet. «desperata causa».* J. V. L.

5. *Sunt homines.* Iudices eos designat, qui de sua infamia, deque odio

quasi de industria in odium offensionemque populi romani irruere⁶ videantur : hoc me profiteor suscepisse, magnum fortasse onus, et mihi periculosum, verumtamen dignum, in quo omnes nervos ætatis industriæque meæ contenderem. Quoniam totus ordo paucorum improbitate et audacia premitur, et urgetur infamia judiciorum : profiteor, huic generi hominum me inimicum, accusatorem odiosum⁷, assiduum, acerbum adversarium. Hoc mihi sumo, hoc mihi depono, quod agam in magistratu⁸, quod agam ex eo loco, ex quo me⁹ populus romanus ex kal. januar. secum⁹ agere de republica ac de hominibus improbis voluit ; hoc munus¹⁰ ædilitatis meæ populo romano amplissimum pulcherrimumque polliceor. Moneo, prædico, ante denuntio : qui aut deponere¹¹, aut recipere, aut accipere, aut polliceri, aut sequestres, aut interpretes corrumpendi iudicii solent esse, quique ad hanc rem aut potentiam¹², aut impudentiam suam professi sunt, abstineant in hoc iudicio manus animosque ab hoc scelere nefario.

XIII. Erit tum consul Hortensius cum summo im-

et offensione populi rom. minimum laborantes, religionem, fidem, veritatem pecunia venderent. MAN.

6. *Irruere*. Cum impetu, nullo pudore retenti.

7. *Odiosum*. Importunum. — *Acerbum*. Severissimum.

8. *In magistratu*. Ædilitate. — *Ex eo loco*. E rostris.

9. *Secum agere*. Agere cum populo, est populum ad concilium vocare, et rogationem ferre, quam suffragiis suis jubeat, ant vetet. Quod solis magistratibus licebat. Agere vero ad populum est verba facere ad populum, sine rogatione ; quod privatis, concedente

magistratu, erat permissum. Vid. Gell. XII, 15.

10. *Munus*. Sic appellabantur ludi quos populo exhibere ædiles debebant. Hoc spectaculum, inquit Cicero, polliceor populo pulcherrimum ædilitatis meæ.

11. *Deponere*. Pecunias apud sequestrem ad corrumpenda iudicia. — *Recipere* : iudicia gratiam polliceri. — *Accipere*, pecunia corrumpi. — *Polliceri* pecuniam. — *Interpretes*. Inter-nuncios (gall. *les agents*.)

12. *Potentiam*. Nobiles Verri suffragantes carpit. — *Impudentiam*. In corrumpendo.

perio et potestate; ego autem ædilis, hoc est, paullo amplius¹ quam privatus: tamen hæc hujusmodi res est, quam me acturum esse polliceor, ita populo romano grata atque jucunda, ut ipse consul in hac causa præ me minus etiam, si fieri possit, quam privatus esse videatur. Omnia non modo commemorabuntur, sed etiam, expositis certis rebus, agentur, quæ inter decem annos, posteaquam judicia ad senatum translata sunt, in rebus judicandis nefarie flagitioseque facta sunt. Cognoscet ex me populus romanus, quid sit, quamobrem, quum equester ordo judicaret, annos prope quinquaginta² continuos, nulla [judice equite romano judicante] ne tenuissima³ quidem suspicio acceptæ pecuniæ ob rem judicandam constituta sit; quid sit, quod judiciis ad senatorium ordinem translatis, sublataque⁴ populi romani in unumquemque nostrum potestate, Q. Calidius⁵ damnatus dixerit, minoris H-S. tricies prætorium hominem honeste non posse damnari; quid sit, quod, P. Septimio⁶ senatore damnato,

XIII. 1. *Paullo amplius.* Nam ædilitas ex minoribus erat magistratibus, i. e. ex iis qui minoribus auspiciis creabantur.

2. *Prope quinquaginta.* Annis tantum XLIII equester ordo judicavit.

3. *Ne tenuissima.* Oratorie et ad tempus. Scribit enim Appianus de Bell. civ. I, equites non minus turpiter et flagitiose, quam senatores, judicia administrasse.

4. *Sublataque.* Sublatis per Sullam tribunis plebis, ad quos erat provocatio, si quis injusto judicio se condemnatum putaret. Quo metu dempto, turpiter deinde senatores judicarunt.

5. *Q. Calidius.* Ex prætura Hispaniensi damnatus repetundarum anno 677, quum censisset id factum fuisse,

quia judicium pecunia, eaque parva, corruptum fuerat, satis fœcte exprobravit sordidis judicibus, quod se tam parvo pretio damnassen: «vel idoneam, inquit, mercedem pro meo capite pacisci debuistis; Hoc saltem honestatis esset in vobis ut hominem prætorium non vili pretio venderetis» (nempe non minore pretio quam sestertium trecentis millibus, 61,500 fr.) — Loco tricies, quod dedit Ascon.

edd. vet. XXX. Pessime.

6. *P. Septimio.* P. Septimius, et sequentes C. Herennius, C. Popillius, M. Attilius postulabantur criminum quæ nihil quidem ad judicium corruptum pertinent. Sed quia flagitiose olim judicaverant, eorum damnationi hoc etiam caput additum est, ut pe-

Q. Hortensio prætore, de pecuniis repetundis, lis æstimata⁷ sit eo nomine, quod ille ob rem judicandam pecuniam accepisset; quod in C. Herennio, quod in C. Popillio, senatoribus, qui ambo peculatus damnati sunt; quod in M. Attilio, qui de majestate⁸ damnatus est, hoc planum factum est⁹, eos pecuniam ob rem judicandam accepisse; quod inventi sunt senatores¹⁰, qui, C. Verre prætore urbano sortiente¹¹, exirent in eum reum, quem incognita causa condemnarent; quod inventus [est] senator¹², qui quum judex esset, in eodem judicio et ab reo pecuniam acciperet, quam judicibus divideret, et ab accusatore, ut reum damnet. Jam vero quomodo illam labem, ignominiam, calamitatemque totius ordinis conquerar? hoc factum esse in hac civitate, quum senatorius ordo judicaret,

cuniam, quam ob res judicandas acceperant, redderent.

7. *Lis æstimata*. In liti æstimatione, non omissa fuerit accepta pecunia, etc. *Litem æstimare*, est definire pecuniam, de qua lis est, summam facere omnium quæ a damnato reo repetuntur. Sic inf. 18. Porro æstimatio fiebat non solum ex titulo propositi criminis, sed etiam ex aliis probationibus, quæ ex ante actis rebus apud iudices constiterint: hi peculatus crimine proposito, etiam quæ judicando pecunias acceperant, reddiderunt.

8. *Majestate*. *Majestas* est quædam magnitudo populi rom. ac dignitas, quæ omnia jura summi imperii completur; quam qui contemnit, aut lædit, majestatis crimine tenetur. Vide Indic.

9. Schütz, «factum sit... inventi sint...» J. V. L.

10. *Senatores*. Hyperbole, ad augendam senatus invidiam. Unus tantum senator intelligendus est, C. Fidi-

culanius Fulcula. Vid. pro Cæcin. 10; pro Cluent. 37.

11. *Sortiente*. Jus dicente. Cujus officii pars est sortitio judicum. — *Exirent*. Irent adversus reum. Porro in judicio Oppianici, quum ex triginta duobus judicibus, sexdecim corrumpendos suscepisset Stalenus judex, ipse decimus septimus futurus; et ex illo numero unus deesset, in ejus locum C. Fidiculanus Fulcula, ad complendam Oppianici damnationem, dicebatur fuisse subito suppositus. De his et seqq. vide pro Cluent. 37, ubi orator contraria dicit, et Fulculam omnino excusat.

12. *Senator*. C. Ælius Stalenus. — *Ab reo*. Oppianico. — *Ab accusatore*. Cluentio. Sed in ea, qua Cluentium defendit, oratione, a reo tantum datam pecuniam studet probare. Servit igitur utrique causæ, prout postulant tempora, Tullius: hic, ut senatores terreat; illic ut absolvatur Cluentius;

ut discoloribus³ signis juratorum hominum sententiæ notarentur? Hæc omnia me diligenter severeque acturum esse, polliceor.

XIV. Quo me tandem animo fore putetis, si quid in hoc ipso iudicio intellexero simili aliqua ratione esse violatum atque commissum? quum præsertim planum facere multis testibus possim, C. Verrem in Sicilia, multis audientibus, sæpe dixisse, « Se habere hominem potentem¹, cujus fiducia provinciam spoliaret; neque sibi soli pecuniam quærere, sed ita triennium illud præturæ Siciliensis distributum habere, ut secum præclare agi diceret, si unius anni quæstum in rem suam converteret; alterum patronis et defensoribus suis traderet; tertium illum uberrimum quæstuosissimumque annum totum iudiciis reservaret». Ex quo mihi venit in mentem illud dicere, quod apud M'. Glabrimonem nuper quum, in rejiciendis iudiciis, commemorassem, intellexi, vehementer populum romanum commoveri: me arbitrari fore, uti nationes exteræ legatos ad populum romanum mitterent, ut lex de pecuniis repetundis iudiciumque tolleretur: si enim iudicia nulla sint, tantum unumquemque ablatum putant, quantum sibi ac liberis suis satis esse arbitrentur²; nunc, quod ejusmodi iudicia sint, tantum unumquemque auferre, quantum sibi, patronis, advocatis, prætori³, iudiciis satis futurum sit; hoc profecto infinitum esse; se avarissimi hominis cupiditati satisfacere posse, nocentissimæ victoriæ⁴ non

tristi sane exemplo et apud forenses inveterato!

13. *Discoloribus*. Vide Divin. c. 7.

XIV. 1. *Hominem potentem*. Hortensium, quem ita Verr. V compellat: «quæ iste (Verres) in provincia palam

dictitabat, eum ea quæ faciebat, tua se fiducia facere, ea ne vera putentur, tibi maxime est providendum».

2. Alii, «arbitrarentur». J. V. L.

3. Alii, «prætoribus». J. V. L.

4. *Victoriæ*. Absolutioni, quæ no-

posse. O commemoranda judicia, præclaramque estimationem nostri ordinis! quum socii populi romani judicia de pecuniis repetundis fieri nolunt⁵, quæ a maioribus nostris sociorum causa comparata sunt. An iste umquam de se bonam spem habuisset, nisi de vobis malam opinionem animo imbibisset? Quo majore etiam, si fieri potest, apud vos odio esse debet, quam est apud populum romanum, quum in avaritia⁶, scelere, perjurio vos sui similes esse arbitretur.

XV. Cui loco¹, per deos immortales, judices, consulite ac provide. Moneo prædicoque id, quod intellico, tempus opportunissimum² vobis hoc divinitus datum esse, ut odio, invidia, infamia, turpitudine totum ordinem liberetis. Nulla in judiciis severitas, nulla religio, nulla denique jam existimantur esse judicia. Itaque a populo romano contemnimur³, despici-mur; gravi diuturna-que jam flagramus infamia. Neque enim ullam aliam ob causam populus romanus tribunitiam potestatem tanto studio⁴ requisivit: quam

centissima largitione ematur, et multo plus exigat, quam quod sibi uni furatur prætor.

5. Non dubitat Ernest. Ciceronem scripsisse *nolent*, quum sermo sit de re futura, quam Cicero prædicebat. Nihil vero mutandum videtur. J. V. L.

6. *In avaritia*. In capienda contra leges pecunia. — *Scelere*. In ipso absolvendo, homine nocentissimo. — *Perjurio*. In contemnendis legibus, in quas jurastis.

XV. 1. *Cui loco*. Huic rei, huic existimationi.

2. *Opportunissimum* deest in duob. codd. Omiserunt Lamb. et Ernest. Et hic quidem eam ob causam, quod, verbum *opportunus* requiratur, vel quo

(tempore), vel genitivum; non autem eo posito sequatur *ut*. Recte autem monuit Beckius verba *ut liberetis* pendere a *datum esse*.

3. *Contemnimur*. Nempe senatores. In senatorum numerum post quaesturam fuerat receptus Cicero. Nunc vero suam cum eis causam communicat, ut contumeliose in eos dicta, non ex odio seu ira, sed ex quodam pollutæ tantæ dignitatis dolore, profecta videantur.

4. *Tanto studio*. Per tres annos continuos. — *Requisivit*. Qualis ante nullam fuerat; nam is valde eam minuit, lege lata, ne ei, qui tribunus plebis fuisset, postea alios magistratus capere liceret.

quum poscebat, verbo illam poscere videbatur, re vera judicia poscebat ⁵. Neque hoc Q. Catulum ⁶, hominem sapientissimum atque amplissimum, fugit, qui Cn. Pompeio, viro fortissimo et clarissimo, de tribunitia potestate referente ⁷, quum esset sententiam rogatus, hoc initio est summa cum auctoritate usus: « Patres
« conscriptos judicia male et flagitiose tueri; quod si
« in rebus judicandis populi romani existimationi satisfacere voluissent, non tantopere homines fuisse
« tribunitiam potestatem desideraturos ». Ipse denique Cn. Pompeius, quum primum concionem ad Urbem ⁸ consul designatus habuit; ubi (id quod maxime expectari videbatur) ostendit, se tribunitiam potestatem restitutum, factus est in eo strepitus, et grata concionis admurmuratio. Idem in eadem concione quum dixisset: « Populatas vexatasque esse provincias; judicia autem turpia et flagitiosa fieri; ei rei
« se providere ac consulere velle; » tum vero non strepitu ⁹, sed maximo clamore suam populus romanus significavit voluntatem.

5. *Judicia poscebat.* Tribuni plebis efficiebant, ut populus de judiciis posset cognoscere, quod, eorum sublata potestate, fieri non poterat.

6. *Q. Catulum.* Ejus filium, qui cum C. Mario consul fuit. Simultatem aliquam cum Pompeio gessit, quod non nisi post collegam fuerat designatus.

7. *Referente.* Proponente in senatu ut tribunitia potestas restitueretur. Tunc maxima invidia laborasse Pompeius dicitur, quod consul populo tribunitiam potestatem, tot malorum causam, reddidisset. Conf. de Leg. III, 11.

8. *Ad Urbem.* Extra urbis muros. Pompeius, Sertoriano bello confecto,

quum triumphum expectaret, de more ad urbis portas remanserat. Nemi enim, qui cum imperio provinciali esset, in urbe esse licebat, salvo imperio. Nemo autem deposito imperio triumphabat; peracto triumpho imperium deponeretur. Vide Curtium ad Sallust. Catil. XXX, 4.

9. *Non strepitu.* Quam populo judiciorum severitas cordi esset, ex hoc intelligi vult; quod tribunitiam potestatem vehementer expetitam populus strepitu tantum et admurmuratione exceperit, hanc vero de judiciis coercendis promissionem « maximo clamore », quasi magis in hanc rem Pompeium acuere et inflammare voluisset.

XVI. Nunç autem homines in speculis¹ sunt; observant, quemadmodum sese unusquisque vestrum gerat in retinenda religione, conservandisque legibus. Vident adhuc post legem² tribunitiam unum³ senatorem vel tenuissimum⁴ esse damnatum: quod tametsi non reprehendunt, tamen magnopere, quod laudent, non habent. Nulla est enim laus, ibi esse integrum, ubi nemo est, qui aut possit, aut conetur corrumpere. Hoc est iudicium, in quo vos de reo, populus romanus de vobis iudicabit; in hoc homine statuatur, possitne, senatoribus iudicantibus, homo nocentissimus pecuniosissimusque damnari. Deinde est huiusmodi reus, in quo homine nihil sit, præter summa peccata, maximamque pecuniam; ut, si liberatus sit, nulla alia suspicio, nisi ea, quæ turpissima⁵ est, residere possit: non gratia, non cognatione, non aliis recte⁶ factis, non denique aliquo mediocri vitio⁷, tot tantaque ejus vitia sublevata esse existimabuntur. Postremo ego causam sic agam, iudices: ejusmodi res, ita notas, ita testatas, ita magnas, ita manifestas proferam, ut nemo a vobis, ut istum absolvatis, per gratiam conetur con-

XVI. 1. *In speculis.* Omnes intentis oculis vos spectant.

2. *Post legem.* Ex quo lege Pompeii restituti sunt tribuni.

3. *Lambin.* ex Asconio dedit « unum hominem ». Male. J. V. L.

4. *Tenuissimum.* Pauperrimum; qui, unde iudices corrumpere, non habebat. Non autem erat Dolabella, ut putat Asconius, qui multo ante legem tribunitiam, i. e. ante consulem Pompeiam damnatus erat; ut facile ex Verr. I constat; neque etiam tenuissimus homo fuisset vocatus.

5. *Turpissima.* Nempè absolutum cum sua pecunia.

6. *Lambinus*, ut aliquid mutaret, maluit « non ullis recte factis ». J. V. L. — Sæpe enim *alia* reorum recte facta ad commovendos iudices proferebantur. Conf. Verr. V ad init. et de Inv. II, 34, ubi reus dicitur « multorum suorum recte factorum causa ut uni delicto ignoscatur » postulare.

7. *Vitio.* Scil. iudicium in re iudicanda. Sic Manut. Sch. Alii interpretantur: Aliqua ratione, quæ mediocriter saltem sit vitiosa, seu quæ, quamvis illicita, possit excusari; ut si, v. g. nimia assentatione iudicum animos sibi conciliasset. Quo in loco omnes cum Asconio errare mihi videntur.

tendere⁸. Habeo autem certam viam atque rationem, qua omnes illorum conatus investigare et consequi pos-
sim. Ita res a me agetur, ut in eorum consiliis omnibus non modo aures hominum, sed etiam oculi populi romani interesse videantur. Vos aliquot jam per annos conceptam huic ordini turpitudinem atque infamiam delere ac tollere⁹ potestis. Constat inter omnes, post hæc constituta¹⁰ judicia, quibus nunc utimur, nullum hoc splendore¹¹ atque hac dignitate consilium fuisse. Hic si quid erit offensum, omnes homines non jam ex eodem ordine alios magis idoneos, quod fieri non potest, sed alium omnino ordinem ad res judicandas quærendum arbitrabuntur.

XVII. Quapropter primum ab diis immortalibus, quod sperare¹ mihi videor, hoc idem, judices, peto², ut in hoc iudicio nemo improbus, præter eum³, qui jam pridem inventus est, reperiatur : deinde, si plures improbi fuerint, hoc vobis, hoc populo romano, judices, confirmo; vitam mehercule mihi prius, quam vim perseverantiamque, ad illorum improbitatem persequendam, defuturam. Verum quod ego laboribus, periculis, inimicitiisque meis tum, quum admissum erit, dedecus, severe me persequuturum esse polliceor, id ne accadat, tu tua sapientia, auctoritate, diligentia, M'. Glabrio, potes providere⁴. Suscipe causam iudicio-

8. *Contendere*. Nemo enim audebit, quum obijci videatur ejusmodi res.

9. Male omissum « ac tollere » in quibusdam MSS et edd. Nam et oriretur clausula hexametri, et tolleretur membrorum æqualitas. J. V. L.

10. *Constituta*. Ex quo Sulla constituit, ut senatores soli judicarent.

11. *Hoc splendore*. Propter integritatem et honores præclare gestos.

XVII. 1. *Sperare*. Subaud. *debere* seu *posse*. Quod sæpius apud auctorem nostrum usurpatur. Frustra Lambin. addidit *debere*.

2. Lambin. e MSS, *opto*.

3. *Eum*. Verrem, cujus jam pridem nota est improbitas.

4. *Potes providere*. Faciendo tua diligentia, ut ne quis eorum, qui adsumt, corrumpatur.

rum; suscipe causam severitatis, integritatis, fidei, religionis; suscipe causam senatus, ut is hoc iudicio probatus, cum populo romano et in laude et in gratia esse possit. Cogita, qui sis⁵, quo loco sis, quid dare populo romano⁶, quid reddere majoribus⁷ tuis debeas; fac tibi paternæ legis Aciliæ⁸ veniat in mentem, qua lege populus romanus de pecuniis repetundis optimis iudiciis, severissimisque iudicibus usus est. Circumstant te summæ auctoritates, quæ te oblivisci laudis domesticæ non sinant; quæ te dies noctesque commoneant, fortissimum tibi patrem, sapientissimum avum⁹, gravissimum socerum fuisse. Quare si Glabronis patris vim et acrimoniam ceperis ad resistendum hominibus audacissimis; si avi Scævolæ prudentiam ad prospiciendas insidias, quæ tuæ atque horum famæ comparantur; si soceri Scauri constantiam, ut ne quis te de vera et certa possit sententia demovere; intelliget populus romanus, integerrimo atque honestissimo prætore, delectoque consilio, nocenti reo magnitudinem pecuniæ plus habuisse momenti ad suspicionem criminis, quam ad rationem salutis.

5. Abest «qui sis» ab aliquot edd. et MSS. Addidere Victor. et Manut. et ceteri, sed sine altero *sis*, quod Ernest. post Græv. restituit. J. V. L. — *Quo loco* ad tribunal refert Asconius, ad dignitatem Manutius: quod satius videtur.

6. *Dare populo rom.* Qui tibi præturam mandavit.

7. *Reddere majoribus.* Quam ab iis laudem acceperat, eandem redde.

8. *Legis Aciliæ.* Significatur lex de repetundis, quam tulit hujus pater tribunus plebis, qua licebat, semel dicta causa, reum condemnare aut ab-

solvere, nisi ampliarent iudices. Cf. Verr. I, 9, et Ind. Leg. Ceterum significat id Glabroni cavendum esse, ne patri filius desit, cui hujus legis auctori alienissimi non defuerunt.

9. *Avum.* Scævolam Glabronis avum matrum, juris peritissimum. — *Socerum.* M. Æmiliam Scaurum, virum consularem, et senatus principem; quem unus Sallustius in Jug. 15, ut pecuniæ, honoris, etc. avidum describit, ceteri scriptores ut gravissimum et prudentissimum laudant. De illo vid. C. V. *De Brosses*, t. XXIV, *Mém. de l'Acad. des Inscript.*

XVIII. Mihi certum est non committere, ut in hac causa prætor nobis consiliumque¹ mutetur. Non patiar rem in id tempus duci², ut Siculi, quos adhuc servi designatorum consulum non moverunt³, quum eos novo exemplo universos arcescerent, eos tum lictores consulum vocent; ut homines miseri, antea socii atque amici populi romani, nunc servi ac supplices, non modo jus suum fortunasque omnes eorum imperio amittant, verum etiam deplorandi juris sui potestatem non habeant. Non sinam profecto, causa a me perorata, quadraginta diebus⁴ interpositis, tum nobis denique respondeant, quum accusatio nostra in oblivionem diuturnitate adducta sit: non committam, ut tum res judicetur, quum hæc frequentia⁵ totius Italiæ Rôma discesserit; quæ convenit uno tempore undique comitiorum, ludorum⁶, censendique causa. Hujus judicii⁷ et laudis fructum, et offensionis periculum, vestrum; laborem, sollicitudinemque, nostram; scientiam, quid agatur, memoriamque, quid a quoque dictum sit, omnium puto esse oportere. Faciam hoc

XVIII. 1. *Consilium*. Judices mutantur. Quod sperat Verres.

2. *MSS adduci*. Sequuntur fere nunc emendationem Gronovii, Obs. V, 12. Scriptam tamen lectionem servavit Beckius. J. V. L.

3. *Non moverunt*. Non Hortensio paruerunt qui eos arcescebat per servos: nam consules lictorum jus, nisi inito magistratu, non habebant. Vid. sup. c. 9. Nota vocem *Siculi* a nullo verbo pendere, ita ut sit insolentius: quamvis exemplis non careat tale dicendi genus, et hoc præsertim loco planissime cum altero membro *homines miseri* possit conjungi.

4. *XL diebus*. Vid. sup. cap. 10, constructionis exemplum.

5. *Hæc frequentia totius Italiæ... censendique causa*. Quæ ex municipiis venit, suffragiorum causa, aut propter ludos, aut ut apud censores censeatur. Vide Indicem.

6. *Judiciorum*. At ludorum ex Asconio. J. V. L.

7. *Hujus judicii*. Sensus est: Ad vos perveniet ex hoc judicio fructus laudis, si recte; aut odium et offensio populi, si prave judicaveritis; mihi incumbit labor et sollicitudo hujusce accusationis; sed puto oportere, ut hæc multitudo sciat quæ causa agatur, et memoria teneat, quid a quoque teste dictum fuerit. Ad singula membra subaudiendum est, *puto esse oportere*.

non novum, sed ab iis, qui nunc principes⁸ nostræ civitatis sunt, ante factum, ut testibus utar statim : illud a me⁹ novum, iudices, cognoscetis, quod ita testes constituam, ut crimen totum explicem; ubi id interrogando, argumentis atque oratione firmavero, tum testes ad crimen accommodem : ut nihil inter illam usitatam accusationem, atque hanc novam intersit, nisi quod in illa tunc, quum omnia dicta sunt, testes dantur; hic in singulas res dabuntur; ut illis¹⁰ quoque eadem interrogandi facultas, argumentandi dicendique sit. Si quis erit, qui perpetuam orationem accusationemque desideret, altera actione¹¹ audiet: nunc id¹², quod facimus (ea ratione facimus, ut malitiæ illorum consilio nostro occurramus), necessario fieri intelligat. Hæc primæ actionis erit accusatio. Dicimus, C. Verrem, quum multa libidinose, multa cru-

8. *Principes.* L. et M. Licinius, ambo consulares, nominat Asconius; qui, quum accusarent L. Cottam anno 675 non nisi sunt oratione perpetua; sed interrogatione testium causam peregerant.

9. *Illud a me.* Non, quod illi principes fecerunt, testes appellabit Cicero, priusquam crimen totum breviter explicuerit; sed testes ita constituet, ut interrogatione sua, i. e. propositione primum, crimen totum per partes explicet hoc pacto, e. g. « Verres illo die, ex illo templo, illud signum sustulit »; atque ubi id argumentis et oratione firmaverit, tum testes excitet qui ad illud crimen pertineant, et Hortensio defensori interrogandos tradat; ut post interrogationem, ipse quoque argumentandi ac dicendi facultatem habeat. Hoc infra apertius. Quo major huic loco lux fiat, credit

Garat. duplicem testium interrogationem fuisse, alteram brevem, quantum *argumentis* sufficeret, alteram solemnem ac necessariam, quum, unoquoque proposito crimine, testes, tabulas, auctoritates edere volebat Tullius. Apparet autem ea ratione Licinius egisse, ut testes omnes ante orationem interrogarint; Cicero autem in singulas res ita eos dabat, ut cuiusque rei narratiunculam sui testes sequerentur.

10. *Illis.* Verri et Hortensio.

11. *Altera actione.* Quam lex Servilia dabat.

12. *Nunc id.* Inconsequens Asconio videtur locutio, et obscura, multique mendosum locum suspicantur; cuius tamen facilis explanatio: intelligat ille, quæso, necessitatis vi fieri id quod facimus (scil. novum illud accusandi genus); nempe ideo facimus ut malitiæ illorum, etc. Nihil habet re-

deliter in cives romanos atque in socios, multa in deos hominesque nefarie fecerit, tum præterea quadringenties¹³ sestertium ex Sicilia contra leges abstulisse. Hoc testibus, hoc tabulis privatis, publicisque auctoritatibus, ita vobis planum faciemus, ut hoc statuatis, etiamsi spatium ad dicendum nostro comodo, vacuosque dies habuissemus, tamen oratione longa nihil opus fuisse¹⁴.

petitio illa *facimus* quod miremur, si modo familiares Tullio locutiones novimus.

13. *Quadringenties* (8,500,000 fr.) Notandum in *Divinat.* Siciliæ nomine multo plura Ciceronem obiter repetiisse; nunc vero, quum, peragrata provincia, ipse per se Verris injurias viderit ac æstimaverit, non jam sestertium millies (20,500,000 fr.) vindicantem Siciliam inducit; sed ipse illam tantum, constituto iudicio, definit summam, quam veram esse publicis privatisque auctoritatibus probaturum

se pollicetur. Vide *Divin. c. 5*, not. 7. Hinc ortus Plutarchi error qui in *Cic. vit.* prævaricationis et conniventiae suspitione laborasse Tullium dicit, quod ita de priore summa demiserit, et tantummodo drachmarum septingena quinquagena millia (680,000 fr.) repetierit; quod omnino falsum atque absurdum est.

14. Vocem *dixi* addit *Ascon.* quem sequuti sunt *Manut. Verb. Oliv. Lall.* Merito non receperunt *Gruter. Græv.* et alii; quum illud præcæmum tantummodo sit orationia.

M. TULLII CICERONIS

IN C. VERREM

ACTIONIS SECUNDÆ

LIBER PRIMUS

DE PRÆTURA URBANA

ARGUMENTUM

ASCONII PEDIANI.

Deinceps hæc omnia non dicta, sed scripta sunt contra eum : quod ita factum est. Fingit Cicero adesse in iudicio Verrem comprehendinatum, et respondere citatum et defendi. In ceteris enim orationibus defensor futurus, accusationis officium his libris, qui Verrinarum nomine nuncupantur, compensare decrevit, et quoniam accusare multos indecorum Tullio videbatur, in una causa vim hujus artis et eloquentiam demonstrare. Nam et bene intelligentes omnem virtutem oratoriam quæcumque in criminationibus constituta est, hic expressam vident, et contra ex hoc defensionum vim in ceteris orationibus et nervos ejus ex hac virtute cognoscunt, quæ in opprimendo exprimitur reo; igitur rerum scena sic facta est, ut dicit Tullius, non autem acta res est. Adest, inquit, Verres, respondet, defenditur. Ergo quum prima actione accusatus sit ac defensus Verres, nunc velut defensus iterum (sic enim mos erat), in altera actione, accusatur ad ultimum rursus oratione perpetua. Crimina repetundarum, et alia pleraque ex anteacta vita sæpe firmantur. Sumitur etiam hinc sæpe defensio. Omnis enim confirmatio ab attributis personæ et negotio sumi solet. Ergo attributa personæ maxime in anteacta vita quæri solent, negotium in ipso crimine. Libros igitur pro qualitate criminum Tullius dividens anteactis unum dedit, hunc scilicet solum; crimini ipsi repetundarum quatuor : unum de jure dicendo, alterum de re frumentaria, tertium de signis, quartum de suppliciis. Ad hanc enim similitudinem poeta Virgilius Minoem judicem apud inferos, tamquam si prætor sit rerum capitalium, quæsitorem appellat. (*Æn.* VI, 432.) Dat ibi sortitionem, ubi urnam nominat; dat electionem judicum, quum dicit : « conciliumque vocat »; dat cognitionem facinorum, quum dicit : « vitasque et crimina discit ». Ergo hic liber qui de anteacta vita est statum necesse est conjecturalem habeat. Capita autem quæ ipse Tullius fecit, dividendo totam hanc accusationem, sunt hæc. Primum in quæsturam; deinde in legationem et vice-quæsturam; tertio in

præturam urbanam, quarto in præturam Siciliensem. Nam quum omnes ejus actus quæsturæ nomine, legationis, præturæ urbanæ, Siciliensisque quadripartita librorum divisione cognoscantur; anteacta ejus omnia hoc libro comprehensa sunt ad eorum fidem, quæ post dicentur. Procœmia sane hujus libri in simulatione constituta sunt, quasi veræ accusationis; in Verrem audentem adesse atque defensum; in exhortatione judicum ad recte judicandum; tum in minis contra adversarios; et in exhibenda ratione officii sui, cur ita maluerit accusare, ut prima actione tantum testibus uteretur. Quæ omnia ejusmodi sunt, ut non tam nova dicere, quam dicta libri superioris instaurare videatur. Post hæc omnia ipsius Ciceronis per honores Verris cum criminibus junctos, divisio per ordinem currit.

ALIUD ARGUMENTUM.

Quum Cicero actione prima, tabulis ac testibus Verrem obruisset, vehementi ejus impetu exterritus Hortensius, *de statu omni de-jectus est, nec pro familiari reo summus orator respondit*; Orat. 37. Verres ipse, antequam ex comperendinatione causa iterum agi posset, in exsilium abiit. Quum vero in hac accusatione suam eloquentiam continere ac refrenare coactus esset Cicero, neque, pro rei gravitate ac sua dicendi laude, orationem habere potuisset, hoc in secunda actione facere constituit; et quamvis hanc non exspectasset Verres, istum tamen totis eloquentiæ viribus insequi voluit, et simul querenti Hortensio, nova hac agendi ratione oppressum fuisse reum, ostendere multo facilius causa casurum fuisse Verrem, si ejus facinora ab accusatore fuissent explanata. Studium ejus forense præterea semper in amicorum defensione versatum fuerat, neque antea quemquam accusarat; quod quum faceret denique, statuit in hoc uno reo vim artis accusatoriæ demonstrare; et perpetuam conscripsit actionem secundam, libris quinque divisam, in qua finxit Verrem comperendinatum in judicio adesse, respondere et defendi.

Tota accusatio in quatuor capita distribuitur; quorum tria, quæsturæ nimirum; legationis in Asia, Achaia et Pamphylia; et præturæ urbanæ, unde traxit nomen oratio, hoc libro continentur. Quartum caput, de prætura Siciliensi, quod proprium est hujusce quæstionis de repetundis, in quatuor, qui hunc sequuntur, libris tractatur. Quum vero mos esset apud Romanos ut accusator non ea tantum exponeret, quæ ad ipsum crimen, de quo postulatus esset reus, pertinerent, sed et totam vitam anteaquam indagaret, in hoc primo libro Verris flagitia inde a quæstura usque ad præturam urbanam exponuntur. Estque adeo hic liber quasi introductio ad ipsam accusationem, ut præmissa ea scelera majorem sequuturæ accusationi fidem afferant, et ad nova Siciliensis præturæ facinora iudices quasi manu ducere videantur.

Fuerunt olim qui septem orationes Verrinas numerarent con-

tinuas; ita quidem ut primam appellarent, Divinationem n. Q. Cæcilium, secundam actionis primæ proœmium, etc. Cicero tamen ipse accusationis in Verrem quinque libros numerat, Orat. cap. 29. Idem faciunt alii veteres, ut Quintil. XI, 11. A. Gell. I, 7; XIII, 13. Auct. dial. de Orat. 20.

Partes habet hæc oratio *exordium*, seu longius proœmium, 1-11; *propositionem* et *partitionem* in tria capita divisam, 12. Hæc capita reliqua tota oratione tractantur, 13-61.

Ceterum operæ pretium est monere, non unum quemque actionis secundæ librum justis orationis partibus constare; neque id fieri posse, quum Verrinæ illæ quinque unam tantum, sed diversis capitibus distinctam accusationem contineant; magnificum ergo ac perpetuum opus est, quod ideo tantum in partes dividit Cicero, ut ad humani ingenii imbecillitatem accommodaretur, nec oculos immensa quadam mole terreret.

In *exordio* Cicero mentionem facit opinionis, quæ per hos dies sermone vulgi percrebuerit: Verrem altera actione respondurum non esse, neque ad iudicium affuturum; attamen eum adeo impudentem esse, ut præsto sit, ad audiendum et respondendum paratus. Hoc Cicero negat se moleste ferre, quia sic ipse laboris sui, iudices virtutis et severitatis majorem fructum laturi sint. Se enim accessisse ad invidiam iudiciorum levandam; ideoque reum nocentissimum accusare, qui si absolvatur, recusari non posse de iudiis a senatu ad alium ordinem transfereendis. Absolutionem vero ejus nec ipsum sperare, nec populum romanum metuere; esse tamen qui de impudentia ejus, quod adsit, quod respondeat, mirentur. Hoc autem fieri, quod scelorum suorum pœnis agitetur, et a mente consilioque deducatur, 1-3. Etenim si vel ex hoc iudicio repetundarum emergerit, alia tamen ei pericula impendere, quum peculatus, aut majestatis accusatus fuerit, 4, 5. Tum exponit orator, quid adhuc in accusando Verre egerit, quid a iudicibus speret, et quam rationem accusandi in hac altera actione sequuturus sit, 6-11.

Totius autem causæ *partitionem* hanc facit, ut omissis pueritiæ et adolescentiæ Verris flagitiis, primum se de ejus quæstura in Gallia, deinde de legatione Asiatica, tum de prætura urbana, postremo de prætura Siciliensi acturum denuntiet, 12.

Primo igitur actionis secundæ libro tria priora capita pertractantur.

Ac primum quidem agitur de ejus quæstura in Gallia. Quum enim quæstor ex SCto provinciam sortitus esset consularem, additusque esset consuli Cn. Papirio Carboni A. U. C. 699, venit in Galliam ad exercitum consularem cum pecunia publica, quam, prima occasione data, avertit, et consulem, exercitum, sortem provinciamque deseruit; rationes male reddidit. Et postea, quum eum Cn. Dolabella, C. Malleolo occiso, pro quæstore haberet, quæ ipsum gravabant crimina in illum contulit, et in eum inimicissimum atque improbissimum testimonium dixit, 13-16.

Secundo loco agitur de legatione ejus Asiatica. Quum enim Cn. Dolabellæ provincia Cilicia obtigisset, Verres legationem sibi apud eum cupidissime expugnavit. Qua in legatione quæ furta fecerit in Achaia, Deli, in Asia narratur, 17-23. Deinde quæ fuerint ejus flagitia in libidinibus et stupris exponitur, in primis insigne facinus Lampsacenum. Quum enim Lampsaci devertisset ad Philodamum hominem nobilem, filiæ ejus vim inferre voluit, et quum Lampsaceni Philodamo ejusque filio ita succurrerent, ut Verres ipse vix salvus evaderet, per Dolabellam apud C. Neronem Asiæ prætorem effecit, ut Philodamus ejusque filius damnarentur, et securi percuterentur, 24-33. Sequitur avaritiæ exemplum apud Milesios, quibus præter lanam publicam ablatam, iniquos sumptus in adventum, contumelias et injurias in magistratum Milesium, myoparonem pulcherrimum abstulit et vendidit, 34, 35. Idem iste quum in locum C. Malleoli comitis ac sodalis sui, in quæstorio munere successisset, simul pupilli Malleoli tutor factus, in ejus bona scelestissime impetum fecit, et quum H-S vicies quinquies (512,500 fr.) redegissee constaret, ut Romam rediit, nullam libellam pupillo, nullam matri ejus, nullam tutoribus reddidit, 36, 37. Pro quæstore vero Lyciam, Pamphyliam, Pisidiam, Phrygianique frumento imperando, æstimando, aliisque rationibus pecuniam exigendo vexavit, 38, 39.

Postremo loco crimina a Verre in prætura urbana commissa pertractantur, ubi primum docetur, qualis in edicto constituendo fuerit, exemplis edictorum de mulierum hereditatibus,

40-44. Et de hereditatum possessionibus, 45, 46. Deinde **quæ** ejus crudelitas et superbia in plebem romanam fuerit, **quæ** decretorum novitas et iniquitas, 47, 48. Tum quomodo in **tuen-**dis publicis ædificiis versatus sit, 49. In primis in æde Castoris, quam quum tuendam habuisset P. Junius, post ejus mortem filium impuberem, nova locatione, omnibus bonis patriis **exuit**, 50-59. Denique quomodo publicum judicium exercuerit, 60 seqq. Verum hujus partis pleraque una cum ceteris usque **ad finem libri primi** interciderunt.

M. T. CICERONIS ORATIONES.

IN C. VERREM ACTIO SECUNDA. LIBER PRIMUS.

DE PRÆTURA URBANA.

ORATIO SEXTA.

I. **N**EMINEM vestrum ignorare arbitror, iudices, hunc per hosce dies sermonem vulgi¹, atque hanc opinionem populi romani fuisse, C. Verrem altera actione responsurum² non esse, neque ad iudicium affuturum. Quæ fama non idcirco solum emanarat, quod iste certe statuerat ac deliberaverat non adesse; verum etiam, quod nemo quemquam tam audacem, tam amentem, tam impudentem fore arbitrabatur,

1. *Vulgi*. Ad h. l. adnotat Quintil. IX, 4: « Cur hosce potius quam hos? neque enim erat asperum. Rationem fortasse non reddam, sentiam esse melius. Cur non satis sit *sermonem vulgi fuisse?* compositio enim patiebatur. Ignorabam; sed ita, ut audio, hoc animus accipit plenum sine hac geminatione non esse ». Nonnulli libri veteres « vulgo, populo », quos et Tulliana elegantia et Quintiliani auctoritas h. l. refellit.

2. *Responsurum*. Præconi et accusatorem et reum citanti: præsto futurum in iudicio, ut apud Phæd. « citati non respondent ». Tunc enim *respondere* dicebantur, quum a præcone appellati prodirent, seque adesse testati debitum in iudicio sibi locum occuparent. Sic infra « præsto est, respondet, defenditur »; et Verr. II, 40: « citatus accusator M. Pacilius nescio quo casu, non respondit, non affuit ». Sic Ascon. Græv. Ferrat. Ma-

qui tam nefariis criminibus, tam multis testibus evictus³, ora iudicum adspicere, aut os suum populo romano ostendere auderet. Est idem Verres, qui fuit semper; ut ad audendum projectus⁴, sic paratus ad audiendum⁵: præsto est; respondet; defenditur. Ne hoc quidem sibi reliqui facit, ut in rebus turpissimis, quum manifesto teneatur, si reticeat, et absit, tamen impudentiæ⁶ suæ pudentem exitum quæsisse videatur. Patior⁷, iudices, et non moleste fero, me laboris mei, vos virtutis vestræ fructum esse laturos. Nam si iste id fecisset, quod primo statuerat, ut non adesset; minus aliquando, quam mihi opus esset, cognosceretur, quid ego in hac accusatione comparanda constituendaque elaborassem: vestra vero laus tenuis plane atque obscura, iudices, esset. Neque enim hoc a vobis populus romanus exspectat, neque eo potest esse contentus, si condemnatus sit is, qui adesse noluerit; et si fortes fueritis in eo, quem nemo sit ausus defendere. Imo vero adsit, respondeat; summis opibus, summo studio potentissimorum hominum defendatur; certet mea diligentia cum illorum omnium cupiditate; vestra integritas cum istius pecunia; testium constantia cum illius patronorum minis atque potentia: tum demum illa victa videbuntur, quum in contentionem

nutius autem *responsurum* accipit, quasi per Hortensium orationem sit habiturus Verres, et adnotat reum in iudicio tacere, et per patronum tantummodo respondere. Vere, sed *non erat hic locus*.

3. Scholiast. anon. et quidam scr. lib. *convictus*. J.V. L. — Vulgatam ut exquisitiorem et hoc sensu non semel occurrentem defendunt Græv. Ernest. Beck.

4. *Projectus*. De eo nempe dicitur

qui audaciæ est eminentis ac projectæ.

5. *Audiendum*. Subaud. omnia sibi objecta probra: qui promptus est ad quidvis probum audiendum, qui nullo pudore suffunditur.

6. *Impudentiæ*. Aliquo saltem pudoris vestigio impudentem vitam obtegat.

7. *Patior*. Verumtamen gaudeo Verrem non abiisse: sic enim laudem feremus, ego ex mea diligentia, vos ex integritate vestra. Summa cum digni-

certamenque venerint. Absens⁸ si iste esset damnatus, non tam ipse sibi consuluisse, quam invidisse vestrae laudi videretur.

II. Neque enim salus ulla reipublicae major hoc tempore¹ reperiri potest, quam populum romanum intelligere, diligenter rejectis² ab accusatore iudiciis, socios, leges, rempublicam, senatorio consilio maxime posse defendi: neque tanta fortunis omnium perniciēs potest accedere³, quam opinione populi romani rationem veritatis, integritatis, fidei, religionis, ab hoc ordine abjudicari. Itaque mihi videor magnam, et maxime ægram, et prope depositam reipublicae partem⁴ suscepisse; neque in eo magis meae, quam vestrae laudi existimationique servisse. Accessi enim ad invidiam iudiciorum levandam, vituperationemque tollendam: ut, quum hæc res pro voluntate populi romani esset iudicata, aliqua ex parte mea diligentia constituta⁵ auctoritas iudiciorum videretur; postremo, ut esset⁶ hoc iudicatum, ut finis aliquando iudiciariae controversiae constitueretur. Etenim sine dubio, ju-

tate laboris fructus in honesta laude ponitur. Vide Curtium ad Sallust. Cat. XXXV, 3.

8. Absens. In exilium voluntarium ante latam sententiam profectus. — Damnatus. Namque ideo non vitabatur damnatio, et damnatum hic ipsum iri supponitur.

II. 1. Hoc tempore. Quo populus illam veterem iudiciorum vim requirit. Divin. 3.

2. Rejectis. I. e. electis. Vid. Act. I, 3.

3. Ruhnken. ad Rutil. Lup. pag. 3, accidere, quod habebant jam quædam edd. J. V. L.—*Quam opinione*. Quam prave iudicando facere, ut populus

rom. opinetur æquitatem, etc. in senatorum iudiciis remanere non posse.

4. Partem. Iudicia. — *Depositam*. Desperatam. Metaphora de ægrotis sumpta, qui desperati ante januas suas deponebantur, ut a prætereuntibus viserentur ac curarentur, si quid forte opis in eis esset. Vide Serv. ad Æn. XII, 395.

5. Constituta. Constabilita.

6. Lambino placebat « quum esset hoc iudic. » Mureto » ut ut esset h. » Alii aliter conjiciunt. Legit Hotom. « et finis ». Ceterum docet J. F. Gron. Observ. III, 6, ut sæpe idem esse ac utut, utcumque. Quod etsi verissimum est, parvam tamen h. l. obscuritatem

dices, in hac causa ea res⁷ in discrimen adducitur. Reus est enim nocentissimus : qui si condemnatur, desinent homines⁸ dicere, his judiciis pecuniam plurimum posse; sin absolvitur, desinemus nos de judiciis transferendis recusare. Tametsi de absolutione istius neque ipse jam sperat, nec populus romanus metuit. De impudentia singulari, quod adest, quod respondet, sunt qui mirentur : mihi, pro cetera ejus audacia atque amentia, ne hoc quidem mirandum videtur. Multa enim et in deos et in homines impie nefarieque commisit; quorum scelerum poenis⁹ agitur, et a mente consilioque deducitur.

III. Agunt eum præcipitem poenæ civium romanorum; quos partim¹ securi percussit, partim in vinculis necavit, partim implorantes jura libertatis et civitatis in crucem sustulit. Rapiunt eum ad supplicium dii patrii : quod iste inventus est, qui e complexu parentum abreptos filios ad necem duceret, et parentes pretium pro sepultura liberum posceret. Religiones vero cærimoniarumque omnium sacrorum fanorumque violatæ, simulacraque deorum, quæ non modo ex suis templis ablata sunt, sed etiam jacent in tenebris ab isto retrusa² atque abdita, consistere ejus animum

parit *ut esset*, quia particula *ut* paullo ante, et statim alio sensu ponitur. Sensus est : Denique, utcumque hoc sit judicatum, finem judicium illud controversiæ de judiciis constituit : nam si damnatur Verres, reconciliabitur senatoribus amissa existimatio; sin autem absolvitur, nemo recusare honeste poterit, quo minus ad equites judicia transferantur.

7. *Ea res*. An judicia penes ordinem senatorium manere debeant, necne.

8. Sic vett. edd. et MSS nonnulli. Apud Lambin. et Gruter. « omnes dicere ».

9. *Pœnis*. Furis ultricibus. Sic paullo post : « poenæ civium romanorum », et in Plon. 37, ac Dom. 9. De pulcherrimo hoc toto loco, conferre operæ pretium esset scriptam elatissimis sensibus D. Juven. Sat. XIII.

III. 1. *Quos partim*. Hæc fusa tractantur Verrina ultima de suppl. c. 28 et sqq.

2. *Retrusa*. No sacrilegium pateret.

sine furore atque amentia non sinunt³. Neque iste mihi videtur se ad damnationem offerre solum, neque hoc avaritiæ supplicio⁴ communi, qui se tot sceleribus obstrinxerit, contentus esse: singularem quamdam poenam istius immanis atque importuna natura desiderat. Non id solum quæritur, ut, isto damnato, bona restituantur iis, quibus erepta sunt; sed et religiones deorum immortalium expiandæ, et civium romanorum cruciatus, multorumque innocentium sanguis, istius supplicio luendus est. Non enim furem, sed ereptorem⁵; non adulterum, sed expugnatorem pudicitiae; non sacrilegum, sed hostem sacrorum religionumque; non sicarium, sed crudelissimum carnificem civium sociorumque, in vestrum iudicium adduximus: ut ego hunc unum ejusmodi reum post hominum memoriam fuisse arbitrer, cui damnari⁶ expediret.

IV. Nam quis hoc non intelligit, istum absolutum, diis hominibusque invitis, tamen ex manibus populi romani eripi nullo modo posse? Quis hoc non perspicit, præclare nobiscum¹ actum iri, si populus romanus istius unius supplicio contentus fuerit², ac non sic statuerit, non istum majus in sese scelus conce-

3. *Non sinunt.* Sic Juven. « continuo templum et violati numinis aras, Et quod præcipuis mentem sudoribus urget Te videt in somnis: tua sacra et major imago Humana, turbat pavidum, cogitque fateri ».

4. *Supplicio.* Quod avaritiæ, seu repetundarum damnatis infligi solet; pecuniæ erat redditio et exilium.

5. *Ereptorem.* Quasi legum poenas contemnentem. Verris crimina omnia ad apertam vim ita deducit Cicero, ut mira correctione rem amplificet, et gravius priori semper vocabulum subjiciat.

6. *Cui damnari.* Nam si a vobis absolvitur, ad populi iudicium deducetur; morte mulcendus, propter jus libertatis et civitatis, civium rom. nece, imminutum.

IV, 1. *Nobiscum.* Cum senatoribus. Significat populum rom. in alios quoque senatores animadversurum. Tribunis enim, lege Pompeia hoc ipso anno lata, licebat quemcumque vellent, ad populum trahere condemnandum.

2. *Olim erit.* Sed Prisc. lib. XVIII, pag. 1155, ed. Putsch. fuerit. Sic deinde, statuerit. J. V. L.

pisce, quum fana spoliarit, quum tot homines innocentes necarit, quum cives romanos morte, cruciatu, cruce affecerit; quum prædonum duces, accepta pecunia, dimiserit; quam eos, si qui istum tot, tantis, tam nefariis sceleribus coopertum³, jurati sententia sua liberarint? Non est, non est in hoc homine cuiquam peccandi locus, iudices: non is est reus, non id tempus⁴, non id consilium; metuo ne quid arrogantius apud tales viros videar dicere, ne actor quidem est is, cui reus tam nocens, tam perditus, tam victus⁵, aut occulte surripi, aut impune eripi possit. His ego iudicibus non probabo, C. Verrem contra leges pecunias cepisse? sustinebunt tales viri, se tot senatoribus, tot equitibus romanis, tot civitatibus, tot hominibus honestissimis ex tam illustri provincia, tot populorum privatorumque literis non credidisse? tantæ populi romani voluntati restitisse? Sustineant: reperiemus, si istum vivum⁶ ad aliud iudicium perducere poterimus, quibus probemus, istum in quæstura pecuniam publicam, Cn. Carboni consuli datam, avertisse; quibus persuadeamus, istum alieno⁷ nomine a quæstoribus urbanis, quod priore actione didicistis⁸, pecuniam abstulisse. Erunt, qui et in eo quoque audaciam ejus reprehendant, quod aliquot

3. *Coopertum*. Sic apud Sall. Catil. 23: «flagitiis atque facinoribus coopertus».

4. *Id tempus*. Quum senatores invidia corruptorum iudiciorum laborant.—*Id consilium*. Ex optimo quoque adscitum. Itaque corruptores non habent, quid sperent.

5. *Victus*. Convictus. *Occulto*. Largitionibus pecuniarum.—*Tot senatoribus*. Testibus scilicet in Verrem productis.

6. *Vivum*. Periculum est enim, si absolvitur, ne populi manibus discerpatur.

7. Jac. Gronovius, dum corrigendum putat, «empti frumenti nomine», errat tota via. J. V. L. — Non enim hæc pertinent ad præturam Siciliensem, sed ad illud tempus quo Cn. Carbonis proquæstor Verres pecuniam publicam alieno, s. falso nomine avertit. Vid. inf. c. 18.

8. *Didicistis*. Ex testibus.

nominibus⁹ de capite, quantum commodum fuerit, frumenti decumani detraxerit. Erunt etiam fortasse, iudices, qui illum ejus peculatum¹⁰ vel acerrime vindicandum putent, quod iste M. Marcelli et P. Africani monumenta, quæ nomine illorum, revera populi romani et erant, et habebantur, ex fanis religiosissimis, ex urbibus¹¹ sociorum atque amicorum non dubitaverit auferre.

V. Emerserit¹ ex peculatus etiam iudicio : meditetur de ducibus hostium, quos accepta pecunia liberavit; videat, quid de illis respondeat, quos in eorum locum subditos domi suæ reservavit²; quærat non solum, quemadmodum nostro crimini, verum etiam quo pacto suæ confessioni possit mederi; meminerit, se priore actione, clamore populi romani infesto atque inimico excitatum, confessum esse, duces a se prædonum securi non esse percussos; se jam tum esse veritum, ne sibi crimini daretur, eos ab se pecunia liberatos; fateatur id, quod negari non potest, se privatam³ hominem, prædonum duces vivos atque incolumes domi suæ, posteaquam Romam redierit, usque dum per me licuerit, tenuisse⁴: hoc in illo majestatis

9. *Nominibus*. Quod aliquot debitoribus *de capite*, i. e. de summa frumenti seu de toto frumento quod populo rom. debebant decumani, tantum Verres detraxit, et in privatos usus convertit quantum sua referre arbitratu est. Verr. III, passim.

10. *Peculatum*. *Peculatus* appellatur, non solum pecuniæ et nummorum rapina, sed et cujusvis rei, quæ publica sit et populi rom.

11. Lambinus, «et ex urbibus». Quod Garat. probat.

V. 1. *Emerserit*. Pingamus cum in

peculatus iudicio absolutum iri; meditandum illi erit, quomodo se defendat, etc. Verri denuntiat Cicero iudicium majestatis, propter duces hostium liberatos, aut etiam in domo, ut iste dicebat, servatos, et mercatores innocentissimos in eorum locum subditos ac trucidatos. Verr. V, 39-52.

2. Idem Lambinus habet «reservavit», quod male, ut videtur, consonat cum superiore «liberavit». J. V. L.

3. *Privatum*. Quod majestatis crimen est.

4. Lamb. «retinuisse». J. V. L.

judicio si licuisse sibi ostenderit, ego oportuisse concedam. Ex hoc quoque evaserit : proficiscar eo⁵, quod me jam pridem vocat populus romanus. De jure⁶ enim libertatis et civitatis suum putat esse judicium : et recte putat. Confringat iste sane vi sua consilia senatoria ; quæstiones⁷ omnium perrumpat ; evolet ex vestra severitate : mihi credite, arctioribus apud populum romanum laqueis tenebitur. Credet iis equitibus romanis populus romanus, qui ad vos antea producti testes, ipsis inspectantibus, ab isto civem romanum, qui cognitores⁸ homines honestos daret, sublatum esse in crucem dixerunt. Credent omnes v et xxx tribus⁹ homini gravissimo atque ornatissimo M. Annio, qui, se præsentem, civem romanum securi percussum esse dixit. Audietur a populo romano vir primarius, eques romanus, L. Flavius, qui suum familiarem He-

5. *Eo.* Ad judicium illud, ad quod me populus, omisiss aliis, jam pridem vocat. Perduellionis, i. e. in patriam parricidii judicium intelligit orator, quod in campo Martio, triginta quinque tribubus convocatis, fiebat de cive, qui civem suum vinculis, virgis, morte denique contra leges Porciam et Semproniam, affecisset. Sceleris hujus poena erat capitalis. Porro quum esset Cicero ædilis curulis, habendæ concionis et diem dicendi jus habebat, æque ac tribuni plebis. De his vid. pro Rabir. et T. Liv. I, 26.

6. *De jure.* Arbitratur enim populus de violatis, quibus libertas et jura civium sanciantur, legibus pertinere ad se judicium.

7. *Quæstiones.* Tribunalia prætorum de repetundis querentium largitionibus suis perrumpat. Illa autem consilia senatoria vocat quod illis

unusquisque prætor cum senatorum consilio præest.

8. *Cognitores.* Dicuntur h. l. homines qui aliquem cognoscunt, quique de ejus statu possunt testificari. De his et seqq. vid. Verr. V.

9. *Tribus.* Quarum aliæ rusticæ, aliæ urbanæ dicebantur ; « laudatissimæ, inquit Plinius, eorum qui rura haberent ; et in urbanas transferri ignominie erat, desidiæ, probro ». Porro quum comitiis centuriatis rei perduellionis judicarentur, ut est in Tab. XII : « de capite civis nisi per maximum comitiatum ne feranto » ; idemque Cicero testatur Sext. 30, de Leg. III, 19 ; et ea a magistratibus majoribus tantum convocari possent ; magistratus minores, si quem accusare ad populum vellent, diem comitiis centuriatis a consulibus aut prætore urbano petebant. Hoc vero locum

rennium, negotiatorem¹⁰ ex Africa, quum eum Syracusis amplius centum cives romani cognoscerent, lacrymantesque defenderent, pro testimonio dixit, securi esse percussum. Probabit¹¹ fidem, et auctoritatem, et religionem suam L. Suetius, homo omnibus ornamentis præditus, qui juratus apud vos dixit, multos cives romanos in lautumiis¹² istius imperio crudelissime per vim morte esse multatos. Hanc ego causam quum agam, beneficio populi romani, de loco superiore¹³, non vereor, ne aut istum vis ulla ex populi romani suffragiis eripere, aut a me ullum munus¹⁴ ædilitatis amplius aut gratius¹⁵ populo romano esse possit.

VI. Quapropter omnes in hoc iudicio conentur omnia : nihil est jam¹, quod in hac causa peccare quisquam, iudices, nisi vestro periculo, possit. Mea² quidem ratio, quum in præteritis rebus est cognita, tum in reliquis explorata atque provisa est. Ego meum studium in rempublicam jam³ illo tempore ostendi, quum longo intervallo veterem consuetudinem⁴ retuli, et

tribus nominantur, quod his etiam suffragiis populus, ante suffragii lationem, in tribus divideretur, et quod in ipsis tribubus centuriæ continerentur. Conf. Ursin. et Vales. ad Liv. I, 43. **FERRAT.**

10. *Negotiatorem.* De negotiatoribus vide ad Verr. II, 77.

11. *Lambinianæ* aliquot edd. « Probavit ». Errore forsan operarum. J. V. L.

12. *Lautumiis.* Quod nomen erat Syracusarum carceri. Vid. Verr. V, 27.

13. *De loco superiore.* Nempe pro rostris in foro, seu de suggesto in campo Martio, utpote ædilis factus, concionem habebit. Quod populo rom. acceptum munus refert.

14. *Munus.* De ædiliam solemnibus ludis, qui *munera* vocabantur, et de hac oratoris allusione vid. Act. I, 12.

15. *Perperam* iterum aliquot edd. Lambini, *gravius.* J. V. L.

VI. 1. *Nihil est jam.* Postquam diligentis accusatoris officia præstitimus.

2. *Mea quidem.* Quod ad me attinet, ex iis, quæ, in comparanda accusatione, egerim, provisum est, quid a me nunc expectari debeat.

3. Ursinus conj. « jam tum illo tempore », quia in cod. MS invenerat « tantum illo tempore ». J. V. L.

4. *Veterem consuetudinem.* Ut homines honesti, non adolescentes, aut quadruplatores accusarent. Vid. Divin. cap. 21.

rogatu sociorum atque amicorum populi romani, meorum autem necessariorum, nomen hominis audacissimi detuli. Quod meum factum lectissimi viri atque ornatissimi (quo in numero e vobis complures fuere) ita probarunt, ut ei, qui istius quæstor⁵ fuisset, et ab isto læsus inimicitias justas persequeretur, non modo deferendi nominis, sed ne subscribendi quidem, quum id postularet, facerent potestatem. In Siciliam sum inquirendi causa profectus: quo in negotio industriam meam celeritas reditionis⁶, diligentiam multitudo literarum et testium declaravit; pudorem vero ac religionem, quod, quum venissem senator ad socios populi romani, qui in ea provincia quæstor fuissem, ad hospites meos⁷ ac necessarios causæ communis defensor deverti potius, quam ad eos, qui a me auxilium petivissent. Nemini meus adventus labori, aut sumptui, neque publice, neque privatim, fuit. Vim in inquirendo tantam habui, quantam mihi lex dabat; non quantam⁸ habere poteram istorum studio, quos iste vexarat. Romam ut ex Sicilia redii, quum iste, atque istius amici, homines lauti⁹ et urbani, sermones hujuscemodi dissipassent, quo animos

5. *Quæstor. Q. Cæcilius. — Justas.* Has fuisse simulatas dixit in Divin. quam de hoc toto loco consule. Nunc vero aliud argumentum victoriæ suæ aperit.

6. *Celeritas reditionis.* Quum totam Siciliam quinquaginta diebus obierit.

7. *Ad hospites meos.* Ut ne umbra quidem suspicionis in mea fide resideret, neque me gratia aut pecunia ad accusandum Verrem inductum crederetur.

8. *Non quantam.* Ostendit Cicero se non nimio studio aut apparatu in Verrem inquisisse, sed accusato-

rio jure modeste usum intra legem sese continuisse, et se tum fidelem erga Sienlos patronum exstitisse, tum etiam non iniquum in Verrem accusatorem. Si enim Siculis injurias suas ulcisci cupientibus mos gerendus fuisset, multo plura a volentibus colligere potuisset. Vide quid de nimia accusatorum severitate dicat, pro Flacco, quum Lælium Flacci accusatorem ita describit: « Qui comitatus in inquirendo? Comitatum dico? imo vero, quanti exercitus? quæ jactura? qui sumptus? etc. »

9. *Lauti.* His verbis præcipue signi-

testium retardarent, me magna pecunia a vera accusatione esse deductum, tametsi probabatur¹⁰ nemini, quod et ex Sicilia testes erant ii, qui quæstorem me in provincia cognoverant, et hinc homines maxime illustres, qui, ut ipsi noti sunt, sic nostrum unumquemque optime norunt; tamen usque eo timui, ne quis de mea fide atque integritate dubitaret, donec ad rejiciendos judices venimus.

VII. Sciebam in rejiciendis judicibus nonnullos, memoria nostra, pactionis¹ suspicionem non vitasse, quum ipsa in accusatione eorum industria ac diligentia probaretur. Ita rejeci judices, ut hoc constet, post hunc statum² reipublicæ, quo nunc utimur, simili splendore et dignitate consilium nullum fuisse. Quam iste laudem³ communem, ait, sibi esse mecum: qui quum P. Galbam⁴ judicem rejecisset, M. Lucretium retinuit; et, quum ejus patronus ex eo quæreret, cur suos familiarissimos, Sex. Peducæum, Q. Considium, Q. Junium rejici passus⁵ esset, respondit, quod eos in judicando nimium sui juris⁶ sententiæque cognosceret. Itaque, judicibus rejectis, sperabam, jam onus meum vobiscum esse commune; putabam non solum notis⁷, sed etiam ignotis probatam meam fidem esse

ficatur Hortensius, vestitu et cultu corporis elegantior. A. Cell. I, 5.

10. Ernest. conj. « probabantur ». J. V. L.

VII. 1. *Pactionis*. Quam cum reo fecissent, ut prævaricarentur.

2. *Post hunc statum*. Ab annis decem, ex quo tempore judicat senatus.

3. *Laudem*. Optimæ judicum rejectionis.

4. *P. Galbam*. Virum integerrimum. — *M. Lucretium*. Malum hominem, et corruptioni ohnoxium, quem

a Verre retentum Cicero rejecerat.

5. *Rejici passus*. Asconius arbitratu rejectionem a reo primum, ab accusatore postea fieri, quod verisimile videtur. Itaque interpretatur *rejecisset ipse*; nam ne rejicerentur ab accusatore, qui poterat obsistere? MÆ.

6. *Nimium sui juris*. Pertinacius suæ opinioni adhærentes; et qui nulla gratia a semel suscepta sententia deduci possent.

7. *Notis*. *Noti et ignoti* activa significatione, pro iis qui norunt et

et diligentiam : quod me non fefellit. Nam comitiis meis⁸, quum iste infinita largitione contra me uteretur, populus romanus iudicavit, istius pecuniam, quæ apud me contra fidem meam nihil potuisset, apud se contra honorem meum nihil posse debere. Quo quidem die primum, iudices, citati in hunc reum consedistis, quis tam inimicus huic ordini fuit, quis tam novarum rerum, iudiciorum⁹, iudicumque cupidus, qui non conspectu consessuque vestro commoveretur? Quum in eo vestra mihi dignitas fructum diligentiae¹⁰ referret; id sum assequutus, ut una hora, qua coepi dicere, reo audaci¹¹, pecunioso, profuso, perdito, spem iudicii corrumpendi præciderem; ut primo die, testium tanto numero citato, populus romanus iudicaret, ipso absoluto rempublicam stare non posse¹²; ut alter dies amicis istius ac defensoribus non modo spem victoriae, sed etiam voluntatem defensionis auferret; ut tertius dies sic hominem prosterneret, ut, morbo simulato, non, quid responderet, sed, quemadmodum non responderet, deliberaret: deinde reliquis diebus¹³, his criminibus, his testibus, et urbanis, et provincialibus sic obrutus atque oppressus est, ut his ludorum diebus¹⁴ interpositis, nemo istum comperendinatum, sed condemnatum iudicaret.

VIII. Quapropter ego, quod ad me attinet, iudices,

qui non norunt, sæpius ut h. l. usurpatur.

8. *Meis*. Quibus mea res seu ædilitas agebatur. Vid. Act. I, 9.

9. *Judiciorum*. Subaud. *novorum*.

10. *Diligentiæ*. Quam scilicet in rejiciendis iudiciis adhibueram.

11. *Audaci*. Ad corrumpendum.—
Perdito. Qui nullis rationibus, modo ad finem perveniret, parcebat.

12. *Stare non posse*. Quod qui integerrimi iudices haberantur, ii corruptissime iudicarent.

13. *Reliquis diebus*. Sex; nam diebus novem primam actionem transactam esse ostendit.

14. *His ludorum diebus*. Per hos dies, qui prope quadraginta interpositi sunt, ludorum causa. Vide Act. I, cap. 10.

vici : non enim spolia C. Verris, sed existimationem populi romani concupivi¹. Meum fuit cum causa accedere ad accusandum ; quæ causa fuit justior², quam a tam illustri provincia defensorem constitui et deligi? reipublicæ consulere³ ; quid jam reipublicæ honestius, quam in tanta invidia judiciorum adducere hominem, cujus damnatione totus ordo cum populo romano et in laude et in gratia possit esse? ostendere ac persuadere, hominem nocentem adductum esse ; quis est in populo romano, qui hoc non ex priorē actione abstulerit⁴, omnium ante damnatorum scelera, furta, flagitia, si in unum locum conferantur, vix cum hujus parva parte æquari conferrique posse? Vos, quod ad vestram famam, existimationem, salutemque communem pertinet, judices, prospicite atque consulite⁵ : splendor vester facit, ut peccare sine summo reipublicæ detrimento ac periculo non possitis. Non enim potest sperare populus romanus, esse alios in senatu, qui recte possint judicare, vos si non potueritis. Necessesse est, quum de toto ordine desperarit, aliud genus⁶ hominum atque aliam rationem judiciorum requirat. Hoc si vobis ideo levius videtur, quod putatis onus esse grave⁷ et incommodum, judicare ; intelligere debetis primum, interesse, utrum id onus vosmet ipsi rejeceritis, an, quod probare populo romano

VIII. 1. *Concup.* Non ut quadruplatores, tamquam hostem devictum spoliare volui ; quæsi vi tantum ut bene de me populus rom. existimaret, quem videret cum justa causa accessisse ad accusandum, i. e. reum nocentissimum in judicium adduxisse.

2. Male aliquot MSS, *illustrior*. J. V. L.

3. *Consulere*. A superioribus verbis

meum fuit pendet. Græv. habet « reipublicæque consulere ».

4. *Abstulerit*. Persuasum habens recesserit.

5. *Consulite*. Nam ego, quod ad me attinet, vici.

6. *Aliud genus*. Alium ordinem, equestrem scilicet.

7. *Grave*. Quod multæ sint subeundæ inimicitiae.

fidem vestram et religionem non potueritis, eo vobis judicandi potestas erepta sit : deinde etiam illud cogitate, quanto periculo⁸ venturi simus ad eos iudices, quos propter odium vestri populus romanus de vobis voluerit judicare. Verum vobis dicam id, quod intellexi, iudices : homines scitote esse quosdam, quos tantum odium vestri ordinis teneat, ut hoc palam jam dictitent, se istum, quem sciant esse hominem improbissimum, hoc unò nomine absolvi velle, ut ab senatu judicia per ignominiam turpitudinemque auferantur. Hæc⁹ me, iudices, pluribus verbis vobiscum agere coegit non timor meus de vestra fide, sed spes illorum¹⁰ nova ; quæ quum Verrem a porta subito ad iudicium retraxisset, nonnulli suspicati sunt, non sine causa illius consilium tam repente esse mutatum.

IX. Nunc, ne novo¹ querimoniæ genere uti possit Hortensius, et ea² dicere, opprimi reum, de quo nihil dicat accusator ; nihil esse tam periculosum fortunis innocentium, quam tacere adversarios ; et ne aliter³, quam ego velim, meum laudet ingenium, quum dicat, me, si multa dixissem, sublevaturum fuisse eum, quem contra dicerem ; quia non dixerim, perdidisse : morem illi geram ; utar oratione perpetua : non⁴ quoniam

8. *Quanto periculo.* Quia, quod integri sunt equites et inimici nobilitatis, quum translata erunt a vobis ad eos iudicia, de vestra infamia et iniquitate severe iudicabunt.

9. *Hæc.* Mitigat superioris admonitionis acerbiteratem.

10. *Illorum.* Verris amicorum. — *A porta.* Qua in exilium proficisceretur.

IX. 1. *Novo.* Inaudito : ridiculo. Quis enim umquam rei patronus pauciora ab accusatore dici questus est ?

Ironice Hortensii querelam proponit orator.

2. *Quorsum ea ?* Vereor, ne ex eo ortum sit. Forte etiam fuit *ita*, quod esset elegantius ; et *ita* sæpe sic cum verbo *dicere* est apud Ciceronem. Ernest. J. V. L. — Sed *ea* idem est h. l. ac *hæc et talia*, et optime congestis Hortensii querimoniis accommodatur.

3. *Ne aliter.* Astutum me scilicet et callidum appellans.

4. *Non quoniam.* Nam ex priore

hoc sit necesse; verum ut experiar, utrum ille ferat molestius, me tunc tacuisse, an nunc dicere. Hic tu fortasse eris diligens, ne quam ego horam de⁵ meis legitimis horis remittam: nisi omni tempore, quod mihi lege concessum est, abusus ero, querere; deum atque hominum fidem implorabis; circumveniri⁶ C. Verrem, quod accusator nolit tamdiu, quamdiu liceat, dicere. Quod mihi lex mea causa⁷ det, eo mihi non uti non licebit? nam accusandi mihi tempus mea causa datum est, ut possem oratione mea crimina causamque explicare: hoc si non utor, non tibi injuriam facio, sed de meo jure aliquid et commodo detraho. Causam enim⁸, inquit, cognosci oportet. Ea re quidem, quod aliter condemnari reus, quamvis sit nocens, non potest. Id igitur tu moleste tulisti, a me aliquid factum esse, quo minus iste condemnari posset? nam causa cognita multi possunt absolvi: incognita quidem condemnari nemo potest. Adimo enim comperendinatum⁹. Quod habet lex in se

actione constat reum absolvi non posse.

5. *De meis.* De eo tempore, quod mihi lex ad accusandum tribuit. Tempus definitum Tullius *horam* vocat græco more. Viginti dies actori dabantur ad accusandum, totidemque defensori ad respondendum. Nota ironiam in hoc toto loco.

6. *Circumveniri.* Subaud. *clamabis*.

7. *Mea causa.* Propter meam utilitatem.

8. *Causam enim.* Propositio Hortensii: cui respondet Cicero sateri se causam cognosci oportere eam ob rem, quod aliter, etc.

9. *Al. Comperendinatum*, q. J. V. L. — *Adimo.* Verba hæc Hortensii nomine dicuntur; quasi esset, at dicis

me reo comperendinationem, i. e. causæ in tertium diem dilationem (quam lege de repetundis jussit C. Servilius Glancia A. U. 653 prætor), auferre. Notat Asconius, comperendinato judicio, dicere priorem defensorem, posteriorem vero accusatorem. et defensionem tamquam in medio positam ab ultimo obrui accusatore. Ceterum illud non satis constat, et quamvis docti viri plerique probent, non male adversatur Ferratius, et postquam rationem istam isti legi repugnare docuit, ipsum Ciceronem Asconio opponit. Nempe pro Fonteio, 13: « M. Fonteius ita duabus actionibus accusatus est, ut objectum nihil sit, quo significari vestigium libidinis, aut audaciæ possit ». Duabus

molestissimum, bis ut causa¹⁰ dicatur, id aut mea causa potius est constitutum, quam tua, aut nihilo tua potius, quam mea. Nam si bis dicere est commodum, certe utriusque commune est. Si eum, qui posterius dixit, opus est redargui; accusatoris causa, ut bis ageretur, constitutum est. Verum, ut opinor, Glaucia¹¹ primus tulit, ut comperendinaretur reus: antea vel judicari primo¹² poterat, vel amplius pronuntiari. Utram igitur putas legem molliorem? opinor, illam veterem¹³, qua vel cito absolvi, vel tarde condemnari licebat. Ego tibi illam Aciliam¹⁴ legem

igitur actionibus accusatus jam fuerat Fonteius, et in secunda postremo loco defendebat Tullius. Et ipsis Verinis quas, tamquam dixerit vere, scripsit, facile est invenire locos, qui responsurum fuisse Hortensium demonstrant. Sic I, 28: «nisi forte illud dicet Hortensius», nondum igitur dixerat; et V, 13: «scilicet est metuendum, ne ad exitum defensionis tuæ vetus illa Antoniana dicendi ratio atque auctoritas proferatur». Cf. Verr. II, 72; III, 16; IV, 4; V, 1, etc.

10. *Bis ut causa.* Comperendinatio vel æque favet utrique; vel accusatori magis quam defensori. Si enim opus est redargui defensorem, qui in prima actione posterius dixit, secunda actio instituta est in gratiam accusatoris, ut hic possit redarguere in secunda actione, quæ defensor in prima dixerit. Hoc ergo sensu accusatori favet, quod hic actione prima neque prævidere potuit, neque occupare omnia, quæ rei causa defensor esset dicturus: hic enim *posterius dixit*, hunc *redargui* ab se commodum accusatori. Porro ademptam comperendinationem excusat, quod causa bis diceretur, et ex criminum repetitione

odium et invidia in reum crescerent. — *Quod aut.* Lectio nova Ernestio debetur. J. V. L.

11. *Glaucia.* C. Servilius Glaucia, quo prætor Saturninus maxime est usus, in illa seditione propter quam in curia est interfectus. Eum Cicero de Orat. III, per similitudinem *stercus curiæ* appellari posse dicit, nisi deformis esset cogitatio similitudinis.

12. *Primo.* Prima actione. — *Amplius* (gall. *plus ample informé*). Quam causa non satis explanata iudicibus videbatur, dicebant *non liquet*, i. e. obscura causa est; tum prætor, *amplius*, i. e. amplius est cognoscendum, pronuntiabat. Cui ampliacioni non certus erat definitus dies, ut tertius comperendinacioni; nec ampliacionis actionum certus erat numerus, ut patet ex causa Cottæ septies ampliata, Val. Max. VIII, 1, 11. Comperendinationis vero lege numerus actionum duarum præstitutus erat. Ergo durior erat ampliacione comperendinatio.

13. *Illam veterem.* Aciliam de repetundis; quam tulerat Acilius Glaudio hujusce prætoris pater.

14. Hotomannus, Observat. I, 14,

restituo, qua lege multi semel accusati, semel dicta causa, semel auditis testibus, condemnati sunt, nequaquam tam manifestis, neque tantis criminibus, quantis tu convinceris. Puta te non hac tam atroci, sed illa lege mitissima causam dicere. Accusabo : respondebis : testibus editis, ita mittam in ¹⁵ consilium, ut, etiamsi lex ampliandi ¹⁶ faciat potestatem, tamen isti turpe sibi existiment, non primo judicare ¹⁷.

X. Verum, si causam cognosci opus est, parumne cognita est? Dissimulamus, Hortensi, quod sæpe experti in dicendo sumus. Quis nos magnopere attendit umquam, in hoc quidem genere causarum, ubi aliquid ereptum, aut ablatum a quopiam dicitur? nonne aut in tabulis, aut in testibus omnis expectatio iudicum est? Dixi prima actione, me planum esse facturum, C. Verrem H-S quadringenties contra legem abstulisse. Quid? hoc planius egissem, si ita narrassem? Dio quidam fuit Halesinus, qui, quum ejus filio, prætore Sacerdote¹, hereditas a propinquo permagna venisset, nihil habuit neque negotii, neque controversiæ. Verres, simul ac tetigit provinciam, statim Messanam literas dedit; Dionem evocavit; calumniatores ex sinu suo² apposuit, qui illam hereditatem Veneri Erycinæ³ commissam

corrigi jussit, «illam antiquam legem», vel «illam Cæciliam». J. V. L. — Frustra. De toto hoc loco consule Ind. Leg.

15. *Mittam in consilium.* Sententias, causa perorata, ferre iudices jubebō.

16. *Ampliandi.* Lex Acilia ampliandi faciebat potestatem, si non liqueret; alioqui vel condemnare vel absolvere reum necesse erat. Comperendinatio autem nondum locum habebat, per quam his causa dicebatur.

17. *Judicare.* Quia non poterant causari rem non esse satis cognitam, tam manifestis criminibus, tot testibus probatam.

X. 1. *Sacerdote.* Is anno ante Verrem proximo prætor fuit in Sicilia.

2. *Ex sinu suo.* Subornavit ex domesticis, quos habebat maxime familiares, qui eum accusarent. Sic Cat. II: «de sinu et complexu Catilinæ».

3. *Veneri Erycinæ.* Vid. Div. 17. — *Commissam.* Addictam (gall. *confisquée au profit de*). Sic Verr. II, 14,

esse dicerent; hac de re ostendit se ipsum cogniturum. Possum deinceps totam rem explicare; deinde ad extremum id, quod accidit, dicere: Dionem H-S⁴ decies centena millia numerasse, ut causam certissimam obtineret; præterea greges equarum ejus istum abigendos⁵ curasse; argenti vestisque stragulæ⁶ quod fuerit, curasse auferendum. Hæc neque quum ego dicerem, neque quum tu negares, magni momenti⁷ nostra esset oratio. Quo tempore igitur aures judex erigeret, animumque attenderet? quum Dio ipse prodiret, quum ceteri, qui tum in Sicilia negotiis Dionis interfuisent; quum per eos ipsos dies, per quos causam Dio diceret, reperiretur pecunias sumpsisse mutuas, nomina⁸ sua exegisse, prædia vendidisse; quum tabulæ virorum bonorum proferrentur; quum, qui pecuniam Dioni dederunt, dicerent se jam tum audisse, eo nummos sumi, ut Verri darentur; quum amici, hospites, patroni Dionis, homines honestissimi, hæc eadem se audisse dicerent. Opinor, quum hæc fierent, tum vos audiretis, sicut audistis; tum causa agi⁹ videretur. Sic a me sunt acta omnia priore actione, ut in criminibus omnibus nullum esset, in quo quisquam vestrum per-

et apud JCtos. Jussus fuerat heres in foro statuas ponere; nisi poneret Veneri mulctandus. Has non ex testamento collocatas finxerunt falsi accusatores.

4. *H-S decies* (gall. 205,500 fr.)

5. *Abigendos. Abigere* ex JCtis est greges aut armenta abducere et deprædari: hinc *abigei* dicti, qui istiusmodi furta exercent. Digest. XLVII, 14.

6. *Vestisque stragulæ.* Hoc nomine intelliguntur tapetes, aulæa, peristromata et cetera, quibus, ornatus gra-

tia, *insternitur* humus, lectus, mensa, equus, etc.

7. *Magni momenti.* Ad fidem iudicibus faciendam.

8. *Nomina.* Debita.—*Tabulæ.* Quibus nimirum probaretur Dionem pecunias sumpsisse mutuas. Vidiuus pro Rosc. Com. I, 1, magnam fidem illis tabulis adhiberi, et in iudicium, quum opus esset, proferri.

9. *Ag.* Tunc reipso, revera causa agebatur.—MS Franc. 1: « agi vere ». Probat Græv. Lallèm. recte vero e glossa natum iudicat Ernest.

petuam accusationem requireret. Nego ¹⁰ esse quidquam a testibus dictum, quod aut vestrum cuiquam esset obscurum, aut cujusquam oratoris eloquentiam quæreret.

XI. Etenim sic me ipsum egisse memoria tenetis, ut in testibus interrogandis omnia crimina proponerem, et explicarem, ut, quum rem totam in medio proposuissem, tum denique testem interrogarem. Itaque non modo vos, quibus est judicandum, nostra crimina¹ tenetis, sed etiam populus romanus totam accusationem causamque cognovit: tametsi ita de meo facto loquor, quasi ego illud mea voluntate potius, quam vestra injuria² adductus fecerim. Interposuistis³ accusatorem, qui, quum ego mihi c et x dies solos in Siciliam postulassem, c et viii sibi in Achaiam postulare. Menses mihi tres⁴ quum eripuissetis ad agendum maxime appositos⁵, reliquum omne tempus hujus anni me vobis remissurum putastis: ut, quum horis nostris nos essemus usi, tu, binis ludis interpositis, quadragesimo post die responderes; deinde ita tempus duceretur, ut a M'. Glabrione prætore, et a magna parte horum judicum, ad prætorem alium judicesque alios veniremus. Hæc si ego non vidissem; si me non omnes noti ignotique monuissent, id agi, id cogitari, in eo

10. Sic Ern. ex MSS. Olim, n. ego.

XI. 1. *Nostra crimina.* Nostram criminationem.

2. *Vestra injuria.* Injustitia. Hortensium et ceteros Verris defensores alloquitur.

3. *Interposuistis.* De istis Verris et Hortensii fraudibus plura vide Act. I, 2, 10.

4. *Menses tres.* Maium, junium et quintilem. Quum enim iste Achaicus inquisitor CVIII dies obtinuisse, ob-

stituisse videtur ne Cicero ante hoc elapsum tempus causam oraret. Cicero enim L dies in Sicilia commoratus est, unde kal. maiis discesserat, et tribus sequentibus mensibus exspectavit, donec iste suum tempus consumpisset: et nonis tantum sextilibus orsus est.

5. *Appositos.* Quia, quum accusatio et defensio dies XL postulare, tantum in iis mensibus erat dierum utilium, ut iudicium terminaretur.

laborari, ut res in illud⁶ tempus rejiceretur; credo⁷, si meis horis in accusando uti voluissem, vererer, ne mihi crimina non suppetarent; ne oratio deesset; ne vox viresque deficerent; ne, quem nemo prima actione defendere ausus esset, eum ego bis accusare non possem. Ego meum consilium⁸ tum iudicibus, tum populo romano probavi. Nemo est, qui alia ratione istorum injuriæ atque impudentiæ potuisse obsisti arbitretur. Etenim qua stultitia fuissem, si, quam diem⁹, qui istum eripiendum redemerunt¹⁰, in cautione viderunt, quum ita caverent, SI POST KALEND. JAN. IN CONSILIUM IRETUR; in eam diem ego, quum potuissem vitare, incidissem? Nunc mihi temporis ejus, quod mihi ad dicendum datur, quoniam in animo est causam omnem exponere, habenda ratio est diligenter.

XII. Itaque primum illum actum¹ istius vitæ turpissimum et flagitiosissimum prætermittam. Nihil a me de pueritiæ suæ flagitiis peccatisque audiet, nihil ex illa impura adolescentia sua: quæ qualis fuerit, aut meministis, aut ex eo², quem sui simillimum produxit³, recognoscere potestis. Omnia præteribo, quæ mihi turpia dictu videbuntur; neque solum, quid istum audire, verum etiam, quid me deceat di-

6. Ernest. conjicit *aliud*; Schütz recepit. J. V. L.—Vulgatæ standum; *illud* enim intelligitur *tempus* quo alius futurus est prætor, alii iudices, i. e. annus sequens.

7. *Credo*, si. Ironice dictum.

8. *Meum consilium*. Omittendæ nimirum orationis perpetuæ.

9. *Si, quam diem*. Si ego in illud tempus incidissem, quod, in conditionibus seu clausulis pactioni appositis, providerunt ii qui Verris a iudicio liberandi provinciam, accepta

pecunia, susceperunt; quum ea lege iudicii corruptionem promitterent, si de Verre post kalendas januarias, i. e. anno sequenti iudicaretur. Vid. Act. I, 6.

10. *Redemerunt*. Conduxerunt certa pecunia, ut Verres eriperetur legibus. Sic ad Att. I: « rem illam redemptam a iudicibus confitentur ».

XII. 1. *Actum*. Partem. Metaphora e theatro desumpta.

2. *Ex eo*. Nempe Verris filio.

3. *Produxit*. Genuit. Subaudit Man.

cere, considerabo. Vos, quæso, date hoc, et concedite pudori meo, ut aliquam partem de istius impudentia reticere possim. Omne illud tempus, quod fuit, antequam iste ad magistratus remque publicam accessit, habeat per me⁴ solutum ac liberum. Sileatur de nocturnis ejus bacchationibus ac vigiliis; lenonum⁵, aleatorum, perductorum nulla mentio fiat; damna⁶, dedecora, quæ res patris ejus, ætas ipsius pertulit, prætereantur; lucretur⁷ indicia veteris infamiæ; patiatur⁸ ejus vita reliqua, me hanc tantam jacturam criminum facere. Quæstor Cn. Papirio⁹ consuli fuisti abhinc annos quatuordecim: ex ea die ad hanc diem quæ fecisti, in judicium voco. Hora nulla vacua a furto, scelere, crudelitate, flagitio reperietur. Hi sunt anni consumpti in quæstura, et legatione Asiatica, et prætura urbana, et prætura Siciliensi. Quare hæc eadem erit quadripartita distributio totius accusationis meæ.

XIII. Quæstor¹ ex senatusconsulto provinciam sor-

et Desj. in *judicium*. Qui sensus minus placet. — *Recognoscere*. Quasi tanta sit similitudo paternæ turpitudinis.

4. *Per me*. Quod ad me attinet ut filii turpitudine cognita, continuo parentis in mentem veniat.

5. *Lenonum*. Quos Verres socios adscisciebat. — *Perductores*. Hi sunt qui personas vel invitas variis artibus ad aliquem perducunt; in quo differunt a lenonibus. Sic *perducere* Suet. Calig. 25: «Perductam a marito conjunxit sibi».

6. *Damna* ad bona patris, *dedecora* d. ætatem, h. e. adolescentiam Verris referuntur.

7. *Lucretur*. Lucro apponat, quod veterem ejus infamiam non indicabo.

8. *Patiatur*. Reliqua ejus vita, quæ per se accusatori criminum satis dabit, illam jacturam compenset.

9. *Cn. Papirio*. Carboni, cujus alterum consulatum quem annos abhinc tredecim cum L. Cinna gessit, orator significat.

XIII. 1. *Quæstor*. A. U. C. 669. Cn. Papirio Carbone II, L. Cornelio Cinna IV cons. Porro quæstura primus erat ad honores gradus: illis a tribunis ærarii adnumerabatur pecunia in militum stipendium, annonam exercitus, et sumptum in legatos et consulis præfectos. Inde autem dictos apparet, quod illi in provinciis populo rom. a vectigalibus debitam pecuniam quærebant, et ad quæstores urbanos mittebant.

titus es : obtigit tibi consularis², ut cum consule Cn. Carbone esses, eamque provinciam obtineres. Erat tum dissensio³ civium; de qua nihil sum dicturus, quid sentire debueris : unum hoc dico, in ejusmodi tempore ac sorte⁴ statuere te debuisse, utrum malles sentire atque defendere⁵. Carbo graviter ferebat, sibi quæstorem obtigisse, hominem singulari luxuria atque inertia : verumtamen ornabat eum beneficiis⁶ omnibus. Ne diutius teneam, pecunia attributa⁷, numerata est; profectus est quæstor in provinciam; venit in Galliam exspectatus ad exercitum consularem cum pecunia. Simul ac primum ei occasio visa est (cognoscite hominis principium magistratuum gerendorum et reipublicæ administrandæ), aversa⁸ pecunia publica, quæstor consulem, exercitum, sortem provinciamque deseruit. Video quid egerim : erigit se; sperat, sibi auram⁹ posse aliquam afflari, in hoc crimine, voluntatis assensionisque¹⁰ eorum, quibus Cn. Carbonis mortui

2. *Consularis*. Ea erat quæ a consulari viro; *prætoria* vero quæ a prætorio regebatur. Vide plura ad orat. *de Provinciis consularibus*.

3. *Dissensio*. Verborum lenitate rei tristitiam mitigat. Bellum erat civile Marianum, quod atrociter gestum est ab anno 663 ad 671. Flor. III, 21.

4. *Sorte*. Provinciali administratione; quæ tibi sorte obtigerat.

5. *Malles defendere*. Ut lege illa nobili Solonia Atheniensis, quæ capite puniebat, si quis in seditione, non alterutrinus partis fuisset.

6. Vulgo inde a Victorio addebatur « officisque ». Delevit Ernest. auctoritate codd. et edd. vett. Defendit autem Garaton.

7. *Attributa*. Ex Scto assignata. Sic Varro : « attributa pecunia dicebatur

quæ assignata erat : unde tribuni ærarii dicti, quibus attributa erat pecunia, quæ militibus redderetur ».

8. *Aversa*. Alio versa. Notum juris verbum, de quo conf. J. F. Gronov. *Observ.* IV, 5.

9. *Auram*. Metaphora a zephyro ducta, quo afflati recreamur æstu languentes. Sensus est : Sperat illos sibi quodammodo fautores, qui Cn. Carbonem aversantur. Porro Cn. Carbo, Cinnanæ factionis dux, tertium consul, occisus est a Pompeio in Sicilia A. U. C. 671.

10. *Assensionisque*. Sic optime Man. Ern. At *dissensionisque* Franc. 1. Guelf. Cujac. edd. princ. Græv. Male. Nam voluntatis et assensionis sunt synonyma, et utrumque refertur ad auram. Sententia enim est, sperare Verrem se

nomen odio sit; quibus illam relictionem proditionemque consulis sui gratam sperat fore. Quasi vero id cupiditate defendendæ nobilitatis, aut studio partium fecerit, ac non apertissime consulem, exercitum, provinciamque compilarit, et propter impudentissimum furtum aufugerit. Est enim¹¹ obscurum, et ejusmodi factum ejus, ut possit aliquis suspicari, C. Verrem, quod ferre novos homines¹² non potuerit, ad nobilitatem, hoc est, ad suos transisse; nihil fecisse propter pecuniam. Videamus, rationes¹³ quemadmodum retulerit. Jam ipse ostendet, quamobrem Cn. Carbonem reliquerit; jam se ipse indicabit.

XIV. Primum brevitatem cognoscite: ACCEPI¹, inquit, VICIES² DUCENTA TRIGINTA QUINQUE MILLIA QUADRINGENTOS XVII NUMMOS: DEDI STIPENDIO, FRUMENTO, LEGATIS, PROQUÆSTORIBUS³, COHORTI PRÆTORIÆ⁴, H-S MILLE⁵ SEXCENTA TRIGINTA QUINQUE MILLIA QUADRINGEN-

Carbonis inimicorum assensione ac voluntate levatum iri.

11. *Est enim.* Ironica objectio.

12. *Novos homines.* Illos quorum majores nullum in rep. magistratum gesserant, Marii ac Cinnæ fautores, nobilibus vero ac Sullæ infensos.

13. *Rationes.* Acceptæ a consule pecuniæ.

XIV. 1. Sequuti sumus, post Gruteram, editionem Victorii. Aliter Budæus, lib. pr. de Asse; aliter Lambin. aliter MSS et edd. vett. J. V. L.

2. *Vicies*, etc. (443,113 fr. 31 c.)

3. Alii, « quæstoribus »; alii rectius, « pro quæstore », ut significet, quæ Verres sibi ipse, pro officio quæstorio, expensa tulerat. J. V. L. — *Proquæstores* autem ii erant in quæstoria procuratione, qui, in proconsulari, legati.

4. *Cohorti prætoriae.* Sic in re militari dicebatur manus partim evocatorum militum, partim nobilium adolescentium, qui in acie et agmine præsto imperatori adesse solebant. Erat quoque sua provinciali prætori cohors, quæ præcones, medicos, scribas, lictores continebat, quibus de publico stipendium atque alimenta dabantur. De posteriore illa sæpius dicendi locus occurret passim in Verinis.

5. *H-S mille*, etc. (335,257 fr. 31 c.). *H-S decies sexcenta* scripserunt Angustin. Gronov. Grav. quibus favent Desjard. et Lalleu. — *Sexcenta millia* (123,000 f.) Hoc est, quod in his rationibus reprehendit Cicero, quod nulla re pluribus verbis explicata, ita quadrent summæ, ut vix melius Archimedes describat.

TOS XVII NUMMOS : RELIQUI ARIMINI H-S SEXCENTA MILLIA. Hoc est rationes referre? hoc modo aut ego⁶, aut tu Hortensi, aut quisquam hominum retulit? Quid hoc est? quæ impudentia? quæ audacia? quod exemplum ex tot hominum rationibus relatis hujusmodi est? Illa tamen H-S sexcenta millia, quæ ne falso quidem potuit, quibus data essent, describere, quæ se Arimini scribit reliquisse, quæ ipsa H-S sexcenta millia reliqua facta sunt, neque Carbo attigit, neque Sulla vidit, neque in ærarium relata sunt. Oppidum sibi elegit Ariminum, quod tum, quum iste rationes referebat, oppressum⁷ direptumque erat: non suspicabatur id, quod nunc sentiet, satis multos ex illa calamitate Ariminensium testes nobis in hanc rem reliquos esse. Recita denuo: P. LENTULO⁸, L. TRIARIO, QUÆSTORIBUS URBANIS, RES RATIONUM RELATARUM. Recita: EX S. C. Ut hoc pacto rationem referre liceret, eo Sullanus repente factus est, non ut honos et dignitas nobilitati restitueretur. Quod si illinc inanis profugisses, tamen ista tua fuga nefaria, proditio consulis tui scelerata judicaretur. Malus civis, improbus consul, seditiosus homo Cn. Carbo⁹ fuit. Fuerit aliis: tibi quando esse cœpit? posteaquam tibi pecuniam, rem frumentariam, rationes omnes suas exercitumque commisit. Nam si tibi antea displicuisset; idem fecisses, quod anno post

6. *Ego, aut tu.* Faerat uterque quæstor; Cicero in Sicilia, anno 678; Hortensius anno 673, qua provincia incertum.

7. *Oppressum.* A Sulla; prodente illud Albinovano, duce Mariano.

8. *P. Lentulo.* Titulus est rationum Verri. Nempe A. U. 672 quæstores erant P. Lentulus Sura et L. Valerius Triarius, ad quos rationes retulerat

Verres. Verba ex *SCto* harum prima sunt verba. — *Res. Gall. état.* Et is est index, seu codicis inscriptio, seu literæ quibus consignatæ erant rationes omnium, his quæstoribus urbanis relatarum rerum.

9. *Cn. Carbo.* Hoc ex animi sententia scribit Cicero, qui ad Div. IX, 21 de hoc Carbone loquens: « Hoc, qui Lilybæi a Pompeio nostro est inter-

M. Piso¹⁰. Quæstor quum L. Scipioni¹¹ consuli obtigisset, non attigit pecuniam, non ad exercitum profectus est : quod de republica sensit, ita sensit, ut nec fidem suam¹², nec morem majorum, nec necessitudinem sortis læderet.

XV. Etenim¹ si hæc perturbare omnia, et permiscere volumus; totam vitam periculosam, invidiosam, infestamque reddemus; si nullam religionem sors habebit, nullam sanctitatem² conjunctio secundæ dubiæque fortunæ, nullam auctoritatem mores atque instituta majorum. Omnium est communis inimicus, qui fuit hostis suorum. Nemo umquam sapiens proditori credendum putavit³. Ipse Sulla, cui adventus istius gratissimus esse debuit, ab se hominem, atque ab exercitu suo removit : Beneventi esse jussit apud eos, quos suis partibus amicissimos esse intelligebat; ubi iste summæ rei causæque nocere nihil posset. Ei postea præmia tamen liberaliter tribuit : bona quædam proscriptorum in agro Beneventano diripienda concessit; habuit honorem⁴ ut proditori, non ut amico fidem. Nunc, quamvis sint homines, qui mortuum Cn. Carbonem oderint; tamen hi debent, non, quid

fectus, improbius nemo, meo judicio, fuit ».

10. *M. Piso*. Frugi: homo nobilissimus, innocentissimus et eloquentissimus, ut eum appellat Cicero pro Planc. 3. Vid. Ind. Histor.

11. *L. Scipioni*. Qui consul anno 670 adversus Sullam profectus, ab exercitu suo desertus ac proditus est; inviolatus vero a Sulla dimissus, Massiliam abiit in exsilium. Vell. Patere. II, 25.

12. *Fidem suam*. Quam nec consuli suo dedit. — *Morem majorum*. Qui

prætorem quætori suo parentis esse loco voluerunt. — *Necessitudinem*. Qualis est parentis cum filio.

XV. 1. *Etenim*. Ordo est. Etenim si hæc... permiscere volumus; si nullam religionem, etc. totam vitam infestam... reddemus.

2. Vulgo *societatem*. Recepimus emendationem J. F. Gronovii. J. V. L.

3. *Putavit*. Hanc in sententiam præclarissime non semel Demosthenes, quem adi de Coron. passim.

4. *Honorem*. Mercedem ac præmium.

illi accidere voluerint, sed quid ipsis in tali re metuendum sit, cogitare. Commune est hoc malum, communis metus, commune periculum. Nullæ⁵ sunt occultiores insidiæ, quam eæ, quæ latent in simulatione officii, aut in aliquo necessitudinis nomine: nam eum, qui palam est adversarius, facile cavendo vitare possis; hoc vero occultum, intestinum ac domesticum malum, non modo non existit⁶, verum etiam opprimit, antequam prospicere atque explorare potueris. Itane vero? tu, quum quæstor ad exercitum missus sis, custos non solum pecuniæ, sed etiam consulis particeps omnium rerum, consiliorumque fueris; habitus sis in liberum loco⁷, sicut mos majorum ferebat: repente relinquo? deseras? ad adversarios transeas? O scelus! o portentum in ultimas terras exportandum! Non enim potest ea natura, quæ tantum facinus commiserit, hoc uno scelere esse contenta: necesse est semper aliquid ejusmodi molitur; necesse est in simili audacia perfidiaque versetur. Itaque idem iste, quem Cn. Dolabella⁸ postea, C. Malleolo⁹ occiso, pro quæstore habuit (haud scio, an major etiam hæc necessitudo fuerit, quam illa Carbonis, ac plus judi-

5. *Nullæ sunt.* Eam sententiam operæ pretium erit conferre cum simili, Rosc. Am. 40, et observare quomodo verbis eam variaverit orator. Confer etiam Xenoph. Rerum Græcarum lib. II, 15.

6. *Non existit.* Non se aperit: non agit extra.—*Prospicere.* Est a Pall. et Cujac. placueratque item Lambino; vett. edd. *perspicere.*

7. *In liberum loco.* Vide Divinat. cap. 19.

8. *Cn. Dolabella.* Prætor urbanus anno 672, de cujus injuria in P. Quintium graves sunt Ciceronis querimo-

niæ pro Quint. passim. Ex prætura Ciliciam anno sequenti administravit; ex qua reus factus ab adolescente M. Æmilio Scauro repetundarum, damnatus est A. U. 675, maxime adnitente Verre. Vid. inf. 30, 38.

9. *C. Malleolo.* Quæstore Dolabellæ.—*Occiso.* Suspiciosum verbum, quasi Malleolum Verres, cui mors illius lucro fuit, occiderit. Illud etiam animadvertendum quam artificiose ad illud conjiciendum iudices, tamquam aliud agens, impulerit, quum nullum non scelus in proditorem cadere declaraverit.

cium voluntatis ¹⁰ valere, quam sortis debeat), idem in C. Dolabellam, qui in Cn. Carbonem fuit. Nam quæ in ipsum valebant crimina, contulit in illum, causamque illius omnem ad inimicos accusatoresque detulit ¹¹; ipse in eum, cui legatus, cui pro quæstore fuerat, inimicissimum atque improbissimum testimonium dixit. Ille, miser ¹² quum esset, tum proditione istius nefaria, tum improbo et falso ejusdem testimonio, tum multo etiam ex maxima parte, istius furtorum ac flagitiorum invidia conflagravit.

XVI. Quid hoc homine ¹ faciatis, aut ad quam spem tam perfidiosum, tam importunum animal reservetis? qui in Cn. Carbone ² sortem, in Cn. Dolabella ³ voluntatem neglexerit ac violarit, eosque ambos non solum deseruerit, sed etiam prodiderit atque oppugnarit. Nolite, quæso, iudices, brevitate orationis meæ potius, quam rerum ipsarum magnitudine, crimina ponderare: mihi enim properandum necessario est, ut omnia vobis, quæ mihi constituta sunt, possim exponere. Quamobrem, quæstura istius demonstrata, primique magistratus et furto et scelere perspecto, reliqua attendite: in quibus illud tempus ⁴ Sullanarum proscriptionum ac rapinarum prætermittam; neque

10. *Voluntatis*. Sorte obveniebant prætoribus quæstores; sed si quis in provincia esset demortuus, ejus in locum prætor, quem vellet, constituerat. Testis hic locus.

11. *Detulit*. Ad M. Scaurum, qui in Dolabella accusando, Verres opera et indicio est usus.

12. *Miser*. Reus, afflictus, calamitosus. Reos enim *miseros* dici quum in summo discrimine versentur, satis est pervulgatum. Ad hanc autem miseriam accesserunt proditio Verres, istius

farta et flagitia, quorum invidia, multo magis quam suorum conflagravit.

XVI. 1. *Hoc homine*. Locutio vetus pro, de hoc homine.

2. Alii, « Carbonem ». J. V. L.

3. *Dolabellam*. Cum Ern. sequimur Manutium. J. V. L. — Verres enim in Carbone sortem neglexit, qua illi sancte conjungebatur; in Dolabella voluntatem qua delectus ab eo fuerat.

4. *Illud tempus*. Quo tempore Beneventi proscriptorum bona diripuit.

ego istum sibi ex communi calamitate defensionem ullam sinam sumere : suis eum certis propriisque criminibus accusabo. Quamobrem, hoc omni tempore Sullano ex accusatione circumscripto⁵, legationem ejus præclaram cognoscite.

XVII. Posteaquam Cn. Dolabellæ provincia Cilicia¹ constituta est ; o dii immortales ! quanta iste cupiditate, quibus allegationibus² illam sibi legationem³ expugnavit ? id quod Cn. Dolabellæ principium maximæ calamitatis fuit. Nam ut iste profectus est, quacumque iter fecit, ejusmodi fuit, non ut legatus populi romani, sed ut quædam calamitas pervadere videretur. In⁴ Achaia (prætermittam minora omnia, quorum simile forsitan alius quoque aliquid aliquando fecerit : nihil dicam, nisi singulare, nisi quod, si in alium reum diceretur, incredibile videretur), magistratum Sicyonium nummos poposcit. Ne sit hoc crimen in Verrem : fecerunt alii. Quum ille non daret, animadvertit. Improbum, sed non inauditum. Genus animadversionis videte : quæretis, ex quo genere hominum⁵ istum judicetis. Ignem ex lignis viridibus atque humidis in loco angusto fieri jussit : ibi hominem ingenuum, domi nobilem, populi romani socium atque amicum,

5. *Circumscripto*. Remoto, repudiato. Sic Cæs. de Bell. civ. I, 32.

XVII. 1. *Cilicia*. Anno 673 primum cum piratis Cilicibus bellum initum est, provinciaque Cilicia cum proconsulari imperio Cn. Dolabellæ prætori demandata est.

2. *Allegationibus*. Intercessionibus communium amicorum.

3. *Legationem*. Illi erant *legati*, quos proconsules aut proprætores, ituri in provincias, consiliorum atque officii adjutores sibi adjungebant. Illi

aut a senatu dabantur, aut ex auctoritate senatus ab ipsis præsidibus eligebantur plures paucioresve, ut bellum, aut res poscebant. Cicero in Cilicia administranda legatos quatuor; quindecim Pompeius in bello piratico habuit. T. Liv. XLIV, 18. Sall. Jug. 28, etc.

4. *In Achaia*. Per quam iter cum Dolabella in Ciliciam provinciam suam faciebat.

5. Multi habent *hominem*; altera lectio ab Hotomanno est. J. V. L.

fumo excruciatum, semivivum reliquit. Jam quæ iste signa, quas tabulas pictas ex Achaia sustulerit, non dicam hoc loco : est alius⁶ mihi locus ad hanc istius cupiditatem demonstrandam servatus⁷. Athenis audistis ex æde Minervæ⁸ grande auri pondus ablatum; dictum hoc est in Cn. Dolabellæ iudicio : dictum? etiam æstimatum⁹. Hujus consilii non modo participem C. Verrem, sed principem fuisse reperietis.

XVIII. Delum venit : ibi ex fano Apollinis religiosissimo noctu clam sustulit signa pulcherrima atque antiquissima; eaque in onerariam navem suam conjicienda curavit. Postridie quum fanum spoliatum viderent ii, qui Delum incolebant, graviter ferebant : est enim tanta apud eos ejus fani religio atque antiquitas, ut in eo loco ipsum Apollinem natum esse arbitrentur : verbum tamen facere non audebant, ne forte ea res ad Dolabellam ipsum pertineret. Tum subito tempestates coortæ sunt maximæ, iudices, ut non modo proficisci, quum cuperet, Dolabella non posset, sed vix in oppido¹ consisteret : ita magni fluctus ejiciebantur. Hic navis illa prædonis istius, onusta signis religiosis, expulsa atque ejecta fluctu, frangitur : in litore signa illa Apollinis reperiuntur; jussu Dola-

6. *Est alius*. In iudicio de peculatu, si hinc evaserit; non vero, ut putavit Asconius, in libro de Signis, quum in eo de tabulis ex Achaia sublati verbum nullum fiat. Sic Manutius. Contendit autem Ferratius de hoc ultimo libro hic agi, quum promittat orator, se nimirum hanc Verris cupiditatem demonstraturum, neque ideo de Achaicis signis loqui Siciliæ patrono necesse sit, quum ex istius in hoc genere furtis facile appareat quid in aliis provinciis fecerit.

7. Tres codd. apud Lambinum, *se-*

paratus; nonnulli alii, *reservatus*. J. V. L.

8. *Æde Minervæ*. Quam Parthenonem Græci vocabant, a Pericle in arce extractam.

9. *Æstimatum*. Dolabellæ imputatum, ita ut damnato illi fuerit solvendum.

XVIII. 1. *In oppido*. Rem supra modum auget orator. Non enim verisimile est ejectos fuisse fluctus in oppidum, quod in media insula positum erat ad radices Cynthii montis, nisi forte tunc terræ fuerit motus.

bellæ reponuntur : tempestas sedatur ; Dolabella Delo proficiscitur. Non dubito, quin, tametsi nullus in te sensus humanitatis, nulla ratio umquam fuit religionis, nunc tamen, in metu periculoque tuo, tuorum tibi scelerum veniat in mentem. Potestne tibi ulla spes salutis commoda ostendi, quum recordaris, in deos immortales quam impius, quam sceleratus, quam nefarius fueris? Apollinemne tu Delium spoliare ausus es? illine² tu templo, tam antiquo, tam sancto, tam religioso manus impias ac sacrilegas afferre conatus es? Si in pueritia non his artibus et disciplinis institutus eras, ut ea, quæ literis mandata sunt³, disceres atque cognosceres : ne postea quidem, quum in ea ipsa loca venisti, potuisti accipere id, quod est proditum memoriæ ac literis? Latonam ex longo errore et fuga, gravidam, et jam ad pariendum [vicinam] temporibus exactis, confugisse⁴ Delum, atque ibi Apollinem Dianamque peperisse : qua ex opinione hominum illa insula eorum deorum sacra⁵ putatur; tantaque ejus auctoritas religionis et est, et semper fuit, ut ne Persæ⁶ quidem, quum bellum toti Græciæ, diis hominibusque indixissent, et mille numero⁷ navium clas-

2. *Illine*. Cicero ut majorem Verris in hoc templo furtis invidiam addat, de ingente clade reticet quam sexennio ante Verrem, Menophanes Delo intulerat, vasta omnia ac deserta penitus relinquens. Idem tamen hanc in Maniliana refert, quam adi.

3. *Mandata sunt*. Poetas discebant in scholis pueri, et ex iis deorum fabulas. Quod ad Delum et Apollinem pertinet, minuta quæque dabit Spanhemii eruditissimus commentarius ad Callim. hymn. in Delum, vs. 255. Verum « Cui non dictus Hylas puer, et Latonia Delos? »

4. Sic edd. pr. et multi MSS. Aldus ediderat *fugisse*. J. V. L.

5. *Sacra*. Illis diis sacrata.

6. *Persæ*. De his plura vide in Herod. VI, 97. — *Diis*. Quorum templa Persæ incendebant, deos parietibus includi nefas arbitantes. Vide de Leg. II, 26. Æschyl. in Pers. Deliaeo autem ac Ephesio templo eos pepercisse tradit scholiastes Aristophanis ad Pacem, v. 409, quod Solem ac Lunam deos maxime venerarentur.

7. *Mille numero*. De harum numero navium vide Bosium ad Cornel. Nep. Themist. 2. Illud etiam intelliges, ro-

sem ad Delum appulissent, quidquam conarentur aut violare, aut attingere. Hoc tu fanum depopulari⁸, homo improbissime atque amentissime, audebas? fuit ulla cupiditas tanta, quæ tantam exstingeret religionem? et, si tum hæc non cogitabas, ne nunc quidem recordaris, nullum esse tantum malum, quod non tibi pro sceleribus tuis jamdiu debeatur?

XIX. In Asiam¹ vero postquam venit, quid ego adventus² istius prandia, cœnas, equos muneraque commemorem? Nihil cum Verre de quotidianis criminibus acturus sum. Chio per vim signa pulcherrima dico abstulisse; item Erythris et Halicarnasso. Tenedo (prætereo pecuniam, quam eripuit) Tenem³ ipsum, qui apud Tenedios sanctissimus deus habetur, qui urbem illam dicitur condidisse, cujus ex nomine Tenedus nominatur; hunc ipsum, inquam, Tenem, pulcherrime factum, quem quondam in comitio⁴ vidistis, abstulit magno cum gemitu civitatis. Illa vero expugnatio fani antiquissimi et nobilissimi Junonis⁵ Samiæ, quam luctuosa Samiis fuit? quam acerba toti Asiæ? quam clara apud omnes? quam nemini vestrum inaudita? de qua expugnatione quum legati ad C. Neronem

tundos a Tullio numeros, dum oratorem agit, amari.

8. Lambinus maluit « depeculari ». J. V. L.

XIX. 1. In Asiam. Minorem, cui C. Nero præerat.

2. Cœlius Rhodiginus conj. *adventu*, quod recte improbat Gulielm. J. V. L.

3. *Tenem*. Cyeni filium, ab Achille, perinde ut fuerat pater, occisum: ideoque institutum est, ut in ejus templo numquam audiretur Achillis nomen. Plat. Qu. gr. Hunc viæ cursum sequutus erat Verres, ut Peloponnesum

primo inviseret, ubi Achaia et Sicyon, postea Athenas, Delum, Chium, Erythras, Samum, Tenedum, quæ insula, extra Hellespontum, adversa Sigæo litori adjacet. Plin. XXXI. Virg. II, 21.

4. In comitio. In foro, cujus pars erat comitum; quum ab ædilibus ludorum causa ornaretur. Porro ædiles signa nobilia ex urbibus sociorum mutuabantur, quæ postea reportande curabant. De comitio vide inf. c. 22, not. 2.

5. *Junonis Samiæ*. In hac insula Juno præcipue colebatur. Virg. *Æn.* I, 16.

in Asiam Samo venissent; responsum tulerunt, ejusmodi querimonias, quæ ad legatum populi romani pertinerent, non ad prætorem, sed Romam⁶ deferri oportere. Qua de re⁷ Charidemum Chium testimonium priore actione dicere audistis: sese, quum esset trierarchus, et Verrem ex Asia decedentem prosequeretur, jussu Dolabellæ fuisse una cum isto Sami; seseque tum scire spoliatum esse fanum Junonis et oppidum Samum; posteaque se causam apud Chios, cives suos, Samiis accusantibus publice, dixisse; eoque se esse absolutum, quod planum fecisset, ea, quæ legati Samiorum dicerent, ad Verrem, non ad se pertinere. Quas iste tabulas illinc, quæ signa sustulit? quæ cognovi egomet apud istum in ædibus nuper, quum obsignandi⁸ gratia venissem. Quæ signa nunc, Verres, ubi sunt? illa quæro, quæ apud te nuper ad omnes columnas, omnibus etiam intercolumniis, in⁹ silva denique disposita sub divo vidimus. Cur ea, quamdiu alium prætorem¹⁰ cum iis iudicibus, quos in horum locum subsortiturus¹¹ eras, de te in consilium iturum putasti, tamdiu domi fuerunt? posteaquam nostris testibus nos, quam horis tuis¹², uti malle vidisti; nul-

6. *Romam*. Poterat quidem prætor de rebus provincialibus cognoscere, sed non ita ut legatum alterius prætoris castigare posset: cujus rei cognitio ad senatum pertinebat, aut etiam si quid gravius commissum erat, illud animadvertere erat populi rom.

7. Hæc, usque ad verba « non ad se pertinere », sunt in edd. aliis post « sectoremque pugnare ». Ernest. primus transtulit. J. V. L.

8. *Obsignandi*. Moris fuit ut accusator obsignaret domum, et clausa teneret omnia illius quem accusaturus

erat, ne qua furtorum indicia in literis constituta ab eo removerentur. ASCON. — Ex seqq. apparet non eam obsignationem ad signa tabulasque pictas patere, quum ea abhinc a Verre celata et in alias domos avecta queratur Cicero.

9. *In silva*. Silvula, viridario.

10. *Alium prætorem*. Metellum. — *Horum*. Qui nunc adsunt.

11. Alii, *subsortitus*. J. V. L.

12. *Tuis*. Tibi potius quam mihi commodis, nempe ad iudicium protrahendum. Vid. sup. 9, et Act. I, 8.

lum signum domi reliquisti, præter duo, quæ in mediis ædibus sunt; quæ ipsa Samo sublata sunt? non putasti me tuis familiarissimis in hanc rem testimonia denuntiaturum, qui tuæ domi sæpe fuissent; ex quibus quærerem, signa scirentne fuisse¹³, quæ non essent? Quid tum hos de te judicaturos arbitratus es, quum viderent, te jam non contra accusatorem tuum, sed contra quæstorem¹⁴ sectoremque pugnare?

XX. Aspendum, vetus oppidum et nobile in Pamphylia scitis esse, plenissimum signorum optimorum. Non dicam illinc hoc signum ablatum esse, et illud: hoc dico, nullum te Aspendi¹ signum, Verres, reliquisse; omnia ex fanis, ex locis publicis, palam, spectantibus omnibus, plostris evecta² asportataque esse. Atque etiam illum Aspendium citharistam³, de quo sæpe audistis id, quod est Græcis hominibus in proverbio, quem omnia intus canere dicebant, sustulit, et in intimis suis ædibus posuit: ut etiam illum ipsum

13. *Fuisse*. Domi tuæ signa illa, quæ jam non apparerent.

14. *Quæstorem*. *Quæstores ærarii* auctionem fieri jubebant bonorum ejus, qui repetundarum fuerat damnatus. Sic Livius scribit: « missos quæstores in possessionem bonorum Scipionis Asiatici, sed eos nequaquam summam in ærarium redegissee, quantæ pecuniæ damnatus fuerat ». Erant vero *sectores* (gall. *les enchérisseurs*). Verres autem illa subtrahendo, jam non se contra accusationem, sed hona sua contra auctionem, ut jam damnatus, defendere videbatur.

XX. 1. *Aspendi*. Urbs illa ad Erymedontem fluvium sita, ad Dolabellæ provinciam pertinebat. Vid. Pomp. Mel. XIV. Strab. XIV. Plin. V, 27; XXXI, 7.

2. Vetus anonymus interpres, « avecta exportataque ». J. V. L.

3. *Aspendium citharistam*. I. e. simulacrum apud Aspendios citharistæ speciem exhibens. Quod apud Græcos ita erat notum, ut jam in proverbium abierit. Scilicet, quum canunt citharistæ, utriusque manus utuntur officio. Dextra plectrum tenet, et hoc est *foris* seu *aliis canere*; sinistra digitis chordas carpit, ac sonos leviores elicit, quod est *intus* seu *sibi canere*. Aspendius ille citharista universam cantionem *intus*, i. e. sinistra tantum manu complectebatur, ita ut a se et a paucis, qui proximi adstant, exaudiretur. Unde omnes quotquot fares erant, a Græcis *Aspendii citharistæ* in proverbio dicebantur, quod ut ille carminis, ita isti furtorum occultato-

artificio suo⁴ superasse videatur. Pergæ⁵ fanum antiquissimum et sanctissimum Dianæ scimus esse : id quoque a te nudatum ac spoliatum esse ; ex ipsa Diana, quod habebat auri, detractum atque ablatum esse dico. Quæ, malum, est ista tanta audacia atque amentia ? quas enim sociorum atque amicorum urbes adisti legationis jure et nomine ; si in eas vi cum exercitu imperioque⁶ invasisses, tamen, opinor, quæ signa atque ornamenta ex his urbibus sustulisses, hæc non in tuam domum, neque in suburbana amicorum, sed Romam in publicum deportasses.

XXI. Quid ego de M. Marcello loquar, qui Syracusas, urbem ornatissimam cepit ? quid de L. Scipione, qui bellum in Asia gessit, Antiochumque, regem potentissimum, vicit ? quid de Flaminio, qui regem Philippum et Macedoniam subegit ? quid de L. Paulo, qui regem Persen vi ac virtute superavit ? quid de L. Mummi¹, qui urbem pulcherrimam atque ornatissimam, Corinthum, plenissimam rerum omnium, sustulit, urbesque Achaiaë Boeotiaëque multas sub imperium populi romani ditionemque subjunxit ? quorum domus, quum honore et virtute florerent, signis

res erant. Apud Latinos autem fluxere figurata verba, *intus canere* quæ de homine suam tantum utilitatem quærenti dicuntur. Illo autem loco Verres dicitur illum citharistam artificio suo superasse, jocosè, quia *intus canentem*, in intimis ædibus posuerat, ut eum quasi *interius* canere doceret. Vid. Erasmus. Adag.

4. Asconius non agnoscit suo. Sch. delevit.

5. Pergæ. Fanum hoc proxime Pergam erat, Pamphyliaë urbem. Pergæa Diana sæpiissime in nummis antiquis

conspicitur. Conf. Pomp. Mel. XIV. Spanh. ad Callim. hymn. in Dianam, vs. 187.

6. Imperio. Cum imperio esse dicebatur, cui nominatim a populo lege curiata mandata erat plena potestas rei militaris suo consilio, in sua provincia, administrandæ. Tit. Livius, XXVI, 21.

XXI. 1. L. Mummi. De maximo illo signorum et tabularum contemptore, adi Strab. VIII. Front. Strat. IV, 3, 15. Ceteri notiores sunt, quam ut de illis mentionem habeamus.

et tabulis pictis erant vacuæ. At vero urbem totam, templa deorum, omnesque Italiæ partes, illorum donis ac monumentis exornatas videmus². Vereor, ne hæc forte cuiquam nimis antiqua et jam obsoleta videantur: ita enim tum æquabiliter omnes erant hujusmodi³, ut hæc laus eximiæ virtutis et innocentiae, non solum hominum, verum etiam temporum illorum esse videatur. P. Servilius⁴, vir clarissimus, maximis rebus gestis, adest; de te sententiam laturus est: Olympum⁵ vi, copiis, consilio, virtute cepit, urbem antiquam, et omnibus rebus auctam et ornatam. Recens exemplum fortissimi viri profero: nam postea Servilius imperator populi romani Olympum, urbem hostium, cepit, quam tu in iisdem locis legatus quæstorius oppida pacata sociorum atque amicorum diripienda ac vexanda curasti. Tu, quæ ex fanis religiosissimis per scelus et latrocinium abstulisti, ea nos videre, nisi in tuis amicorumque tuorum tectis, non possumus: P. Servilius, quæ signa atque ornamenta ex urbe hostium, vi et

2. *Videmus.* In eandem sententiam Sall. Catil. XII, 3: « Illi (nostri majores) delubra deorum pietate, domos sua gloria decorabant; neque victis quidquam, præter injuriæ licentiam, eripiebant »; et paullo infra de his prædatoribus, Verri simillimis, loquens: « Hi contra ignavissimi homines per summum scelus omnia ea sociis ademere, quæ fortissimi viri victores reliquerant; proinde quasi injuriam facere, id demum esset imperio uti ».

3. *Hujusmodi.* Abstinentes et boni. Notandum illam his ducibus « eximiæ virtutis laudem » tribui, non quod victorum ornamentis parcerent, quum ea pleraque Romam transportarent,

sed quod nihil sibi privatim asservarent, nisi quædam minoris pretii, ut arma, currus, domui ornatæ.

4. *P. Servilius.* Consul anno 674, ex consulatu provinciam Ciliciam quinquennio et bellum piraticum obtinuit. Ex iis triumphavit anno 679, atque ob Isauron, arcem Ciliciæ, captam *Isauricus* est cognominatus. Flor. III, 6, Strab. XIV.

5. *Olympum.* In vertice Tauri montis, ait Strabo, XIV, Olympus est Zeniceti piratæ sedes. Mons item et arx eodem nomine: undè Lycia omnis, et Pamphylia Pisidiaque cernitur. Quem montem quum Isauricus cepisset, sese ille cum universa domo exnssit.

virtute capta, belli lege, atque imperatorio jure sustulit, ea populo romano apportavit, per triumphum vexit, in tabulas publicas ad ærarium perscribenda curavit. Cognoscite ex literis publicis hominis amplissimi diligentiam. Recita: *RATIONES RELATÆ P. SERVILII*. Non solum numerum signorum, sed etiam uniuscujusque magnitudinem, figuram⁶, statum, literis definiri vides. Certe major⁷ est virtutis victoriæque jucunditas, quam ista voluptas, quæ percipitur ex libidine et cupiditate: multo diligentius habere dico Servilium prædam populi romani, quam te tua furta notata atque descripta.

XXII. Dices, tua quoque signa et tabulas pictas ornamēto urbi¹ foroque populi romani fuisse. Memini; vidi simul cum populo romano forum comitiumque² adornatum³, ad speciem magnifico ornatu, ad sensum cogitationemque acerbo et lugubri. Vidi collucere omnia furtis tuis, præda provinciarum, spoliis sociorum atque amicorum. Quo quidem tempore, judices, iste spem maximam reliquorum quoque peccatorum⁴ nactus est. Vidit enim eos, qui judiciorum⁵ dominos se dici volebant, harum cupiditatum esse servos.

6. *Figuram*. Situm membrorum (gall. *l'attitude*). — *Statum*. Habitum seu ornatum vestis, insignium, armorum (gall. *la draperie, les attributs*).

7. *Certe major*. Asconio subobscurus videtur locus, quem optime explicat Hotom. per epiphonema: sunt et sua victoriæ ac virtuti gaudia majora quam, etc.

XXII. 1. *Urbi*. Nam ædili, atque prætori Hortensio, et Metellis rapta ex provinciis signa Verres ornando foro commodaverat.

2. *Comitium*. Locus erat in foro

juxta curiam, ubi rostra; hic olim habebantur curiata comitia, et sumebantur supplicia de sontibus. Aliud præterea fuit comitium extra Urbem in campo Martio ad comitia centuriata.

3. Lambinus malit *adornatum* abesse. J. V. L. — Attamen eadem de re Cicero Verr. IV, 3, « ornamentis ornarent ».

4. *Peccatorum*. Subaud. *non puniendorum*.

5. *Judiciorum dominos*. Manifeste in Hortensium, ac nobiles ceteros.

Socii vero nationesque exteræ spem omnium tum primum abjecere⁶ rerum ac fortunarum suarum : propterea quod casu legati ex Asia atque Achaia plurimi Romæ tunc fuerunt, qui deorum simulacra, ex suis fanis sublata, in foro venerabantur⁷, itemque cetera signa et ornamenta quum cognoscerent, alia alio in loco lacrymantes intuebantur. Quorum omnium hunc sermonem tum esse audiebamus : « Nihil esse, quod
« quisquam dubitaret de exitio sociorum atque amico-
« rum ; quum quidem viderent in foro populi romani,
« quo in loco antea, qui sociis injurias fecerant, accu-
« sari et condemnari solebant, ibi esse palam posita ea,
« quæ ab sociis per scelus ablata ereptaque essent ».

XXIII. Hic ego non arbitror illum negaturum, signa sese plurima, tabulas pictas innumerabiles habere ; sed, ut opinor, solet hæc, quæ rapuit et furatus est, nonnumquam dicere, se emisse : quoniam quidem¹ in Achaiam², Asiam, Pamphyliam, sumptu³ publico, et legationis nomine, mercator signorum tabularumque pictarum missus est. Habeo et istius, et patris ejus accepti tabulas⁴ omnes ; quas diligentissime legi atque digessi : patris, quoad vixit ; tuas, quoad ais te confecisse. Nam in isto, iudices, hoc novum reperietis. Audimus, aliquem tabulas numquam confecisse ;

6. Rectius forte *abjecerunt*, quod habet vetus cod. apud Gothofred. J. V. L.

7. Debebat esse, ut Ernest. putat, *venerarentur* ; et videtur sic habuisse in exemplo suo scholiastes anonymus Vossianus. J. V. L.

XXIII. 1. *Quoniam quidem*. Asconius, post *quidem*, addit « cum imperio et securibus », quod male migrasse putant e Verrina IV, 4. J. V. L.

2. *In Achaiam*, etc. Per quas iter in Ciliciam provinciam fecerat.

3. *Sumptu publico*. Vide sup. c. 14, quæ ei ad privatos sumptus publico ærario fuerit assignata pecunia.

4. *Accepti tabulas*. Jam ad Rosc. Comœd. 1, adnotavimus, Romanum unumquemque rationes vitæ totius per dies singulos scribere, ex quibus appareret quid lucri damne fecisset. Dicit autem Asconius, postquam,

quæ est opinio hominum de Antonio⁵ falsa : nam fecit diligentissime : verum sit hoc genus⁶ aliquod minime probandum. Audimus, alium non ab initio fecisse, sed ex tempore aliquo confecisse : est aliqua etiam hujusce rei ratio⁷. Hoc vero novum et ridiculum est, quod hic nobis respondit, quum ab eo tabulas postularem : usque ad M. Terentium⁸ et C. Cassium consules confecisse ; postea destitisse. Alio loco, hoc cujusmodi sit, considerabimus : nunc nihil ad me attinet : horum enim temporum, in quibus nunc versor, habeo tabulas, et tuas, et patris. Plurima signa pulcherrima, plurimas tabulas optimas deportasse te, negare non potes : atque utinam neges ! Unum ostende in tabulis aut tuis aut patris tui emptum esse ; vicisti : ne hæc quidem duo signa pulcherrima, quæ nunc ad impluvium⁹ tuum stant, quæ multos annos ad valvas Junonis Samiæ steterunt, habes¹⁰ quomodo emeris ; hæc, inquam, duo, quæ in ædibus tuis sola jam sunt, quæ sectorem expectant, relictæ ac destitutæ a ceteris signis.

XXIV. At, credo¹, in hisce solis rebus indomitas cupiditates atque effrenatas habebat : ceteræ libidines

obsignandis literis, reorum ex suis tabulis quisque damnari cœpit, totam hanc veterem consuetudinem cessavisse.

5. *De Antonio.* Oratore, L. Crassi amulo et æquali. Fallitur Asconius, qui de illo M. Antonio Cretico interpretatur, qui oratoris filius, triumviri pater fuit. Vid. de Orat. II, 23, ubi hæc ipsa de se falso jactatæ ait Antonius orator : « tamen ne tabulas quidem conficere existimor. Verum et in hoc ex re familiari mea, et in illo, ex eo quod dico, quantulum id camque est, quod faciam judicari potest ».

6. *Sit hoc genus.* Sint hujusmodi homines aliqui minime probandi.

7. *Ratio.* Defensio. Potest hoc aliqua ratione defendi.

8. *Ad M. Terentium.* Nempe anno 680, quo anno Verres pro prætore in Siciliam abiit. Confer Pighii Annal. XVI ad annum 680.

9. *Impluvium.* Erat area ædificiis cincta, « quo aqua impluebat collecta e tecto », ait Festus.

10. *Habes.* Dicere potes, qua ratione emeris. Græcismus.

XXIV. 1. *At credo.* Transitus ad aliam criminum speciem.

eius ratione aliqua aut modo continebantur. Quam multis istum ingenuis, quam multis matribus familias, in illa tetra atque impura legatione, vim attulisse existimatis? ecquo in oppido pedem posuit, ubi non plura² stuprorum flagitiorumque suorum, quam adventus sui vestigia reliquerit? Sed ego omnia, quæ negari poterunt, prætermittam; etiam hæc, quæ certissima sunt et clarissima, relinquam: unum aliquod de nefariis istius factis eligam; quo facilius ad Siciliam possim aliquando, quæ mihi hoc oneris negotiique imposuit, pervenire. Oppidum est in Hellesponto Lampsacum, iudices, in primis Asiæ provinciæ³ clarum et nobile: homines autem ipsi Lampsaceni tum summe in omnes cives romanos officiosi, tum præterea maxime sedati et quieti, prope præter ceteros ad summum⁴ Græcorum otium potius, quam ad ullam vim⁵ aut tumultum accommodati. Accidit, quum iste a Cn. Dolabella efflagitasset, ut se ad regem Nicomedem⁶, regemque Sadalam mitteret, quumque iter hoc sibi magis ad quæstum suum, quam ad reipublicæ tempus accommodatum depoposcisset; ut illo itinere veniret Lampsacum, cum magna calamitate et prope

2. *Non plura.* Pauciora legatus Verres adveniens pedum suorum, quam fortorum et flagitiorum vestigia reliquit.

3. *Asiæ provinciæ.* Quæ definitur a septentrione Bithynia, ab occasu Propontide et Ægæo pelago, a meridie Lycia, ab oriente Pamphylia.

4. *Ad summum.* Otiosi enim, ac desides tum Græci omnes habebantur.

5. *Ad ullam vim.* Hoc ideo dicit, ut culpa tumultus in Verrem concitati, non in Lampsacenos, sed in ipsum Verrem conferatur.

6. *Nicomedem.* Bithyniæ regem, qui, quum esset sine liberis, populum rom. testamento reliquit heredem. Decessit autem Nicomedes ex Entrop. VI, 6, L. Lucullo et M. Cotta coss. sexennio post Verris legationem. — *Sadalam.* Thraciæ regem, socium populi rom. alium ab eo Sadala quem nominat Cæsar Bell. Civ. III, 4. De populi rom. cum illis regibus amicitia vide Liv. XLV, 42, deque ejus regiæ familiæ antiquitate Ovid. de Pont. II, 9: confer etiam Taciti Annal. II, 64.

pernicie civitatis. Deducitur iste ad Janitorem⁷ quemdam hospitem; comitesque ejus item apud ceteros hospites collocantur. Ut mos erat istius, atque ut eum suæ libidines flagitiosæ facere admonebant⁸, statim negotium dat illis suis comitibus, nequissimis turpissimisque hominibus, uti videant et investigent, ecqua virgo sit, aut mulier digna, quamobrem ipse⁹ Lampsaci diutius commoretur¹⁰.

XXV. Erat comes ejus Rubrius quidam, homo factus ad istius libidines, qui miro artificio, quocumque venerat, hæc investigare omnia solebat. Is ad eum rem istam defert: Philodamum esse quemdam, genere, honore, copiis, existimatione facile principem Lampsacenorum; ejus esse filiam, quæ cum patre habitaret, propterea quod virum non haberet¹, mulierem eximia pulchritudine; sed eam summa integritate pudicitiaque existimari. Homo, ut hæc audivit, sic exarsit ad id, quod non modo ipse numquam viderat, sed ne audierat quidem ab eo, qui ipse vidisset, ut statim ad Philodamum migrare se diceret velle. Hospes Janitor, qui nihil suspicaretur, veritus, ne quid in ipso se offenderetur², hominem summa vi retinere cœpit. Iste, qui hospitis relinquendi causam reperire non posset, alia sibi ratione viam munire³ ad stuprum cœpit: Rubrium, delicias suas, in omnibus ejusmodi rebus

7. *Janitorem*. Nomen est proprium hominis.

8. Olim *admonuerant*. Ernest. interpolata suspicabatur verba hæc: «atque ut eum admonebant». Multo elegantius abesse ista conjicit Schütz. Temere.

9. Sic e Guelf. dedit Ern. Vulg. *iste*.

10. Alii, *commoraretur*. J. V. L.

XXV. 1. *Non haberet*. Nimirum

absens ille aut mortuus erat. Mulierem enim modo appellat non virginem.

2. *Offenderetur*. Ne quid esset in semetipso, quod Verri displiceret. Sic Ernest. ex quatt. MSS interpretatur. Olim edebatur *offenderet*. Grævius malebat: «ne quid in ipso offenderit». Lambin. «in se offenderit», quem sequutus est Schütz. Alii aliter.

3. *Viam munire*. Sibi viam aperire.

adjutorem suum et conscium, parum laute⁴ deversari dicit; ad Philodamum deduci jubet. Quod ubi est Philodamo nuntiatum, tametsi⁵ erat ignarus, quantum sibi ac liberis suis jam tum mali constitueretur, tamen ad istum venit; ostendit, munus illud suum non esse: se, quum suæ partes⁶ essent hospitum recipiendorum, tum ipsos tamen prætores et consules, non legatorum asseclas, recipere solere. Iste, qui una cupiditate raperetur, totum illius postulatum causamque⁷ neglexit; per vim ad eum, qui recipere non debebat, Rubrium deduci imperavit.

XXVI. Hic Philodamus, posteaquam jus suum obtinere non potuit, ut humanitatem consuetudinemque suam retineret, laborabat¹. Homo, qui semper hospitalissimus amicissimusque nostrorum hominum existimatus esset, noluit videri ipsum illum Rubrium invitatus in domum suam recepissee; magnifice et ornate, ut erat in primis inter suos copiosus, convivium comparat: rogat Rubrium, ut, quos ei commodum sit², invitet; locum sibi soli, si videatur, relinquat: etiam filium suum, lectissimum adolescentem, foras ad propinquum suum quemdam mittit³ ad cœnam. Rubrius

4. *Parum laute*. Non satis commode.

5. Sic Nonius, IV, 67. Olim edebatur minus probabiliter, « tametsi non erat ignarus ». J. V. L. — Codices pro « tametsi » magno consensu scribunt « tamen etsi », quam vocem h. l. et multis aliis Ciceroni restituendam esse censet Muret. Var. lect. XI, 17.

6. *Suæ partes*. Suæ vices. Inde apparet onus recipiendi rom. magistratus ex fœdere locupletibus municipibus injungi; qui isto officio singuli per ordinem defungebantur. Philodamus autem Verri se dupliciter

excusabat: tum quia ipse non erat eo anno unus ex delectis ad recipiendos hospites; tum quia, quo sibi tempore id a civitate munus injungebatur, pro sua dignitate non recipiebat, nisi prætores ipsos, non legatorum servos, qualis erat hic Rubrius. Conf. Verr. IV, 11.

7. *Causam*. Excusationem, ut paullo inf. « omen magis Patribus conscriptis, quam causa placuit ».

XXVI. 1. *Laborabat*. Enitebatur.

2. *Commodum sit*. Quos ei invitare libeat.

3. Olim edebatur « ut etiam filium

istius comites invitat : eos omnes Verres certiores facit, quid opus esset. Mature veniunt : discumbitur : fit sermo inter eos, et invitatio, ut græco more⁴ biberetur. Hortatur hospes : poscunt⁵ majoribus poculis : celebratur omnium sermone lætitiaque convivium. Posteaquam satis calere⁶ res Rubrio visa est : Quæso, inquit, Philodame, cur ad nos filiam tuam non intro vocari jubes? Homo, qui et summa gravitate, et jam id ætatis, et parens esset, obstupuit hominis improbi⁷ dicto. Instare Rubrius. Tum ille, ut aliquid responderet, negavit moris esse⁸ Græcorum, ut in convivio virorum accumberent mulieres. Hic tum alius ex alia parte : Enimvero ferendum hoc non est⁹; vocetur mulier ! Et simul servis suis Rubrius, ut januam clauderent, et ipsi ad fores assisterent, imperat. Quod ubi ille intellexit id agi, atque id parari, ut filiæ suæ vis afferretur ; servos suos ad se vocat : his imperat, ut se ipsum negligant, filiam defendant ; excurrat

suum...mitteret». Gratero placuit infinitivus historicus « etiam...mittere ».

4. *Græco more*. Ad singulas potiones, deos et amicos, quos velis nominando, et quoties nominantur, merum bibendo; vel est capacioribus poculis bibere, ἀμυστὶ πίνειν.

5. *Poscunt*. Se provocant, ut ad h.l. interpretatur Nonius; aut etiam vinum a pincerna majoribus poculis petunt. Ceterum omnino græcus est usus ac locutio. Græci enim initio convivii parvis poculis, in fine vero, grandioribus utebantur. Et illud erat proprie τὴν μέζονα αἰτεῖν, quum ab initio propinarent ἴσον ἴσω. Sic apud Athen. Deipnos. X, 8, e veteri comico hæc leguntur : Οὐ συμποσίαρχος ἦν γάρ, ἀλλὰ δῆμιος ὁ Χαίρειας κωῶθους προπίνων εἰκοσιν, ἴσον ἴσω,

πάλιν τὴν μέζον' ἤρει. Id est : « Chærea non erat rex convivii, sed carni-fex, qui majoribus posceret poculis, postquam viginti cyathos par pari propinasset ». Conf. Verr. III, 43. Diog. Laert. I, 104, et ib. Casaub.

6. *Satis calere*. Satis accensi vino comites, ad facinus suscipiendum.

7. Ernest. conj. *improbe*. Nimia curiositate aliquid mutandi». J. V. L.

8. *Negavit moris esse*. Sic Vitruv. VI, 10, de Græcorum ædibus : « Ju his œcis fiunt convivia virilia, non enim fuerat institutum, matresfamilias eorum moribus accumbere ». Cf. Corn. Nep. præf. et Muret. Var. Lect. VII, 2.

9. *Ferendum hoc non est*. Adnotant Hotom. et Lambin. hanc narrationis partem ex Demosthenis ἐπὶ Παρ-περιδείας oratione esse expressam.

aliquis, qui hoc tantum domestici mali filio suo nuntiet. Clamor interea fit tota domo; pugna¹⁰ inter servos Rubrii atque hospitis. Jactatur¹¹ domi suæ vir primus, et homo honestissimus: pro se quisque manus affert: aqua denique ferventi a Rubrio ipso Philodamus perfunditur. Hæc ubi filio nuntiata sunt; statim exanimatus ad ædes contendit, ut et vitæ patris, et pudicitiae sororis succurreret. Omnes eodem animo Lampsaceni, simul ut hoc audiverunt, quod eos tum Philodami dignitas, tum injuriæ magnitudo movebat, ad ædes noctu convenerunt. Hic lictor istius Cornelius, qui cum ejus servis erat a Rubrio, quasi in præsidio, ad auferendam mulierem collocatus, occiditur; servi nonnulli vulnerantur; ipse Rubrius in turba sauciatur. Iste, qui sua cupiditate tantos tumultus concitatos videret¹², cupere aliqua evolare, si posset.

XXVII. Postridie mane homines in concionem veniunt¹; quærent, quid optimum factu sit; pro se quisque, ut in quoque erat auctoritatis plurimum, ad populum loquebatur; inventus est nemo, cujus non hæc et sententia esset, et oratio: «Non esse me-
«tuendum, si istius nefarium scelus Lampsaceni ul-
«vi manuque essent, ne senatus populusque romanus
«in eam civitatem animadvertendum putaret. Quod si
«hoc jure legati populi romani in socios nationesque
«exteris uterentur, ut pudicitiam liberorum servare

10. Vocem *pugna* addidit Hotom. ex Rufiniano de figg. cap. 36.

11. *Jactatur*. Plagis sternitur. — Victor. et Manut. «vir optimus». Lambin. ex Nonio: «vir primarius». Illis multos Ciceronis locos opponunt Ernest. et Garaton. quibus vulgata «primus et h.» confirmatur. Conf. Verr. II, 4, 8; III, 71.

12. *Videret*. Intelligeret ac consideraret. Quod est aperto sensu. Frustra legendum «audiret» suspicatur Hotom.

XXVII. 1. *In concionem veniunt*. Mos Græcorum ut de publica injuria concio cognoscat, et psephismia seu decretum fiat, de quo plura in orat. pro Flacco.

« ab eorum libidine tutam non liceret; quidvis esse
 « perpeti satius, quam in tanta vi atque acerbitate ver-
 « sari. » Hæc quum omnes sentirent, et quum in eam
 rationem pro suo quisque² sensu ac dolore loqueretur;
 omnes ad eam domum, in qua iste deversabatur,
 profecti sunt: cædere januam saxis, instare ferro, ligna
 et sarmenta circumdare, igneinque subjicere cœperunt.
 Tum cives romani, qui Lampsaci negotiabantur,
 concurrunt; orant Lampsacenos, ut gravius apud
 eos nomen legationis, quam injuria legati putaretur:
 sese intelligere hominem illum esse impurum ac nefarium;
 sed, quoniam nec perfecisset, quod conatus esset,
 neque futurus esset Lampsaci postea, levius eorum³
 peccatum fore, si homini scelerato pepercissent, quam
 si legato non pepercissent. Sic iste multo sceleratior
 et nequior, quam ille Hadrianus⁴, aliquanto etiam
 felicior fuit. Ille, quod ejus avaritiam cives romani
 ferre non potuerant, Uticæ domi suæ vivus exustus
 est; idque ita illi merito accidisse existimatum est,
 ut lætarentur omnes, neque ulla animadversio constitueretur:
 hic sociorum⁵ ambustus⁶ incendio, tamen ex illa
 flamma periculoque evolavit; neque adhuc causam
 ullam excogitare potuit, quamobrem commiserit⁷,
 aut quid evenerit, ut in tantum pericu-

2. *Pro suo quisque*, etc. Ut quisque vehementius sentiebat ac ferebat.

3. *Levius*. Fore ut minus illos pœniteret, quod homini, etc.

4. *Hadrianus*. C. Fabius Hadrianus in Africa prætor quum esset, Sullanis temporibus, anno 669, i. e. annos abhinc XII, propter crudelitatem et avaritiam suam Uticæ, in prætorio suo vivus exustus est. T. Liv. Epit. 86. Val. Max. IX, 10, 2. Oros. V, 20.

5. *Sociorum*. Livius, XLIII, 6:

« Lampsacenos in sociorum formulam referre Q. Mænius prætor jussus ». Quem loco supra citato adi.

6. *Ambustus*. Semiustulatus; flamma circumventus et obsessus.

7. *Quamobrem commiserit*. Quomodo effecerit ut. *Committere* h. l. absolute ponitur. Verres periculi sui causam non potest aut in aliquod suum factum honestum, aut in fortunam rejicere. — Frustra mutatum quidpiam velint Hotom. et Lambin.

lum veniret. Non enim potest dicere : Quum seditionem sedare vellem , quum frumentum imperarem , quum stipendium cogerem , quum aliquid denique reipublicæ causa gererem ; quod acrius imperavi , quod animadverti , quod minatus sum. Quæ si diceret , tamen ignosci non oporteret , si nimis atrociter imperando sociis , in tantum adductus periculum videretur.

XXVIII. Nunc quum ipse causam illius tumultus neque veram dicere , neque falsam confingere audeat ; homo autem ¹ ordinis sui frugalissimus , qui tum accensus ² C. Neroni fuit , P. Tettius , hæc eadem se Lampsaci cognosse dixerit ; vir omnibus rebus ornatus C. Varro , qui tum in Asia tribunus militum fuit , hæc eadem ipsa se ex Philodamo audisse dicat : potestis dubitare , quin istum fortuna non tam ex illo periculo eripere voluerit , quam ad vestrum iudicium reservare ? Nisi vero illud dicet , quod et in testimonio Tettii , priore actione , interpellavit ³ Hortensius (quo tempore ⁴ quidem signi satis dedit , si quid esset , quod

XXVIII. 1. *Ordinis*. Libertorum ; nam accensorum munus libertis deferbatur : libertus autem erat Tettius : et optime *frugalitatis* s. probitatis laus huic decernitur.

2. *Accensus*. Olim in militia romana *accensi* genus erant militum , qui defectum legionum supplerent. Dicebantur alio nomine *adscriptitii*. Sed Ciceronis tempore *accensi* ministratores consulum et prætorum erant , et ab *acciendo* dictos putat Varro de Ling. Lat. VI , quod accirent , i. e. vocarent ad magistratus. Quin et decuriones et centuriones habebant suos accensos , ut constat ex Varronis loco apud Nonium. Sed Asconius et alii docti viri confandunt *accensos* veteris militiæ , in quorum locum postea veli-

tes successerunt , cum his consulum prætorumque ministris , quum tamen sint diversissimi , et iisdem omnino quibus apparitores , fungantur officiis. Quod aperte demonstrat Ciceronis locus ad Quint. Fr. I , 1 : « Accensus sit eo etiam numero , quo eum majores nostri esse voluerunt , qui hoc non in beneficii loco , sed in laboris et muneris , non temere nisi libertis suis deferabant , quibus illi non multo secus ac servis imperabant ». Vid. Salmas. de Re milit. Rom. 14. Sigon. de Jure civ. Rom. II , 15. Rosin. Ant. VII , 48 , etc.

3. *Interpellavit*. Interpellando et redarguendo Tettii testimonium , dixit : adeo malam fuisse Philodami causam , ut a C. Nerone sit damnatus.

4. *Quo tempore*. Tunc autem satis

posset dicere, se tacere non posse; ut, quamdiu in ceteris rebus tacuerit, scire omnes possemus, nihil habuisse, quod diceret). Hoc tum dixit, Philodamum, et ejus filium, a C. Nerone esse damnatos⁵. De quo ne multa disseram, tantum dico, sequutum id esse Neronem, et ejus consilium, quod Cornelium lictorem occisum esse constaret: putasse non oportere esse cuiquam, ne in ulciscenda quidem injuria, hominis occidendi potestatem. In quo video, Neronis judicio non te absolutum esse improbitatis, sed illos damnatos esse cædis. Verum ista damnatio tamen cujusmodi fuit? Audite, quæso, judices, et aliquando miseremini sociorum, et ostendite, aliquid his in vestra fide præsidii esse oportere.

XXIX. Quod toti Asiæ jure occisus videbatur istius ille, verbo lictor, re vera minister improbissimæ cupiditatis¹; pertimuit iste, ne Philodamus Neronis judicio liberaretur²: rogat et orat Dolabellam, ut de sua provincia decedat³; ad Neronem proficiscatur: se demonstrat incolumem esse non posse, si Philodamo vivere, atque aliquando Romam venire licuisset. Commotus est Dolabella: fecit id, quod multi reprehenderunt, ut exercitum, provinciam, bellum⁴ relinqueret, et in Asiam, hominis nequissimi causa, in alienam provinciam, proficisceretur. Posteaquam ad Neronem venit; contendit ab eo, ut Philodami causam cogno-

manifeste demonstravit, se, quum dicere aliquid posset, non tacere posse; ita ut, etc.

5. *Esse damnatos.* Ex quo sequitur, inquit, eos nocentes fuisse; et etiamsi innoxii essent, Neronis illud esset crimen, non autem Verris.

XXIX. 1. Sic plerique codd. exhibent; alii: « voluptatis ». J. V. L.

2. *Liberaretur.* Quod hæc cædis absolutio, causam cur esset facta comprobare videretur.

3. *Decedat.* Quod injussu senatus non licebat. Liv. XXXIX, 19.

4. *Bellum.* Fortasse cum iis, qui Amanum montem tenebant, quos Cicero Ciliciæ proconsul postea devicit. Vid. Epist. XV, 4.

sceret. Venerat ipse⁵, qui esset in consilio, et primus sententiam diceret; adduxerat etiam præfectos⁶, et tribunos militares suos, quos Nero omnes in consilium vocavit: erat in consilio etiam æquissimus iudex ipse Verres; erant nonnulli togati⁷ creditores Græcorum, quibus ad exigendas pecunias improbissimi cujusque legati plurimum prodest gratia. Ille miser defensorem reperire neminem poterat. Quis enim esset aut togatus, qui Dolabellæ gratia; aut Græcus, qui ejusdem vi et imperio non moveretur? Accusator autem apponitur⁸ civis romanus de creditoribus⁹ Lampsacenorum: qui, si dixisset, quod iste jussisset, per ejusdem istius lictores a populo pecuniam posset exigere. Quum hæc omnia tanta contentione, tantis copiis¹⁰ agerentur; quum illum miserum multi accusarent, nemo defenderet; quumque Dolabella cum suis præfectis pugnaret in consilio; Verres fortunas¹¹ agi suas diceret; idem testimonium diceret; idem esset in consilio; idem accusatorem parasset; hæc quum omnia fierent, et quum hominem constaret occisum: tamen tanta vis istius injuriæ, tanta in isto improbitas putabatur, ut de Philodamo amplius¹² pronuntiaretur.

5. *Venerat ipse.* In aliena autem provincia alterius provinciæ prætores primi sententiam dicebant.

6. *Præfectos.* Turmarum equestrium.

7. *Togati.* Romani. Addit orator « creditores Græcorum », ut ostendat causas gratificationis eorum in Verrem. Solebant enim Romani pecunias provincialibus hominibus gravissimo fœnore dare, ad quas exigendas non rectoris provinciæ solum, sed et legati plurimum eis proderat gratia.

8. *Apponitur.* Apud J. V. L. *opponitur*, sed errore operarum.

9. Asconius, « et ex creditoribus », quod recepit sine admonitione Lamb.

10. *Copis.* Significat comites quos Dolabella secum adduxerat, præfectos, etc. ut Verri adessent; quibus opponitur rei Philodami solitudo.

11. *Fortunas.* Existimationem, caput, bona sua. Vid. pro Quint. 2.

12. *Amplius.* Formula in obscuris causis adhiberi solita, qua in diem aliam judicia proferebantur. Tametsi igitur multa Philodami causæ adversarentur, etiam illud accederet, quod, quia occisum hominem esse constaret, mala

XXX. Quid ego nunc in altera actione¹ Cn. Dolabellæ spiritus², quid hujus lacrymas et concursationes³ proferam? quid C. Neronis, viri optimi atque innocentissimi, nonnullis in rebus animum nimis timidum atque demissum? qui in illa re quid facere potuerit⁴, non habebat, nisi forte, id quod omnes tum desiderabant, ut ageret eam rem sine Verre et Dolabella: quidquid esset sine his actum, omnes probarent; tum vero quod pronuntiatum est, non per Neronem iudicatum, sed per Dolabellam ereptum⁵ existimabatur. Condemnatur enim perpaucis sententiis Philodamus et ejus filius. Adest, instat, urget Dolabella, ut quam primum securi feriantur, quo⁶ quam minime multi ex illis de istius nefario scelere audire possent. Constituitur in foro Laodiceæ spectaculum acerbum, et miserum, et grave toti Asiæ provinciæ; grandis natu parens adductus ad supplicium; ex altera parte filius: ille, quod pudicitiam liberorum; hic, quod vitam patris famamque sororis defenderat. Flebat uterque, non de suo supplicio, sed pater de filii morte, de patris, filius. Quid lacrymarum ipsum Neronem putatis profudisse? quem fletum totius Asiæ fuisse? quem luctum et gemitum Lampsacenorum? securi esse percussos homines innocentes, nobiles, socios populi romani atque amicos, propter hominis flagitiosissimi singula-

Philodami causa videretur, non tamen prima actione condemnarunt.

XXX. 1. Alii, «in alteram actionem». J. V. L.

2. *Spiritus*. Animi contentiones.

3. *Al. concursiones*. Sic Hot. ex MSS.

4. Ernest. putat scripsisse Tullium vel «quid faceret», vel «quid facere posset». Quod recepit Schütz. Schellerus ei obloquitur, allato exemplo

orat. pro Rosc. Amer. cap. 35, ubi est: «quid erat quod... voluerit?»

5. *Ereptum*. Vi extortum. Sic apud Senec. de Brev. vit. cap. 6: «ausus iudicibus reos commendare, et gratiam suam foro interponere tam efficaciter, ut quædam judicia constet ab eo rapta».

6. *Quo*. Ut tempus infelix pater ac filius non habeant querendi coram multitudine, de Verris nefario scelere.

rem nequitiam atque improbissimam cupiditatem? Jam, jam⁷, Dolabella, neque tui, neque tuorum liberum, quos tu miseros in egestate atque in solitudine reliquisti, misereri⁸ potest. Verresne tibi tanti fuit, ut ejus libidinem hominum innocentium sanguine lui velles⁹? Idcircone exercitum atque hostem relinquebas, ut tua vi et crudelitate istius hominis improbissimi pericula sublevares? Quod enim eum tibi quæstoris in locum constitueras, idcirco tibi amicum in perpetuum fore putasti? Nesciebas, ab eo Cn. Carbonem consulem, cujus re vera quæstor fuit, non modo relictum, sed etiam spoliatum auxiliis, pecunia¹⁰, nefarie oppugnatum et proditum? Expertus igitur es istius perfidiam tum, quum se ad inimicos¹¹ tuos contulit; quum in te homo ipse nocens acerrimum testimonium dixit; quum rationes ad ærarium, nisi damnato te, referre noluit.

XXXI. Tantæne tuæ, Verres, libidines erunt, ut eas capere ac sustinere non provinciæ populi romani, non nationes exteræ possint? Tune quod videris, quod audieris, quod concupieris, quod cogitaris, nisi id ad nutum tuum præsto fuerit, nisi libidini tuæ cupiditatique paruerit¹, immittentur homines²? expugnabuntur domus? civitates non modo pacatæ³, ve-

7. *Jam, jam*. Hunc affectibus plenum locum, quo in genere mirabiliter Cicero excellit, indicare satis est. Conf. Quintil. IX, 1.

8. *Misereri*. Passivo sensu a *miserere*. Lamb. e cod. Memm. «jam jam D. me neque... miserere potest».

9. *Lui velles*. Abstergi ac deleri, ut nullum ejus vestigium criminis relinquatur.

10. Vocem *pecunia* omiserunt Hot. Manut. Lambin. quod *pecunia* auxi-

liis contineretur. Sed prudenter ea vox retinetur: ita tamen ut explicata et apertius prolata hoc adjuncto *auxilia* intelligamus. GARAT.

11. *Inimicos*. Scaurum qui te accusavit.—*Damnato te*. Ne tibi falsa multa tribuentem redarguere posses.

XXXI. 1. *Pessime* Lambin. conj. «patuerit». *Parere libidini* idem est ac *servire libidini*.

2. *Homines*. Satellites tui.

3. *Non modo pacatæ*. Non modo

rum etiam sociorum atque amicorum, ad vim atque ad arma confugient, ut ab se atque ab liberis suis legati populi romani scelus ac libidinem propulsare possint? Nam quæro abs te, circumsessusne sis Lampsaci; coeperitne domum, in qua deversabare, illa multitudo incendere; voluerintne legatum populi romani comburere vivum Lampsaceni? Negare non potes: habeo enim testimonium⁴ tuum, quod apud Neronem dixisti; habeo, quas ad eundem literas misisti. Recita hunc ipsum locum de testimonio: TESTIMONIUM C. VERRIS IN ARTEMIDORUM. Recita⁵ ex Verris literis ad Neronem⁶: EX LITERIS C. VERRIS AD C. NERONEM. NON MULTO POST IN DOMUM..... Bellumne populo romano Lampsaceni facere conabantur? deficere ab imperio ac nomine nostro volebant? Video enim, et ex iis, quæ legi et audiui, intelligo, in qua civitate non modo⁷ legatus populi romani circumsessus, non modo igni, ferro, manu, copiis oppugnatus, sed aliqua ex parte violatus sit; nisi publice satisfactum sit, ei civitati bellum indici⁸ atque inferri solere. Quæ fuit igitur causa, cur cuncta civitas Lampsacenorum de concione, quemadmodum tute scribis, domum tuam concurrerent⁹? Tu enim neque in literis, quas Neroni mittis, neque in testimonio, causam tanti tumultus ostendis ullam: obsessum te dicis; ignem alla-

quibuscum bellum nullum est; sed etiam pacis ac belli societas est contracta.

4. Asconius in exemplo suo legerat, « testimonium publicum tuum ». J. V. L.

5. *Artemidorum*. Forsan hoc Philodami filius nomine appellabatur. Conj. Lalleu. « Philodamum ».

6. Absunt verba hæc, « Recita... Neronem », a multis MSS. Inseruit

Hot. probante Lambin. Paullo infra codd. Hot. « Lampsaci civitas ». Codd. Pall. et edd. vet. « Lampsaceni civitas ». Lamb. « Lampsacena civitas ». Alii, « Lampsaceni cives ».

7. *Non modo*. Nedum: non dico.

8. *Bellum indici*. Bellorum, quæ ob male habitos legatos suscepta sunt, plenæ sunt historiæ romanæ.

9. Sic ex MSS edid. Græv. et Ern. Alii, *concurreret*. Lamb. *concurrerit*.

tum, sarmenta circumdata, lictorem tuum occisum esse dicis; prodeundi tibi in publicum potestatem factam negas: causam hujus tanti terroris occultas. Nam si quam Rubrius injuriam suo nomine, ac non impulsu tuo et tua cupiditate fecisset; de tui comitis injuria questum ad te potius, quam te oppugnatum venirent. Quum igitur, quæ causa illius tumultus fuerit, testes a nobis producti dixerint, ipse celarit; nonne causam hanc, quam nos proposuimus, tum illorum testimonia, tum istius taciturnitas perpetua confirmat?

XXXII. Huic homini parcetis igitur, judices, cujus tanta peccata sunt, ut ii, quibus injurias fecerit, neque legitimum tempus¹ exspectare ad ulciscendum, neque vim tantam doloris in posterum differre potuerint? Circumsessus es: a quibus? a Lampsacenis, barbaris hominibus, credo, aut iis, qui populi romani nomen contemnerent. Imo vero ab hominibus, et natura, et consuetudine, et disciplina lenissimis²; porro autem populi romani, conditione sociis, fortuna servis, voluntate supplicibus³: ut perspicuum sit omnibus, nisi tanta acerbitas injuriæ, tanta vis sceleris fuisset, ut Lampsaceni moriendum sibi potius, quam perpetiendum putarent, numquam illos in eum locum progressuros fuisse, ut vehementius odio libidinis tuæ, quam metu legationis moverentur. Nolite, per deos immortales, cogere socios atque ex-

XXXII. 1. *Legitimum tempus*. Quo, finito magistratus tempore, licebat ipsum ac comites ejus Romæ accusare. Quamdiu autem imperium habebant de his iudicium fieri non poterat. Quod ex lege Servilia constat, in ejus fragmentis est: « de hisce, dum magistratum aut imperium habebunt, iudicium non fiet ». Confer

Brisson. de Formul. lib. II, cap. 24.

2. *Lenissimis*. Unde atrocior videtur injuria quæ eis tantam potuit lenitatem excutere.

3. *Supplicibus*. Qui fœdere quidem Romanorum sunt socii, fortunæ autem vicibus eorum servi, quum quidquid Romanis placuerit magistratibus pati metum cogantur, sed tamen animo

teras nationes, hoc uti perfugio⁴ : quo, nisi vos vindicatis, utentur necessario. Lampsacenos in istum numquam ulla res mitigasset, nisi eum poenas Romæ daturum credidissent. Etsi talem acceperant injuriam, quam nulla lege satis digne persequi poterant; tamen incommoda sua nostris⁵ committere legibus et judiciis, quam dolori suo permittere⁶ maluerunt. Tu mihi, quum circumsessus a tam illustri civitate sis propter tuum scelus atque flagitium; quum coegeris homines miseros et calamitosos, quasi desperatis nostris legibus et judiciis, ad vim, ad manus, ad arma confugere; quum te in oppidis et civitatibus amicorum non legatum populi romani, sed tyrannum libidinosum crudelemque præbueris; quum apud exterarum nationes, imperii nominisque nostri famam tuis probris flagitiisque violaris; quum te ex ferro amicorum populi romani eripueris, atque e flamma sociorum evolaris : hic tibi perfugium speras futurum? Erras⁷ : ut huc incideres⁸, non ut hic conquiesceres, illi te vivum exire passi sunt.

XXXIII. Et ais¹, iudicium esse factum, te injuria circumsessum esse Lampsaci, quod Philodamus cum filio condemnatus sit. Quid? si doceo, si planum facio, teste homine nequam, verum ad hanc rem tamen idoneo, te ipso, inquam, teste doceo², te hujus cir-

semper iis sunt obnoxii ac devoti.

4. *Perfugio*. Ut vi et armis ipsi suas injurias ulciscantur.

5. Sic cod. Franc. 1, et receperunt Græv. Ernest. Al. *vestris*.

6. *Permittere*. Scil. ut ipsi suas injurias ulciscerentur.

7. *Erras*. Locum de Clodio ex epistola quadam ad Atticum, notandæ similitudinis causa, confer : « Erras,

Clodi : non te iudices urbi, sed carceri reservarunt, neque retinere in civitate, sed exsilio privare voluerunt ».

8. *Incideres*. Ut in hæc iudicia, tamquam in saxa, quibus frangereris, impingeres.

XXXIII. 1. *Et ais*. Et dicis, Verres, iudicio declaratum fuisse te injuste a Lampsacenis circumsessum.

2. Alii, *docebo*. J. V. L.

cum sessionis tuæ causam et culpam in alios transtulisse³? neque in eos, quos tu insimularas⁴, esse animadversum? jam nihil te iudicium Neronis adjuvat. Recita, quas ad Neronem literas misit: **EPISTOLA C. VERRIS AD NERONEM: THEMISTAGORAS ET THESSALUS...** Themistagoram et Thessalum scribis populum concitasse. Quem populum? qui te circumsegit; qui te vivum comburere conatus est. Ubi hos persequeris? ubi accusas? ubi defendis jus nomenque legati? In Philodami iudicio dices id actum. Cedo mihi ipsius Verris testimonium: videamus, quid idem iste juratus⁵ dixerit. Recita: **AB ACCUSATORE ROGATUS⁶ RESPONDIT, IN HOC JUDICIO NON PERSEQUI; SIBI IN ANIMO ESSE, ALIO TEMPORE PERSEQUI.** Quid igitur te juvat Neronis iudicium? quid Philodami damnatio? Legatus quum esses circumsessus, quumque, quem admodum tute ad Neronem scripsisti, populo romano communique causæ legatorum facta esset injuria insignis, non es persequutus: dicis tibi in animo esse, alio tempore persequi. Quod fuit id tempus? quando es persequutus? Cur imminuisti? jus legationis? cur causam populi romani deseruisti ac prodidisti? cur injurias tuas, conjunctas cum publicis, reliquisti⁸? Non te ad senatum causam deferre; non de tam atrocibus injuriis conqueri; non eos homines, qui populum concitarant⁹, consulum literis evocandos¹⁰ curare oport-

3. Lambin. ex Asconio, *contulisse*. J. V. L.

4. *Iidem, insimularis*. J. V. L.

5. *Juratus*. In testimonium producti homines jurabant se veritatem dicturos.

6. Ascon. habet *Interrogatus*.

7. *Imminuisti*. Adnotat Liv. IV: "Censores ægre passi, Mamercum, quod magistratum populi rom. immi-

nuiasset, tribu moverunt, octuplicatoque censu ærarium fecerunt".

8. *Reliquisti*. Inultas. Sic pro Cæc. "Nunc vero quis est, qui aut vim armatis hominibus factam relinqui putet oportere".

9. Ab Hotomanno; alii, *concitantur*, vel *concitantur*. J. V. L.

10. *Evocandos*. Romam, ut populo rom. de tumultu illo satisfacerent.

tuit? Nuper, M. Aurelio Scauro¹¹ postulante, quod is Ephesi se quæstorem vi prohibitum esse dicebat, quominus e fano Dianæ servum suum, qui in illud asyllum¹² confugisset, abduceret; Pericles Ephesius, homo nobilissimus, Romam evocatus est, quod auctor injuriæ illius fuisse argueretur: tu, si te legatum ita Lampsaci tractatum esse, senatum docuisses, ut tui comites vulnerarentur, lictor occideretur, ipse circumsessus pæne incenderere; ejus autem rei duces et auctores et principes¹³ fuisse, quos scribis, Themistagoram et Thessalum: quis non commoveretur? quis non ex injuria, quæ tibi esset facta, sibi provideret? quis non in ea re causam tuam, periculum commune agi arbitraretur? Etenim nomen legati ejusmodi esse debet, quod non modo inter sociorum jura, sed etiam inter hostium tela incolume versetur¹⁴.

XXXIV. Magnum hoc Lampsacenum crimen est libidinis atque improbissimæ cupiditatis: accipite nunc avaritiæ propemodum in suo genere non levius. Mile-

11. *M. Aurelio Scauro*. Alius ab eo qui Dolabellam accusavit; ille ex gente Aurelia plebeia fuit et consul A. U. 642. Vid. Epit. Liv. LXII, et Vell. Pat. II, 12.

12. *Asylum*. Jus *asyli* Ephesini, ob magnæ Dianæ celebritatem, quam late patuerit, docet Strabo. Ceterum fugitivos servos ex asylius retrahi licuisse probat locus Plut. de Is. et Os. Interdum autem Græcis asylorum jus fuit concessum, interdum dampnum, hinc Romanis publicæ utilitati prospicientibus, inde Græcis vetustæ religionis jura defendentibus. Quod scribit Sueton. in Tiber. 36: «Abolevit, inquit, Tiberius, et jus moremque asylorum quæ usquam erant». Significat

non omnibus fuisse sacris locis asylum. Ceterum apparet jus ad statuas deorum aut imperatorum confugiendi, non omnino hoc decreto fuisse sublatum, et in Capitolio propter religionem id jus fuisse ne supplices per vim abducerentur. Qua de re confer egregium Taciti Annal. III, 60 locum, et Spanhem. de Numism. p. 671.

13. Gruterus testatur in MSS tribus suis nullam esse copulam, legique vult, «auctores principes». Nihil tamen putamus a vulgatis recedendum. J. V. L.

14. *Versetur*. Sic de Harusp. resp. «Sic enim sentio, jus legatorum, quum hominum præsidio munitum sit, tum etiam divino jure esse vallatum».

sios navem poposcit, quæ eum præsidii causa Myndum prosequeretur. Illi statim myoparonem egregium de sua classe, ornatum atque armatum dederunt. Hoc præsidio Myndum profectus est. Nam, quid Milesiis lanæ publicæ¹ abstulerit, item de sumptu in adventum, de contumeliis et injuriis in magistratum Milesium, tametsi dici tum vere, tum graviter et vehementer potest, tamen dicere prætermittam, eaque omnia testibus integra reservabo: illud, quod neque taceri ullo modo, neque dici pro dignitate² potest, cognoscite. Milites remigesque Miletum Myndo pedibus reverti jubet: ipse myoparonem pulcherrimum, de decem Milesiorum navibus³ electum, L. Magio et L. Rabio, qui Myndi⁴ habitabant, vendidit. Hi sunt homines, quos nuper senatus in hostium numero habendos censuit; hoc illi navigio ad omnes populi romani hostes, usque ab Dianio, quod in Hispania⁵ est, ad Sinopen, quæ in Ponto est, navigaverunt. O dii immortales! incredibilem avaritiam, singularemque audaciam! Navem tu de classe populi romani, quam tibi Milesia civitas, ut te prosequeretur, dedisset, ausus es vendere? Si te magnitudo maleficii, si te

XXXIV. 1. *Lanæ publicæ.* Milesia civitas publicos in pascuis habebat ovium greges, ex quorum lana vectigalia augebat. Hinc sunt lanæ publicæ. Lanæ Milesiæ passim apud scriptores veteres celebrantur, ut pretiosissimæ. Virg. Georg. III, 306; IV, 134. Plin. VIII, 73.

2. *Pro dignitate.* Ut digna res est. Mallet Grævius *indignitate*, et sic habet Schütz. Frustra. Nam dignitas in utramque partem accipitur, ut græca vox ἀξίωμα, ἀξιώμα. Cic. de Invent. II, 160: «Justitia est habitus animi

...suam cuique tribuens dignitatem».

3. *De decem navibus.* Quas Milesii ex fœdere Romanis præbebant.

4. *Myndi.* In ditione Mithridatia. Magius enim et Phanius, seu Fannius, al. Rabirius, ad Mithridatem transfugerant, Ponti regem, qui eos ad Sertorium in Hispaniam miserat, de paciscenda belli societate adversus Romanos.

5. Schütz exulare hinc jubet *Hispaniam* et *Pontum*. Male. J. V. L. — Verba enim hæc locorum intervallum magis demonstrant, et amplificant.

hominum existimatio non movebat; ne illud quidem cogitabas, hujus improbissimi furti, sive adeo nefariæ prædæ, tam illustrem ac tam nobilem civitatem testem futuram? An, quia tum Cn. Dolabella in eum, qui ei myoparoni præfuerat, Milesiisque rem gestam renuntiabat, animadvertere tuo rogatu conatus est, renuntiationemque ejus, quæ erat in publicas literas relata illorum legibus, tolli jusserat: idcirco te ex hoc crimine elapsurum esse arbitrabare⁶?

XXXV. Multum te ista fefellit opinio, et quidem multis in locis. Semper enim existimasti, et maxime in Sicilia, satis cautum tibi ad defensionem fore¹, si aut referri aliquid in literas publicas vetuisses, aut, quod relatum esset, tolli coegisses. Hoc quam nihil sit, tametsi ex multis Siciliae civitatibus priore actione didicisti, tamen etiam in hac ipsa civitate cognosce. Sunt² illi quidem dicto audientes, quamdiu adsunt ii³, qui imperant: simul ac discesserunt, non solum illud perscribunt, quod tum prohibiti sunt, sed etiam causam adscribunt, cur non tum in literas relatum sit. Manent istæ literæ Mileti, manent, et, dum erit illa civitas, manebunt. Decem enim naves jussu L. Murenæ⁴ populus Milesius ex pecunia vectigali⁵ populi romani fecerat, sicut pro sua quæque parte Asiæ ceteræ civitates. Quamobrem unam ex decem, non prædonum repentino adventu, sed legati latrocinio; non

6. Alii, *arbitrabere*. Sed cf. finem cap. 39. J. V. L.

XXXV. 1. *Ad defensionem fore*. Voces has glossam sapere contendit Lambin.

2. *Illi*. Provinciales.

3. *Hi* legendum conj. Goerenz. ad Ciceronem lib. de Finibus, II, 34. J. V. L.

4. *L. Murenæ*. Patris ejus, pro quo exstat Ciceronis oratio. Post Sallæ discessum, cujus legatus in Asia fuit, sponte sua bellum instauravit cum Mithridate, et Asiæ urbibus in fidem populi romani receptis, de eo, anno 678, triumphavit.

5. *Vectigali*. Quam populo rom. debebat ex fœdere. — Multi codd.

vi tempestatis, sed hac horribili tempestate⁶ sociorum, amissam, in literas publicas retulerunt. Sunt Romæ legati Milesii, homines nobilissimi, ac principes civitatis: qui, tametsi mensem februarium⁷, et consulum designatorum nomen expectant⁸, tamen hoc tantum facinus non modo negare interrogati, sed ne producti quidem reticere poterunt: dicent, inquam, et religione adducti, et domesticarum⁹ legum metu, quid illo myoparone factum sit; ostendent, C. Verrem in ea classe, quæ contra piratas ædificata sit, piratam¹⁰ ipsum consceleratum fuisse.

XXXVI. C. Malleolo, quæstore Cn. Dolabellæ, occiso, duas sibi hereditates venisse arbitratus est: unam quæstoriæ procurationis; nam a Dolabella statim pro quæstore jussus est esse: alteram tutelæ; nam, quum pupilli Malleoli tutor esset, in bona ejus impetum fecit. Nam Malleolus in provinciam sic copiose profectus erat, ut domi prorsus nihil relinqueret: præterea pecunias occupat¹ apud populos, et syngraphas fe-

« populo rom. » probant Lalleu. et Beck.

6. *Tempestate*. Sic Verrem appellat.

7. *Februarium*. Qui totus postulatis sociorum et legationibus audiendis dari solebat.

8. *Nomen expectant*. Ipsum consulum, qui de suis petitionibus sunt relaturi, nomen formidant. Sic optime Ascon. Schütz nutum post Grævium. Falso. Pro *expectant* Asconius legi etiam testatur *extimescunt*. Desjard. mallet *spectant*. Quæ inutilia sunt, quia in verbo *expectant* metus inest. Expectant enim ut adversarios suos, et unde timere aliquid possint, si Verrem testimonio suo læserint. Sensus est: Tametsi mensem februarium, quo beneficia a senatu petituri sunt, ac

simul de injuriis questuri, et consules Hortensium ac Metallum, qui de ipso- rum postulatis ad senatum referant, cum formidine expectant, quia si contra Verrem fuerint loquuti, isti Verris amici male de illis ad senatum referent, tamen, etc.

9. *Domesticarum*. Quibus coguntur de patriæ suæ incommodis non tacere.

10. *Piratam*. Quia ex ea classe navem abstulit, et vendidit.

XXXVI. 1. *Occupat*. Fœnori dederat. *Vacua* et *otiosa* pecunia vocatur, quæ usuras nullas confert. Solebant autem Romani pecuniam in provinciis, eamque sub gravissimis usuris collocare. Sicuti Brutus, qui quaternas centesimas a Salaminis pepigerat; aut Seneca, cui « Italiam et

cerat; argenti optimi cælati grandè pondus secum tulerat (nam ille quoque sodalis² istius erat in hoc morbo et cupiditate); grande pondus argenti, familiam magnam, multos artifices, multos formosos homines reliquerat³. Iste, quod argenti placuit, invasit; quæ mancipia voluit, abduxit; vina, ceteraque, quæ in Asia facillime⁴ comparantur, quæ ille reliquerat, asportavit; reliqua vendidit, pecuniam exegit. Quum eum ad H-S vicies⁵ quinquies redegissee constaret; ut Romam rediit, nullam literam pupillo, nullam matri ejus, nullam tutoribus reddidit: servos artifices pupilli quum haberet domi, circum pedes⁶ autem homines formosos et literatos; suos esse dicebat, se emisse. Quum sæpius mater et avia pueri postularent, uti, si non redderet pecuniam, nec rationem daret, diceret saltem, quantum pecuniæ Malleoli deportasset; multis efflagitatus aliquando dixit H-S decies: deinde in codicis extrema cera⁷ nomen infimum in flagitiosa litura fecit: expensa Chrysogono servo H-S sexcenta

provincias immenso fœnore hauriri = exprobrabatur. Vide sup. cap. 29; ad Attic. V, 21; Tac. Ann. XIII, 42, etc. — *Syngraphas*. *Syngrapha* est cautio scripta manu eorum inter quos convenit. Vide Salmas. de Usur. 6.

2. *Sodalis*. Nam Malleolus ut in ceteris rebus, sic in avaritia sodalis et assecla Verris erat.

3. Alii, *reliquit*. J. V. L.

4. *Facillime*. Vili pretio.

5. *H-S vicies*, etc. (gall. 512,000 f.)

6. *Circum pedes*. Qui cœnanti domino ad pedes stabant. Vide Sen. de Ben. III, 27.

7. *Extrema cera*. Ultima parte paginæ. Notum veteres ceratis tabellis uti; inde prima, secunda cera, i. e. pagina. Porro deletis H-S decies cen-

tenis millibus, quæ scripta esse debent, Verres reposuit sexcenta millia; et sub ipsa litura, quam flagitii hujus causa fecerat, nomen s. debitum subscripsit his verbis: Quæ servo meo Chrysogono sexcenta data et expensa sunt in Asia, ea a pupillo Malleolo, i. e. ex Malleoli nummis, seu pupilli nomine, cui hæc debebantur, illi expensa sunt. Malleolo hæc ego debeo. Nam «acceptum referre alicui» est scribere se ab aliquo accepisse: *expensum ferre*, scribere se dedisse. Ad h. l. confer etiam Lambin. ad Horat. Sat. II, 53: «Sic tamen, ut limis rapias quid prima secundo Cera velit versu», et viros doctos ad illud Sueton. Jul. cap. 83: «reliquos in ima cera».

millia⁸ accepta pupillo Malleolo retulit. Quomodo⁹ ex decies H-S sexcenta sint facta; quomodo de eodem modo quadrarint, ut illa, de Cn. Carbonis pecunia, reliqua H-S sexcenta facta sint; quomodo Chrysogono expensa lata sint; cur id nomen infimum, in lituraque sit, vos existimabitis. Tamen H-S sexcenta millia quum accepta retulisset, H-S quinque millia soluta non sunt. Homines, posteaquam reus factus est, alii reddit, alii etiam nunc retinentur; peculia¹⁰ omnium vicariique retinentur.

XXXVII. Hæc est istius præclara tutela. En, cui tuos liberos committas; en memoria¹ mortui sodalis; en metus vivorum existimationis. Quum tibi se tota Asia spoliandam ac vexandam tradidisset; quum tibi exposita esset omnis ad prædandum Pamphylia: contentus his tam opimis rebus non fuisti? manus a tutela, manus a pupillo, manus a sodalis filio abstinere non potuisti? Jam te non Siculi, non aratores, ut dictitas, circumveniunt; non hi, qui decretis edictisque tuis in te concitati infestique sunt: Malleolus a me productus est, et mater ejus atque avia; quæ miseræ², flentes, eversum a te puerum patriis bonis esse dixe-

8. *Millia acc.* Alii aliter refingunt. J. V. L. — Nihil mutandum.

9. *Quomodo.* Jam vestrum est, iudices, æstimare primum quomodo H-S decies centena millia subito ad sexcenta millia redacta sint, seu quomodo qui paullo ante fassus est se pupilli nomine decies accepisse, in tabulis accepti tantum sexcenta retulerit; dein quomodo redacta ex Malleoli bonis pecunia tam præcise confecerit hanc summam, ita ut neque plus, neque minus inveniat: eadem ratione, qua olim scripsit de illa Carboni erepta pecunia præcise H-S sexcenta millia

reliqua se habuisse; postea quam ob causam illa Chrysogono Verris servo data sint.

10. *Peculia.* I. e. pecunia quam servus de demenso suo sibi comparat. Ex illa sæpius sibi *vicarium* servum lautiores servi emebant, qui pars peculii erat, et cujus laborem lucro apponebant. Conf. Plaut. Asinar. II, 4, et Martial. Epigr. II, 18.

XXXVII. 1. Duo codd. apud Lambinum, «memoriam...metum». Minus numerosa compositio. J. V. L.

2. Beckius ex codd. «miseræ flentes». J. V. L.

runt. Quid exspectas? an dum ab inferis ille Malleolus existat, atque abs te officia tutelæ, sodalitatis, familiaritatisque flagitet? Ipsum putato adesse: «Homo
 «avarissime et spurcissime, redde bona sodalis³ filio:
 «si non quæ abstulisti; at quæ confessus es. Cur cogis
 «sodalis filium hanc primam in foro vocem cum dolore
 «et querimonia emittere⁴? cur sodalis uxorem, sodalis
 «socrum, domum denique totam sodalis mortui, contra
 «te testimonium dicere? cur pudentissimas lectissi-
 «masque feminas in tantum virorum conventum in-
 «solitas invitasque prodire cogis?» Recita omnium
 testimonia: TESTIMONIUM MATRIS ET AVIÆ.

XXXVIII. Proquæstore¹ vero quomodo iste commune² Milyadum vexarit, quomodo Lyciam, Pamphyliam, Pisidiam, Phrygiamque totam frumento imperando, æstimando, hac sua, quam tum primum excogitavit, Siciliensi³ æstimatione affligerit, non est necesse demonstrare verbis. Hoc scitote: his nominibus (quæ res per eum gestæ sunt, quum iste civitatibus frumentum, coria⁴, cilicia, saccos⁵ imperaret, neque ea sumeret, pro his rebus pecuniam exigeret),

3. *Sodalis*. Sic appellatur proprie collega ac socius, cum quo sacra celebramus.

4. Lambinus, *mittere*. J. V. L.

XXXVIII. 1. *Proquæstore*. I. e. factus quæstor in locum mortui Malleoli.

2. *Commune*. Communitem, republicam. Græca locutio: τὸ κοινόν. Porro Milyas montana regio ab angustiis Tauri montis, usque ad Apameensium regionem extenditur. Strab. in fin. lib. XIII.

3. *Siciliensi*. Quia postea in Sicilia usus est. Verr. III, 81. Porro quæstorum præcipue frumentaria erat procu-

ratio, qui frumenti certam vim a vectigalibus dari imperabant, aut etiam emebant ac æstimabant.

4. *Coria*. Quibus tabernacula militibus conficiebantur. T. Liv. V, 2. — *Cilicia*. Vestes e lana caprina textas, quibus in castris utebantur, et quarum usus in Cilicia repertus est. Varr. de Re rust. II, 11. Virgil. Georg. III, 313: «barbas incanaque menta Cinyphii tondent hirci, sætasque comantis, Usus in castrorum, etc.»

5. Grævius, *sagos*. J. V. L. — Recte monuit Ernest. *saccos* in urbium oppugnationibus usurpari ad frangendam vim telorum, arietum, ut *Cilicia*.

his nominibus⁶ solis, Cn. Dolabellæ H-S ad tricies litem esse æstimatam. Quæ omnia, etiamsi voluntate Dolabellæ fiebant, per istum tamen omnia gerebantur. Consistam in uno nomine⁷: multa enim sunt ex eodem genere. Recita: DE LITIBUS ÆSTIMATIS CN. DOLABELLÆ PR. PECUNIÆ REDACTÆ. QUOD A COMMUNI MILYADUM.... Te hæc coegisse, te æstimasse, tibi pecuniam numeratam esse dico; eademque vi et injuria, quum pecunias maximas cogeres, per omnes partes provinciæ te, tamquam aliquam calamitosam tempestatem, pestemque, pervasisse demonstro. Itaque M. Scaurus, qui Cn. Dolabellam accusavit, istum in sua potestate ac ditione tenuit. Homo adolescens quum istius in inquirendo multa furta ac flagitia cognosceret, fecit perite et callide: volumen ejus rerum gestarum maximum isti ostendit; ab homine, quæ voluit, in Dolabellam abstulit; istum testem produxit: dixit iste, quæ velle accusatorem putavit. Quo ex genere mihi testium, qui cum isto furati sunt, si uti voluissem, magna copia fuisset; qui ut se periculo litium, conjunctione criminum liberarent⁸, quo ego vellem, descensuros pollicebantur. Eorum ego voluntatem omnium repudiavi: non modo proditori, sed ne perfugæ quidem locus in meis castris cuiquam fuit. Forsitan meliores⁹ illi accusatores habendi sunt, qui hæc omnia fecerunt; sed

6. *Nominibus*. Articulis pro hac re sola. — H-S ad tricies (615,000 fr.)

7. *In uno nomine*. A privatis Malleoli ad publicas regionum injurias transit Cicero, et postquam Asiam in eo maxime afflictam ostendit, quod Verres pro imperato frumento ipse pecuniam exigeret quantam vellet ab unaquaque civitate, unum hujusce generis furtum exempli gratia desumit,

et ne judicium patientia abutatur, si de cunctis civitatibus agat nominatim, reliquas omittit, et exponit solum, quantum pecuniæ ab una illarum eriperit, ex nomine uno reliqua conjecturæ permittens. Errant h. l. Ascon. et Manut.

8. *Liberarent*. Dammodo periculi communione exsolverentur.

9. *Meliores*. Peritiores.

ego defensorem in mea persona, non accusatorem¹⁰, maxime laudari volo. Rationes ad ærarium, antequam Dolabella condemnatus est, non audet referre¹¹; impetrat a senatu, ut dies sibi prorogaretur, quod tabulas suas ab accusatoribus Dolabellæ obsignatas diceret: proinde quasi exscribendi potestatem non haberet. Solus est hic, qui numquam rationes ad ærarium referat.

XXXIX. Audistis quæstoriam rationem tribus versiculis relata; legationis¹ non, nisi condemnato et ejecto eo, qui posset reprehendere: nunc denique præturæ, quam ex senatusconsulto statim referre debuit, usque ad hoc tempus non retulit. Quæstorem² se in senatu expectare dixit: perinde quasi non, ut quæstor sine prætore, posset³ rationem referre (ut tu, Hortensi, ut omnes) eodem modo sine quæstore prætor. Dixit, idem Dolabellam impetrasse. Omen⁴ magis patribus conscriptis, quam causa placuit: probaverunt. Verum quæstores quoque jampridem venerunt: cur non retulisti? Illarum rationum ex ea fæce⁵ legationis, quæstoriarumque tuæ procurationis, illa

10. *Accusatorem*. Accusatorium nomen ita viro bono fugiendum est, ut aut dici omnino se accusatorem nolit, aut velit se non satis accusatorem videri. *Ascon.*

11. *Referre*. Quia earum redargui falsitas potuisset.

XXXIX 1. *Legationis*. Sensus est: Audistis quæsturæ rationes tribus lineis relatas; audistis legationis non relatas rationes, nisi eo, etc. nunc denique rationem præturæ non retulit, etc.

2. *Quæstorem*. Alterum e suis quæstoribus, qui hini erant, Syracusanus

et Lilybætanus. Habet *Ascon.* Desjard. et *Sch. quæstores*.

3. *Manut.* et *Hotom.* «posset referre». Sed nobiscum faciunt *Victor. Car. Steph. Lambin.* et interque *MS Franc.*

4. *Omen*. Utebatur Verres Dolabellæ exemplo, qui repetundarum fuerat damnatus; hinc ominati sunt eundem fore hujusce judicii exitum; quod omen magis eis placuit quam excusatio.

5. *Fæce*. Ex residuis sordibus illius tæ legationis capita desumam quæ Dolabellæ fuerunt imputata.

sunt nomina⁶, quæ Dolabellæ necessario sunt æstimata: Ex LITIBUS ÆSTIMATIS⁷ DOLABELLÆ PR. P. R. PECUNIÆ⁸ REDACTÆ. Quod⁹ minus Dolabella Verri acceptum retulit, quam Verres illi expensum tulerit, H-S quingenta triginta quinque millia; et quod plus fecit Dolabella Verrem accepisse, quam iste in suis tabulis habuit, H-S ducenta triginta duo millia; et quod plus frumenti fecit accepisse istum, H-S decies et octingenta millia: quod tu¹⁰, homo castissimus, aliud in tabulis habe-

6. *Nomina.* Articuli, capita. — *Necessario.* Eæ pecuniæ non poterant non Dolabellæ imputari, in litis æstimatione, quia Verres rationes non edebat, ut ab illo exigi possent, si in rationibus haberet. ERNEST.

7. *Litibus æstimatis.* Quid sit *litem æstimare*, vide Act. I, cap. 13. Porro Desjard. h. l. alium in sensum detorquet, accipit pro tabulis et instrumentis ex quibus lis peragitur (gall. *les pièces du procès*). *Redactæ* non est hic, ut sæpe alias, *ex divenditis bonis collectæ*, quæ interpretatio hic non habet locum, sed significat, « ex pluribus tabulis in quibus sparsæ jacebant, descriptæ et in unam tabulam connectæ et collectæ ». Sed ei hac in re assentiri difficile, quum nullis sit fretus exemplis. Malim cum Garatonio credere illum fuisse quæstorii ex ærario codicis titulum, in quo perscriptum fuerit, quantam quæstores ex bonis Dolabellæ ærario pecuniam intulerint, et quantum unicuique creditorum ex litibus æstimatis nomini fuerit persolutum. Quod quidem ut a quæstore perfici posset, antea ex judiciali æstimatione deposita oportuit esse in ærario nomina omnia, quantum cuique repetundarum lege de bonis Dolabellæ solvendum esset. Vide

légis antiquæ de repet. fragmentum apud Brisson. de Form. II, 30.

8. *Pr. p. r.* Prætoris populi romani. Vulgo *pr. et propr.* h. e. prætoris et proprætoris.

9. *Quod minus.* Verba hæc usque ad illa, *quod tu homo*, non Ciceroni, sed tabulis adscriptis Desjard. neque falso; ita ut hoc in obscuro loco paullum saltem lucis fiat. Scilicet damnatus est Dolabella. Quia scripsit in suis tabulis Dolabella, se a Verre sestertium quingenta triginta quinque millia (109,225 fr.) minus accepisse, quam Verres illi se dedisse scripserat in suis; et quia scripsit Dolabella plus accepisse sestertium ducenta triginta duo millia (47,660 fr.) — *H-S decies*, etc. (369,000 fr.)

10. *Quod tu.* Quas tu pecunias, longe aliter ac Dolabella, in tabulis tuis scriptas habebas. Conjecit Ernest. « id tu h. c. » Reponit Wytttenbach. autem Bibl. crit. vol. I, pars II, pag. 9: *quæ tu, homo cautissimus, aliis in tabulis habebas.* « Verres nimirum pecuniam, quam aliis surripuerat, in tabulas suas non referebat, neque etiam si quam aliis dederat, ne tabulis suis convinci posset in judicio. Itaque per cavillationem vocatur cautissimus, quod illa nomina non in suis, sed

bas. Hinc illæ extraordinariæ¹¹ pecuniæ, quas nullo duce, tamen aliqua ex particula investigamus, redundarunt; hinc¹² ratio cum Q. et Cn. Postumis¹³ Curtiis, multis nominibus, quorum in tabulis iste habet nullum; hinc H-S quaterdecies¹⁴ P. Tadio numeratum¹⁵ Athenis, testibus planum faciam; hinc empta aperitissime prætura: nisi forte id etiam dubium est, quomodo iste prætor factus sit. Homo scilicet aut industria, aut opera probata, aut frugalitatis existimatione præclara, aut denique, id quod levissimum est, assiduitate¹⁶: qui ante quæsturam cum meretricibus lenonibusque vixisset; quæsturam ita gessisset, quemadmodum cognovistis; Romæ post quæsturam illam nefariam vix triduum constitisset; absens non in oblivione jacuisset, sed in assidua commemoratione omnibus omnium flagitiorum fuisset: is repente, ut Romam venit, gratis prætor factus est? Alia porro pecunia, ne accusaretur, data. Cui sit data, nihil ad me, nihil ad rem pertinere arbitror: datam quidem esse tum inter omnes recenti negotio facile constabat. Homo stultissime et amentissime, tabulas quum conficeres, et quum extraordinariæ pecuniæ¹⁷ crimen subterfugere velles; satis te

aliorum tabulis habebat, quibus tamen tabulis convincebatur. Conf. quæ mox sequuntur: *homo stultissimus... existimasti*. Ingeniosissime quidem, sed non ad locum; et nimia mutandi curiositate.

11. *Extraordinariæ*. Extra ordinem; nempe quas, injustis et turpibus modis conciliatas, non audet Verris in tabulas acceptorum referre, ne ex iis convinci possit. « Nullo duce », i. e. tabulis Verris destitutus.

12. *Ratio*. Hinc pecuniæ illæ, quæ plurimis syngraphis inclusæ, in Curtiorum tabulis referuntur.

13. Sic Ursinus optime, pro *Postumiis*. J. V. L.

14. *Quaterdecies*. Quadragies (gall. 820,000 fr.)—P. Tadio. Verris in Sicilia legato. Verr. II, 20.

15. Alii, *numerata*. J. V. L.

16. *Assiduitate*. Quotidiana præsentia. Sic Quintus de petitione: « jam assiduitatis nullum est præceptum, verbumque ipsum docet, quæ res sit. Prodest quidem vehementer, nusquam deesse; sed tamen hic fructus est assiduitatis, non solum esse Romæ atque in foro, etc. »

17. Olim edebatur « extraordinaria

elapsurum omni suspicione arbitrabare, si, quibus pecuniam credebas, iis expensum non ferres, neque in tuas tabulas ullum nomen referres, quum tot tibi nominibus acceptum Curtii referrent? Quid proderat tibi, te expensum illis non tulisse? An tuis solis tabulis te causam dicturum existimasti?

XL. Verum ad illam jam veniamus præclaram præturam¹, criminaque ea, quæ notiora sunt his, qui ad sunt, quam nobis, qui meditati ad dicendum paratique venimus: in quibus non dubito, quin offensionem negligentiae vitare atque effugere non possim. Multi enim ita dicent: « De illo nihil dixit, in quo ego interfui: illam injuriam non attigit, quæ mihi, aut quæ amico meo facta est, quibus ego in rebus interfui. » His omnibus, qui istius injurias norunt, hoc est, populo romano universo, me vehementer excusatum volo, non negligentia mea fore, ut multa præteream, sed quod alia testibus integra reservari velim, multa autem propter rationem brevitatis ac temporis prætermittenda existimem. Fatebor etiam illud invitatus², me prorsus, quum iste punctum temporis nullum vacuum peccato præterire passus sit, omnia, quæ ab isto commissa sunt, non potuisse cognoscere. Quapropter ita me de præturæ criminibus auditote, ut ex utroque genere, et juris dicundi, et sartorum³ tectorum exigendorum, ea postuletis, quæ maxime digna

pecunia », servatum etiam a Ferrat. Garaton. Beck. Manutii vero emendationem ut certissimam receperunt Græv. Ernest. Sch. alii. J. V. L.

XL. 1. *Præturam*. Hanc gessit Verres L. Lucullo et M. Cotta cons. anno 679. De prætoris urbani maneribus adi ad excursum ad finem hujus orationis.

2. Ernest. vix dubitat, Ciceronem

scripsisse « hand invitus ». Alii e recentioribus dubitant, inter quos editor Lipsiensis. J. V. L.

3. *Sartorum*. *Sartus et tectus* derivata sunt a verbis *sarcio* et *tego*: *sarta tecta* (subaud. *opera*) proprie dicuntur ædificia integra et in parietibus et in tecto. *Sarta tecta exigere*, est curare ut opera publica, nempe

sint⁴ eo reo, cui parvum ac mediocre objici nihil oporteat.

Nam ut prætor factus est, qui auspicato⁵ a Chelidone surrexisset, sortem nactus est urbanæ provinciæ, magis ex sua et Chelidonis, quam ex populi romani voluntate : qui principio, qualis in edicto⁶ constituendo fuerit, cognoscite.

XLI. P. Annius Asellus mortuus est, C. Sacerdote prætore. Is quum haberet unicam filiam, neque census¹ esset; quod eum natura hortabatur, lex nulla prohibebat, fecit, ut filiam bonis suis heredem institueret. Heres erat filia : faciebant omnia cum pupilla, leges²,

urbis templa, viæ, ædificia publica, etc. integra præstent redemptores, qui ea tuenda et servanda certo pretio locaverunt. Ea cura ad censores pertinebat. Cic. de Leg. III, § 7. Sed quum, Verre prætore, nulli essent, ei muneri iste extra ordinem præfuit. De *sartis tectis* vide doctissimas explanationes Gronovii in Lect. Plaut. Amstelædami 1740, p. 431 sq.

4. Vulgo *sunt*. Sic tamen Priscian. p. 1153. J. V. L.

5. *Auspicato*. Facete respicitur ad morem magistratuum auspicandi extra pomerium in tentorio; qui auspicium expectantes, quum vocem avis faustæ audissent, surgebant statim et abibant; quod erat *auspicato surgere*. Porro *chelidon* Græciis, Latinis hirundo, est avis species, et meretricia Verris amicæ, nomen. Hinc jocus; et addito verbo *surrexisset*, invidiose ostendit istum non a religione, de more, præturam, sed a re turpissima, auspicatum fuisse.

6. *Edicto*. De prætoris urbani edicto plura vide in Excursu ad calcem orationis.

XLI. 1. *Census esset*. Q. Voconius Saxa trib. pl. anno 584 tulit, ne qui census esset, h. e. qui professus esset facultates suas apud censores, mulierem (ne filiam quidem unicam) heredem suis bonis supra quadrantem, aut, ut Perizonio placet, supra centum millia sestertium (20,500 fr.) institueret; ne plus legaret alii cuiquam, quam ad heredem, heredesve perveniret. Sed rigidam hanc legem multi sic eludebant, ut apud censores nomina haud profiterentur, et, quia *non censi* essent, illa lege teneri se negarent. P. Annius census non fuerat, sive quod legem subterfugerat, sive quod his annis intermisso censu non potuerat censi, atque ideo, nulla lege prohibente, heredem bonis suis filiam unicam instituerat. De lege Voconia vide Cic. de Fin. II, 17. A. Gell. XX, 1, et maxime doctissimam Perizonii dissertationem, qui hunc locum illustrat; ac Montesquieu, *Esprit des Loix*, lib. XXVII, qui hoc caput et seqq. optime de more interpretatur et explicat. Vid. Ind. Leg.

2. Sic Grævius e Prisciano, XVIII,

æquitas, voluntas patris, edicta prætorum, consuetudo juris ejus, quod erat tum, quum Asellus est mortuus. Iste, prætor designatus (utrum admonitus, an tentatus, an, qua est iste sagacitate in his rebus, sine duce ullo, sine indice, pervenerit ad hanc improbitatem, nescio: vos tantum hominis audaciam amentiamque cognoscite), appellat heredem L. Annium, qui erat institutus secundum³ filiam (non enim mihi persuadetur, istum ab illo⁴ prius appellatum); dicit, se posse ei condonare edicto⁵ hereditatem; docet hominem, quid possit fieri⁶. Illi bona res, huic vendibilis videbatur. Iste, tametsi singulari est audacia, tamen ad pupillæ matrem submittebat⁷: malebat pecuniam accipere, ne quid novi ediceret, quam ut hoc edictum tam improbum et inhumanum interponeret. Tutores, pecuniam prætori si pupillæ nomine dedissent, grandem præsertim, quemadmodum in rationem⁸ inducerent, quemadmodum sine periculo suo dare possent, non videbant; simul et istum fore tam improbum non arbitrabantur: sæpe appellati, pernegaverunt. Iste ad arbitrium ejus, cui condonarat hereditatem ereptam liberis, quam æquum edictum scripserit, quæso, cognoscite: QUUM INTELLIGAM, LEGEM VOCONIAM. Quis umquam crederet, Verrem mulierum adversarium futurum? an ideo ali-

verissime: et infra de hoc testamento dicitur cap. 42: «eum jure, legibus, auctoritate omnium, quos consuluisset, testamentum fecisse». Vulgo «legis æquitas», quod parum aptum est, quum non hic agatur de una quadam lege. Grævius ex eodem grammatico edidit *puella*, quia nondum tutoris facta mentio est. Sed etiam mox *pupilla* cum *matre* conjungitur.

3. *Secundum*. Post filiam, si nempe illa sine liberis moreretur, secundus

hic heres, hereditatem adiisset. Franc. 1. habet «qui erat substitutus».

4. *Istum ab illo*. Non enim credo rem ab Annio Verri fuisse propositam.

5. *Condonare edicto*. Se scripturam in ejus gratiam edictum, quo hereditas hæc ad eum perveniret.

6. *Quid possit fieri*. Qua ratione id fieri possit; quid pro eo facere possit.

7. *Submittebat*. Clam mittebat.

8. *In rationem*. In librum rationum.

quid contra mulieres fecit, ne totum edictum ad Chelidonis arbitrium scriptum videretur? Cupiditati hominum ait se obviam ire. Quis⁹ potius, non modo his temporibus, sed etiam apud majores nostros? quis tam remotus fuit a cupiditate? Dic, quæso, cetera : delectat enim me hominis gravitas, scientia juris, auctoritas : QUI¹⁰ AB A. POSTUMIO, Q. FULVIO CENSORIBUS, POSTVE EA FECIT, FECERIT. Fecit, fecerit! Quis umquam edixit isto modo? quis umquam ejus rei fraudem aut periculum proposuit edicto, quæ neque post edictum, neque ante edictum provideri potuit?

XLII. Jure, legibus, auctoritate omnium, qui consulebantur, testamentum P. Annius fecerat, non improbum¹, non inofficiosum, non inhumanum : quod si ita fecisset; tamen post illius mortem nihil de testamento illius novi juris constitui oporteret. Voconia lex te videlicet delectabat? imitatus esses² ipsum illum Q. Voconium, qui lege sua hereditatem ademit nulli neque virgini, neque mulieri; sanxit in posterum, qui post eos censores census esset, ne quis heredem virginem, neve mulierem faceret. In lege Voconia non est, FECIT, FECERIT : neque in ulla præteritum tempus reprehendit.

9. Olim *quid*. Gulliel. ita distinguit : « Quis potius? non modo his temporibus, sed etiam apud majores nostros, quis tam remotus fuit a cupiditate? » J. V. L. — Sensus est : Quis potius quam Verres cupiditati hominum obviam iverit, non modo his, sed etiam prioribus temporibus, si vixisset?

10. *Qui*. Verba edicti Verrini. Qui a tempore quo A. Postumius et Q. Fulvius censores fuerunt, h. e. ab anno 579, qui annus, quinquennio fuit ante Voconiam legem, postve illud

tempus, in testamento mulierem heredem fecit, aut faciet, cassum faciam testamentum. In eo peccavit Verres, quod etiam in tempus præteritum edictum suum valere voluit, quum satis constet neque edictum, neque leges ipse vim habere in præteritum.

XLII. 1. *Improbum*. Contra leges. *Inofficiosum*. Contra rationem officii. *Inhumanum*. In quo amicorum mentio nulla facta est. — *Novi juris*. Neque enim posterioribus legibus testamentum rescindi potuit.

2. *Imitatus esses*. Imitari debuisses.

ditur, nisi ejus rei, quæ sua sponte³ scelerata ac nefaria est, ut, etiamsi lex non esset, magnopere vitanda fuerit. Atque in his rebus multa videmus ita sancta esse legibus, ut ante facta in iudicium non vocentur. Cornelia⁴ testamentaria, nummaria, ceteræ complures: in quibus non jus aliquod novum populo constituitur, sed sancitur, ut, quod semper malum facinus fuerit, ejus quæstio ad populum⁵ pertineat, ex certo tempore. De jure vero civili si quis novi quid instituit, is non⁶ omnia, quæ ante acta sunt, rata esse patietur? Cedo mihi leges Atinias, Furias⁷, ipsam, ut dixi, Voconiam, omnes præterea de jure civili; hoc reperies in omnibus statui jus, quo post eam legem populus utatur. Qui plurimum tribuunt edicto, prætoris edictum legem annuam dicunt esse. Tu edicto plus complecteris, quam lege. Si finem edicto prætoris afferunt kalendæ januarii; cur non initium quoque edicti nascitur a kalendis januarii? an in eum annum progredi nemo poterit edicto, quo prætor alius futurus est; in illum, quo alius prætor fuit, regredietur?

XLIII. Ac si hoc juris non unius causa hominis edixisses, cautius composuisses. Scribis, si quis heredem fecit, fecerit. Quid¹ si plus legarit, quam ad

3. *Sua sponte.* Ex naturali interpretatione.

4. *Cornelia*, test. J. V. L. — Sunt nominativi absoluti, quasi dicas, «cujus generis sunt, etc.» Has leges tulerat L. Corn. Sulla A. U. 673. Vid. Digest. XLVIII, 10.

5. *Ad populum.* I. e. publicum iudicium de eo habeatur. Quare non erat, quod Hotom. et Lambin. corrigendum putarent: «ad prætorem pertineat». In hujus enim generis criminibus, cuilibet e populo licebat ac-

cusare, ideoque recte dicuntur eorum quæstiones ad populum pertinere. Vid. Divin. in procem.

6. Abest non, et leg. patitur. Sequimur Prisc. et codd. Par. J. V. L.

7. Alii, «Furias, Fnsias». J. V. L. XLIII. 1. Olim quod. J. V. L. — In

hoc etiam peccat Verres, quod unum tantum caput legis Voconie in edictum suum transtulerit, neglecto altero, «ne plus cuiquam legaretur, quam ad legitimos heredes pervenire posset», quod caput omitti non oportuerat, si revera

heredem, heredesve perveniat, quod per legem Voconiam ei, qui census sit, non licet² cur hoc, quum in eodem genere sit, non caves? Quia non³ generis, sed hominis causam verbis amplecteris: ut facile appareat, te pretio esse commotum. Atque hoc si in posterum edixisses, minus esset nefarium; tamen esset improbum: sed tum vituperari posset, in dubium venire non posset; nemo enim committeret. Nunc est ejusmodi edictum, ut quivis intelligat, non populo esse scriptum, sed P. Annii secundis heredibus. Itaque quum a te caput⁴ illud tam multis verbis, mercenario procemio, esset ornatum; ecquis est inventus postea prætor, qui illud idem ediceret? non modo nemo edixit; sed ne metuit quidem quisquam, ne quis ediceret. Nam post te prætorem multi testamenta eodem modo fecerunt: in his nuper Annia. Ea de multorum propinquorum sententia, pecuniosa mulier, quod censa non erat, testamento fecit heredem filiam. Itaque hoc magnum judicium⁵ hominum de istius singulari improbitate, quod Verres sua sponte instituisset, id neminem metuisse, ne quis reperiretur, qui [istius institutum] sequi vellet. Solus enim tu inventus es, cui non satis fuerit corrigere voluntates vivorum, nisi etiam rescinderes mortuorum. Tu ipse⁶ ex Siciliensi

jus commune omnibus civibus institueretur. At Verres, quum in eo solo legem Voconiam sit sequutus, quod mulieribus adversabatur, et de legatis nihil edixerit, satis manifeste convincitur dedita opera et accepto pretio, edictum suum composuisse, ut ab Annii filia ad secundum heredem hereditatem transferret.

2. Sic nos post Lambinum, re, ut videtur, postulante; fere omnes alii,

«qui census non sit, licet?» J. V. L.

3. *Non generis.* Non generatim fere legem, sed L. Annium solum respicias.

4. *Caput illud.* Hic articulus edicti tui.

5. *Judicium.* Argumentum judicii, opinionis publicæ.

6. *Tu ipse.* Illud tu caput de hereditatibus, in edictum quod proposuisti in Sicilia prætor, callide non transtulisti, et tamen voluisti ex hoc tuo

edicto hoc sustulisti: voluisti, ex improvise si quæ res natæ essent, ex urbano edicto decernere. Quam postea tu tibi defensionem relinquebas, in ea maxime offendisti, quum tuam auctoritatem tute ipse edicto provinciali repudiabas.

XLIV. Atque ego non dubito, quin, ut mihi, cui filia¹ maxime cordi² est, sic unicuique vestrum, qui simili sensu, atque indulgentia filiarum commovemini, res hæc acerba videatur atque indigna. Quid enim natura nobis jucundius, quid carius esse voluit? quid est dignius, in quo omnis nostra diligentia indulgentiaque consumatur? Homo importunissime, cur tantam injuriam P. Annio mortuo fecisti? cur hunc dolorem cineri ejus atque ossibus inussisti, ut liberis ejus bona patria, voluntate patris, jure, legibus tradita, eriperes, et, cui tibi esset commodum, condonares? Quibuscum vivi bona nostra partimur, iis prætor adimere, nobis mortuis, bona fortunasque poterit? NEC PETITIONEM³, inquit, NEC POSSESSIONEM DABO. Eripies igitur pupillæ togam prætextam⁴? detrahes ornamenta non

urbano edicto decernere, si forte in Sicilia hoc tibi esset utilius; hac scilicet ratione ut ejus decreti, quum reprehenderetur, hanc defensionem tu tibi relinqueres, nempe in edicto illo tuo quod in urbe propositum fuerat, ita scriptum fuisse. Sed non animadvertebas tuam calliditatem contra te facere, et tuam a te ipsa auctoritatem repudiari; quum enim, si in provinciale edictum retulisses, postea dicere potuisses: urbanum decretum, in provincia sum sequutus; hanc tu tibi defensionem ademisti, et in provinciale edictum ideo transferre noluisse videris, quod tibi ipsi iniquum videretur.

XLIV. 1. *Filia*. Tulliola, quæ apud

Dolabellam ex partu decessit A. U. 708. Quantum eam dilexerit Cicero, declarat dolor, quem cepit ex illius interitu. Att. XII, XIII, pass.

2. *Cordi est, res hæc... indigna, sic... commovemini*. Q. e. Nimia forte indulgentia et hic, et in aliis locis, servamus illas ordinis mutationes ab Ernestio primum inventas; quæ si in controversiam atque adeo in damnationem vocentur, se defendant auctoritate clarissimi viri. J. V. L.

3. *Petitionem*. Actionem, qua a prætore postulatur ut jus concedat.

4. *Togam præt.* Feminæ, antequam nubarent, prætexta utebantur. Bene Ernestius monuit, erepto censu, eripi

solum fortunæ, sed etiam ingenuitatis? Miramur, ad arma contra istum hominem Lampsacenos isse? miramur istum de provincia decedentem clam Syracusis profugisse⁵? nos si alienam vicem pro nostra injuria doleremus, vestigium istius in foro non esset relictum. Pater dat filiæ : prohibes. Leges sinunt : tamen te interponis. De suis bonis ita dat, ut ab jure non abeat : quid habes, quod reprehendas? nihil, opinor. At ego concedo : prohibe, si potes; si habes, qui te audiat; si potest tibi dicto audiens esse quisquam. Eripias tu voluntatem mortuis, bona vivis, jus omnibus? Hoc populus romanus non manu vindicasset, nisi te huic tempori atque huic judicio reservasset?

Posteaquam⁶ jus prætorium constitutum est, semper hoc jure usi sumus : si tabulæ testamenti non proferrentur, tum, uti proximum quemque potissimum heredem esse oporteret⁷, ita secundum eum possessio daretur. Quare hoc sit æquissimum, facile est docere : sed in re tam usitata satis est ostendere, omnes antea jus ita dixisse, et hoc vetus edictum⁸ translatitiumque esse.

XLV. Cognoscite aliud hominis in re vetere¹ edictum novum; et simul, dum est unde jus civile discatur, adolescentes ei in disciplinam tradite : mirum est ho-

insignia; et ornamentum fortunæ esse bullam auream, ornamentum ingenuitatis togam prætextam. Cf. c. 58.

5. *Profugisse*. Hoc non memini me alibi legere.

6. *Posteaquam*. Ex quo jus illud, quod per prætorem exercetur, institutum est, ea fuit semper apud nos juris regula, ut cujus testamentum non appareret, ejus heres esset proximus agnatus, atque ei bonorum pos-

sessio a prætore daretur. Vide Instit. III, 2.

7. *Oporteret, si is intestato mortuus esset, ita s. Glossa. J.V. L.*

8. *Translatitium*. Hoc nomine appellabatur edictum, quod prætor ex superiorum prætorum edictis transtulerat in suum.

XLV. 1. *Vetere*. Quæ veteribus et pridem usitatis juris formulis dijudicanda erat.

minis ingenium, mira prudentia. Minucius quidam mortuus est ante istum prætorem : ejus testamentum erat nullum^a : lege hereditas ad gentem Minuciam veniebat. Si habuisset iste edictum, quod ante istum et postea omnes habuerunt, possessio Minuciæ genti esset data. Si quis testamento se heredem esse arbitraretur, quod tum non exstaret, lege ageret in hereditatem : aut, pro præde litis vindiciarum quum satis accepisset, sponsionem faceret ; ita de hereditate certaret. Hoc, opinor, jure et majores nostri, et nos semper usi sumus. Videte, ut hoc iste correxerit. Componit edictum iis verbis, ut quis intelligere possit, unius hominis causa conscriptum esse ; tantum quod

2. *Nullum.* Toto cælo errant h. l. commentatores ac gallicus interpres. Nec enim testamentum a Minucio omnino factum non esse, aut tunc temporis non proditiisse ait Tullius, sed illud quod scripserat jure nullam vim habuisse, ac nullum fuisse. Quæ quum ita essent, et ad hereditatem ab intestato Minucia gens esset vocanda, quonam modo res geri solerent describit Cicero : scilicet, quum parte alia heres testamentum valere, alia testatoris familia nullum esse contendat, inter heredem institutum et familiam de hereditate certatur. Duo hic possunt occurrere : 1° Aut heres testamento institutus bona defuncti non possedit, tunc heredes ab intestato in jus vocat, ut ipsi bona restituantur, *lege agit in hereditatem.* 2° Aut ea statim, extincto testatore occupavit, tunc ipsum restituendæ hereditatis causa heredes ab intestato in jus vocant. Ante omnia necesse est prætoram statuere uter, pendente lite, possessionem retinere debeat : quod quidem *lis vindiciarum* dicebatur. Qui

Interea possessionem retinere jussus fuerit, sponsionem adversario faciet *pro præde litis vindiciarum*, nempe adstipulatus se et rem et fructum restitutarum, si judicio victus decesserit. Gai. IV, § 16 et 91. Simulque satis accipiet ab illo, id est, satisfactionem, qua se obstringat petitor se, si petitione deiciatur, certam pecuniæ summam, damni causa, soluturum, quæ quingentis assibus constare solebat. Gai. ubi supra. Quid autem egerat Verres ? Iste quum supervacaneum omnino duxisset, utrum possessorem esse oporteret statuere, hoc edicto sanxerat ut qui possessor, lite incipiente, esset, possessionem, pendente lite, ad usque finem retineret, nec tamen sponsionem faceret. Si quis autem honestus ac diligens prætor exstisset, non ille quæsiasset, nter facto possideret, sed utrum jure possidere oporteret. Ita fit, concludit Cicero, ut, neutra parte possidente, neutri possessionem dare velis, quam cuilibet alieno libentius permittas. PONGELET.

hominem non nominat : causam quidem totam perscribit³; jus, consuetudinem, æquitatem, edicta omnium negligit. Ex EDICTO URBANO : SI DE HEREDITATE AMBIGITUR, SI POSSESSOR⁴, SPONSIONEM NON FACIET. Quid⁵ id ad prætorem, uter possessor sit? nonne id quæri oportet, utrum possessorem esse oporteat? Ergo quia possessor est, non moves possessione; si possessor non esset, non dares : nusquam enim scribis, neque tu aliud quicquam edicto amplecteris, nisi eam causam, pro qua pecuniam acceperas. Jam hoc ridiculum est: SI DE HEREDITATE AMBIGETUR, ET TABULÆ TESTAMENTI OBSIGNATÆ NON MINUS MULTIS SIGNIS, QUAM E⁶ LEGE OPORTET, AD ME PROFERENTUR; SECUNDUM TABULAS TESTAMENTI POTISSIMUM HEREDITATEM DABO. Hoc translaticium est: sequi illud oportet⁷, SI TABULÆ TESTAMENTI NON PROFERENTUR⁸. Quid ait? se ei daturum, qui se dicat heredem esse. Quid ergo interest, proferantur, necne? si protulerit; uno signo ut sit minus, quam ex lege oportet, non des possessionem : si omnino tabulas non proferet, dabis. Quid nunc dicam? neminem umquam postea alium edixisse⁹? valde sit mirum, neminem fuisse, qui istius se similem dici vellet. Ipse in Siciliensi edicto hoc non habet; exegerat enim jam mercedem : item ut illo¹⁰ edicto, de quo ante dixi,

3. *Perscribit*. Totam ejus causam, a quo pecunia corruptus est, in edicto complectitur.

4. *Possessor*. Subaud. *est*. Lambin. et Gruter. dant *et possessor*.

5. Vulgo *jam quid*. J. V. L.

6. *E lege XII tabularum*. Nam quoties *lex* simpliciter nominatur, leges XII tabularum fere intelliguntur. Porro leges illæ jubebant quinque testium signis obsignari testamenta. Posteriores prætores septem adhiberi

signa voluerunt. Instit. Justin. II, 10. — Alii, *oporteat*. J. V. L.

7. Ernest. conjicit *oportebat*. Frustra. J. V. L.

8. *Proferentur*. Subaud. *non dabo*. At *quid ait Verres?* ait *se ei*, etc.

9. Lambinus addit *ita*; Schütz, item ex ingenio, *sic*. Nihil vero requirere videtur, neque nunc, neque alias sæpissime, istas, quas dicunt, emendationes. J. V. L.

10. *Illo*. Anniano, de mulierum

in Sicilia de hereditatum possessionibus dandis edixit idem, quod omnes Romæ, præter istum. Ex EDICTO SICILIENSI: SI DE HEREDITATE AMBIGITUR.....

XLVI. At, per deos immortales, quid est, quod de hoc dici possit? Iterum enim jam quæro abs te, sicut modo in illo capite Anniano de mulierum hereditatibus, nunc in hoc de hereditatum possessionibus: cur ea capita in edictum provinciale transferre nolueris? Utrum digniores homines existimasti eos, qui habitabant in provincia, quam nos, qui æquo jure uteremur¹? an aliud Romæ æquum est, aliud in Sicilia? Non enim hoc potest hoc loco² dici, multa esse in provinciis aliter edicenda: non de hereditatum quidem possessionibus, non de mulierum hereditatibus. Nam³ utroque genere video non modo ceteros, sed te ipsum totidem verbis edixisse, quot verbis edici Romæ solet. Quæ Romæ magna cum infamia, pretio accepto, edixeras, ea sola te, ne gratis in provincia male audires, ex edicto Siciliensi sustulisse video. Et, quum edictum totum eorum arbitrato, quamdiu fuit designatus, componeret, qui ab isto jus ad utilitatem suam nundinarentur; tum vero in magistratu contra illud edictum suum sine ulla religione decernebat. Itaque L. Piso⁴ multos codices implevit earum rerum,

hereditatibus. Vide supra cap. 41-44.

XLVI. 1. Emendationem Hotomanni, *uterentur*, probat P. Manutius, itemque Ernestius. Vulgatam tamen lectionem Grævius defendit. J. V. L. — Hunc sequimur ob id, quia hoc verbum maluit Cicero, more veteribus familiari, respondere ultimis his verbis *quam nos*. Sic T. Liv. IX, 8: « nec quidquam ex ea, præterquam corpora nostra debentur ».

2. Edit. Gruteriana, « in loco ». J. V. L.

3. Lambinus addit *in*. J. V. L.

4. L. Piso. Alter prætor, qui jus dicebat inter peregrinos. — *Codices*. In quos acta magistratus sui referebat. Similiter in Cæsaris Commentariis, III, 20, M. Cœlii prætoris mentio fit, qui, si quis a C. Trebonio prætore urbano appellavisset, ei fore auxilio pollicebatur.

in quibus ita intercessit⁵, quod iste aliter, atque ut edixerat, decrevisset. Quod vos oblitos esse non arbitror, quæ multitudo⁶, qui ordo ad Pisonis sellam isto prætore solitus sit convenire : quem iste collegam nisi habuisset, lapidibus coopertus esset in foro. Sed eo leviores istius injuriæ videbantur, quod erat in æquitate prudentiaque Pisonis paratissimum perfugium, quo sine labore, sine molestia, sine impensa, etiam sine patrono homines uterentur. Nam, quæso, redite⁷ in memoriam, judices, quæ libido istius in jure dicundo fuerit, quæ varietas decretorum, quæ nundinatio, quam inanes domus eorum omnium, qui de jure civili consuli solent, quam plena atque referta Chelidonis : a qua muliere quum erat ad eum ventum, et in aurem ejus insusurratum, alias revocabat eos, inter quos jam decreverat, decretumque mutabat; alias inter alios contrarium sine ulla religione decernebat, ac proximis paullo ante decreverat. Hinc illi homines erant, qui etiam ridiculi⁸ inveniebantur ex dolore : quorum alii, ut audistis⁹, negabant mirandum esse, jus tam nequam¹⁰ esse verrinum : alii etiam frigidiores erant; sed, quia stomachabantur, ridiculi

5. *Intercessit*. Verris decreta rescidit. Etenim prætor prætori, consul consuli, et par denique omnis potestas pari, item ut superior inferiori, intercedebat. Cic. de Leg. III, 4. Cæs. de Bell. civ. III, 20.

6. *Multitudo*. Homines e plebe. — *Ordo*. Equester, aut generatim potius, hominum turba omnis, ac etiam nobilium.

7. Priscianus, p. 1154, ed. Putsch. *reducite*. J. V. L.

8. *Ridiculi*. Faceti ac risum moventes.

9. Cod. Ursini, « id quod sæpe au-

distis », quod Muretus probavit, et recepit Lambinus. J. V. L.

10. *Jus tam nequam*. His verbis et Verrina jurisdictio, et liquor ille insuavis, in quo Verrina caro decocta est, intelligi potest. Verris enim et hominis nomen, et porcus non exsectus. Auctor dial. de Orat. 23, hoc, quasi frigidius, dictum reprehendit, tamquam ex Cicerone sit. Æquior Ciceroni Quintilianus, qui VI, 3, Ciceronem excusat, quod in aliorum persona hoc dicatur. Et ipsa per se satis indicant quæ sequuntur, Ciceronem de his, ut frigidis, judicium tulisse.

videbantur esse, quum Sacerdotem exsecrabantur, qui verrem tam nequam reliquisset. Quæ ego non commemorarem (neque enim perfacete dicta, neque porro hac severitate digna sunt), nisi vos illud vellem recordari, istius nequitiam et iniquitatem tum in ore vulgi, atque in communibus proverbiiis esse versatam.

XLVII. In plebem vero romanam utrum superbiam prius memorem, an crudelitatem? Sine dubio crudelitas gravior est atque atrocior. Oblitosne igitur hos¹ putatis esse, quemadmodum sit iste solitus virgis plebem romanam concidere? quam rem etiam tribunus plebis² in concione egit, quum eum, quem virgis iste ceciderat, in prospectum³ populi romani produxit: cujus rei cognoscendæ faciam vobis suo⁴ tempore potestatem. Superbia vero qua fuerit, quis ignorat? quemadmodum⁵ is tenuissimum quemque contempserit, despexerit, liberum esse numquam duxerit? P. Trebonius viros bonos⁶ et honestos complures fecit heredes; in his fecit⁷ suum libertum. Is A. Trebonium fratrem habuerat proscriptum: ei quum cautum⁸ vellet, scripsit, ut heredes jurarent, se curaturos, ut ex sua cujusque parte ne minus dimidium ad A. Trebonium fratrem illum proscriptum perveniret. Libertus jurat. Ceteri heredes adeunt ad Verrem: docent, non

XLVII. 1. *Hos*. Populum, qui circum subsellia stabat.

2. *Tribunus plebis*. M. Lollius Pallianus.

3. Melius codd. quidam, « conspectum ». J. V. L.

4. *Suo tempore*. Quum de suppliciis agetur.

5. Gœrenz. ad Ciceronem de Finibus, V, 32, oratorem conjicit repetitione usum dixisse, « quis ignorat, quemadmodum is, etc. » J. V. L.

6. *Bonos*. Nimirum ex opinione Trebonii. Nam quæ sequuntur *bonos et honestos*, revera non fuisse declarant.

7. Multi deleri volunt *fecit*; Herellius mutat in *etiam*. J. V. L.

8. *Cautum*. Quum ei vitæ subsidia suppeditare, et id, quod relinquebat, providere vellet ut extra periculum poneretur; ntpote qui proscriptus cernendæ hereditati idoneus non esset.

oportere se jurare; facturos esse, quod contra legem Corneliam esset, quæ proscriptum juvari vetaret⁹. Impetrant, ut ne jurent : dat his possessionem. Id ego non reprehendo : etenim¹⁰ erat iniquum, homini proscripto, egenti, de fraternis bonis quidquam dari; at¹¹ ille libertus, nisi ex testamento patroni jurasset, scelus se facturum arbitrabatur. Itaque ei Verres possessionem hereditatis negat se daturum, ne posset patronum¹² suum proscriptum juvare; simul ut esset poena, quod alterius patroni testamento obtemperasset. Das possessionem ei, qui non juravit : concedo : prætorium est. Adimis tu ei, qui juravit : quo exemplo¹³? Proscriptum juvat. Lex est; poena est. Quid ad eum, qui jus dicit? Utrum reprehendis, quod patronum juvabat eum, qui tum in miseriis erat; an quod alterius patroni mortui voluntatem conservabat, a quo summum beneficium acceperat? Utrum horum reprehendis? Et hoc tum de sella vir optimus dixit : « Equiti romano, tam locupleti, libertinus¹⁴ sit homo « heres? » O modestum ordinem, quod illinc vivus surrexit ! Possum sexcenta decreta proferre, in quibus, ut ego¹⁵ pecuniam non dicam intercessisse, ipsa de-

9. Aliis placet, *juvari vetat*. Male.

10. *Etenim*. Ironia est vehemens.

11. Alii, *et. J. V. L.*

12. *Patronum*. Servus ille amborum Treboniorum fuerat, et ab utroque manumissus, utrumque habebat patronum.

13. *Quo exemplo*. Omni hereditatis parte dejectum libertum edicit Verres; quo autem jure? Nempe, ait Verres, quod sic jubet Cornelia lex de proscriptis. At poena est hac lege illata, respondet Cicero; et hujus rei cognitio non ad te civilem magistra-

tum pertinet, sed ad eos qui de publicis rebus judicant.

14. *Libertinus*. Invidiosa oratio Verri afficta. Nota *libertinos* eosdem esse ac *libertos*; sed ita ut *libertinus* absolute, *libertus* autem dicatur respectu ad dominum qui eum manumisit. V. g. Tiro libertus Ciceronis, etc. Libertinorum ordo, ut infra dicitur.

15. *Ut ego*. Etiamsi, quamvis ego te pecunia corruptum hac in re fuisse non dixerim, satis per se res ipsa loquitur, et edicti iniquitas ostendit.

cretorum novitas iniquitasque declarat. Verum, ut ex uno de ceteris conjecturam facere possitis; id quod priore actione cognostis, audite.

XLVIII. C. Sulpicius Olympus fuit. Is mortuus est C. Sacerdote prætore, nescio an ante, quam Verres præturam petere cœperit. Fecit heredem M. Octavium Ligurem. Ligur hereditatem adiit: possedit Sacerdote prætore, sine ulla controversia. Posteaquam Verres magistratum iniit; ex edicto istius, quod¹ edictum Sacerdos non habuerat, Sulpicii patroni filia sextam partem hereditatis ab Ligure petere cœpit. Ligur non aderat. L. frater ejus causam agebat: aderant amici, propinqui. Dicebat iste, nisi cum muliere decideretur, in possessionem se ire jussurum². L. Gellius causam Liguris defendebat: docebat, edictum ejus non oportere ad hereditates valere, quæ ante eum prætorem venissent; si hoc tum fuisset edictum, fortasse Ligur hereditatem aditurum non fuisse. Æqua postulatio, summa hominum auctoritas pretio superabatur. Venit Romam Ligur: non dubitabat, quin, si ipse Verrem convenisset, æquitate causæ et auctoritate sua commovere hominem posset: domum ad eum venit: rem demonstrat; quam pridem sibi hereditas venisset, docet; quod facile in causa æquissima homini ingenioso fuit, multa, quæ quemvis movere possent, dixit; ad extremum petere cœpit, ne usque eo suam auctoritatem despiceret, gratiamque contemneret, ut se tanta injuria afficeret. Homo Ligurem accusare cœpit, qui in re adventitia³ atque hereditaria

XLVIII. 1. *Quod edictum.* Quem articulum. — *Sulpicii*, etc. Filia ejus, qui Sulpicium manumiserat.

2. Grævius conjicit, « se jure misurum ». J. V. L. — *L. Gellius.* Qui

biennio ante consul fuerat, et hoc anno censuram gerebat. De eo vide Brut. cap. 47.

3. *Adventitia.* Non expectata, utpote quæ non veniret a propinquo.

tam diligens, tam attentus esset : debere eum aiebat suam quoque⁴ rationem ducere; multa sibi opus esse, multa canibus suis, quos circa se haberet. Non possum illa planius commemorare, quam ipsum Ligurem pro testimonio dicere audistis. Quid enim, Verres? utrum ne his quidem testibus crederetur? an hæc ad rem non pertinent? non M. Octavio? non L. Liguri? Quis nobis credet⁵? cui nos? quid est, Verres, quod planum fieri testibus possit, si hoc non fit? An id, quod dicunt, leve est? nihil levius, quam prætorem urbis hoc juris in suo magistratu constituere, omnibus iis, quibus hereditas venerit, coheredem prætorem esse oportere. An vero dubitamus, quo ore iste ceteros homines inferiore loco, auctoritate, ordine, quo ore homines rusticanos ex municipiis, quo denique ore, quos numquam liberos putavit, libertinos homines, solitus sit appellare⁶, qui ob jus dicendum M. Octavium Ligurem, hominem ornatissimum loco, ordine⁷, nomine, virtute, ingenio, copiis, poscere pecuniam non dubitarit?

XLIX. In sartis tectis vero quemadmodum sese gesserit, quid ego dicam? dixerunt, qui senserunt¹; sunt alii, qui dicant; notæ res ac manifestæ, prolatae sunt, et proferuntur. Dixit C. Fannius, eques romanus, frater² germanus Q. Titinii, iudicis tui, tibi se pecuniam

4. *Suam quoque.* Sui, scil. Verris, rationem habere. — *Canibus suis.* Asseculis suis. Sic sæpius orator ipse appellat, ob eam causam, quod prædam, canum more, odorari et investigare solerent. *Lambere tribunal Verris* dicuntur, Verr. III, 11.

5. *Quis nobis credet.* Subaud. si testibus, tantis viris, tam gravibus, non creditur?

6. *Appellare.* Ad tribunal suum citare.

7. *Ordine.* Senator erat M. Octavius Ligur.

XLIX. 1. *Senserunt.* Qui experti sunt ejus injurias.

2. *Frater.* Per adoptionem in Titiniam adscriptus gentem, ut placet Manutius; vel potius, ut multis exemplis constat, credendum eorum matrem

dedisse. Recita TESTIMONIUM C. FANNII. Nolite C. Fannio dicenti credere; noli, inquam, tu, Q. Titini, C. Fannio, fratri tuo, credere: dicit enim rem incredibilem; C. Verrem insimulat avaritiæ et audaciæ: quæ vitia videntur in quemvis potius, quam in istum convenire. Dixit Q. Tadius, homo familiarissimus patris istius, non alienus a matris ejus genere et nomine; tabulas protulit, quibus pecuniam se dedisse ostendit. Recita NOMINA³ Q. TADII. Recita TESTIMONIUM Q. TADII. Ne tabulis quidem Q. Tadii, nec testimonio credetur? Quid igitur in judiciis sequemur? quid est aliud, omnibus omnia peccata et maleficia concedere, nisi hoc, hominum honestissimorum testimoniis et virorum bonorum tabulis non credere? Nam quid ego⁴ de quotidiano sermone querimoniaque populi romani loquar? de istius impudentissimo furto, seu potius novo ac singulari latrocinio? ausum esse in æde Castoris, celeberrimo clarissimoque monumento, quod templum in oculis quotidianoque adspectu populi romani est positum, quo sæpenumero senatus convocatur, quo maximarum rerum frequentissimæ quotidie advocaciones⁵ fiunt; in eo loco, in sermone hominum, audaciæ suæ monumentum æternum relinquere?

L. Ædem Castoris, judices, P. Junius habuit tuendam, L. Sulla, Q. Metello consulibus¹. Is mortuus est: reliquit pupillum parvum filium. Quum L. Octavius,

Fannio ac Titinio nupsisse, unde illa in ejus filiis varia nomina.

3. *Nomina*. Capita, seu articulos tabularum Q. Tadii, in quibus mentio fit datæ Verri pecuniæ.

4. *Nam quid ego*. Transito ad narrationem de æde Castoris. Vovit eam bello Latino Postumius dictator; filius ejus dedicavit. T. Liv. II, 42. Metel-

lus Dalmaticus hostium spoliis auxit. Erat in foro ad radices Palatini montis.

5. *Advocationes*. Uti consulatur, convenientibus advocatis.

L. 1. *Alii, censoribus*. Quod falsum. Numquam enim una censores, consules vero fuerunt Sulla et Metellus A. U. 672. Verba sic transponit Sch. « ædem.....tuendam. Is mortuus est

C. Aurelius, consules², ædes sacras locavissent³, neque potuissent omnia sarta tecta exigere, neque ii prætores, quibus erat negotium datum, C. Sacerdos et M. Cæsius; factum est senatusconsultum, quibus⁴ de sartis tectis cognitum et iudicatum non esset, uti C. Verres, P. Cælius, prætores cognoscerent et iudicarent. Qua⁵ potestate iste permissa, ut ex C. Fannio et ex Q. Tadio cognovistis; verumtamen quum esset omnibus in rebus apertissime impudentissimeque prædatus, hoc voluit clarissimum relinquere indicium latrociniorum suorum; de quo non audire aliquando, sed videre quotidie possemus. Quæsivit, quis ædem Castoris sartam tectam deberet tradere. Junium ipsum mortuum esse sciebat: scire volebat, ad quem illa res pertineret. Audit pupillum esse filium. Homo, qui semper ita palam dictitasset, pupillos et pupillas certissimam prædam esse prætoribus, optatum negotium sibi in sinum⁶ delatum esse dicebat. Monumentum illa amplitudine, illo opere, quamvis sartum, tectum, integrumque esset, tamen aliquid se inventurum, in quo moliri prædarique posset, arbitrabatur. L. Rabonius ædem Castoris tradi oportebat⁷: is casu pupilli

L. Sulla, Q. Met. coss. » ob hanc causam, quod inf. cap. 5 dicitur Junius Castoris ædem tuendam redemisse a Marcio et Perperna censoribus, h. e. A. U. 667. Quod sublevabis, si *habuit* eodem sensu quo *habebat* intelligas, ita ut his consulibus, hoc munus adhuc obiret Junius.

2. *Consules.* Anno 678.

3. *Locavissent.* Tuendas nimirum et reficiendas. Censores enim, quorum erat locare redemptoribus, nulli tunc erant, ab anno 667.

4. *Quibus.* Ordo est: ut prætores Verres et P. Cælius cognoscerent

(gall. *visiter par experts*) et iudicarent de sartis tectis, de quibus cognitum non esset.

5. Ernest. verba sic transponenda esse putat, « Qua potestate iste permissa, quum esset... prædatus, ut... cognovistis, verumtamen hoc voluit, etc. » J. V. L.

6. *In sinum.* In crumenam. Sinus apud veteres erat cavum, inter rugas togæ in alterum humerum rejectæ, qui crumenæ vicem habebat. Vide Petron. 90. Tacit. Ann. VI, 40. Flor. II, 6.

7. *Oportebat.* Rabonius, Junio mor-

Junii tutor erat testamento patris; cum eo sine ullo intertrimento⁸ convenerat jam, quemadmodum traderetur. Iste ad se Rabonium vocat: quærit, ecquid sit, quod a pupillo traditum non sit, quod exigi debeat. Quum ille, id quod erat, diceret, facilem⁹ pupillo traditionem esse; signa et dona comparere omnia; ipsum templum omni opere esse integrum: indignum isti videri cœpit, ex tanta æde, tantoque opere, se non opimum præda, præsertim a pupillo, discedere.

II. Venit ipse in ædem Castoris; considerat templum; videt undique tectum pulcherrime laqueatum, præterea cetera nova atque integra. Versat se; quærit, quid agat. Dicit ei quidam ex illis canibus, quos iste Liguri dixerat esse circa se multos: Tu, Verres, hic quod moliare, nihil habes; nisi forte vis ad perpendiculum¹ columnas exigere. Homo omnium rerum imperitus, quærit, quid sit, ad perpendiculum. Dicunt ei, fere nullam esse columnam, quæ ad perpendiculum esse possit². Nam³ mehercule, inquit, sic agamus: columnæ ad perpendiculum exigantur. Rabonius, qui legem nosset⁴, qua in lege numerus tantum columnarum traditur, perpendiculi mentio fit nulla, et qui

tuo, Castoris ædem tuendam receperat, certis conditionibus sibi a tutoribus Junii pupilli traditam. Accidit vero ut idem Rabonius, cui ut redemptori, pupilli Junii nomine, ædes tuenda esset, simul pupilli tutor esset, testamento patris. Sic Schütz. Hoc autem in loco errant Ernestius et Menardus.

8. *Intertrimento*. Sine ullo alterius partis damno.

9. *Facilem*. Quandoquidem nihil deerat in opere.

II. 1. *Perpendiculum*. Linea est

I. *Cic. pars secunda*.

recta, laterum æqualitatem a summo ad imum latitudine probans. ASCON. — *Exigere*. Explorare an columnæ rectæ sint, neque in hanc aut illam partem inclinent.

2. Herelius mallet, «exigi possit». J. V. L.

3. Alii, *jam*. Vitiose, ut probant codd. et latini sermonis consuetudo.

4. *Legem nosset*. H. e. legem censoriam, contractum locationis, secundum quem Junius olim ædem Castoris tuendam redemerat, qui contractus ad Rabonium transibat.

non putaret sibi expedit, ita accipere, ne⁵ eodem modo reddendum esset : negat, id sibi deberi⁶; negat oportere exigi. Iste Rabonius quiescere jubet; et simul ei nonnullam spem societatis⁷ ostendit: hominem modestum⁸, et minime pertinacem, facile coercet: columnas ita se exacturum esse confirmat. Nova res, atque improvisa pupilli calamitas nuntiatur statim C. Mustio, vitrico pupilli, qui nuper est mortuus; M. Junio, patruo; P. Potitio, tutori, homini frugalissimo. Hi rem ad virum primarium, summo officio ac virtute præditum, M. Marcellum, qui erat pupilli tutor, deferunt. Venit ad Verrem M. Marcellus: petit ab eo, pro sua fide⁹ ac diligentia, pluribus verbis, ne per summam injuriam pupillum Junium fortunis patriis conetur evertere. Iste, qui jam spe et opinione prædam illam devorasset, neque ulla æquitate orationis, neque auctoritate M. Marcelli, commotus est. Itaque, quemadmodum ostendisset, se id exacturum esse, respondit. Quum sibi omnes ad istum allegationes¹⁰ difficiles, omnes aditus arduos, ac potius interclusos viderent, apud quem non jus, non æquitas, non misericordia, non propinqui oratio, non amici voluntas, non cujusquam auctoritas, pro pretio¹¹, non gratia

5. *Ne eodem modo.* Quia Rabonio videbatur sumptuosius fieri, si columnæ ad perpendicularum exigendæ essent. Nolebat ædem hac conditione accipere, quia si in posterum alius existeret hujus negotii redemptor, verebatur ne impensæ sibi augerentur, si ei columnas ad perpendicularum factas tradere oporteret.

6. *Id sibi deberi.* Negat hoc debere pupillum Junii, ut, in tradenda sibi æde, columnæ ad perpendicularum essent.

7. *Societatis.* Communitatis rapinæ, et prædæ.

8. *Modestum.* Ironia in Rabonium, qui prædæ cupiditate ab officio descivit.

9. *Pro sua fide.* Ut fidelis tutor et probus vir.

10. *Omnes ad istum allegationes.* Privatas legationes amicorum, aut hominum auctoritate præstantium, qui cum a tanta admittenda injuria deterrent.

11. *Pro pretio.* Præ pecunia.

valeret : statuunt, id sibi optimum esse factu, quod cuivis venisset in mentem, petere auxilium a Chelidone, quæ isto prætore non modo in jure civili, privatorumque omnium controversiis, populo romano præfuit, verum etiam in his sartis tectis¹² dominata est.

LII. Venit ad Chelidonem C. Mustius, eques romanus, publicanus, homo cum primis honestus : venit M. Junius, patruus pueri, frugalissimus homo et castissimus : venit homo summo honore, pudore¹ et summo officio spectatissimus ordinis sui, P. Potitius tutor. O multis acerbam, o miseram, atque indignam præturam tuam ! Ut mittam cetera, quo tandem pudore tales viros, quo dolore, meretricis domum venisse arbitramini ? qui nulla conditione istam turpitudinem subissent, nisi officii necessitudinisque ratio coegisset. Veniunt, ut dico, ad Chelidonem. Domus erat plena : nova jura, nova decreta, nova judicia petebantur. « Mihi det possessionem : mihi ne adimat : « in me judicium ne det : mihi bona addicat. » Alii nummos numerabant ; alii tabulas² obsignabant : domus erat non meretricio conventu, sed prætoria turba referta. Simul ac potestas primum data est, adeunt hi, quos dixi : loquitur Mustius, rem demonstrat, petit auxilium, pecuniam pollicetur. Respondit illa, ut meretrix, non inhumane³ : libenter, ait, se esse facturam, et se cum isto diligenter sermocinaturam ; reverti jubet. Tum discedunt ; postridie revertuntur : negat illa posse hominem exorari ; permagnam eum dicere ex illa re pecuniam confici posse.

12. Asconius, « sartis tectisque ». J. V. L.

LII. 1. Alii, et pudore. J. V. L.

2. Tabulas. In quibus scribebant se Verri pecuniam ad certam diem so-

luturos ; easque annulis suis, de more, obsignabant.

3. Priscianus, p. 1010, ed. Putsch. « non inhumaniter ». J. V. L. — Verum nihil hic mutandum.

LIII. Vereor, ne quis forte de populo, qui priori actione non affuit, hæc, quia propter insignem turpitudinem sunt incredibilia, fingi a me arbitretur. Ea vos antea, judices, cognovistis. Dixit juratus P. Potitius, tutor pupilli Junii: dixit M. Junius tutor et patruus: Mustius dixisset, si viveret; sed pro Mustio, recenti re de Mustio auditum¹ dixit L. Domitius. Qui quum sciret, me ex Mustio vivo audisse, quod eo sum usus plurimum (etenim id iudicium, quod prope omnium fortunarum suarum C. Mustius habuit, me uno defendente vicit), quum hoc, ut dico, sciret L. Domitius, me scire, ad eum res omnes Mustium solitum esse deferre; tamen de Chelidone reticuit, quoad potuit: alio responsionem suam derivavit. Tantis in adolescente clarissimo ac principe juventutis² pudor fuit, ut aliquandiu, quum a me premeretur, omnia potius responderet, quam Chelidone nominaret. Primo necessarios istius ad eum³ allegatos esse dicebat, deinde aliquando coactus Chelidone nominavit. Non te pudet, Verres, ejus mulieris arbitratu gessisse præturam, quam L. Domitius ab se nominari, vix sibi honestum esse arbitrabatur?

LIV. Rejecti a Chelidone, capiunt consilium necessarium, ut suscipiant ipsi negotium: cum Rabonio tutore¹, quod erat vix H-S quadraginta² millium, transigunt H-S ducentis millibus. Refert ad istum rem

LIII. 1. *Auditum*. Nam apud antiquos etiam de auditione testimonium dicebatur. Vide pro Rosc. Com. cap. 14. — L. Domitius. Ahenobarbus, qui postea consul fuit A. U. 699.

2. *Principe juventutis*. Quæ laus attribui solet adolescentibus nobilissimis, qui ætate excluderentur a capessendis magistratibus.

3. *Ad eum*. Ad Verrem, qui agerent cum eo de re transigenda.

LIV. 1. *Tutore*. Emphasis in hoc verbo, quasi dicat cum eo homine, cui maxime pro pupillo erat pugnandum.

2. *H-S quadraginta*. Circ. 8,200 f. Et paulo infra, « H-S ducentis millibus », circ. 41,000 f.

Rabonius : ut sibi videatur³, satis grandem⁴ pecuniam, et satis impudentem esse. Iste, qui aliquanto plus cogitasset, male accipit verbis Rabonium; negat eum sibi illa decisione satisfacere posse; ne multa, locaturum⁵ se esse confirmat. Tutores hæc nesciunt; quod actum erat cum Rabonio, putant id esse certissimum; nullam majorem pupillo metuunt calamitatem. Iste vero non procrastinat : locare⁶ incipit, non proscripta neque edicta die, alienissimo tempore, ludis ipsis romanis, foro ornato. Itaque renuntiat⁷ Rabonius illam decisionem tutoribus. Accurrunt tamen ad tempus tutores : digitum tollit⁸ Junius patruus : isti color immutatus est; vultus, oratio, mens denique excidit. Quid ageret, cœpit cogitare : si opus pupillo redimeretur, si res abiret ab eo mancipe⁹, quem ipse apposuisset, sibi nullam prædam esse. Itaque excogitat : quid? nihil ingeniose; nihil, quod quisquam possit dicere, improbe, verum callide¹⁰; nihil ab isto tectum, nihil veteratorum expectaveritis : omnia aperta, omnia perspicua reperientur, impudentia, amentia, audacia. Si pupillo opus redimitur, mihi præda de manibus eripitur : quod est igitur remedium? quod? ne liceat pupillo redimere. Ubi illa¹¹ consuetudo in bonis

3. *Videatur*. Schütz probat Ernest. emendationem *videbatur*. J. V. L.

4. *Satis grandem*. Hoc a persona Rabonii dicitur; et Cicero addit ex sua parte « satis impudentem ».

5. *Locaturum*. Alicui, qui majori pretio redimeret.

6. *Locare*. Auctionem fieri jubet, non ante declarata die libello palam affixo. — Loco *edicta*, Lambin. legit *prodicta*. J. V. L.

7. *Renuntiat*. Irritam declarat priorem a se cum ipsis factam decisionem.

8. *Digitum tollit*. Mos erat in auctionibus, ut qui liceri contra aliquem vellet, id sublato digito significaret.

9. *Mancipe*. Eo, qui aliquid faciendum redemerat (gall. *adjudicataire*).

10. Hotomanni auctoritas invexerat passim, « vel callide ». Multo præstat vetus lectio. Codd. suffragantur. J. V. L.

11. *Ubi illa*. Cur hic non observatur consuetudo, quam observare solent consules, etc. quam bona vendunt eorum, qui, locatis publicis

prædibus¹², prædiisque vendundis, omnium consulum, censorum, prætorum, quæstorum denique, ut optima conditione sit is, cuja res sit, cujum periculum? Excludit eum solum, cui prope dicam soli potestatem factam esse oportebat. Quid enim quisquam ad meam pecuniam¹³, me invito, adspirat? quid accedit? Locatur opus id, quod ex mea pecunia reficiatur: ego me refecturum esse dico: probatio futura est tua, qui locas: prædibus et prædiis populo cautum est. Et, si¹⁴ non putas cautum, scilicet tu prætor in mea bona, quos voles, immittes? me ad meas fortunas defendendas accedere non sines?

LV. Operæ pretium est, ipsam legem cognoscere: dicetis, eundem conscripsisse, qui illud edictum de hereditate: **LEX OPERI¹ FACIUNDO QUÆ PUPILLI² JUNII...**

operibus, locationis obligationi non responderunt? Curare solent ut optima conditione sit, i. e. ut iis, quæ redimenti tribuantur, commodis maxime utatur, ille ipse cujus res est, i. e. cujus bona sunt ea quæ venduntur, et qui periculo suo, opus faciendum redemit. At Verres excludit eum, etc.

12. *Bonis pr.* Ernest. verbum *bonis* glossam habet quod paullo post, et apud alios, ut Liv. XXII, 60, semper tantum *prædibus prædiisque* dicitur. Schütz *bonis* substantive accipit et distinguit: « bonis, prædibus pr. » Ceterum vox *bonis* adjectiva est, et pertinet tam ad *prædes* quam ad *prædia*, cum quibus conjuncta sæpe legitur: « boni-prædes, bona-prædia, hono-prædia ». *Prædes* non pro fidejussoribus tantum accipitur, sed etiam pro bonorum illa parte quæ moveri loco potest (gall. *les biens meubles*); quæ fidejussor oppignerabat reip. cum prædiis, seu rebus soli (gall. *les immeubles*). *Prædes*

vendere est bona eorum, quibus se publico obligarunt, si opus redemptum, vel sarta tecta rationi publicæ non responderint, vendere.

13. *Ad meam pecuniam.* Ad eam locationem, quæ solvenda erit mea pecunia, si mancipem ad alium perveniat. Hæ sunt pupilli querimonie. — *Quid accedit.* Subaud. ad hastam, ad auctionem.

14. *Et, si.* Et tu, si satis cautum non putas, poteris aliorum licitationes admittere in opere, quod ego mea pecunia soluturus sum, atque ita immittes in mea bona, etc.

LV. 1. *Olim ex opere.* Optime emendavit Ant. Augustinus. J. V. L.

2. Ant. Augustinus hic conjiciebat, « PUPILLI JUNII. Quæ? dic, etc. » Manutius vero et Victorius, « Quæ? PUPILLI JUNII », MSS nihil adjuvant. J. V. L. — Sed nihil mutandum, quum nesciamus quid in ea lege sequeretur, et ad sequentia aliqua vocem quæ referri æquum sit credere.

Dic, dic, quæso, clarius. C. VERRES PR. URBIS ADDIDIT³. Corriguntur leges censoriæ. Quid enim⁴? video in multis veteribus legibus : CN. DOMITIUS, L. METELLUS, L. CASSIUS, CN. SERVILIUS, CENSORES ADDIDERUNT : vult aliquid ejusmodi C. Verres. Dic : quid addidit? QUI DE⁵ L. MARCIO, M. PERPERNA, CENSORIBUS REDEMERIT, EUM SOCIUM NE ADMITTITO; NEVE EI PARTEM DATO, NEVE EI REDIMITO. Quid ita⁶? ne vitiosum opus fieret? at erat probatio tua : ne parum locuples esset? at erat, et esset amplius, si velles, populo cautum prædibus et prædiis. Hic te si res ipsa, si indignitas injuriæ tuæ non commovebat; si pupilli calamitas, propinquorum lacrymæ, D. Bruti, cujus prædia subierunt⁷ periculum, M. Marcelli tutoris auctoritas apud te ponderis nihil habebat : ne illud quidem animadvertebas, ejusmodi fore hoc peccatum tuum, quod tu neque negare posses (in tabulas enim retulisti), nec cum defensione aliqua confiteri? Addicitur id opus H-S⁸ *DLX* millibus; quum tutores H-S *LXXX* millibus id opus ad illius hominis iniquissimi arbitrium se effecturos esse clamarent. Etenim quid erat operis? id, quod vos vidistis : omnes illæ columnæ, quas dealbatas videtis, machina⁹ apposita, nulla impensa dejectæ, eisdemque

3. *Addidit.* Legi, qua locata fuerat P. Junio patri ædes Castoris.

4. *Quid enim.* Subaud. Verri non liceat, quod multis ante illum licuit? Video enim in multis, etc. — Alii habent, « Quid enim video », vel etiam, « Quod enim ». J. V. L.

5. *Qui de.* Qui ab his temporibus retro ad annum 667, quo L. Marcius et M. Perperna censores fuerunt, opud aliquod publicum redemerit, non poterit admitti socius in locatione facienda, neque pars ei dari poterit. Manifeste in pupillum,

quem non obscure excludit Verres.

6. *Quid ita.* Subaud. addidisti. An timebas, ne pupillus impensæ parceret, etc. Tuum erat illud inspicere; et ipsi bona, ad fidem faciendam, reip. obligaverant, et multo etiam plura, si necesse fuisset, obligavissent.

7. Hotomannus, Asconii exemplo, *subierant.* J. V. L. — Sponponderat Brutus pro P. Junio.

8. *H-S DLX*, etc. (114,800 fr.— *H-S LXXX* (16,400 fr.)

9. *Machina.* Qua pondera attoluntur, vel demittuntur.

lapidibus repositæ sunt : hoc tu H-S 12LX millibus locavisti. Atqui in illis columnis dico esse, quæ a tuo redemptore commotæ non sint ; dico esse, ex qua tantum tectorium vetus delitum¹⁰ sit, et novum inductum. Quod si tanta pecunia columnas dealbari putassem, certe numquam ædilitatem¹¹ petivissem.

LVI. At, ut videatur tamen res agi¹, et non eripi pupillo : SI QUID OPERIS CAUSA RESCIDERIS, REFICITO. Quid erat, quod rescinderet, quum suo quemque loco lapidem reponeret? QUI REDEMERIT², SATISDET DAMNI INFECTI EI, QUI A VETERE REDEMPTORE ACCEPERIT. Deridet, quum sibi ipsum jubet satisfacere Rabonium. PECUNIA PRÆSENS SOLVATUR. Quibus de bonis? ejus, qui, quod tu H-S 12LX millibus locasti, H-S LXXX millibus effecturum se esse clamavit. Quibus de bonis? pupilli, cujus ætatem et solitudinem, etiamsi tutores non essent, defendere prætor debuit. Tutoribus defendentibus, non modo patrias ejus fortunas, sed etiam bona tutorum ademisti. Hoc³ OPUS BONUM SUO CUIQUE FACITO. Lapis aliquis cædendus, et apportandus fuit

10. *Delitum*. Retinendum recte putat Hot. Cod. Palat. sec. *deletum* ; prim. *delectum* ; unde Gruterus suspicatur *dejectum*, ut laudatur Prisciano, XVIII, p. 1151. J. V. L.

11. *Ædilitatem*. Ut ne tanto reip. sumptu, curante me, opera publica sarcirentur. *Ædificiorum publicorum* cura ad ædiles pertinebat.

LVI. 1. *Agī*. Jure fieri.

2. *Qui redemerit*. Novus redemptor satisfacere se damnum, si quod accidat, ei præstiturum qui a vetere redemptore accepit. *Damnum infectum* illud est, quod nondum factum est, sed quod faciendum veremur. Videntur hic tres induci personæ, quum

tamen duæ sint. Vetus enim redemptor est pupillus Junius ; qui ab eo accepit, est Rabonius, cui jam, ante novam Verris locationem, ædem Castoris tradi oportebat cap. 50. Qui autem nunc redemit, seu novus manceps a Verre appositus est idem Rabonius ; ridiculum igitur erat, quod illa formula Verres Rabonium sibi ipsi ipsum satisfacere jubebat.

3. Quædam edd. «Hoc opus bono suo quoque facito», ex arbitratu, ut videtur, Hotomanni, sed contra vulgarem MSSorum lectionem, citatamque Asconio. J. V. L. — Sensus est : Bonum facito ex materia, quæ cuique convenit.—*Suo*. I. e. eo, quod

machina sua⁴ : nam illo non saxum, non materies ad-
 vecta est. Tantum operis in ista locatione fuit, quantum
 paucæ operæ fabrorum mercedis tulerunt, et manus
 pretium⁵ machinæ. Utrum existimatis minus operis
 esse, unam columnam efficere ab integro novam nullo
 lapide redivivo⁶, an quatuor illas reponere? nemo du-
 bitat, quin multo majus sit novam facere. Ostendam,
 in ædibus privatis, longa difficilique vectura, columnas
 singulas ad impluvium, H-S quadragenis⁷ millibus,
 non minus magnas, locatas. Sed ineptum est de tam
 perspicua istius impudentia pluribus verbis disputare,
 præsertim quum iste aperte tota lege omnium sermo-
 nem atque existimationem contempserit, qui etiam
 ad extremum adscripserit, REDIVIVA SIBI HABETO : quasi
 quidquam redivivi ex opere illo tolleretur, ac non to-
 tum opus ex redivivis constitueretur. At enim⁸ si pu-
 pillo redimi non licebat, non necesse erat rem ad ipsum
 pervenire : poterat aliquis ad id negotium de populo
 accedere. Omnes exclusi sunt non minus aperte, quam
 pupillus : diem præstituit operi faciundo, kalendas
 decembres; locat circiter idus septembres; angustiiis
 temporis excluduntur omnes.

proprium est cuique materiæ, ut bona
 sit. Omnes materiæ in se habeant,
 quod requiritur, ut bonæ et probæ
 sint.

4. *Machina sua.* Has voces delet
 Schütz. Temere. Totum Rabonii opus
 in eo fuit, ut cæderentur lapides ali-
 quot, et in suum locum attollerentur
machina sua, i. e. convenienti. Illo
 enim saxa majora nulla advecta sunt.
 Itaque sumptus duntaxat factus est in
 perpaucas fabrorum operas et in ma-
 nus pretium machinæ.

5. Desjard. ex Ascon. « manu-pre-
 tium ». Sch. « manupretii ».

6. *Redivivo.* Vetere et de integro
 cæso. Sic infra *rediviva* veteres ma-
 teriæ.

7. *H-S quadragenis*, etc. Hoc est,
 circ. 8,200 fr.

8. *At enim.* Sed, inquit Verris de-
 fensor, quamvis Verris lege pupillus
 redimere non posset, non ideo necesse
 locationem ad Verrem ipsum, h. e. ad
 hominem a Verre subornatum redi-
 re; et poterat quivis alius e populo
 ad redimendum hoc opus accedere.
 Respondet Cicero, non ita; nam om-
 nes non manifeste minus, definiti tem-
 poris brevitate sunt exclusi.

LVII. Quid ergo? Rabonius istam diem quomodo assequitur¹? Nemo Rabonio molestus est, neque kalendis² decembribus, neque nonis, neque idibus; denique aliquanto in provinciam iste proficiscitur prius, quam opus effectum est. Posteaquam reus factus est, primo negabat³ opus in acceptum referre posse: quum instaret Rabonius, in me causam conferebat, quod tum codicem obsignassem. Petit⁴ a me Rabonius, et amicos allegat: facile impetrat: iste, quid ageret, nesciebat. Si in acceptum non retulisset, putabat se aliquid defensionis⁵ habiturum. Rabonium porro intelligebat rem totam esse patefacturum: tametsi, quid poterat esse apertius, quam nunc est, ut uno⁶ minus teste haberet Rabonio? Opus in acceptum retulit quadriennio post, quam diem operi dixerat. Hac conditione⁷, si quis de populo redemptor accessisset, non

LVII. 1. *Quomodo assequitur.* I. e. quomodo potuit, exiguo illo tempore præfinito, opus illud efficere.

2. *Kalendis.* Kalendæ, nonæ, idus h. l. nominantur, quia omnia, in quibus dies sint præstituti, facta sint ad rationem pecuniæ sub usuris collocatæ, quæ si kalendis non solveretur, prorogabatur solutio ad nonas, et inde ad idus, quæ erat ultima dies. Sic quum dies operi faciendo præstituta esset kal. decemb. tamen neque hoc die, neque nonis, neque idibus hoc opus a Rabonio exigebatur.

3. *Negabat.* Nempe Rabonio, qui sibi cautum vellet de pecunia ei tradita, quam Verres ex isto de locatione luorificerat, omninoque de opere recte effecto.

4. *Petit.* Ut sibi codicis faciam potestatem.

5. *Alii, defensionum.* J. V. L. — Nempe dicturus erat Verres, adeo

nullum apposui redemptorem, ut, post diem præstitutum operi, non a Rabonio acceperim opus, nec in acceptum retulerim. At parte alia intelligebat, etc.

6. *Uno minus.* Ut omnes, detracto uno Rabonio, testes in se haberet. — Pro *haberet*, Lambinus mallet *haberem*, probat Desjard. et recepit Schütz.

7. *Hac conditione.* Si quis alius, quam Rabonius, hoc opus redemisset, non obtinisset a prætore tam laxum tempus, i. e. quadriennium; sed nemo accessit, ut redimeret; 1° quia alios deterruit brevis temporis. 2° Quia alii noluerunt venire in Verris arbitrium (mense decembri, quo opus exisset, præturam adhuc urbanam gerentis) a quo mire fuissent vexati, eo quod existimasset prædam sibi fuisse ereptam a redemptore, qui alius esset ac Rabonius, ideoque illud opus acer-

esset usus : quum die ceteros redemptores exclusisset, tum in ejus arbitrium ac potestatem venire nolebant, qui sibi ereptam prædam arbitraretur. Nam quid argumentamur, quo ista pecunia pervenerit? fecit ipse indicium. Primum quum vehementius cum eo D. Brutus contenderet, qui de sua pecunia H-S⁸ DLX millia numeravit; quod jam⁹ iste ferre non poterat, opere addicto, prædibus acceptis, de H-S DLX millibus, remisit D. Bruto H-S cx millia. Hoc, si¹⁰ aliena res esset, certe facere non potuisset. Deinde nummi numerati sunt Cornificio : quem scribam suum fuisse negare non potest. Postremo ipsius Rabonii tabulæ prædam illam istius fuisse clamant : recita NOMINA¹¹ RABONII.

LVIII. Hic etiam priore actione Q. Hortensius pupillum Junium venisse prætextatum in vestrum conspectum, et¹ stetisse cum patruo testimonium dicente, questus est; et me populariter agere, atque invidiam commovere, quod puerum² producerem, clamavit. Quid erat, Hortensi, tandem in illo puero popolare? quid invidiosum? Gracchi, credo, aut Saturnini, aut aliqujus hominis ejusmodi produxeram filium, ut nomine

bissime exacturus fuisset. Mire in h. l. laborat Schütz, sicque interjectis vocibus scribit «accessisset, nemo non esset usus; nunc quum die». Verba «non esset usus», quæ sunt apud Priscian. et in uno cod. Paris. in aliis vero omissa adjecerunt Lamb. Græv. Ern. Paulo post *nolebat* dedit Aldus. Ascon. *volebat*.

8. Alii, «H-S XL». J. V. L.

9. *Quod jam*. Quia diutius iste tantam Bruti contentionem de summa minuenda ferre non poterat, etc.

10. *Hoc, si*. Si aliena res fuisset,

non potuisset de illa summa, quæ redemptori, pupilli Junii nomine, debebatur, aliquid remittere.

11. *Nomina*. Articulos, quos habet Rabonius in suis tabulis.

LVIII. 1. *Olim et testes secum p*. Optime correxit *Henri de Mesmes*. Amplectimur. J. V. L.

2. *Puerum producerem*. Mos erat antiquis oratoribus, ipsorum quos defenderent, pueros infantes producere coram judicibus. Vide Quintil. IV, 1; VI, 1, etc. — *Populare*. Quod populi iras in senatum commoveret.

ipso, et memoria patris, animos imperitæ multitudinis concitarem. P. Junii erat, hominis de plebe romana, filius : quem pater moriens tum tutoribus et propinquis, tum legibus, tum æquitati magistratuum, tum judiciis vestris commendandum putavit. Hic istius scelerata locatione, nefarioque latrocinio, bonis patriis fortunisque omnibus spoliatus, venit in iudicium : si nihil aliud, saltem, ut eum, cujus opera ipse multos annos est in sordibus, paullo tamen obsoletius³ vestitum videret. Itaque tibi, Hortensi, non illius ætas, sed causa; non vestitus, sed fortuna, popularis videbatur; neque te tam commovebat, quod ille cum toga prætexta, quam quod sine bulla venerat : vestitus enim neminem commovebat is, quem illi mos, et jus ingenuitatis dabat; quod ornamentum pueritiæ pater dederat, indicium atque insigne fortunæ⁴, hoc ab isto prædone ereptum esse, graviter et acerbe homines ferebant. Neque erant hæ lacrymæ populares magis, quam nostræ, quam tuæ, Q. Hortensi, quam horum, qui sententiam laturi sunt : ideo, quod communis est causa, commune periculum; communi præsidio talis improbitas, tamquam aliquod incendium, restinguenda est. Habemus enim liberos parvos : incertum est, quam longa nostrum cujusque vita futura sit : consulere vivi ac prospicere debemus, ut illorum solitudo et pueritia quam firmissimo præsidio munita sit. Quis est enim, qui tueri possit liberum nostrorum pueritiam contra improbitatem magistratuum? Mater, credo. Scilicet magno præsidio fuit Annix pupillæ mater, femina

3. *Obsoletius*. Quum in sordibus ac miseria sit Junii filius, voluit Verrem quoque, reorum de more, sordidatum in iudicio videre.

4. *Ins. fortunæ*. Qui enim non erant ingenui, eorum tantum cum nodo sine bulla gestabant. Vide sup. cap. 44, in not.

primaria : minus, illa deos hominesque implorante, iste infanti pupillæ fortunæ patrias ademit. Tutoresne defenderent? perfacile vero apud istiusmodi prætorem, a quo M. Marcelli tutoris, in causa pupilli Junii, et oratio, et voluntas, et auctoritas repudiata est.

LIX. Quærimus etiam, quid iste in ultima Phrygia, quid in extremis Pamphylæ partibus fecerit? qualis in bello prædonum prædo ipse fuerit? qui in foro populi romani pirata nefarius reperiatur. Dubitamus, quid iste in hostium præda molitus sit, qui manubias sibi tantas ex L. Metelli manubiis¹ fecerit? qui majore pecunia quatuor columnas dealbandas, quam ille omnes ædificandas locaverit? Exspectamus², quid dicant ex Sicilia testes : quis umquam templum illud adspexit, quin avaritiæ tuæ, quin injuriæ, quin audaciæ testis esset? Quis a signo Vertumni³ in circum maximum venit, quin is in unoquoque gradu de avaritia tua commoneretur? quam tu viam thensarum⁴ atque pompæ ejusmodi⁵ exegisti, ut tu ipse illa ire non audeas. Te putet quisquam, quum ab Italia freto disjunctus esses, sociis temperasse? qui ædem Castoris, testem furtorum tuorum esse volueris; quam populus

LIX. 1. *Ex L. Met. manubiis.* Ex Castoris æde, quam de hostium manubiis L. Metellus amplificavit.

2. Vulgo *exspectemus.* Quod jam Schütz recte mutaverat ex Herelii conjectura. Fecimus et nos, sic interponendo, ut nunc vides. J. V. L.

3. *Vertumni.* Mercaturæ dei, cujus signum in vico Tusco fuisse dicitur. Hac iter erat senatorum, qui toga palmata insignes, deos, honoris atque officii causa, prosequerentur e Capitolio in circum maximum; in quo ludi magni, seu Romani, celebrabantur. Vide Tertull. de Cor. Mil. c. 13.

4. *Thensarum.* Sacri erant currus, in quibus deorum collocata simulacra gestabantur. Usus ab diis ad Julium Cæsarem primo, deinde ad alios imperatores adulatio transtulit. Vide Sueton. in Jul. cap. 76. Pompæ circensis descriptionem sane longam leges apud Dionys. Halicarn. VII, sub finem.

5. *Ejusmodi.* Adverbialiter pro sic. — *Exigere viam* (subaud. *munientem*) dicuntur iis quibus ea est procuratio ut vias ornari, et parietes ædium pannis intensis obvelari jubent. Conf. Macrobian. Saturn. I, 6.

romanus quotidie, iudices etiam tum, quum de te sententiam ferrent, viderent?

LX. Atque etiam iudicium in prætura publicum¹ exercuit: non enim prætereundum est ne id quidem. Petita multa est apud istum prætorem a Q. Opimio: qui adductus est in iudicium, verbo, quod, quum esset tribunus plebis, intercessisset² contra legem Corneliam; re³, quod in tribunatu dixisset contra alicujus⁴ hominis nobilis voluntatem. De quo iudicio si velim dicere omnia, multi appellandi lædendique sint⁵; quod mihi non est necesse. Tantum dicam, paucos homines, ut levissime dicam, arrogantes, hoc adjutore, Q. Opimium per ludum et jocum fortunis omnibus evertisse. Is mihi etiam queritur, quod a nobis, ix solis diebus, prima actio sui iudicii transacta sit: quum apud ipsum tribus horis Q. Opimius, senator populi romani, bona, fortunas, ornamenta⁶ omnia amiserit? cujus propter indignitatem iudicii, sæpissime est actum in senatu, ut genus hoc totum multarum ac iudiciorum ejusmodi tolleretur. Jam vero in bonis Q. Opimii vendendis, quas iste prædas, quam aperte, quam improbe fecerit, longum est dicere. Hoc dico: nisi vobis

LX. 1. *Publicum*. Quamvis publica iudicia ad prætorem urbanum non pertinerent, tamen quum de irrogata multa pecuniaria ageretur, iudicium illud non capitale ab urbano prætore poterat exerceri. FERRAT.

2. Vulgo *intercessit*. J. V. L. — Sullæ lege anno 673 lata vetabantur ii, qui magistratus plebis fuerant, alia postea munera gerere. Contra tulit C. Aurelius Cotta consul A. U. 678; quam legem Aureliam Q. Opimius, tribunus plebis, suasit. Quam ob causam, anno sequenti, in iudicium vocatus apud C. Verrem, majestatis

causam dicere coactus est; atque, instantibus nobilibus aliquot, publicatis bonis damnatus.

3. *Re ante quod* primum reperi in edit. Lambin. 1576; quod sane abesse non potest. Sic et edidit Aldus nepos. Ernest. J. V. L. — Idem conj. *dixit* aut *dixerat*. J. V. L.

4. *Alicujus*. Catulum significat, Sullanæ factionis tunc principem.

5. Alii, *sunt*. — *Paucos*. Catulum, Curionem, Hortensium, homines e Sullanis partibus, eosdem hac in causa Ciceroni adversarios.

6. *Ornamenta*. Senatoria. Amisso

id hominum honestissimorum tabulis planum fecero, fingi a me hoc totum temporis causa putatote. Jam qui ex calamitate senatoris populi romani, quum prætor judicio ejus præfuisset, spolia domum suam referre, et manubias detrahare conatus est; is ullam ab sese calamitatem poterit deprecari?

LXI. Nam de subsortitione illa Juniana¹ judicium nihil dico. Quid enim? contra tabulas, quas tu protulisti, audeam dicere? difficile² est. Non enim me tua solum, et judicium auctoritas, sed etiam annulus aureus scribæ tui deterret. Non dicam id, quod probare difficile est: hoc dicam, quod ostendam, multos ex te viros primarios audisse, quum diceres, ignosci tibi oportere, quod falsum codicem protuleris; nam, qua invidia C. Junius conflagrarat, ea, nisi providisses, tibi ipsi tum pereundum fuisse. Hoc modo iste sibi et salutis suæ prospicere didicit, referendo in tabulas et privatas et publicas, quod gestum non esset; tollendo, quod esset, et semper aliquid demendo, mutando, curando³, ne litura appareret, interpolando. Eo enim usque progreditur, ut ne defensionem quidem male-

enim senatorio censu, ordinem retinere non poterat.

LXI. 1. *Subsortit. Juniana.* C. Junius, Oppianici quæstioni quum præesset judex, alios ab iis judicibus, quos subsortitus erat, supposuisse fuit insimulatus ac damnatus. Scilicet suppositi fuerant judices, sed inscio Junio, ab ipso Verre, qui ut Junio majorem conflaret invidiam, codicem etiam suum, in quo descripta erant judicium nomina, annulo non solum suo, sed etiam scribæ sui obsignatum, interlitum nefarie protulit, quasi eum Junius adulterasset. Itaque Junius, licet innocentissimus, judicii corrupti

nomine, tamquam auctor corruptionis quæ tota Verris erat, damnatus est. Vid. pro Cluent. cap. 33 sqq.

2. *Difficile est.* Ironia. — *Annulus.* De quo vid. Verr. III, 80.

3. *Curando n. l. appareret.* Non habet Nonius Marcellus v. *in templo*, I, 145, 15. Glossam credunt Lamb. Desj. Beck. delevit Schütz. Servavimus cum J. V. L. eo quod congesta illa verba ac repetita magis singularem Verris curam demonstrant, nec videntur abundare. — Translatum a fullonibus, qui, poliendo vetera quæque diligenter, quasi in novam speciem mutant.

ficiorum suorum sine aliis maleficiis reperire possit⁴. Eiusdem modi sortitionem⁵ homo amentissimus suorum quoque iudicum fore putavit per sodalem suum, Q. Curtium, iudicem quaestionis: cui nisi ego vi populi, et hominum clamore atque convicio restitsem; ex hac decuria⁶ nostra, cujus mihi copiam quam largissime factam oportebat, erepta esset facultas eorum, quos⁷, ubi iste annuerat, in suum consilium sine causa subsortiebatur.

Multa desunt.

4. Nonnulli codd. *posset*. J. V. L.

5. Ascon. *subsortitionem*. Putavit Verres fore ut Curtius, sodalis suus, iudex quaestionis, in locum eorum iudicum, quos subsortitus erat, alios ex Verris voluntate supponeret, qui eum absolverent. Apparet ex iis quae sequuntur, Curtium a Cicerone fuisse rejectum iudicem, cum convicio populi circumstantis. Sic Ascon. et Desj. Frustra, ut videtur. Optime contra explicat Schütz. Curtius ille tum aliam quamdam e quaestionibus perpetuis exercebat; et suum habebat consilium, in quod ut Verris sodalis utilitatibus inserviret, multos ex ea decuria, ex qua Cicero quam plurimos volebat iudices causae Verrinae habere, praeter necessitatem subsortiebatur, ideoque eorum facultatem Ciceroni eripere volebat, i. e. impedire ne in consilio Glabronis, qui iudicio de Verre praerat, adesse possent.

6. *Decuria*. Tabula erat in qua iudi-

cum nomina scribebantur, seu classis iudicum. Tunc in illam soli referebantur senatores. Sed hoc ipso anno legem promulgavit L. Cornelius Cotta praetor, qua judicia inter senatores, et equites, et e plebe tribunos aërii communicarentur; quae lex, quum ageretur Verris causa, tantum promulgata, nondum lata erat, nec ullam adeo vim habebat. Non autem ad omnia judicia ex omnibus decuriis, quae Ciceronis aetate tres fuerant, legebantur iudices; sed una aut altera decuria hoc illo tempore erat immunis. Vid. pro Cluent. 37. Apparet quoque ex h. l. aliam alia fuisse honestiorem. Vid. Ind. Verb.

7. Vulgo «quos iste annuerat». Hotom. «cum iis, quos i. a.» Lamb. «quum eos, quibus i. a.» Rescripait Schütz, «quos, ubi iste, scil. Verres, annuerat». Quem cum J. V. L. sumus sequuti, ne manca et imperfecta sententia relinqueretur.

EXCURSUS

DE PRÆTORE URBANO.

PRÆTORIS nomen ejusdem ferme cum Urbe est antiquitatis. Veteres Latini omnem magistratum, cui pareret exercitus, a præundo, prætorem appellaverunt. Varro de Ling. Lat. IV. Itaque consules, penes quos summum belli pacisque imperium erat, initio prætores dicebantur. Idem apud Nonium. Hinc ducis tabernaculum prætorium; et in castris porta, quæ ad prætorium spectabat, prætoria appellabatur.

Postea vero quum sæpe bellis avocarentur, nec esset in urbe qui jus diceret, peculiaris magistratus ei rei institutus est, qui assidue jus in Urbe diceret, et proprio nomine prætor appellaretur. Initio unus creatus est, qui rebus judicandis sufficiebat; dictus collega consulum, quod iisdem auspiciis crearetur. T. Liv. VII, 1. A. Gell. XIII, 14. Pigh. ad annum 387.

Quum vero crescenti negotiorum moli deinceps prætor unus non sufficeret, huic collega adjunctus est, circa annum 510: ita ut illi veteri jurisdictio inter cives solos relinqueretur, et ob eam rem prætor urbanus vocaretur; hic vero novus quoniam peregrinorum, quorum multitudo major in dies in Urbem confluebat, causas cognosceret, peregrinus nominaretur. Quæ distinctio nominum ultra reipublicæ tempora duravit. Liv. Epit. 19. Pigh. ibid. Honoratiorem peregrina urbanam fuisse præturam constat tum ex Appian. Bell. Civ. II, tum ex eo, 1º quod prætori peregrino civium causas cognoscere non liceret, nisi hi cum peregrinis liti-garent; 2º quod apud eum lege non ageretur; 3º quod ex edicto, quod prætor urbanus in albo proponebat de quibus rebus suo anno jus esset dicturus, jus dicere deberet;

4^o quod ex jure gentium, hoc est, communi omnium hominum, ei causas judicare liceret, prætor vero urbanus jus civile, id est, proprium civibus romanis, semper applicare deberet: ceteroquin par erat utriusque potestas; adeo ut prætor peregrinus rescindere, et abolere aliquando posset, quod urbanus constituerat. Exempla suggerunt, Cic. lib. I in Verr. cap. 46. Cæsar, de Bello Civ. lib. III, cap. 20.

Remansit duorum prætorum numerus quamdiu in Italia imperium populi romani se continuit. Verum Sicilia atque Sardinia in provinciarum formam redactis anno 526, prætorum numerus ampliatus est, ut essent quatuor. Liv. Epit. 20. Causam cur duplicaretur hanc subjicit Pomponius, de Orig. juris, ut nempe essent qui in captas nuper Sardiniam et Siciliam insulas rectores quotannis mitterentur. Crescente provinciarum numero, et latius patescente imperio, creati sunt sex prætores anno 556 (Liv. XXXII, cap. 27): ut subacta Hispania, et in duas provincias distributa, citeriorem nimirum et ulteriorem, duos etiam prætores haberet.

L. Sulla dictator factus anno 672, duobus adjectis, instituit ut octo prætores quotannis crearentur. Victor prælio Pharsalico Cæsar decem creari voluit; deinde quatuordecim; postea sexdecim. Cæsare occiso ad veterem octonarium numerum prætores rediere. Pigh. ibid.

Initio, prætorium munus annuo spatio continebatur. At circa annum Urbis 609, in annum sequentem prorogari cœpit, duabus de causis, 1^o Africa, Achaia, et Asia nuper subactis, provinciæ plures quam antea, fuerunt regendæ; 2^o criminibus ex divitiis et otio inter cives quam maxime in dies invalescentibus, publica de iis, et assidua judicia instituere, et tribunalia in Urbe plura erigere necessarium fuit. Quapropter institutum est ut sex prætores omnes integro sui magistratus anno deinceps in Urbe juris dicendi causa manerent: e quibus duo urbanam et peregrinam jurisdictionem de more obirent, et causas civiles cognoscerent; reliqui quatuor publicas criminum capitalium quæstiones

seu causas criminales, de repetundis, de ambitu, de majestate, de peculatu, vel quovis alio crimine exercerent (1): tum demum finito anno, et exacta urbana jurisdictione, sex illi ad provincias, quas sorte obtinuissent, administrandas in annum alterum proficiscerentur. Pigh. Annal. tom. II, pag. 467.

Iisdem temporibus nova jurisdictionis forma adducta est, et quæstiones factæ sunt perpetuæ: institutum est enim ut quæstiones (sic appellantur, quasi quæsitiones, judicia publica quibus inquiritur de jure, aut facto) singulæ, v. gr. de repetundis, de majestate, etc. non jam ut olim huic, aut illi prætori ad arbitrium senatus mandarentur, sed proprium deinceps haberent tribunal, et prætori peculiari in singulos annos assignarentur.

Quæstionum perpetuarum exordium repetitur ab anno Urbis circiter 609, ad quem annum vide tamen Pigh.

Prætoris urbani munus erat ut jus inter cives diceret; viduas pupillosque defenderet; ludos solemnes, et sacra quædam faceret; sarta tecta, vacante censura, exigeret; senatum absentibus consulibus rogaret; comitia et conciones haberet. Pigh. ad annum 387.

Jurisdictio prætorum spectabat, ut jam dixi, ad judicia tam privata, quam publica. De his infra ad finem volum.

Judicia privata pertinebant ad privatas controversias, et ad jus omne Quiritium tuendum. Ea prætor urbanus tractabat. Ejus jurisdictionis erant partes, non ut ipse judicaret, hoc perquam dubium est an prætor umquam de causa cognosceret (vide Excursum supra citatum); sed ut alterum judicare juberet, et tum judices judiciumve, aut actionem dedisse dicebatur.

Prætores certis insignibus ornati, certo in loco, certis diebus, et certis horis jus dixerunt.

Sedenti prætori ad jurisdictionem adstabant lictores duo :

(1) Vide ad calcem hujus volum. Excurs. de publicis judiciis.

ad pedes erant scribæ et accensi; illi, ut in tabulas actiones referrent; hi, ut litigatores citarent: lictorum usus erat, ut coercerent, aut summoherent. Ejus lateribus assidebant viri prudentes decem, quinque senatores, et quinque equites, quos in consilium adhibebat nec sorte, nec arbitrio suo; sed certi erant et perpetui, «decem viri litibus judicandis appellati». Rævard. Protrib. cap. 18.

Prætoris judicantis insignia erant, præter ministros, prætexta, sella curulis, hasta et gladius.

Prætexta, toga fuit cum limbo purpureo prætexto, quam kalendis januariis in Capitolio, votis solemnibus nuncupatis, sumebant una cum ceteris insignibus; quod eis commune quoque cum consulibus fuit. Sella curulis, fuit sella eburnea, qua in publico et privato loco, sedendi causa, utebantur. Hasta et gladius prætoris fuerunt insigne; illa, ad jurisdictionem, quod ex eo apparet, quia censores quoque hasta posita vectigalia publica locaverunt: hic, ad imperium, sive ad quæstionem significandam. Sigon. de Jud. lib. I, cap. 7.

Prætores urbani magistratum ineuntes (habita concione, et jurati in leges. Cic. de Fin. II, 74) edictum, seu formulam juris dicendi proponebant in albo, hoc est, in tabula, seu charta expansa (Ulpian. Digest. II, 1, 7) tribunali prætoris affigi solita, ut inde populus intelligeret quod jus prætor anno suo dicturus esset de causis ad suam jurisdictionem pertinentibus; utpote de testamentis (Cic. Verr. I, 45), de hereditatibus, quarum petitio et possessio a prætore postulâri solebant (ibid. c. 44): de pecuniis creditis, emancipationibus, tutelis, vindiciis, manumissionibus, possessionibus, limitibus, et aliis quæ privato Quiritium jure continentur. Etenim non ita scribi potuerant leges, ut omnes, qui accidere possint, casus complecterentur. Varii sæpe emergebant, qui aut nimia antiquarum legum severitate obruebantur, aut nulla lege cavebantur, aut denique in quibus nisi aliquid detraheretur, aut suppleretur legi,

pugnasset hæc cum æquitate. Hanc cum legibus antiquis in concordiam adducere, munus erat prætorum, et hoc est prætoris edictum Ciceroni toties memoratum in Verrinis, et alibi.

Ex eo more, veluti æquitatis totius origine, omnia ea fluxerunt edicta quorum interpretatione utuntur hodie jurisconsulti. Ne vero quis existimet scripta illa fuisse pro libidine prætoris; in eis constituendis observabantur ea præcipue quæ more majorum constituta essent, id est, ex legibus romanis, et ex superiorum prætorum edictis; unde translaticia appellabantur. Itaque Verres, cui pro lege fuit libido, eam ob causam a Cicerone perstringitur non semel, quod multa edixisset, quæ nemo superiorum prætorum edixerat.

Pro Verre tamen contra Ciceronis accusationem pugnat Hotomannus, *Observ. lib. I, cap. 1 et 2*, atque istum purgare velle, sed frustra, videtur.

Edictum prætoris perpetuum appellabatur, quia toto anno præturæ perpetua erat regula a qua recedere in jure dicendo prætori non licebat, ex senatusconsulto anni 585. Neque eo minus tamen edicta sua mutaverunt prætores, atque deinceps eo anno, quod magistratum gesserunt, jus aliud, quam quod polliciti erant, dixerunt; quo nomine Verrem Cicero passim exagitat, uti *v. gr. lib. I, cap. 46, et pass.* Quam ob causam C. Cornelius tribunus plebis anno 686 legem, etsi nemo aperte repugnaret, multis tamen invitis, tulit, ut prætores ex edictis suis perpetuis jus dicerent. Quæ res tum gratiam ambitiosis prætoribus, qui varie jus dicere assueverant, sustulit. *Ascon. p. 123, et Liv. Suppl. XCIX, 44, tom. X, pag. 380 nostræ editionis.*

Edictum prætoris in eum annum tantum valebat, quo prætor erat is, qui illud proposuerat. Hinc appellatur a Cicerone «lex annua», *lib. I in Verr. cap. 42*: at prætoris ipsius tribunal aram legum magnifico titulo idem appellat, *lib. II, cap. 3.*

Locus, in quo jus dicebatur, fuit duplex; aut superior, aut planus. Superior, fuit tribunal in comitio; atque in tribunali, sella curulis. Planus, quicumque locus præter tribunal, posita sella curuli. Is locus tum dicebatur jus. Imo ex jurisconsultis; jus, est locus ubicumque prætor salva majestate imperii sui, salvoque more majorum, jus dicere constituit, etiamsi domi, vel in itinere hoc agat. In plano jus ergo reddebatur quolibet loco; sed hoc accipiendum de causis, quæ faciles erant; quæ enim cognitionem solemnem requirebant, eas pro tribunali expediri necesse erat. Ulpian. lib. IX, D. de Off. proc.

Tota prætoris jurisdictio his tribus verbis fuit inclusa, DO, DICO, ADDICO. Sed quolibet die pronuntiari, atque ideo singulis diebus jurisdictio exerceri non poterat. Dierum hæc fuit ratio. Eorum alii fasti; alii nefasti; alii interdicti vocati sunt. Fasti dies fuere, quibus prætori licebat fari tria verba «do, dico, addico»; hisque erant contrarii nefasti. Intercisis diebus, quibusdam horis fas erat, quibusdam fas non erat. Macrob. Saturn. I, cap. 16.

Diximus tribus hisce verbis inclusam fuisse prætoris jurisdictionem, quia necesse est, inquit Varro, ut aliquo horum trium verborum, quum quid lege peragitur. Nam dicit prætor quum v. gr. aliquem aut liberum esse decernit, aut interdicat. Addicit in mancipatione, adoptione, etc. dat bonorum possessionem, vindicias, actionem, etc. Sigon. ibid. Juri dicendo vacabatur ab hora tertia romana, ad vespem. Illud testatur Martialis his verbis: «Exercet raucos tertia causidicos». Lib. IV, epigr. 8. Hoc autem ex lege Plætoria. «M. Plætorius tribunus plebis scitum tulit, in quo scriptum est, prætor urbanus qui nunc est, quique post hac fuat, duos lictores apud se habeto; isque usque ad supremum jus inter cives dicito». Censorin. de Die Nat. cap. 24.

DESJARD. EX REGENSIONE PONCELET.

M. TULLII CICERONIS
IN C. VERREM
ACTIONIS SECUNDÆ
LIBER SECUNDUS
DE JURISDICTIONE SICILIENSI

ARGUMENTUM,

In libro secundo jam venit orator ad causam, et ad ea crimina quæ Verres in Sicilia commisit: ac primum de pecunia agit ob jus dicendum exacta, et venali Verris jurisdictione, eumque ostendit et hac in re magnam contra leges pecuniam coegisse. Nec tamen tota in hoc argumento versatur oratio. Nam inde a cap. 48 de pecunia aliis rationibus expressa agitur; ob munera et honores venditos usque ad cap. 57: statuarum nomine usque ad cap. 78.

Antequam vero de Sicilia incommodis dicit orator, magnifica præludit hujus provinciæ laudatione quam ex dignitate, vetustate, utilitate commendat; ut et apud judices Siculi plus auctoritatis habeant in sua causa, et ipse orator majorem faciat attentionem in tota contentione. Ostendit eam primam Romanorum provinciam, rei frumentariæ subsidium, et classibus romanis receptaculum fuisse; qua sublata non tam facile opes Carthaginis concidissent. Itaque ei a Scipione Africano et Marcello magnum esse honorem habitum; eamque non solum rei publicæ cellam penariam, sed etiam italico bello pro ærario fuisse, cap. 2. Præterea multos in ea cives romanos cum quæstu negotiari; incolas ipsos patientia, virtute et frugalitate excellere; romanos homines hic diligi; ac sæpe magistratuum romanorum injurias patienter toleratas; donec tandem Verris luxuria, crudelitate, avaritia, superbia coacti sint, ejus scelera persequi, et Ciceronem, ut eum accusaret, rogaverint, 3. Magnis tamen opibus, magna cupiditate reum absentem contra inquisitionem accusatoris esse defensum, multisque modis Sículos, ne decernerent legationes, qui contra istum dicerent, tentatos esse, 4. Unam tamen esse civitatem Mamertinam (Messanam urbem), quæ publice legatos, qui Verrem laudarent, miserit; ceteris omnibus, ipsis quoque Syracusanis, eum summo odio esse, 5. Neque vero Sículos solos eum persequi, plurimos etiam cives romanos, gravibus ab eo injuriis affectos, existimare, juris, libertatis, rerum fortunarumque suarum salutem in ejus damnatione consistere, 6. Jam inde demonstratur Verrem, antequam

in Siciliam proficisceretur, cogitasse, quibusnam rebus in ea provincia maximam uno anno pecuniam facere posset, ac non modo genera furandi, sed etiam nomina quæsisvisse. Cujus avaritiæ primum exemplum affertur hoc, quod Dioni Halesino, cujus filio a propinquo homine hereditas venerat, H-S undecies (circ. 225, 500 f.) eripuerit, 7. Alterum quod Dioni cuidam Siculo, cui permagna venisset hereditas, ea lege ut statuas in foro poneret, nisi posuisset, Veneri Erycinæ esset mulctatus; illam hereditatem eripuit, etsi statuæ positæ essent ex testamento, 8. Tertium quod Sosippum et Epicratem fratres Agyrinenses fere tota hereditate paterna Veneris nomine spoliavit, 9. Inanem vero esse rei defensionem, si quis dicat ad Verrem pecuniam istam non pervenisse, aut a comitibus suis et asseclis acceptam esse, 10. Rectores enim provinciarum non solum se ipsos abstinentes, sed etiam comites suos præstare debere, 11.

Sequitur locus de ipsa jurisdictione Siciliensi. In quo primum omnino docetur quantam sibi potestatem Verres arrogaverit, et quomodo omnia Siculorum jura perverterit, 12, 13. Deinde sequuntur exempla, I. Herachio Hieronis filio Syracusano magna hereditas venerat testamento propinqui sui Heraclii. In eo testamento erat scriptum, ut statuas in palæstra deberet ponere. Affines quidam ejus monent Verrem, fieri posse, ut palæstritæ negent statuas ex testamento esse positas, et petant hereditatem, quod eam palæstræ commissam esse dicant. Quod consilium Verres quum approbasset, non solum ex lege Rupilia iudices Heraclio non dedit, sed etiam per summam injuriam hereditatem illam palæstritis adjudicavit, magna prædæ parte ipse potitus, imo etiam Heraclium patriis bonis omnibus exturbavit, 14-20. II. Sequuntur injuriæ in senatum populumque Syracusanum, quum non solum urbem, ædes sacras, curiamque spoliaverit, sed etiam Marcellea (diem festum Marcello sacrum), sustulerit, et ut Verrea agerent eos coegerit, 21. III. Epicratem Bidinum cui hereditas a propinqua muliere venerat, non modo ea privavit, sed etiam quum ille Rhegium profectus esset, quasi fraudandi causa discessisset, omnibus bonis exuit, eaque Bidinis tradidit, magnam eorum partem ipse lucratus, 22-25. L. Metellus, qui Verri successit, simul ac Syracusas venit, statim quidem injurias Heraclio et Epicrati factas rescidit, eisque

bona, quæ restitui possent, restituit. Attamen quum Cicero in Siciliam venisset, repente mutatus est, dixitque se omnia Ver-
ris causa velle, nec Epicrati et Heraclio permisit ut Romam ad
testimonium dicendum abirent, 26. IV. Heraclio Centuripino, a
quo H-S C millia (20,500 fr.) per calumniam malitiamque petita
erant, CCC millia (61,500 fr.) extorquenda curavit, 27.

Jam accedit orator ad rerum capitalium quæstiones. Ex his
I. narratur causa Sopatri Halicyensis, quem hominem, inno-
centem, a C. Sacerdote absolutum, indicta causa condemnavit,
28-33. II. Deinde Sthenii Thermitani, cui iratus, quod sibi
quum monumenta urbis patriæ tollere vellet, fortiter restitisset,
hospitium renuntiavit, eumque, quum pericula confictorum
criminum vitaturus Romam profugisset, absentem sine crimine,
sine teste, sine accusatore damnavit, 34-47.

Sequuntur Verres crimina ex aliis generibus. A multis ob jus
dicendum pecunias accepit, 48. Honores vendidit, et senator-
ium nomen ac locum, 49, 50. Magistratus curationes et sacer-
dotia, 51-56. Magnam pecuniam a civitatibus statuarum quas
sibi collocandas imperabat, nomine exegit, et eam non in hos
usus servatam in loculos demisit, 57. Quamquam, si quis sta-
tuarum honore ducatur, tamen nec domum avertere pecu-
niam liceat, 58. Et ipsarum statuarum modis quidam ha-
bendus sit, 59. Denique ab invitis exigi statuas non oporteat.
Quæ in tria peccavit Verres, quod et omnium Siculorum testi-
monium et novo eorum postulati genere comprobatur, 60.
Verrem enim statuas ab invitis aratoribus, 60-62. Et ab invi-
tis civitatibus Siciliæ exegisse demonstratur, 63-65. Quod fru-
stra Verres defendit, quasi a volentibus ei sint erectæ, quum
iidem vix a provincia abeuntis statuas omnes uno consensu
everterint, 66-69. Neque vero Verrem hac ratione se excusare
posse ostenditur, quod nimio publicæ utilitatis studio peccarit,
et ideo in Siciliæ odium sit adductus, quia frumentum severe
exigeret. Si enim publicanis gratiosus fuit, illa causa est quod in
furtis cum eis collusit: illudque ex familiaritate et conjunctione
Verres cum Carpinatio quodam probatur, qui prædarum istius
socius, isti omni modo favere cœpit, eumque Romæ apud pu-
blicos commendare. Unde ejus rei falsa species Carpinatii
fraude sit effecta. Ultimo loco docetur Verrem portorium haud

solvisse pro multis rebus, quas Syracusis exportaverit; et quamquam literas societatis publicanorum, quibus hæ fraudes continerentur, amovendas curaverit, Cicero tamen ejus criminis ex duobus libellis inventis et publicanorum tabulis reum convincit, 71-79.

Peroratio brevis est et tota in vehementi Verris insectatione consumitur, qui omnibus vitiis obrutus, ne ullam quidem virtutis umbram in accusatione afferre possit; et in invidiosa veterum patronorum laudatione, qui non ad eas causas accedebant, unde in ipsos infamia redundaret, ac Hortensii comparatione, quem pretio ad tantam subeundam ignominiam inductum non obscure ostendit orator.

M. T. CICERONIS ORATIONES.

IN C. VERREM ACTIO SECUNDA. LIBER SECUNDUS.

DE JURISDICTIONE SICILIENSI.

ORATIO SEPTIMA.

1. **M**ULTA mihi necessario, iudices, prætermittenda sunt¹, ut possim aliquando de iis rebus, quæ meæ fidei commissæ sunt, dicere. Recepi enim causam Siciliæ; ea me ad hoc negotium provincia attraxit. Ego tamen, hoc onere suscepto, et recepta causa Siciliensi, amplexus animo sum aliquanto amplius: suscepi enim causam totius ordinis²; suscepi causam populi romani; quod putabam tum denique recte judicari posse, si non modo reus improbus adduceretur, sed etiam di-

1. 1. *Prætermittenda sunt.* Ex flagitiis quæ Verres commisit ante præturam Siciliensem.—Post «aliquando» multi addunt «aliquo modo»; plures delevere. J. V. L. — Non immerito: quis enim credat Tullio tam ingratam repetitionem umquam placuisse.

2. *Ordinis.* Senatorii, qui tunc iudiciorum infamia laborabat, et apud omnes in invidia erat. — *Populi romani.* Qui veterem iudiciorum vim ac severitatem requirebat, et, hoc damnato reo, in gratiam cum senatu reditus erat.

ligens et firmus accusator³ ad iudicium veniret. Quo mihi maturius ad Siciliæ causam veniendum est, relictis ceteris ejus furtis ac flagitiis, ut et viribus quam integerrimis agere, et ad dicendum temporis satis⁴ habere possim.

Atque adeo⁵, antequam de incommodis Siciliæ dico, pauca mihi videntur esse de provinciæ dignitate, vetustate, utilitate dicenda. Nam quum omnium sociorum provinciarumque rationem diligenter habere debetis, tum præcipue Siciliæ, iudices, plurimis justissimisque de causis: primum, quod omnium nationum exterarum princeps⁶ Sicilia se ad amicitiam fidemque populi romani applicuit⁷; prima omnium, id quod ornamentum imperii est, provincia est appellata; prima docuit majores nostros, quam præclarum esset, exteris gentibus imperare; sola fuit ea fide benivolentiaque erga populum romanum, ut civitates ejus insulæ, quæ semel in amicitiam nostram venissent⁸, numquam postea deficerent, pleræque autem, et maxime illustres in amicitia perpetuo manerent. Itaque majoribus nostris in Africam ex hac provincia gradus imperii factus est: neque enim tam facile opes Carthaginis tantæ concii-

3. *Accusator.* Non pueri et quadruplatores, qui soli hoc tempore accusant.

4. *Temporis satis.* Viginti dies dabantur ad accusandum legitimi; actio prima novem abstulerat. Verr. I, 60.

5. *Atque adeo.* Siciliæ laus, quam, ut exemplum numerosæ orationis laudat ipse Cicero in Oratore, § 210: « Adhibenda est, inquit, numerosa oratio, si aut laudandum est aliquid ornatus, ut nos in accusationis secundo de Siciliæ laude diximus ». Opportune autem, qui Siciliæ calamitatem expositorus est, initio florentem illius statum exponit; ut ex utriusque

status comparatione, acerbior calamitas, magisque luctuosa videatur ».

6. *Princeps Sicilia.* Urbs Messana Romanis se suæque tradidit A. U. 489; et anno sequenti, multæ civitates, Hierone fugato, in amicitiam cum Roma venerunt, ac ipse Hiero in societatem receptus est.

7. *Applicuit.* Verbum solemne de eo, qui ad aliquem tamquam ad patronum confugit, quod ut plane intelligas, vid. Cic. de Orat. I, 39. Terent. Andr. V, 4, 21.

8. *Venissent.* Faern. conj. *rediissent.* Ern. bene vulgatam explicat. J. V. L.

dissent, nisi illud et rei frumentariæ subsidium, et receptaculum classibus nostris pateret⁹.

II. Quare P. Africanus, Carthagine deleta, Siculorum urbes signis monumentisque pulcherrimis exornavit¹: ut, quos victoria populi romani maxime lætari arbitrabatur, apud eos monumenta victoriæ plurima collocaret. Denique ille ipse M. Marcellus, cujus in Sicilia virtutem hostes, misericordiam victi, fidemque ceteri Siculi perspexerunt, non solum sociis in eo bello consuluit, verum etiam superatis hostibus temperavit. Urbem pulcherrimam, Syracusas, quæ quum manu munitissima esset, tum loci natura, terra ac mari claudebatur, quum vi consilioque cepisset, non solum incolumem passus est esse, sed ita reliquit ornatam, ut esset idem monumentum victoriæ, mansuetudinis, continentiae: quum homines viderent, et quid expugnasset, et quibus pepercisset, et quæ reliquisset. Tantum ille honorem Siciliae habendum putavit, ut ne hostium quidem urbem ex sociorum insula tollendam arbitraretur. Itaque ad omnes res Sicilia provincia semper usi sumus, ut, quidquid ex sese posset efferre, id non apud eos nasci, sed domi nostræ conditum² putaremus. Quando illa frumentum, quod deberet³, non ad diem dedit? quando id, quod opus esse putaret, non ultro pollicita est? quando id, quod imperaretur, recusavit? Itaque ille M. Cato sapiens

9. *Pat.* Immutatio hæc temporis proptuisset, tum in Cic. tum in ceteris veteribus sæpius ac vix notanda occurrit.

II. 1. *Exornavit.* Restituens ea, quæ victores Pœni abstulerant. Infra, 35. Hæc quædam præparatio est ad librum de signis.

2. *Conditum.* Græv. et Lall. addunt jam e vet. cod. Lamb. Sic « jam con-

ditus », pro Muren. c. 24. Ern. tamen damnat ut languidum. J. V. L. — Sensus est: Tanta est Siculorum erga nos liberalitas, ut, quod apud eos nascitur, nostrum sit, perinde ac si compositum illud in horreis nostris habeamus.

3. *Quod deberet.* De his vide Verr. III, de re frument.

cellam penariam⁴ reipublicæ nostræ, nutricem plebis romanæ, Siciliam nominavit. Nos vero experti sumus, Italico⁵ maximo difficillimoque bello, Siciliam nobis non pro penaria cella, sed pro ærario⁶ illo majorum vetere ac referto fuisse: nam sine ullo sumptu nostro, coriis⁷, tunicis, frumentoque suppeditato, maximos exercitus nostros vestivit, aluit, armavit.

III. Quid illa, quæ forsitan¹ ne sentimus quidem, iudices, quanta sunt? quod multis locupletioribus civibus utimur, quod habent propinquam, fidelem, fructuosamque provinciam, quo facile excurrant, ubi libenter negotium gerant: quos illa partim mercibus suppeditandis cum quæstu compendioque dimittit², partim retinet, ut arare, ut pascere, ut negotiari libeat, ut denique sedes ac domicilium collocare. Quod commodum non mediocre populi romani est; tantum civium romanorum³ numerum, tam prope ab domo, tam bonis fructuosisque rebus detineri. Et quoniam quasi quædam prædia populi romani sunt, vectigalia nostra atque provinciæ: quemadmodum propinquis

4. *Cellam penariam*. Polybius et Strabo Siciliam etiam vocant ταμίον τῆς πόλεως.

5. *Italico*. Sociali, quod ceptum est A. U. 662, ab universa prope Italia. Flor. III, 18.

6. *Ærario*. Non pro hoc inani, quod nunc habemus. *Ærarium* Romæ fuit triplex: unum, in quod ex tributis et præda bellica redacta pecunia inferebatur. Alterum ex vicesima, quod *sanctius* vocabatur, quia non, nisi difficillimis reip. temporibus, aperiretur. Tertium, in quo pecunia in gallicum bellum eroganda custodiretur, quam in alios usus impendi, exsecrationibus publicis vetitum erat.

7. *Coriis*. Ad conficienda tabernacula. Vid. Verr. I, 38. Conjicit Guil. *coritis*, minus dextre; neque enim utebantur hoc genere telorum Romani.

III. 1. Nonnulli veteres, « quod forsitan ».

2. *Dimittit*. Ex civibus romanis, alii negotiationis causa, frequenter in Siciliam commeant, et inde mercibus onusti redeunt; alii in ea propter utilitatem domicilium collocant. De utrisque vid. inf. 77.

3. *Romanorum*. Abest a codd. Lamb. et Metell. J. V. L. — *Tam prope ab domo*. Illam Italiæ vicinitatem commendat Cicero, quia hac ratione civibus Roma non exhauriretur; quod

vos vestris prædiis maxime delectamini; sic populo romano jucunda suburbanitas est hujusce provinciæ. Jam vero hominum ipsorum, judices, ea patientia, virtus, frugalitasque est, ut proxime ad nostram disciplinam illam veterem, non ad hanc, quæ nunc⁴ increbruit, videantur accedere. Nihil ceterorum simile Græcorum: nulla desidia, nulla luxuria; contra summus labor in publicis privatisque rebus, summa parcimonia, summa diligentia. Sic porro nostros homines diligunt, ut his solis neque publicanus⁵, neque⁶ negotiator odio sit. Magistratum nostrorum injurias ita multorum tulerunt, ut numquam ante hoc tempus ad aram legum⁷, præsidiumque vestrum publico consilio confugerint: tametsi et illum⁸ annum pertulerant, qui sic eos afflixerat, ut salvi esse non possent, nisi C. Marcellus quasi aliquo fato venisset, ut bis ex eadem familia salus Siciliae constitueretur, et postea M. Antonii⁹ infinitum illud imperium senserant.

contra in ceteris provinciis, præsertim Asiaticis ita eveniebat, ut postea Julius Cæsar necessario duxerit istas peregrinationes coercere, «ut exhaustæ Urbi frequentia suppeteret». Sueton. in Jul. 42.

4. *Quæ nunc.* Quæ severa olim, nunc dissoluta usurpatur. Ceterum quæ h. l. de Siculis traduntur, ambitiose magis ac oratorie, quam vere dicta esse videntur. Refragatur ipse sibi Cic. Tusc. Quæst. V, 35; de Fin. bon. et mal. II, 28. Et patet ex ipsis locis, ubi enumerantur res a Verre ablatæ, quanta fuerit eorum luxuria.

5. *Publicanus.* Hoc nomine, et pecuarii et portitores intelliguntur. Erant hi omnes, propter vectigalium rationem, omnibus odio nationibus.

6. *Neque neg.* Veluti aratores, ar-

gentarii, quibus liberæ legationes ad negotia obeunda decernuntur.

7. *Aram legum.* Prætoris scilicet tribunal ac subsellia judicium.

8. *Illum annum* 673 quo M. Lepidus Siciliam, quam prætor obtinebat, avare et crudeliter administravit. Huic successit C. Marcellus A. U. 675. Repetundarum reus factus est Lepidus anno 674, accusantibus duobus Metellis Celere et Nepote, qui tamen, victi ejus apud populum gratia, destiterunt.

9. *M. Antonii.* Qui anno 679 imperium nactus faventibus Cotta consule et Cethego in omnes maritimas oras et potestatem proconsulari æquam in omnibus provinciis usque ad quinquagesimum milliariam a mari, Siciliam depopulatus. Vid. Divin. 17.

Sic¹⁰ a maioribus suis acceperant, tanta populi romani in Siculos esse beneficia, ut etiam injurias nostrorum hominum perferendas putarent. In neminem civitates ante hunc testimonium publice¹¹ dixerunt. Hunc denique ipsum pertulissent, si humano modo, si usitato more, si denique uno aliquo in genere peccasset. Sed quum perferre non possent luxuriam, crudelitatem, avaritiam, superbiam, quum omnia sua commoda, jura, beneficia senatus populique romani, unius scelere ac libidine perdidissent: hoc statuerunt, aut istius injurias per vos ulcisci et persequi; aut si vobis indigni essent visi, quibus opem auxiliumque ferretis, urbes ac sedes suas relinquere; quandoquidem agros jam ante istius injuriis exagitati reliquissent.

IV. Hoc consilio a L. Metello legationes universae petiverunt, ut quam primum isti succederet; hoc animo toties apud patronos¹ de suis miseriis deplorarunt; hoc commoti dolore, postulata consulibus², quae non postulata, sed in istum crimina viderentur esse, ediderunt. Fecerunt etiam, ut me, cujus fidem continentiamque³ cognoverant, prope de vitae meae⁴ statu dolore ac lacrymis suis deducerent, ut ego istum accusarem; a quo mea longissime ratio voluntasque abhorrebat (quamquam in hac causa multo plures partes mihi defensionis, quam accusationis, suscepisse vi-

10. Sic. Hotom. placebat, « Scilicet sic »; Ursino, « Sed sic ». J.V. L.

11. Publice. Recte quidem: quia Lepidus, legibus tantum interrogatus, necdum etiam ceperat accusari. Asc.

IV. 1. Patronos. Marcellos, scilicet, Scipiones et Metellos.

2. Postulata consulibus. Pompeio et Crasso. Eam Siculis, vel in tantis calamitatibus modestiam affingit, ut apud consules non liberas edere conquestio-

nes audeant, verum postulata tantummodo proferant, quae ipsius veritatis vi accusationes esse videantur.

3. Continentiam. In quaestura quam, Pæduco prætor, Lilybæi gesserat.

4. De vitae meae statu. De perpetua mea defendendi et neminem accusandi consuetudine. Adjicit prope, quia revera non tam Verris accusator quam Siciliae patronus est ac defensor. Vid. Div. passim.

deor): postremo homines ex tota provincia nobilissimi, primique, publice privatimque⁵ venerunt; gravissima atque honestissima⁶ quæque civitas vehementissime suas injurias persequuta est. At quemadmodum, judices, venerunt? Videor enim mihi liberius apud vos jam pro Siculis loqui debere, quam forsitan ipsi velint⁸: saluti enim eorum potius consulam, quam voluntati. Ecquem⁹ existimatis umquam, ulla in provincia, reum absentem contra inquisitionem accusatoris, tantis opibus, tanta cupiditate, esse defensum? Quæstores utriusque provinciæ¹⁰, qui isto prætore fuerant, cum fascibus¹¹ mihi præsto fuerunt¹². Hi porro¹³, qui successerunt, vehementer istius cupidi, liberaliter ex istius cibariis tractati, non minus acres contra me fuerunt. Videte, quid potuerit, qui quatuor in una provincia quæstores, studiosissimos defensores propugnatoresque habuerit; prætorem¹⁴ vero cohortemque totam sic studiosam, ut facile appareret, non tam illis Siciliam, quam inanem offenderant, quam Verrem ipsum, qui plenus decesserat, provinciam

5. *Publice privatimque*. Aut legati, aut proprias injurias persequentes.

6. Lambin. *amplissima*. J. V. L.

7. *Quemadmodum venerunt*. I. e. quam forti animo, quam nullis minis deterriti.

8. *Velint*. Metu L. Metelli, prætoris Siciliæ, qui Verri amicissimus est.

9. *Melius quam « Et quem »*, invitis multis. J. V. L.

10. *Utriusque provinciæ*. Sicilia, quamvis unum haberet prætorem, in duas provincias (gall. *départements*) dividi posse videbatur, propter quæstores, quos habuit duos, Syracusanum et Lilybætanum.

11. *Cum fascibus*. Erant quæstori-

bus sui in provincia lictores, prætexta toga, ceteraque magistratus insignia. Quæstores Verri, quamvis jam sine imperio essent, fasces retinebant, de magistratuum more, donec in Urbem regrederentur.

12. *Præsto fuerunt*. Assidue occurrerunt, ut mihi in Verrem inquirenti essent impedimento.

13. *Hi porro*. Duo quæstores Metelli. — *Cupidi*. Verri faventes. — *Cibariis*. Largitionibus. Metaphora ducta a canibus. Sic Verr. I, 48.

14. *Prætorem*. Metellum; Verri successorem, et ejus adjutores, ministros et comites, quibus minori curæ fuit, quomodo furtis exinanitam Sici-

fuisse. Minari Siculis, si decressent legationes, quæ contra istum dicerent; minari, si qui essent profecti; aliis, si laudarent, benignissime promittere; gravissimos privatarum rerum testes, quibus nos præsentibus denuntiavimus¹⁵, eos vi custodiisque retinere.

V. Quæ quum omnia facta sint, tamen unam solam scitote esse civitatem Mamertinam¹, quæ publice legatos, qui istum laudarent, miserit. Ejus autem legationis principem, civitatis² nobilissimum, C. Heium, juratum dicere audistis, isti navem onerariam maximam Messanæ esse, publice coactis operis, ædificatam. Idemque Mamertinorum legatus, istius laudator, non solum istum bona sua, verum etiam sacra, deosque penates, a majoribus³ traditos, ex ædibus suis eripuisse dixit. Præclara laudatio, quum duabus in rebus legatorum una opera⁴ consumitur, in laudando atque repetendo. Atque ea ipsa civitas qua ratione illi amica sit, dicetur certo loco: reperietis enim, quæ causæ benivolentiæ sint Mamertinis erga istum, eas ipsas causas satis justas esse damnationis. Alia civitas nulla, judices, publico consilio laudat. Vis illa summi⁵ imperii tantum potuit apud perpaucos homines, non

liam recrearent, quæ erat eorum provincia, seu procuratio, quam quomodo expilatorem ejus Verrem judiciis subducerent.

¹⁵ *Denuntiavimus*. Quos ad dicendam testimonium citavimus. De hoc verbo vid. J. F. Gron. ad Div. V, 11.

V. 1. *Mamertinam*. Messanam, cujus cives Mamertini dicuntur, quæ urbs Verris furtorum adjutrix ac socia, ei, publica impensa et conductis operariis, maximam navem, nomine Cybeam, ædificaverat ac dono dederat. Verr. IV, 8, 9. Ceterum nota has rerum laudationes, quas sæpius ambitus,

aut timor corrumperebat, a Cn. Pompeio fuisse sublatas. Vid. Plutarch. in vit. Pomp. et Val. Max. VI, 2.

2. *Civitatis*. Vocem hanc Gul. quod invenisset in Metellino « civitatis nobilissimum civem C. Heium », arbitrabatur delendam, cen adulterinam.

3. Ernest. putat, « a majoribus traditos », glossam esse. Frustra. J. V. L.

4. *Una opera*. Quæ una esse debebat, nempe ut Verrem laudarent.

5. *Vis summi imperii*. Quam L. Metellus Siciliæ prætor habet: nemo enim in provincia erat qui, ut in urbe prætor alter aut consules proconsulis,

civitates, ut aut levissimi quidam ex miserrimis desertissimisque oppidis invenirentur, qui injussu populi ac senatus proficiscerentur; aut ii, qui contra istum legati decreti erant, et testimonium publicum ac mandata acceperant, vi ac metu retinerentur. Quod ego in paucis tamen usu venisse non moleste fero, quo reliquæ, tot, et tantæ, et tam graves civitates, tota denique Sicilia plus auctoritatis apud vos haberet, quum videretis, nulla vi retineri, nullo periculo prohiberi potuisse, quo minus experirentur, ecquid apud vos querimoniæ valerent antiquissimorum fidelissimorumque sociorum. Nam, quod fortasse non nemo vestrum audierit, istum a Syracusanis publice laudari: id, tametsi priore actione ex Heraclii Syracusani testimonio, cujusmodi esset, cognovistis; tamen vobis alio loco⁶, ut se tota res habeat, quod ad eam civitatem attinet, demonstrabitur. Intelligetis enim, nullis hominibus quemquam tanto odio, quanto istum Syracusanis, et esse, et fuisse.

VI. At enim istum soli Sieuli persequuntur: cives romani, qui in Sicilia negotiantur, defendunt, diligunt, salvum esse cupiunt. Primum, si ita esset, tamen vos in hac quæstione de pecuniis repetundis, quæ sociorum causa constituta est, lege judicioque sociali¹, sociorum querimonias audire oporteret. Sed intelligere potuistis priore actione, cives romanos ex Sicilia plurimos, honestissimos, maximis de rebus, et quas ipsi acceperant injurias, et quas scirent aliis esse factas, pro testimonio dicere. Ego hoc, quod intelligo, judices, sic confirmo: videor mihi gratum fecisse Si-

aut prætoris decretis intercederet. —
Populi ac senatus. Siciliensis.

6. *Alio loco. Confer Verr. IV, 63.*

VI. 1. *Sociali.* In quo de sociorum utilitatibus agitur; lege lata, uti socii sua repetentibus reddantur.

culis, quod eorum injurias meo labore, inimicitiiis², periculo sim persequutus: non minus hoc gratum me nostris civibus intelligo fecisse; qui hoc existimant, juris, libertatis, rerum fortunarumque suarum salutem in istius damnatione consistere. Quapropter de istius prætura Siciliensi non recuso, quin ita me audiatis, ut, si cuiquam generi hominum, sive Siculorum, sive nostrorum civium; si cuiquam ordini, sive aratorum, sive pecuariorum, sive mercatorum³ probatus sit; si non horum omnium communis hostis, prædoque fuerit; si cuiquam denique ulla in re umquam temperaverit: ut vos quoque ei temperetis.

Qui simul atque ei sorte provincia Sicilia obvenit, statim Romæ, et ad urbem⁴, antequam proficisceretur, quærere ipse secum, et agitare cum suis cœpit, quibusnam rebus in ea provincia maximam⁵ uno anno pecuniam facere posset. Nolebat in agendo discere, tametsi non provinciæ⁶ rudis erat et tiro; sed in Siciliam paratus ad prædam meditatusque venire cupiebat. O præclare conjectum a vulgo in illam provinciam omen communis famæ atque sermonis! quum ex nomine istius⁷, quid in provincia facturus esset, perri-

2. Sic reposuit Ern. e MS pro «inimicitias periculo». J. V. L.

3. *Sive mercatorum.* Garaton. putat duo verba hic desiderari, «sive negotiatorum»; Cicero enim dum ordines hominum, qui in Sicilia erant, enumerat, negotiatores nullo modo, silentio prætermittere potuit: erant enim in illis plurimi romani equites.

4. *Romæ et ad urbem.* Ex hoc loco conjecturam capere licet dissimilem fuisse prætorum et consulum rationem in sortiendis comparandisque provinciis. Nam consules antequam magistratum inirent, sibi decretas provincias

aut sortiebantur, aut suo arbitrio inter se comparabant. Prætores contra qui urbani magistratus erant, eas provincias, in quas cum imperio exirent, eo tempore quo magistratu abibant, sortiri consueverant.

5. *Uno anno.* Nesciebat enim fore, ut sibi, non succedente Arrio, per triennium provincia prorogaretur.

6. *Provinciæ.* Subaud. tractandæ. Quæstor videlicet et legatus in Achaia, Asia, etc. omnes jam furandi vias et artes didicerat.

7. *Ex nomine istius.* Ipsa enim veteres nomina in omen ita converte-

dicule⁸ homines augurabantur. Etenim quis dubitare posset, quum istius in quæstura fugam et furtum recognosceret; quum in legatione, oppidorum fanorumque spoliationes cogitaret; quum videret in foro latrocinia præturæ⁹: qualis iste in quarto actu¹⁰ improbitatis futurus esset?

VII. Atque ut intelligatis, eum Romæ quæsisse non modo genera furandi, sed etiam nomina¹, certissimum accipite argumentum, quo facilius de singulari ejus impudentia existimare possitis. Quo die Siciliam tetigit² (videte, satisne paratus, ex illo omine urbano³, ad everrendam provinciam venerit), statim Messana literas Halesam mittit; quas ego istum in Italia scripsisse arbitror: nam, simul atque e navi egressus est, dedit operam, ut Halesinus ad se Dio continuo veniret: se de hereditate velle cognoscere, quæ ejus filio a propinquo homine, Apollodoro Laphirone, venisset. Ea erat, judices, pergrandis pecunia. Hic est Dio, judices, nunc beneficio Q. Metelli civis romanus factus: de quo, multis viris primariis testibus, multorumque tabulis vobis priore actione satisfactum⁴ est, H-S undecies numeratum esse, ut eam causam, in

bant, ut ne dux quidem eligeretur nominis ominosi. Sic Liv. XXVIII: «sed illi primum non Arrium Umbrium, semilixam, nominis etiam abominandi ducem, sed Decium Subellium tribunum mil. sequuti sunt».

8. *Perridicule*. Faecta allusione ad istius nomen, dicebant «Verres everres Siciliam», sc. inanem relinques.

9. *Latrocinia præturæ*. Furta in sede Castoris ac pro rostris.

10. *In quarto actu*. Primus Verris actus fuit furtum in quæstura. Secundus, spoliatio sanorum in legatione. Tertius, in prætura urbana latrocinia.

Quantum fore Siciliæ expilationem nemo dubitabat, donec in quinto, absoluta tragœdia, Verres damnaretur.

VII. 1. *Nomina*. Eorum quos furaretur. Garat. explicat Verrem quæsisse non modo quibus in generibus, sed etiam quibus nominibus, furaretur.

2. *Alii, attingit*. J. V. L.

3. *Urbano*. Nempe quod in urbe, seu Romæ dictum hoc fuerat, ut sup. videre est.

4. *Satisfactum*. Omnino est demonstratum. — *Undecies* (circ. 225,500 fr.) Cicero ipse, Verr. I, 10, habet *decies*, quod est 205,000 fr.

qua ne tenuissima quidem dubitatio posset esse, isto cognoscente obtineret; præterea greges nobilissimarum equarum abactos; argenti vestisque stragulæ domi quod fuerit, esse direptum: ita H-S undecies Q. Dionem, quod hereditas ei obvenisset, nullam aliam ob causam, perdidisse. Quid? hæc hereditas quo prætore Dionis filio venerat? Eodem, quo Annix, P. Annii senatoris filix; eodem, quo M. Liguri senatori, C. Sacerdote prætore. Quid? tum nemo molestus Dioni fuerat? Non plus quam Liguri, Sacerdote prætore. Quid? ad Verrem quis detulit? Nemo: nisi forte existimatis ei quadruplatores⁵ ad fretum⁶ præsto fuisse.

VIII. Ad urbem quum esset, audivit, Dioni cuidam Siculo permagnam venisse hereditatem; heredem statuas jussum esse in foro ponere; nisi posuisset¹, Veneri Erycinæ esse multatum². Tametsi positæ essent ex testamento; putabat tamen, quoniam Veneris nomen esset, causam pecuniæ³ se reperturum. Itaque apponit, qui petat Veneri Erycinæ illam hereditatem: non enim quæstor petiit⁴, ut est consuetudo, is, qui Erycinum⁵ montem obtinebat; petit Nævius Turpio

5. *Quadruplatores*. Accusatores, sive delatores criminum publicorum.

6. *Ad fretum*. Siculum.

VIII. 1. *Nisi posuisset*. Notandum in jure romano, si quis heredem scriberet, et sibi ab eo monumentum certa pecunia exstrui, seu statuas in suum honorem poni juberet, nullam heredi esse obligationem. Hinc multa sæpe adjiciebatur, *ni posuisset*, uti cuivis templo certa esset solvenda pecunia. Legato vero ad opus publicum relicto, exsequi cogebatur heres, usurasque reipublicæ solvebat, donec perfecisset. L. 7, § de annuis

legatis. Ulpian. 5, de oper. publ.

2. *Veneri multatum*. Id est, si statux positæ non essent hereditatem totam Veneri esse adjudicandam. Nannius legendum esse *multandum* censebat. Eo autem nomine Veneri multabatur, quod ea apud Siculos magna frequentia coleretur.

3. *Pecuniæ*. Conficiendæ. Sed cod. Metell. *calumniæ*, quod Lamb. Græv. Garaton. Sch. prætulerunt. Vulgatam defendit Ernest.

4. Alii, *petit*. J. V. L.

5. Alii, *Erycum*. J. V. L. — Is erat Q. Cæcilius, quæstor Lilybætanus.

quidam, istius excursor et emissarius⁶, homo omnium ex illo conventu quadruplatorum deterrimus⁷, C. Sacerdote prætorē condemnatus injuriarum⁸. Etenim erat ejusmodi causa, ut ipse prætor, quum quæreretur calumniatorem, paullo tamen considerationem reperire non posset. Hunc hominem⁹ Veneri¹⁰ absolvit, sibi condemnat: maluit videlicet homines peccare, quam deos; se potius a Dione, quod non licebat, quam Venerem, quod non debebatur, auferre. Quid ego hic nunc Sext. Pompeii Chlōri testimonium recitem, qui causam egit Dionis, qui omnibus rebus interfuit, hominis honestissimi, tametsi civis romanus virtutis causa jamdiu est, tamen omnium Sicularum primi ac nobilissimi? Quid ipsius Q. Cæciliū Dionis¹¹, hominis probatissimi ac prudentissimi? Quid L. Vetecillii Liguris, T. Manlii, L. Caleni? quorum omnium testimoniis de hac Dionis pecunia confirmatum est. Dixit hoc idem M. Lucullus, se de his Dionis incommodis pro hospitio, quod sibi cum eo esset, jam ante cognosse. Quid? Lucullus, qui tum in Macedonia¹² fuit, melius

6. *Excursor et emissarius*. Translatio est a militia, in qua excursores præmittebantur explorandi tentandique gratia, unde sæpe prædæ ingentes. Verres igitur, ex quibusdam quasi castris certos homines emittebat prædæ causa; hiq̃ue optime excursores dicuntur.

7. *Deterrimus*. Hotom. et Gulielm. legendum censebant *terrērimus*.

8. *Injuriarum*. Actio illa competit in eum qui aliquem pulsaverit, in alienam domum vi introierit, etc.

9. *Hunc hominem*. Dionem. Adnotat Schütz *hominem* referri videri ad Nævium Turpionem, qui proxime erat «homo tēterrīmus» appellatus. Scribit

igitur, ambiguitatis vitandæ causa, «Iste Dionem v. a.» Feliciter quidem, sed sine MSS. Ceterum sensus per se satis patet.

10. *Veneri absolvit*. Quod ad Venerem attinet, eum absolvit, et indicat illam hereditatem a Dione Veneri non deberi; sed *sibi*, i. e. quod ad suam utilitatem spectat, eum condemnat, sibi adjudicat illam pecuniam, quod erat idem ac si Dionem condemnasset.

11. *Q. Cæciliū Dionis*. Illum hoc ornat prænomine, quod Dio, ut supra est, in civitatem Q. Cæciliū Metelli beneficio adscitus, ejus nomen suo nomini adjunxerat.

12. *In Macedonia*. M. Terentius

hæc cognovit, quam tu, Hortensi, qui Romæ fuisti? ad quem Dio confugit? qui de Dionis injuriis gravissime per literas cum Verre questus es? Nova tibi hæc sunt, et inopinata? nunc primum hoc aures tuæ crimen accipiunt? Nihil ex Dione¹³, nihil ex socru tua, femina primaria, Servilia, vetere Dionis hospita, audisti? Nonne multa mei testes, quæ tu scis, nesciunt? Nonne te mihi testem in hoc crimine eripuit non istius innocentia, sed legis¹⁴ exceptio? TESTIMONIA M. LUCULLI, CHLORI, DIONIS.

IX. Satisne vobis magnam pecuniam Venerius homo, qui e Chelidonis sinu in provinciam profectus esset, Veneris nomine quæsisse videtur? Accipite aliam in minore pecunia non minus impudentem calumniam. Sosippus et Epicrates fratres sunt Agyrinenses. Horum pater abhinc duo et xx annos est mortuus: in cujus testamento, quodam loco, si commissum¹ quid esset, multa erat Veneri. Ipso² xx anno, quum tot interea prætores, tot quæstores, tot calumniatores in provincia fuissent, hereditas ab his Veneris nomine petita est. Causam³ Verres cognoscit: pecuniam per Volcatium⁴ accipit, fere ad H-S cccc millia, ab duobus fratribus. Multorum testimonia audistis antea. Vicerunt

Lucillus Macedoniae præfuit, et ex ea triumphavit A. U. 682.

13. Ita codd. Nann. et Metell. melius quam « de Dione, de socru », quod vet. habent editiones. Jam Gruterus mutaverat. J. V. L.

14. *Legis exceptio*. Qua vetabatur accusator rei patronum in testimonium vocare.

IX. 1. *Si commissum*. Si quid heredes fecissent contra, quam testamento cautum esset; multam, poenæ nomine, Veneri solvere jubebantur.

2. Olim *Ipsos XX annos... petita non est*. Defendit Lamb. J. V. L. — Longum temporis hoc spatium propterea urget Cicero, non ut *prescriptum* ostendat, quum *perpetuæ* essent eæ actiones; sed ut probet hanc actionem ex solius Verris instigatione susceptam esse.

3. *Causam* abest a cod. Metelli. J. V. L.

4. *Volcatium*. Is erat de cohorte prætoriana, eques romanus. Comitibus suis Verres, quasi sequestribus uteba-

Agrinenses fratres ita, ut egentes inanesque discederent.

X. At enim ad Verrem pecunia ista non pervenit. Quæ est ista defensio? utrum asseveratur¹ in hoc, an tentatur? mihi enim nova res est. Verres calumniatores apponebat; Verres adesse jubebat; Verres cognoscebat; Verres judicabat; pecuniæ maximæ dabantur; qui dabant, causas obtinebant: tu mihi ita defendas? Non est ista Verri numerata pecunia. Adjuvo te: mei quoque testes idem dicunt; Volcatio dicunt sese dedisse. Quæ vis erat² in Volcatio tanta, ut H-S cccc millia a duobus hominibus³ auferret? et quis Volcatio, si sua sponte⁴ venisset, unam libellam dedisset? Veniat nunc; experiatur: tecto recipiet nemo. At ego amplius dico, H-S quadringenties⁵ accepisse te arguo contra leges: nego tibi ipsi ullum nummum esse numeratum; sed quum ob tua decreta⁶, ob imperata, ob judicata, pecuniæ dabantur, non erat quærendum, cujus manu numerarentur, sed cujus injuria cogèrentur. Comites illi tui delecti, manus erant tuæ; præfecti, scribæ, medici, accensi, aruspices, præcones erant manus tuæ; ut quisque te maxime cognatione, affinitate⁷, necessitudine aliqua attingebat, ita maxime

tur, ut, siquando reus ageretur, li-
quido jurare posset, pecunias sibi
numeratas non fuisse.

X. 1. *Asseveratur*. Utrum serio id
dicunt, ut defendant; an experiuntur,
si possint ea ratione defendere. Vid.
Brut. 85, ubi eodem sensu ponitur
asseverare. Mire vero contra Horten-
sium verbum illud *tentatur* prolatum
est, ut qui improbos sæpe defendisset.

2. Edd. vett. «Quæ vis erat Volca-
tio...», id est, quo jure aut quo im-
perio auferrebat?

3. *Hominibus*. Nannii codex habet
«nominibus».

4. *Sua sponte*. Proprio suo nomine.
— *Libellam*. Unum assem. Vide Rosc.
Com. 4.

5. *H-S quadring.* (circ. 82,000 fr.)

6. Cod. Metell. et Lamb. «ob edi-
cta, ob imperia, ob judicata». J.
V. L.

7. *Delent cognatione et affinitate*
codd. Rom. et Brix. edd. Ernest. Sch.
etc. Nos post Desjard. servavimus.
J. V. L.

manus tua putabatur; cohors tota illa tua, quæ plus mali Siciliæ dedit, quam si centum cohortes fugitivorum⁸ fuissent, tua manus sine controversia fuit. Quidquid ab horum quopiam captum est, id non modo tibi datum, sed tua manu numeratum judicari necesse est. Nam, si hanc defensionem probabitis, « Non accepit ipse; » licet omnia de pecuniis repetundis iudicia tollatis. Nemo umquam tam reus, tam nocens adducetur, qui ista defensione non possit uti. Etenim quum Verres utatur; quis erit umquam posthac reus tam perditus, qui non ad Q. Mucii⁹ innocentiam referatur, si cum isto conferatur? Neque nunc tam mihi isti Verrem defendere videntur, quam in Verre defensionis tentare rationem¹⁰. Qua de re, iudices, vobis magnopere providendum est: pertinet hoc ad summam reipublicæ, et ad existimationem ordinis¹¹, salutemque sociorum. Si enim innocentes existimari volumus, non solum nos abstinentes, sed etiam nostros comites præstare debemus.

XI. Primum omnium opera danda est¹, ut eos nobiscum ducamus, qui nostræ famæ capitique consulant: deinde, si in hominibus eligendis nos spes amicitiae fefellerit, ut vindicemus², missos faciamus, semper ita vivamus, ut rationem reddendam nobis arbitremur. Africani³ est hoc, hominis liberalissimi

8. Post *fugitivorum*, Ernestio videbatur deesse aut *in Sicilia*, aut *ibi*, aut simile quid. Sine causa. J. V. L.

9. *Q. Mucii*. De Mucio cujus abstinentia in proverbium cesserat, vide Div. 17.

10. *Rationem*. Quæ nempe ad omnes reos pertineat. Odiose hoc in Verri defensores dicitur, quasi qui iisdem, quibus C. Verres, criminibus affines,

in eo defendendo experiantur num aliquam sibi, ex similitudine causæ, defensionem comparare possint.

11. *Ordinis*. Lambin. ex Metell. « tanti ordinis ».

XI. 1. *Opera tanta danda est*. Sic multi codd. et edd. pr. J. V. L.

2. *Vindicemus*. Id est, puniamus.

3. *Africani*. Minoris. Nam quum nihil additur post vocem *Africanus*,

(verumtamen ea liberalitas⁴ est probanda, quæ sine periculo existimationis est, ut in illo fuit). Quum ab eo quidam vetus assectator, ex⁵ numero amicorum, non impetraret, uti se præfectum⁶ in Africam duceret, et id ferret moleste: «Noli, inquit, mirari, si tu «a me hoc non impetras. Ego jam pridem ab eo, cui «meam existimationem caram fore arbitror, peto, ut «mecum præfectus proficiscatur, et adhuc impetrare «non possum». Etenim re vera multo magis est petendum ab hominibus, si salvi et honesti esse volumus, ut eant nobiscum in provinciam, quam hoc illis in beneficii⁷ loco deferendum. Sed tu, quum et tuos amicos in provinciam, quasi in prædam, invitabas, et cum illis, ac per eos prædabare, et eos in concione annulis aureis⁸ donabas; non statuebas, tibi non solum de te, sed etiam de illorum factis rationem esse reddendam?

Quum hos sibi quæstus constituisset, magnos atque uberes, ex his causis, quas ipse instituerat in consilio, hoc est, cum sua cohorte, cognoscere: tum in-

de minore semper intelligendum putat Manntius.—Hoc. Subaud. factum.

4. *Verumt. ea lib.* Non inhumani, sed ad bene de omnibus merendum promptissimi; itaque illud *verumtamen* ad ejus docendum liberalitatis modum concinne adhibetur.

5. Vulgo *et ex.* Tria verba «ex numero amicorum» glossatori tribuit Ernest. assentitur Schütz. eo quod *assectatores* erant clientes virorum clarorum, plerumque homines tenues, quos non poterat Scipio in amicorum numero habere. Sed et *assectator*, ut verbum *assector*, non semel in bonam partem accipitur; et nomen illud *amici* quod adjicitur, eo magis Africani

constantiam in recusando ostendit, et ea probat quæ a Cicerone paullo ante dicuntur, ut *amicos* quandoque *missos faciamus*.

6. *Præfectum.* In cohorte prætoria is erat legatis inferior, nulli officio peculiari addictus. Sæpius etiam *præfecti* nomen titulus fuit sine re. Vid. Nep. in Att. vit. cap. 6.

7. *Beneficii.* In hanc rationem de Q. Fufidio sic loquitur in epistola ad Brut. 16, «et fuit in Cilicia mecum tribunus militum quo in munere ita se tractavit, ut accepisse ab eo munus viderer, non dedisse».

8. *Annulis aureis.* Vid. infr. act. III, 80.

finitum genus invenerat ad innumerabilem pecuniam corripiendam.

XII. Dubium nemini est, quin omnes omnium pecuniæ¹ positæ sint in eorum potestate, qui judicia dant², et eorum³, qui judicant; quin nemo nostrum possit ædes suas, nemo fundum, nemo bona patria obtinere, si, quum hæc a quopiam vestrum petita sint, prætor improbus, cui nemo intercedere⁴ possit, det, quem velit, judicem; judex nequam et levis, quod prætor jusserit, judicet. Si vero⁵ illud quoque accedet, ut in ea⁶ verba prætor judicium det, ut vel L. Octavius Balbus judex, homo et juris et officii peritissimus, non possit aliter judicare; si judicium sit ejusmodi: L. OCTAVIUS JUDEX ESTO: SI PARET⁷, FUNDUM CAPENATEM, QUO DE AGITUR, EX JURE QUIRITIUM P. SERVILII ESSE, NEQUE IS FUNDUS Q. CATULO RESTITUETUR: NON necesse erit⁸ L. Octavio judici cogere P. Servilium

XII. 1. *Pecuniæ*. Fortunæ.

2. *Qui judicia dant*. Prætores, qui judicia constituunt, et formulas per quas judicetur.

3. *Eorum*. Privatorum hominum, qui iudices a prætore dabantur.

4. *Intercedere*. In provincia scilicet: nam Rqmæ, tribuni plebis et alter prætor et consules intercedere poterant.

5. *Si vero*. «Quid vero si illud», vetus cod.

6. *Ut in ea*. Ut eam iudicii formulam det, a qua non possit discedere judex vel peritissimus v. g. Octavius Balbus, qui vir integerrimus, judex in Verris causa sedebat. Is est Balbus, quem Cicero in Nat. Deor. inducit pro Stoicis disputantem. Ceterum vidimus jam sæpius judicem a prætoris formula non posse vel tantillum discedere,

ita ut ea sit vere omnino constrictus.

7. *Si paret*. Actor fingitur in hoc exemplo Catulus, unus e Verris iudicibus, qui, actione rei vindicatoria instituta, petit ut fundus, quem jure optimo possidet Servilius, alter Verris judex, sibi adjudicetur. Formulam dat prætor Verres, qua præcipit judici, si reperiat summo jure Servilio competere hunc fundum, neque Servilius hunc Catulo, qui nullum in eum jus habet, restituere velit; «tum damnetur Servilius», quæ verba tria subintelliguntur.

8. *Non necesse erit*. Nonne secundum formulam cogetur judex, edicere ut P. Servilius Q. Catulo fundum restituat. Cui interlocutoria sententiæ si contumax fuerit Servilius, nec rem restituere velit, tum sententia definitiva erit dicenda, eaque condemnan-

Q. Catulo fundum restituere, aut condemnare eum, quem non oporteat? Ejusdemmodi totum jus prætorium, ejusdemmodi omnis res judiciaria fuit in Sicilia per triennium, Verre prætore. Decreta ejusmodi: SI NON⁹ ACCIPIT, QUOD TE DEBERE DICIS, ACCUSES; SI PETIT, DUCAS. C. Fuficium duci jussit petito rem, L. Suetium, L. Racilium. Judicia hujusmodi: Qui cives¹⁰ romani erant, si Siculi essent, quum Siculos eorum legibus dari oporteret; qui Siculi, si cives romani essent. Verum, ut totum genus complectamini judiciorum; prius jura Siculorum, deinde istius instituta cognoscite.

XIII. Siculi hoc jure sunt, ut, quod civis cum cive¹ agat, domi certet suis legibus; quod Siculus cum Siculo non ejusdem civitatis, ut de eo prætor judices ex P. Rupilii² decreto, quod is de decem³ legatorum

das idem Servilius *quem damnare tamen non oportebat*, utpote rei dominum. Quod tamen facere necesse erit iudici, formula a prætore data ita adstricto. Sic nos ex Voorda in Lection. Tullian. interpretamur, apud quem plura vide. Gaius, IV, 39, 44. Vin-
 nius ad I tit. de act. § 31, 3, etc. Aliter interpretatur Manutius: Judex cogetur aut condemnare Q. Catulum, quem condemnare non oporteat ex formula prætoris, id jubentis, non ut Catulus, sed ut Servilius condemnaretur. Alterutrum igitur peccabit Octavius iudex, aut Servilium injuste condemnabit, quia formulam sequetur; aut Catulum, contra quem oportet, quia discedet a formula. Quæ nobis minus felix videtur explicatio, neque cum formulæ sensu consentit.

9. Si nos. Jubeo a debitore tantum accipere creditorem, non quantum sibi deberi dicit, sed quantum debitor ipse dicat. Quod si nolit summam

eam accipere creditor pro plena solutione, accuses eum; si petit plus quam debere dicis, ducas eum in vincula.—
Loco petit, Lambin. Græv. *petitur*. Nannius, *petitor*. Alii, *patitur*.

10. Qui cives. Dabantur judices, qui cives romani erant, si Siculi rei essent, et vice versa; quum contra Siculos a Siculis, Romanos a Romanis judicari lex juberet. Sensus est expeditus, si subintelligantur rei.

XIII. 1. Priscian. pag. 766, edit. Putsch. habet *civi*. J. V. L.

2. P. Rupilii. Is ex publicano factus consul A. U. 621 in Sicilia cum fugitivis debellavit; et servili confecto bello, Siciliam constituit ac decretum dedit, secundum quod ordinaretur et administraretur. Verr. IV, 50. Vell. Pat. II, 17.

3. Decem legatorum. Romanis institutum erat ut, quum in potestatem redeissent provinciam, decem eo mitterentur legati, qui una cum impe-

sententia statuit, quam legem illi Rupiliam vocant, sortiatur. Quod privatus a populo petit, aut populus a privato; senatus ex aliqua civitate, qui iudicet, datur, quum alternæ civitates⁴ rejectæ sunt. Quod civis romanus a Siculo petit, Siculus iudex datur; quod Siculo a cive romano, civis romanus datur: ceterarum rerum⁵ selecti iudices civium romanorum ex conventu proponi solent. Inter aratores⁶ et decumanos, lege Frumentaria, quam Hieronicam appellant, iudicia fiunt. Hæc omnia isto prætore non modo perturbata, sed plane et Siculis et civibus romanis erepta sunt: primum suæ leges⁷; quod civis cum cive ageret, aut eum iudicem, quem commodum erat, præconem, aruspicem, medicum suum dabat; aut, si legibus erat iudicium constitutum, et ad civem suum iudicem venerant, libere civi iudicare non licebat. Edictum⁸ enim hominis cognoscite, quo edicto omnia iudicia redege-

ratore, iura constituerent, quibus in posterum provinciam uti vellent. Ad Att. XIII, 4, 5, 6, 30 et 32.

4. *Alternæ civitates.* *Civitates* pro *cives* dicit Cicero. Sensus enim est: Quum petitor iudices ex rei civitate, reus contra iudices ex actoris civitate datos rejecisset.

5. *Ceterarum rerum.* De quibus disceptant non Siculi, sed inter se cives romani et peregrini. — *Ex conventu*, i. e. ex illa regione ubi conventus agitur et iurisdictio celebratur, ex illis qui negotientur illic et domicilium habent. — Vulgo hic ordo verborum est: «ex conventu civium romanorum». Transponit J. Fr. Gron. quem sequuti sumus cum J. Gronov. Verburg. Oliv. Lallemand. Sch. et J.V. L. quia illud antecedentibus aptius ad structuram et ordinem verborum respondet.

6. *Inter aratores.* Vide ad h. l. Verr. III, 8.

7. *Suæ leges.* Subaud. perturbatæ et ereptæ Siculis sunt. Has duas voces delet Schütz, quasi quæcumque sequuntur, ad leges *Siculorum* violatas pertineant. Sed quum postea «civium romanorum» perturbata iura sit commemoraturus orator, non frustra primo *Siculorum* peculiare leges enumerare videtur. — *Civis cum cive.* In his controversiis quas Siculo cum Siculo habebat.

8. *Edictum.* Ex hoc loco intelligendum datur non licuisse prætoribus, eorum quos iudices dederant iudicia rescindere. Quum enim iis iudicandi potestatem fecissent, ipsimet iudicare videbantur. Ceterum de hisce omnibus rebus cf. Excurs. de ordine exercendorum, stante rep. iudiciorum, ad calcem hujus voluminis.

rat in suam potestatem : SI QUI PERPERAM JUDICASSET⁹, SE COGNITURUM ; QUUM COGNOSSET, ANIMADVERSURUM : idque quum faciebat, nemo dubitabat, quin, quum judex alium de suo judicio putaret¹⁰ judicaturum, seque in eo capitis periculum aditurum, voluntatem spectaret¹¹ ejus, quem statim de capite suo putaret¹² judicaturum. Selecti e conventu, aut propositi ex negotiatoribus¹³ judices nulli : hæc copia, quam dico, judicum, cohors, non Q. Scævola, qui tamen de cohorte sua dare non solebat ; sed C. Verris. Cujusmodi cohortem putatis hoc principe fuisse ? sicuti videtis edictum¹⁴. SI QUID PERPERAM JUDICARIT SENATUS¹⁵. Eum quoque ostendam, si quando sit datus, coactu istius, quod non senserit, judicasse. Ex lege Rupilia sortitio nulla, nisi quum nihil intererat istius. Lege Hieronica judicia¹⁶ plurimarum controversiarum, sublata uno nomine omnia : de conventu ac negotiatoribus nulli judices. Quantam potestatem habuerit, videtis : quas res gesserit, cognoscite.

XIV. Heraclius est Hieronis filius, Syracusanus, homo in primis domi suæ nobilis, et ante hunc prætorem vel pecuniosissimus Syracusanorum ; nunc nulla alia calamitate, nisi istius avaritia atque injuria, pauperrimus. Huic hereditas facile ad H-S tricies¹ venit

9. *Judicasset*. Grævius legendum esse putat « judicassit » pro « judicaverit » ; quod solemne erat in edictis obsoletiora verba adhibere.

10. Alii, *putet*. J. V. L.

11. Alii, *spectet*. J. V. L.

12. Olim *putet*. J. V. L.

13. *Negotiatoribus*. Equitibus romanis ; in conventu autem plebei poterant esse cives.

14. Ernest. conjicit « sicuti videtis ipsum » ; Schütz, « de Siculis v. a. »

I. *Cic. pars secunda*.

J. V. L.—Sensus est : Non minus prava ejus cohors, quam ejus edictum erat.

15. *Senatus*. Subaud. cognoscam ; et postquam cognovero, animadvertam. Transit Cicero ad id genus actionis, in quo senatus ex aliqua civitate dabatur, qui judicaret.

16. *Judicia*. Subaud. constituta.—*Uno nomine*. Scil. edicto illo de judicio in octuplum, de quo agitur Verr. III, 10 seqq.

XIV. 1. *H-S tricies* (615,000 fr.)

testamento propinqui sui, Heraclii; plena domus cælati argenti optimi, multæque stragulæ vestis, pretiosissimorumque mancipiorum: quibus in rebus istius cupiditates et insanias² quis ignorat? Erat in sermone res, magnam Heraclio pecuniam venisse; non solum Heraclium divitem, sed etiam ornatum suppellectili, argento, veste, mancipiis futurum. Audit hæc etiam Verres; et primo, illo suo leviori artificio Heraclium aggredi conatur, ut eum roget inspicienda, quæ non reddat. Deinde a quibusdam Syracusanis admonetur: hi autem quidam erant affines³ istius, quorum⁴ iste uxores numquam alienas existimavit, Cleomenes et Æschrio; qui quantum apud istum, et quam turpi de causa potuerint, ex reliquis criminibus intelligetis. Hi, ut dico, hominem admonent: rem esse præclaram, refertam⁵ omnibus rebus; ipsum autem Heraclium, hominem esse majorem natu, non promptissimum⁶; et eum præter Marcellos, patronum, quem jure suo adire aut appellare possit⁷, habere neminem; esse in eo testamento, quo ille heres esset, scriptum, ut statuas in palæstra deberet ponere: faciemus, ut palæstritæ negent ex testamento esse positas; petant hereditatem, quod eam palæstræ commissam⁸ esse dicant. Placuit ratio Verri: nam hoc animo providebat, quum tanta hereditas in

2. *Insanias*. Sic legit Ascon. Edd. vett. Vict. Lambin. *insaniam*.

3. *Affines*. Affines sunt aut quorum propinquam aliquis uxorem duxit, aut qui aliorum ipsi propinquam duxerunt. Significat autem Verri cum illorum uxoribus stupri consuetudinem interceasisse. Itaque quasi Verri propinquæ illorum uxores fuissent, istos affines illius appellat. Sic eodem sensu cap. 10 dixit «affinitate».

4. *Quorum*. Uxores quorum stupri

consuetudine Verres ut suam habuit.

5. Beck. addit *domum* e conjectura Lambini. J. V. L.

6. *Non promptissim*. Ingenio minime malum; nec, nisi Marcellos communes Siciliæ totius patronos, ullum ei patronum peculiarem esse, quem privato jure invocare posset. Hoc significat neminem Heraclio esse ad quem clientelæ jure confugiat.

7. Ern. *posset*.

8. *Commissam*, Adjudicatam.

controversiam venisset, iudicioque peteretur, fieri non posse, ut sine praeda ipse discederet. Approbat consilium : auctor est, ut quam primum agere incipiant, hominemque id ætatis, minime litigiosum, quam tumultuosissime adoriantur.

XV. Scribitur Heraclio dica¹. Primo mirantur omnes improbitatem calumniæ: deinde qui istum nossent, partim suspicabantur, partim plane videbant, adjectum² esse oculum hereditati. Interea dies advenit, quo die sese ex instituto, ac lege Rupilia, dicas sortituum Syracusis iste edixerat : paratus ad hanc dicam sortiendam³ venerat. Tum eum docet Heraclius, non posse eo die sortiri, quod lex Rupilia vetaret diebus xxx sortiri dicam, quibus scripta esset : dies xxx nondum fuerant. Sperabat Heraclius, si illum diem effugisset, ante alteram sortitionem Q. Arrium, quem provincia tum maxime exspectabat, successurum. Iste omnibus dicis⁴ diem distulit; et eam diem constituit, ut hanc Heraclii dicam sortiri post dies xxx ex lege posset. Posteaquam ea dies venit; iste incipit simulare, se velle sortiri. Heraclius cum advocatis adit, et postulat, ut sibi⁵ cum palæstritis, hoc est, cum populo Syracusano, æquo jure disceptare liceat. Adversarii postulant, ut in eam rem iudices dentur ex his civitatibus, quæ in id forum convenirent⁶; electi, qui Verri viderentur. Heraclius contra, ut iudices e lege Rupilia dentur : ut

1. *Dica*. Actio, a græco δίκη. *Dicas sortiri* est, ordinem causarum sorte constituere. Sic apud Terentium in Phormione : « En unquam injuriarum audisti mihi scriptam dicam ».

2. *Adjectum*. H. e. Verrem oculis hereditatem ad prædam designasse.

3. *Sortiendam*. Primam educendam.

4. Est a Fabr. et Metell. Antea editi, *judiciis*. J. V. L.

5. *Ut sibi*. Petit ut sibi, Syracusano cum palæstritis, hominibus Syracusanis, ex suis legibus, secundum legem Rupiliam disceptare liceat.

6. *Convenirent*. Quæ in Syracusano foro judicarentur; quæ ex ju-

ab institutis superiorum, ab auctoritate senatus, ab jure omnium Siculorum ne recedatur.

XVI. Quid ego istius in jure dicundo libidinem¹ demonstrum? quis vestrum non ex urbana jurisdictione cognovit? quis umquam, isto prætore, Chelidone invita, lege agere² potuit? Non istum, ut non neminem, provincia corripuit: idem fuit, qui Romæ. Quum id, quod omnes intelligebant, diceret Heraclius, jus esse certum Siculis, inter se quo jure certarent; legem esse Rupiliam, quam P. Rupilius ex S. C.³ de decem legatorum sententia dedisset; hoc omnes semper in Sicilia consules prætoresque servasse: negavit se judices e lege Rupilia sortituros; quinque judices, quos commodum ipsi fuit, dedit. Quid hoc homine⁴ facias? quod supplicium dignum libidini ejus invenias? Præscriptum tibi quum esset, homo deterrime et impudentissime, quemadmodum inter Siculos judices dares; quum imperatoris populi romani auctoritas, legatorum decem, summorum hominum, dignitas, senatusconsultum intercederet, cujus consulto P. Rupilius de X legatorum sententia leges in Sicilia constituerat; quum omnes, ante te prætorem, Rupilianas leges et in ceteris rebus, et in judiciis maxime observassent: tu ausus es pro nihilo præ tua præda tot res sanctissimas ducere? tibi nulla lex fuit? nulla religio? nullus existimationis pudor? nullus judicii metus? nullus apud te

isdictione Syracusana penderent. — *Electi*. Et ut eligantur judices qui, etc. — *Cod. Metell. convenerant*. Probat Garaton. *Male*. Interjungit Ernest. « convenirent. *Electi*, qui V. v. » quæ major distinctio omnino est frigida.

XVI. 1. Olim *lib. et scelera*. Sed abest a pl. MSS. J. V. L.

2. *Legi agere*. Judicio experiri. Prætor actionem in eos dabat qui in legem aliquam commisissent: hinc *legi agere* est judicium ex lege postulare.

3. Multi delent « ex S. C. » *Male*. J. V. L.

4. Alii, « huic homini ». J. V. L. — *Vetus* est locutio sæpius usurpata. — *Intercederet*. *Interveniret*.

gravis auctoritas? nullum exemplum, quod sequi velles? Verum, ut institui dicere, quinque iudicibus nulla lege, nullo instituto, nulla rejectione⁵, nulla sorte, ex libidine istius datis, non qui causam cognoscerent, sed qui, quod imperatum esset, iudicarent; eo die nihil actum est; adesse iubentur postridie.

XVII. Heraclius interea, quum omnes insidias a prætore fortunis suis fieri videret, capit consilium de amicorum et propinquorum sententia, non adesse ad iudicium: itaque Syracusis illa nocte profugit. Iste postero die mane, quum multo maturius, quam umquam antea, surrexisset; iudices citari¹ jubet: ubi comperit Heraclium non adesse, cogere incipit eos, ut absentem Heraclium condemnarent. Illi eum comonefaciunt, ut, si ei videatur, utatur instituto suo², nec cogat ante horam decimam³ de absente secundum præsentem iudicare: impetrant. Interea sane perturbatus et ipse, et ejus amici et consiliarii, moleste ferre cœperunt, Heraclium profugisse: putabant absentis damnationem, præsertim tantæ pecuniæ, multo invidiosiore fore, quam si præsens damnatus esset. Eo accedebat, quod iudices e lege Rupilia dati non erant; multo etiam rem turpiorem⁴ et iniquiorem visum iri intelligebant. Itaque hoc dum corrigere vult,

5. Al. *religione*, minus aptum, invito Græv. J. V. L. — Nulla permissa iudicum recusatione.

XVII. 1. *Judices citari*. Hoc in iudiciis præcones munus habebant, ut scilicet iudices, testesque et reos convocarent.

2. *Instituto suo*. H. e. non contra ea quæ ipse decrevit, agat.

3. *Ante horam decimam*. Duobus ante noctem horis. Dies totus reo

concedi solebat, ad sistendum se eoram iudice. Vide jus XII tabb. apud Bach. tom. I. — *Secundum*. Propter præsentem.

4. Post «turpiorem» Ern. delevit «fore», quod in libris vett. non est, et ab sententia abhorret. Ex iisdem mox edidit, «quum multis lacrymis eum oraret», pro «multis lacrymis quum eum or.» Item mox, «postero die», pro «postridie», J. V. L.

apertior ejus cupiditas improbitasque facta est. Nam illis quinque judicibus uti sese negat : jubet, id quod initio e lege Rupilia fieri oportuerat, citari Heraclium, et eos, qui dicam scripserant : ait, se judices e lege velle sortiri. Quod ab eo pridie, quum multis lacrymis eum oraret atque obsecraret Heraclius, impetrare non potuerat; id ei postero die venit in mentem, e lege Rupilia sortiri dicas⁵ oportere. Educit ex urna tres; iis, ut absentem Heraclium condemnent, imperat : itaque condemnant. Quæ, malum, ista fuit amentia? ecquando te rationem factorum tuorum redditurum putasti? ecquando his de rebus tales viros audituros existimasti? Petatur hereditas ea, quæ nulla⁶ debetur, in prædam prætoris? interponatur nomen civitatis? imponatur honestæ civitati turpissima persona⁷ calumniæ? Neque hoc solum : sed ita res agatur, ut ne simulatio quidem æquitatis ulla adhibeatur? Nam, per deos immortales, quid interest, utrum prætor imperet, vique cogat aliquem de suis bonis omnibus decedere, an hujusmodi judicium det, quo judicio, indicta causa, fortunis omnibus everti necesse sit?

XVIII. Profecto enim negare non potes, te ex lege Rupilia sortiri judicium¹ debuisse, quum præsertim Heraclius id postularet. Sin illud dices, te Heraclii voluntate ab lege recessisse : ipse te impedies ; ipse tua² defensione implicabere. Quare enim primum ille ipse adesse noluit, quum ex eo numero judices habe-

5. *Dicas*. Indices sorte eligere. *Dica* h. l. pro *dicaste*, giudice.

6. *Nulla debetur*. Nulla pro non sumitur; sic et Plautus in *Asinaria*, « quem in tonstrinam jusseram venire, is nullus venit ». Cf. *Ter. Hec. I*, 2, 4.

7. *Turp. p.* Desumptum ex fabulis, pro turpissimo negotio civitati manda-

to. Porro calumniatorum partes hac in re Syracusanis affinxerat, dum hereditatem hanc Verres petentes inducit.

XVIII. 1. Cod. Nann. et ed. Lamb. «judices». Sed judicium pro judicibus, ut supra, cap. 17, « sortiri dicas », id est, *δυναστέας*. J. V. L.

2. Addidere tu Grævius, Desjard.

ret, quos³ postularat? deinde tu cur post illius fugam iudices alios sortitus es, si eos, qui erant antea dati, utriusque dederas voluntate? deinde ceteras dicas omnes illo foro⁴ M. Postumius quæstor sortitus est: hanc solam tu illo conventu reperiere sortitus. Ergo, inquiet aliquis, donavit populo Syracusano illam hereditatem. Primum, si id confiteri velim, tamen istum condemnetis, necesse est: neque enim permissum est, ut impune nobis liceat, quod alicui eripuerimus, id alteri tradere. Verum ex ista reperietis hereditate ita istum prædatum, ut perpauca occulte fecerit; populum quidem Syracusanum in maximam invidiam sua infamia, alieno præmio⁵ pervenisse; paucos Syracusanos, eos, qui se nunc publice laudationis causa venisse dicunt, et tunc participes prædæ fuisse, et nunc non ad istius laudationem, sed ad⁶ communem litium æstimationem venisse.

Posteaquam damnatus est absens, non solum illius hereditatis, de qua ambigebatur, quæ erat H-S⁷ tricies, sed omnium bonorum paternorum ipsius Heraclii, quæ non minor erat pecunia, palæstræ Syracusanorum, hoc est, Syracusanis, possessio traditur⁸. Quæ

Beckius, Schütz, alii; omittunt cum Grutero plures. J. V. L.

3. Ernest. *quo*. Reposuimus *quos*, multis auctoribus. J. V. L.

4. *Illo foro*. Idem est hic ac conventus (gall. *ressort, étendue de juridiction*). Nota quæstores de mandato prætorum, jure dicendo circumire, ut apud Anglos faciunt «summi iudices».

5. *Alieno præmio*. H. è. palæstritarum; illi enim soli ex hoc Verris flagitio utilitatem percipere, ut qui soli diripiendæ fuerint hereditatis participes.

6. *Ad communem*. Socii isti furtorum Verris ideo nunc venisse videntur, ut causam ipsi suam defendant, et Verre damnato, ipsi litium æstimationum partem, quæ eis cum Verre communis est, exsolvant. Ipsi enim quod Heraclio, pro sua parte, abstulere, restituere repetundarum lege cogentur. Vide pro Rab. Post.

7. *H-S tricies*. Liber vetus Fabricii habet «H-S CCC». Sic quoque exhibit ed. Metell.

8. *Possessio traditur*. Prout erat in testamento præceptum; nisi statim ponerentur in hereditatis partem ve-

est ista prætura? Eripis hereditatem, quæ venerat a propinquo, venerat testamento, venerat legibus; quæ bona is, qui testamentum fecit, huic Heraclio, ante aliquanto, quam est⁹ mortuus, omnia utenda ac possidenda tradiderat; cujus hereditatis, quum ille aliquanto ante te prætorem esset mortuus, controversia fuerat nulla, mentionem fecerat nemo.

XIX. Verum esto, eripe hereditatem propinquis, da palæstritis; prædare in bonis alienis, nomine civitatis¹; evertē leges, testamenta, voluntates mortuorum, jura vivorum: num etiam patriis Heraclium bonis exturbare oportuit? Qui simul ac profugit, quam impudenter, quam palam, quam acerbe², dii immortales, illa bona direpta sunt! quam illa res calamitosa Heraclio, quæstiosa Verri, turpis Syracusanis, miseranda omnibus videbatur? Nam illud quidem statim curatur, ut, quidquid cælati argenti fuit in illis bonis, ad istum deferatur: quidquid Corinthiorum vasorum, stragulæ vestis³, hæc nemo dubitabat, quin non modo ex illa domo capta et oppressa, verum ex tota provincia ad istum comportari necesse esset. Mancipia, quæ voluit, abduxit; alia divisit. Auctio facta est; in qua cohors istius invicta⁴ dominata est. Verum illud est præclarum: Syracusani, qui præ-

nirent palæstritæ; injuste autem patrimonii decreta est possessio.

9. Meæ aures desiderant *esset*, e quo sæpe factum est; refertur enim ad tradiderat. Hæc Ernest. Sed nimis forte vir doctus tribuit in multis aurium suarum iudicio. J. V. L.

XIX. 1. *Nomine civitatis*. Hoc est, prætento palæstritarum nomine.

2. *Quam acerbe*. Græv. *acerbe* pro *acute* positum intelligit; h. e. iis hominibus missis, qui sinus omnes per-

tentarent, nihilque relinquerent intactum.

3. *Stragulæ vestis*. Man. punctum post hæc verba «stragulæ vestis» addit. — *Nemo dubitabat*. Utpote qui Verrem harum rerum studiosissimum, et apertissime rapacem cognoscerent.

4. *Invicta*. Non bellandi virtute, sed furandi rapacitate. Significat eam quid libuerit et quando voluerit pretio abstulisse.

fuerant his Heraclii bonis, verbo, redigendis⁵; re, dispartiendis, reddebant eorum negotiorum rationem in senatu: dicebant, scyphorum paria complura, hydrias⁶ argenteas, pretiosam vestem stragulam, multa mancipia pretiosa, Verri data esse; dicebant, quantum cuique, ejus jussu, nummorum esset datum. Gemenabant Syracusani; sed tamen patiebantur. Repente recitatur, uno nomine H-S CCL⁷ millia jussu prætoris data. Fit maximus clamor omnium, non modo optimi cujusque, neque eorum, quibus indignum semper visum erat, bona privati, populi nomine, per summam injuriam erepta; verum etiam ipsi illi auctores injuriæ⁸, et ex aliqua particula socii prædæ ac rapinarum, clamare cœperunt, sibi ut haberet hereditatem: tantus in curia clamor factus est, ut populus concurreret.

XX. Res ab omni conventu cognita, celeriter domum nuntiatur¹. Homo inimicus his, qui recitassent; hostis omnibus, qui acclamassent; exarsit iracundia ac stomacho. Verumtamen fuit tum sui dissimilis: nostis os hominis, nostis audaciam; tamen tum rumore populi, et clamore, et furto manifesto grandis pecuniæ perturbatus est. Ubi se collegit, vocat ad se Syracusanos: quia² non posset negare ab illis pecuniam datam, non quæsivit procul alicunde (neque enim probaret), sed proximum, pæne alterum³ filium,

5. *Redigendis*. In unam summam, quæ reip. numeraretur.—*Rationem in senatu*. Quod autem hi rationem redderent, vel ex consuetudine omnium qui hæc præfuisse est factum, vel quod res ad palæstram pertinentes ita pro publicis habebantur, ut de iis senatus inquireret.

6. Lambin. Gruter. alii, «hydrias argenteas pretiosas, v. str. multam, m. pr.» J. V. L.

7. *H-S CCL*. H. e. circ. 51,250 fr.

8. *Auctores injuriæ*. Cleomenes et Æschrio.

XX. 1. Herelius, post hoc verbum, e corruptis reliquiis cod. Metelli, «iste mutet», eruit acutissime, «isti Mucio». Schütz audacter recepit. J. V. L.

2. *Quia*. Metel. qui.

3. *Alterum filium*. Generum suum; hominem frugi, nec filii similem quem sæpe impurum ac flagitiosum ostendit.

quem illam pecuniam diceret abstulisse; ostendit se reddere coacturum. Qui posteaquam id audivit, habuit dignitatis, et ætatis, et nobilitatis suæ rationem; verba apud senatum fecit, docuit ad se nihil pertinere; de isto id, quod omnes videbant, neque ille quidem obscure, loquutus est. Itaque illi Syracusani statuam postea statuerunt; et is, ubi primum potuit, istum reliquit, de provinciaque decessit. Et tamen aiunt eum⁴ queri solere nonnumquam, se miserum, quod non suis, sed suorum⁵ peccatis et criminibus prematur. Triennium provinciam obtinuisti: gener electus adolescens unum annum tecum fuit; sodales, viri fortes, legati tui primo anno te reliquerunt; unus legatus P. Tadius, qui erat reliquus, non ita multum tecum fuit: qui si semper una fuisset, tamen summa cura tum tuæ⁶, tum multo etiam magis suæ famæ perpercisset. Quid est, quod tu alios accuses? quid est, quamobrem putes te tuam culpam non modo derivare⁷ in aliquem, sed communicare cum altero posse? Numerantur illa H-S ducenta quinquaginta⁸ Syracusanis: ea quemadmodum ad istum postea per pseudothyrum⁹ revertantur, tabulis vobis, et testibus, iudices, planum faciam.

XXI. Ex hac iniquitate istius et improbitate, iudices, quod præda ex illis bonis ad multos Syracusanos, invito populo senatuque Syracusano, venerat, illa sce-

4. *Eum*. Verrem ironice appellat.

5. *Suorum*. Edd. vett. « plures suorum comitum ».

6. *Tum tuæ*. Nihil commisisset quod tuæ et multo magis famæ suæ officere potuisset.

7. *Derivare*. Totum transferre. *Communicare* partem.

8. *Quinq.* Vetus « H-S ccc quin-

quaginta »; quem postea numerum constanter exhibet.

9. *Pseudothyrum*. Vox græca; Latinis, latens porta (gall. *porte dérobée*). Quam palam exire a Verre pecunie viderentur, latenter postea et per porticum revertebantur. Eadem dicendi figura paulo inf. dicit: « pecuniam, quæ via visa est exire, semita revertisse ».

lera¹ per Theomnastum, et Æschrionem, et Dionysodorum, et Cleomenem invitissima civitate facta sunt, primum ut urbs tota spoliaretur, qua de re alius mihi locus² ad dicendum est constitutus; ut omnia signa iste per eos homines, quos nominavi, omne ebur ex ædibus sacris, omnes undique tabulas pictas, deorum denique simulacra, quæ vellet, auferret; deinde ut in curia Syracusis, quem locum illi buleuterium³ vocant, honestissimo loco, et apud illos clarissimo, ubi illius ipsius M. Marcelli (qui eum Syracusanis locum, quem eripere belli ac victoriæ lege posset, conservavit et reddidit) statua ex ære facta; ibi inauratam isti, et alteram filio statuam posuerint: ut, dum istius hominis memoria maneret, senatus Syracusanus sine lacrymis et gemitu in curia esse non posset. Per eosdem istius injuriarum, furtorum, uxorumque socios, istius imperio Syracusis Marcellea⁴ tolluntur maximo gemitu luctuque civitatis: quem illi diem festum quum recentibus beneficiis C. Marcelli⁵ debitum reddebant, tum generi, nomini, familiæ Marcellorum maxima voluntate tribuebant. Mithridates in Asia, quum eam

XXI. 1. *Illæ scelera.* Vetus codex, «etiam illa scelera sunt quæ per Theomnastum».

2. *Alius mihi locus.* Is est liber IV de signis.

3. Βουλευτήριον, senatus. Beck. scribere jubet «buleuterion». J. V. L.

4. *Marcellæa.* Erant festi dies in honorem M. Marcelli, Siciliæ primum victoris, dein patroni, a Syracusanis instituti, quos, urbe capta, benignissime habuerat. Hos dies Syracusani, Verris jussu, inviti exemerunt, ut in ejus locum *Verrea* reponerent. Ceterum fieri in provinciis solebat, ut, qui magistratus eas bene administras-

set, illi festi dies et sana interdum constituerentur. Quo in genere græca abundavit assentatio. Sic Asiani *Mucia* in Q. Mucii Scævola, Asiæ prætoris, honorem; iidemque posterius *Lucullia* Luculli gratia, celebraverunt. Plura vide apud Mongault, Comment. Reg. Numism. Acad. I, et Desjard. cujus de hac re optimus exstat *Excursus*.

5. *C. Marcelli.* Qui Siciliæ præfuit A. U. 675. Unde male vulg. «M. Marcelli». Verba enim illa «recentibus beneficiis» plane indicant, non de illo agi qui Syracusas cepit, sed de C. Marcello, qui prætor post Lepidum

provinciam totam occupasset, Mucia⁶ non sustulit. Hostis, et hostis⁷ in ceteris rebus nimis ferus et immanis, tamen honorem hominis, deorum religione consecratum, violare noluit: tu Syracusanos unum diem festum Marcellis impartire noluisti; per quos illi adepti sunt, ut ceteros dies festos agitare possent. At vero præclarum diem⁸ reposuisti, Verrea ut agerent, et ut ad eum diem, quæ sacris epulisque opus essent, in complures annos locarentur⁹. Sed jam in tanta istius impudentia remittendum aliquid videtur, ne omnia contendamus, ne omnia cum dolore agere videamur. Nam me dies, vox, latera deficiant, si hoc nunc vociferari velim, quam miserum indignumque sit, istius nomine apud eos diem festum esse, qui sese istius opera funditus extinctos esse arbitrentur. O Verrea præclara! quoquam¹⁰ [si] accessisti, quo non attuleris tecum istum diem? etenim quam tu domum, quam urbem adiisti, quod fanum denique, quod non eversum atque extersum reliqueris? Quare appellentur sane ista Verrea, quæ non ex nomine, sed ex manibus¹¹ naturaque tua constituta esse videantur.

XXII. Quam facile serpat injuria, et peccandi consuetudo; quam non facile reprimatur, videte, iudices.

non ita multo ante in Sicilia fuerat.

6. *Mucia*. Quæ scilicet Asiani in Q. Mucii Scævola, qui abstinenter provinciam rexerat, honorem instituerant.

7. *Et hostis*. Odio in Romanos Hannibal, ut ait Vell. II, 18.

8. *Alii*, « diem illis reposuisti ». J. V. L.

9. *Locarentur*. Ut quidam homines, pretio conducti, se, quæ opus essent, omnia ad diem daturos, pollicerentur.

10. *Quoquam*. Manca lectio. Cod. Paris. « quo quasi accessisti ». Lamb.

« quasi quoquam accessisti ». Hotom. « quonam enim accessisti ». Fortasse scripsit Cicero « quamquam quo accessisti ». Interea sequenti sumus Harles. et Gœrenz. ad Cic. de Legg. Sensus est: Quem locum adiit, quo non secum attulerit *Verrea*, quia omnia everrit diligenter. Sic inf. *eversum* a verbo *everrere*. Quam in vocem sæpius ludit orator.

11. J. Lucan. Hotom. scribendum censent *moribus*; Schützcius paruit. J. V. L.

Bidis oppidum est, tenue sane, non longe a Syracusis. Hujus longe primus civitatis est Epicrates quidam. Huic hereditas H-S quingentorum¹ millium venerat a muliere quadam propinqua, atque ita propinqua, ut ea etiamsi intestata esset mortua, Epicratem Bidinorum legibus heredem esse oporteret. Recens Syracusana erat illa res, quam ante demonstravi, de Heraclio Syracusano, qui bona non perdidisset, nisi ei venisset hereditas. Huic quoque Epicrati venerat, ut dixi, hereditas. Cogitare coeperunt ejus inimici, nihilo minus eodem prætore hunc everti bonis posse, quo Heraclius esset eversus. Rem occulte instituunt; ad Verrem per ejus interpretes² deferunt: ita causa componitur, ut item palæstritæ Bidenses peterent ab Epicrate hereditatem, quemadmodum palæstritæ Syracusani ab Heraclio petissent. Numquam vos prætorem tam palæstricum³ vidistis: verum ita palæstritas defendebat, ut ab illis ipse unctior discederet. Qui statim⁴, quum præsensisset, jubet cuidam suorum amicorum numerari H-S LXXX⁵. Res occultari satis non posse⁶. Per quemdam eorum, qui interfuerat⁷, fit Epicrates certior. Primo negligere et contemnere coepit, quod causa

XXII. 1. *H-S quingentorum* (circ. 102,500 fr.)

2. *Interpretes*. Id est, transactores et emissarios qui judicia corrumpebant; ut Act. I, 12, qui aut sequestres aut interpretes judicii corrumperendi solent esse.

3. *Palæstricum*. Manut. «palæstritam». Palæstritarum studiosum. Jocus. — *Unctior*. Lantior, copiosior. Quod in palæstra, pugnaturi oleo inungebantur, et inde redibat Verres inunctus non oleo, sed pecunia. Sic Hor. Ep. I, 17, 12, «accedes siccus ad unctum».

4. *Qui statim*. Verres, quum præsensisset Bidinos palæstritas litem in Epicratem esse moturos, jubet ab eis, tamquam judicii pretium, quod secundum eos decernat, sestertium octoginta millia Volcatio amico suo numerari. Sed negotiatio illa inter Verrem et palæstritas, non satis occultari potuit, et certior factus Epicrates hereditati suæ insidias obtendi, aufugit.

5. *H-S LXXX* (16,400 fr.)

6. *Posse*. Omnes vett. edd. «non potest».

7. *Interfuerat*. MS «interfuerant».

prorsus, quod dubitari⁸ posset, nihil habebat. Deinde, quum de Heraclio cogitaret, et istius libidinem nosset; commodissimum putavit esse de provincia clam abire. Itaque fecit : profectus est Rhegium.

XXIII. Quod ubi auditum est, æstuarè illi, qui derant pecuniam : putare nihil agi posse, absente Epicrate. Nam Heraclius tum¹ affuerat, quum primum dati sunt iudices: de hoc, qui, antequam in jus aditum esset, antequam denique mentio controversiæ facta esset, discessisset, putabant nihil agi posse. Homines Rhegium proficiscuntur, Epicratem conveniunt : demonstrant id, quod ille sciebat, se H-S LXXX dedisse : rogant eum, ut id², quod ab ipsis abisset pecuniæ, curet; ab sese³ caveat, quemadmodum velit; de illa hereditate cum Epicrate neminem esse acturum. Epicrates homines multis verbis a se male acceptos dimisit. Redeunt illi Rhegio Syracusas : queri cum multis, ita ut fit, incipiunt, H-S LXXX nummum frustra dedisse. Res percrebruit : in ore atque sermone omnium cœpit esse. Verres refert illam⁴ suam Syracusanam : ait se velle de illis H-S LXXX cognoscere : advocat multos. Dicunt Bidini Volcatio se dedisse; illud non addunt, jussu istius. Volcatium vocat : pecuniam referri imperat. Volcatius animo æquissimo nummos affert, qui nihil amitteret⁵; reddit inspectantibus multis : Bidini nummos auferunt.

8. Alii, « disputari ». J. V. L.

XXIII. 1. Tum. Manut. Lamb. et MS Francii « tamen ».

2. Alii, « ut sibi id ». J. V. L.

3. Ab sese. Exigat a seipsis cautionem, qualem ipsi commodum erit; paratos esse se, quavis cautione, re-promittere neminem nomine heredita-

tis amplius ab ipso quidquam petitarum.

4. Refert illam. Locus ille Lambino et Hotomanno corruptus videtur, et addendum esse rationem putant. Male, ut opinor; nam facile intelligas si cantilenam aut fabulam subaudias.

5. Qui nihil amitteret. Quippe quæ

Dicet aliquis: Quid ergo in hoc Verrem reprehendis, qui non modo ipse fur non est, sed ne alium quidem passus est esse? Attendite: jam intelligetis hanc pecuniam, quæ via⁶ modo visa est exire ab isto, eandem semita revertisse. Quid⁷ enim? debuit⁸ prætor, cum cōnsilio re cognita, quum comperisset, suum comitem, juris, decreti, iudicii corrumpendi causa, qua in re ipsius prætoris caput existimatioque ageretur, pecuniam accepisse, Bidinos autem contra prætoris famam ac fortunas dedisse, non et in eum⁹, qui accepisset, animadvertisse¹⁰, et, in eos, qui dedissent? Tu, qui institueras in eos animadvertere, qui perperam judicassent, quod sæpe per imprudentiam fit; hos pateris impune discedere, qui ob tuum decretum, ob tuum iudicium, pecuniam aut dandam, aut accipiendam putarant? Volcatius idem apud te postea fuit, eques romanus, tanta accepta ignominia.

XXIV. Nam quid est turpius ingenuo¹, quid minus libero dignum, quam in conventu maximo cogi a magistratu furtum reddere? qui, si eo animo esset,

pecunia non ad eum, sed ad Verrem pervenisset, ita ut hanc restituendo, nihil damni Volcatius sentiret.

6. *Quæ vis.* Sic Hot. et Wittenb. Bibl. crit. part. II, pag. 10. Sensus est: Pecunia quæ palam visa est exire ab isto, occulte est ei reddita. Sic supra, cap. 20, « per pseudothyron » dixit. Vulgo inepte: « qua via... eadem semita ».

7. Alii, « quid enim debuit pr. fecisse ». J. V. L.

8. *Debuit.* Si non collusisset Verres eum Volcatio et Bidinis, debuit in eos animadvertere.

9. Alii, « et non in eum ». Sed Schütz, post Hotom. retraxit non

ante *debuit*. In eodem orationis tractu, cod. Nannii post « Bidinos autem » repetit « pecuniam ». J. V. L.

10. *Animadvertisse.* Egrege de hac re Cicero ad Quintum Fratr. I, 1: « Denique hæc opinio sit, non modo iis, qui aliquid acceperint, sed iis etiam, qui aliquid dederint, te inimicum, si cognoveris, futurum. Neque vero quisquam dabit, quum erit hoc perspectum, nihil per eos, qui simulant se apud te multum posse, abs te solere impetrari ».

XXIV. 1. *Ingenuo.* Hominum conditio apud Rom. triplex: alii erant servi, alii liberi, alii ingenui, qui et nobiles dicti.

quo non modo eques romanus, sed quivis liber debet esse; adspicere te postea non potuisset, inimicus, hostis esset, tanta contumelia accepta; nisi tecum colluisset, et tuæ potius existimationi servisset, quam suæ. Qui quam tibi amicus non modo tum fuerit, quamdiu tecum in provincia fuit, verum etiam nunc sit, quum jam a ceteris amicis sis relictus, et tu intelligis, et nos existimare possumus. An hoc solum argumentum est, nihil isto imprudente factum, quod Volcatius ei non succensuit²? quod iste nec in Volcatium, nec in Bidinos animadvertit? Est magnum argumentum: verum illud maximum, quod illis ipsis Bidinis, quibus iratus esse debuit, ut a quibus comperit, quod jure agere cum Epicrate nihil possent, etiamsi adesset, idcirco suum decretum pecunia esse tentatum³: his, inquam, ipsis non modo illam hereditatem, quæ Epicrati venerat; sed, ut in Heraclio Syracusano, item in hoc, paullo etiam atrocius, quod Epicrates appellatus omnino non erat, bona patria fortunasque ejus Bidinis tradidit. Ostendit enim novo modo, si quis quid ab absente peteret, se auditurum. Adeunt Bidini, petunt hereditatem. Procuratores⁴ postulānt, ut se ad leges suas rejiciat, aut ex lege Rupilia dicam scribi jubeat. Adversarii non audebant contra dicere: exitus nullus reperiebatur. Insimulant homi-

2. *Succensuit.* Scilicet, ob tantam acceptam contumeliam.

3. *Tentatum.* Periculum illos facere voluisse num pecunia corruptus prætor ad inique decernendum adduceretur.

4. *Procuratores.* Amici Epicratis petunt, ut se Epicratis causam suscipientes ad leges sibi peculiares remittat, aut saltem Epicrati ex Rupilia

lege judicium intendant. Tunc impediti Bidini accusant Epicratem aufugisse, ut creditores frustretur et possessionem ex prætoris edicto petunt. Sed bona possideri jubere non potuit prætor, quod aderant procuratores qui actiones contra Epicratem institutas se cum satisfactione excepturos profiteantur. De his conf. pro Quintio, ubi fusius explicantur.

nem fraudandi causa discessisse; postulant, ut bona possidere liceat. Debebat Epicrates nullum⁵ nummum nemini: amici, si quis quid peteret, iudicium se passuros; iudicatum solvi satisdaturus esse dicebant.

XXV. Quum omnia consilia¹ frigerent; admonitu istius insimulare cœperunt, Epicratem literas publicas corrupisse: a qua suspicione ille aberat plurimum. Actionem ejus rei postulant. Amici recusare, ne quod novum iudicium, ne qua ipsius² cognitio, illo absente, de existimatione ejus constitueretur: et simul idem illud postulare non desistebant, ut se ad leges suas rejiceret. Iste amplam occasionem calumniæ nactus, ubi videt esse aliquid, quod amici absentem³ Epicratem nollent defendere; asseverat se ejus rei in primis actionem esse daturum. Quum omnes perspicerent, ad istum non modo illos nummos, qui per simulationem ab isto exierant, revertisse; sed multo etiam plures eum postea nummos⁴ abstulisse: amici Epicratem defendere destiterunt; iste Epicratis⁵ bona Bidinos omnia possidere et sibi habere jussit. Ad illa H-S 10 millia hereditaria accessit ipsius antiqua H-S quindecies⁶ pecunia. Utrum⁷ res ab initio ita ducta est? an ad extremum ita perducta est? an ita parva est pecunia? an is homo Verres, ut hæc, quæ dixi, gratis facta esse videantur?

5. Græv. et Ernest. e cod. Nann. « nullum nummum nemini ». Paulo inf. olim erat « iudicio secum agi passuros », quod e conjectura ediderat Victorius. Correx. Ernest. ex consuetudine Ciceroniana, ut Verr. III, 28.

XXV. 1. Vulg. « iudicia ». J. V. L.

2. Viri docti malunt *istius*, nempe Verris, non sine causa. J. V. L.

3. Grævius profert e codice Nan-

nio, « absente Epicrate ». J. V. L.

4. Posterius « nummos » Ernest. vix credit esse a Cicerone. Cur non credat? J. V. L.

5. *Epicratis*. Quasi latitantis, nec defensi.

6. *H-S quindecies* (307,500 fr.)

7. *Utrum*. Utrum totum illud Epicratis negotium ita exorsus est Verres, ita ad finem perduxit, ita parvam ex

Hic nunc de miseria Siculorum, iudices, audite. Et Heraclius ille Syracusanus, et hic Bidinus Epicrates, expulsi bonis omnibus, Romam venerunt: sordidati, maxima barba et capillo, Romæ biennium prope fuerunt. Quum L. Metellus in provinciam profectus est, tum isti bene commendati cum Metello una proficiscuntur. Metellus simul ac venit Syracusas, utrumque rescidit, et de Epicrate, et de Heraclio. In utriusque bonis nihil erat⁸, quod restitui posset; nisi quod moveri loco non poterat.

XXVI. Fecerat hæc egregie primo adventu Metellus, ut omnes istius injurias, quas modo posset, rescinderet, et irritas faceret. Heraclium restitui jusserat: non restituebatur¹: quisquis erat² eductus senator Syracusanus ab Heraclio, duci jubebat: itaque permulti ducti sunt. Epicrates quidem continuo restitutus est. Alia judicia Lilybæi, alia Agrigenti, alia Panormi restituta sunt. Census³, qui isto prætore sunt habiti, non servaturum se, Metellus ostenderat: decumas, quas iste contra legem Hieronicam vendiderat⁴, sese venditurum Hieronica lege, dixerat⁵. Omnia erant Metelli ejusmodi, ut totam istius præturam⁶ retexere

eo redegit pecuniam, etc. ut hæc, etc.

8. *Nihil erat.* Res enim mobiles ex edicto venditæ ac per varios locos dispersæ haud facile rursus inveniri et restitui poterant. Apparet inde omnino in provinciis licuisse prætori succedenti, a præcedente prætore rem judicatam rescindere. Conf. Gaius, IV, 105, 106.

XXVI. 1. In cod. veteri apud Hot. «vi restituebatur». Male. J. V. L.

2. *Quisquis erat.* Quisquis senator Syracusanus ab Heraclio in judicium ductus esset, propterea quod bona Heraclii a se possessa non restitueret,

eum Metellus duci in vincula jubebat, vel eum Heraclio addicebat. Pro *eductus* Lamb. e cod. Fabr. dedit *editus*. Male.

3. *Census.* Facultatum cujusque erat æstimatio, ex qua onera cuique imponebantur. — *Non servaturum.* Quia inique erant descripti.

4. *Vendiderat.* Locaverat publicanis. Verr. IV, 6.

5. *Dixerat.* Editio Verrinarum prima, *edixerat.* Forte excidit littera ob ultimam præcedentis verbi. J. V. L.

6. *Præturam.* Lamb. «ut non tam suam pr. gerere, quam istius retexere

videretur. Simul atque ego in Siciliam veni, mutatus est. Venerat ad eum illo biduo Letilius quidam, homo non alienus a literis⁷: itaque eo iste tabellario semper usus est. Is epistolas complures attulerat: in his unam domo, quæ totum immutarat hominem. Repente cœpit dicere, se omnia Verris causa velle; sibi cum eo amicitiam cognationemque esse. Mirabantur omnes, hoc ei tum denique in mentem venisse, posteaquam tam multis eum factis decretisque jugulasset. Erant qui putarent, Letilium legatum a Verre venisse, qui gratiam, amicitiam cognationemque commemoraret. Ex illo tempore a civitatibus laudationes petere; testes non solum deterrere verbis, sed etiam vi retinere cœpit. Quod ego nisi meo adventu illius conatus aliquantulum repressissem, et apud Siculos non Metelli, sed Glabronis⁸ literis, ac lege pugnassem; tam multos huc evocare non potuissem.

XXVII. Verum, quod institui dicere, miserias cognoscite Siculorum. Heraclius ille et Epicrates longe mihi obviam cum suis omnibus processerunt; venienti Syracusas egerunt gratias, flentes; Romam decedere mecum cupierunt. Quod erant mihi oppida complura etiam reliqua, quæ adire vellem, constitui cum hominibus, quo die mihi Messanæ præsto essent. Eo mihi nuntium miserunt, se a prætore retineri. Quibus ego testimonium denuntiavi, quorum nomina edidi Metello¹: cupidissimi veniendi, maximis injuriis affecti,

videretur. At vulgata ut brevior, sic et aptior est. J. V. L.

7. *A literis*. I. e. ab epistolis, utpote tabellarius. Subfrigidior forsan jocus. — *Epistolas*. Intelligenda h. l. chirographa (gall. *lettres-de-change*), ut infra dicit.

8. *Glabronis*. Qui Romæ prætor

quæstionem repetundarum exercebat, et Ciceroni in Siciliam proficiscenti potestatem quærendi, exscribendi omnia dederat. — *Legs*. Cornelia de repetundis.

XXVII. 1. *Edidi Metello*. Scilicet ut iis potestatem faceret de provincia discedendi.

adhuc non venerunt. Hoc jure sunt socii, ut iis ne deplorare quidem de suis incommodis liceat.

Jam Heraclii Centuripini, optimi nobilissimique adolescentis, testimonium audistis : a quo² H-S c millia per calumniam malitiamque petita sunt. Iste pœnis compromissisque interpositis, H-S ccc extorquenda curavit; quodque judicium secundum Heraclium de compromissis factum erat, quod civis Centuripinus inter duos cives judicasset, id irritum jussit esse; eumque judicem falsum judicasse judicavit; in senatu ne esset, locis commodisque publicis uti vetuit; si quis eum pulsasset, edixit, sese judicium injuriarum non daturum; quidquid ab eo peteretur, judicem de sua cohorte daturum, ipsi autem nullius actionem rei sese daturum. Quæ istius auctoritas tantum valuit, ut neque illum pulsaret quisquam, quum prætor in provincia sua verbo permetteret, re hortaretur; neque quisquam ab eo quidquam peteret, quum iste calumniæ licentiam sua auctoritate dedisset³: ignominia⁴ autem illa gravis tamdiu in illo homine fuit, quamdiu iste in provincia mansit. Hoc injecto metu iudicibus, novo more, nullo exemplo, ecquam rem putatis esse in Sicilia, nisi ad nutum istius, iudicatam? Utrum id solum videtur esse actum, quod est

2. *A quo.* Heraclius, quum ab eo fraudulenter et injuste sestertium centum millia (20,500 fr.) peterentur, a se deberi negavit. Res ad arbitrum deferretur, interpositis, per mutuam inter litigantes stipulationem, sestertium ter centum millibus (61,500 fr.); quam solveret summam, qui arbitri sententiæ non pareret. Eam pecuniam Verres extorquet. Interea dicit sententiam secundum Heraclium arbitri. Erat legitimum hoc iudicium, ab ar-

bitro compromissario factum; civis inter cives ex lege Rupilia iudicaret. Verres nihilominus id irritum esse jubet; et quamvis « arbitri sententia nihil ad prætorem pertineat, quamvis sententia illa semel prolata tantopere valeat, ut ipse eam mutare non possit », Digest. IV, 8; iudicium rescindit.

3. Edd. pr. « possedisset ». Manut. Lambin. Oliv. « præbuisset ». Nos Gruterum sequimur. J. V. L.

4. *Ignominia.* Amissio senatoriæ

tamen actum, ut Heraclio pecunia eriperetur? an etiam illud, in quo præda erat maxima, ut, nomine judiciorum⁵, omnia bona atque fortunæ in istius unius essent potestate?

XXVIII. Jam vero in rerum capitalium quæstionibus¹ quid ego unamquamque rem colligam et causam? Ex² multis similibus ea sumam, quæ maxime improbitate excellere videbuntur. Sopater quidam fuit Halicyensis, homo domi suæ cum primis locuples atque honestus. Is ab inimicis suis apud C. Sacerdotem prætorem rei capitalis quum accusatus esset, facile eo judicio est liberatus. Huic eidem Sopatro iidem inimici ad C. Verrem, quum is Sacerdoti successisset, ejusdem rei nomen detulerunt. Res Sopatro facilis videbatur, et quod erat innocens, et quod Sacerdotis judicium improbare istum ausurum non arbitrabatur. Citatur reus: causa agitur Syracusis: crimina tractantur ab accusatore ea, quæ erant antea non solum defensione, verum etiam judicio dissoluta. Causam Sopatri defendebat Q. Minucius, eques romanus in primis splendidus atque honestus, vobisque, judices, non ignotus. Nihil erat in causa, quod metuendum, aut omnino quod dubitandum videretur. Interea istius libertus, et accensus³ idem Timarchides, qui est, id quod ex plurimis testibus priore actione didicistis, rerum hujusmodi omnium transactor⁴ et administer, ad Sopatrum venit; monet hominem, ne nimis judicio Sacerdotis, et causæ confidat; accusatores inimi-

ginitatis, et locorum publicorum interdictio.

5. *Nomine judiciorum.* Ut per ea, quæ dabat, judicia ipsius ex arbitrio omnium decus ac bona penderent.

XXVIII. 1. *Quæstionibus.* Vide append. de jud. ad calc. vol. parte II.

2. *Ex multis similibus.* Hotom. c. codd. laudat, « Ex multis millibus ». J. V. L.

3. *Accensus.* De hac voce vide Verr. I, 28.

4. *Transactor.* Interpret mercaturæ judiciorum faciendæ.

cosque ejus habere in animo pecuniam prætori dare; prætorem tamen ob salutem⁵ malle accipere; et simul malle, si fieri posset, rem judicatam non rescindere. Sopater, quum hoc illi improvisum atque inopinatum accidisset, commotus est sane; neque in præsentia, Timarchidi quid responderet, habuit, nisi, se consideraturum, quid sibi de ea re esset faciendum; et simul ostendit, se in summa difficultate esse nummaria. Post ad amicos retulit; qui quum ei fuissent auctores redimendæ salutis, ad Timarchidem venit: expositis suis difficultatibus, hominem ad H-S LXXX⁶ perducit; eamque ei pecuniam numerat.

XXIX. Posteaquam ad causam dicendam ventum est; tum vero sine metu, sine cura omnes erant, qui Sopatrum defendebant: crimen nullum erat: res judicata: Verres nummos acceperat. Quis posset dubitare¹, quidnam esset futurum? Res illo die non peroratur: dimittitur judicium. Iterum ad Sopatrum Timarchides venit: ait, accusatores ejus multo majorem pecuniam prætori polliceri, quam quantam hic dedisset; proinde, si saperet, videret, quid² sibi esset faciendum. Homo, quamquam erat et Siculus, et reus, hoc est, et jure iniquo, et tempore adverso, ferre tamen atque audire diutius Timarchidem non potuit. Facite, inquit, quod vobis³ libet; daturus non sum

5. Sic Oliv. Lalleu. Edd. pr. «absolute». Ernest. «ab salute». Quod eodem modo, verum multo subtilius, interpretatur, quam si *ob salutem* esset.

6. *Ad H-S LXXX* (16,400 fr.) Animadvertendum quam artificiose hanc totam rem enarret orator; in hoc enim peccabat Sopater, quod prætorem corrumpere tentaret. Verum ita rem proponit orator, ut solus nocens

videatur Verres, qui primus Sopatrum per Timarchidem de numeranda pecunia tentaverit, et cum ad id damnationis metu adegerit.

XXIX. 1. *Posset*. Franc. «qui possunt dubitare».

2. Quatuor has voces unus et alter codd. non agnoscunt. Brevior lectio Grutero verior videtur. J. V. L.

3. *Vobis*. Abest hæc vox a Metell.

amplius. Idemque hoc amicis ejus et defensoribus videbatur : atque eo etiam magis, quod iste, quoquo modo se in ea quæstione præbebat, tamen in consilio habebat homines honestos e conventu⁴ Syracusano, qui Sacerdoti quoque in consilio fuerant tum, quum esset idem hic Sopater absolutus. Hoc rationis habebant⁵, facere eos nullo modo posse, ut eodem crimine, iisdem testibus, Sopatrum condemnarent iisdem homines, qui antea absolvissent. Itaque hac una spe ad iudicium venit. Quo posteaquam ventum est, quum in consilium frequentes convenissent iisdem, qui solebant, et hac una spe tota defensio Sopatri niteretur, consilii frequentia et dignitate, et quod erant, ut dixi, iisdem, qui antea Sopatrum eodem illo crimine liberarant : cognoscite hominis apertam, ac non modo non ratione, sed ne dissimulatione quidem tectam improbitatem et audaciam. M. Petilium, equitem romanum, quem habebat in consilio, jubet operam dare⁶, quod rei privatæ iudex esset. Petilius recusabat, quod suos amicos⁷, quos sibi in consilio esse vellet, ipse Verres retineret. Iste, homo liberalis, negat se quemquam retinere eorum, qui Petilio vellent adesse. Itaque discedunt omnes : nam ceteri quoque impetrant, ne retineantur; qui se velle dicebant alterutri

4. *E conventu.* Solebant magistratus provinciales in certis quibusdam oppidis *conventus agere* (Verr. V, 11), id est, forum constituere, in quo iurisdictionem exercerent. Scilicet certo die *conveniebant* in forum selecti homines qui prætori adessent, et quibus privata iudicia committeret. *Consilium* vero ex selectis in conventu viris constabat, quorum consilio in causis publicis utebatur prætor.

5. *Hoc rationis habebant.* Scilicet

ita Sopatri amici ratiocinabantur, nullo modo neque a Verre, neque a ceteris Sopatri adversariis effici posse, ut ab iisdem Sopater damnaretur, qui antea absolverant.

6. *Operam dare.* Jubet eum discedere, et rei cuidam inter privatos componendæ, cuius iudex esset, vacare.

7. *Suos amicos.* Nempe amicos, quos Petilius elegerat, ut sibi, istius rei privatæ iudici, adessent in consilio.

eorum⁸, qui tum illud iudicium habebant, adesse. Itaque iste solus cum sua cohorte nequissima relinquitur. Non dubitabat Minucius, qui Sopatrum defendebat, quin iste, quoniam consilium dimisisset, illo die rem illam quæsiturus non esset: quum repente jubetur dicere. Respondet⁹: Ad quos? Ad me, inquit, si tibi idoneus videor, qui de homine Siculo ac Græculo iudicem. Idoneus es, inquit; sed perverlem adessent ii, qui affuerant antea, causamque cognorant. Dic, inquit: illi adesse non possunt. Nam hercule, inquit Q. Minucius, me quoque Petilius, ut sibi in consilio adessem, rogavit. Et simul a subselliis abire cœpit. Iste iratus hominem verbis vehementioribus prosequitur, atque ei gravius etiam minari cœpit, quod in se tantum crimen invidiamque¹⁰ conflaret.

XXX. Minucius, qui Syracusis sic negotiaretur, ut sui juris¹ dignitatisque meminisset, et qui sciret, ita se in provincia rem augere² oportere, ut ne quid de libertate deperderet, homini quæ visa sunt, et quæ tempus illud tulit et causa, respondit: causam sese, dimisso atque ablegato consilio, defensurum negavit. Itaque a subselliis discessit; idemque hoc, præter Siculos³, ceteri Sopatri amici advocatique fecerunt. Iste, quamquam est incredibili importunitate et audacia, tamen subito solus destitutus, pertimuit et conturbatus est. Quid ageret, quo se verteret, nesciebat. Si dimi-

8. *Alterutri eorum*. Id est, litigatorum, qui rem suam coram Petilio disceptabant. Adesse alicui, proprie est alicujus se profiteri patronum.

9. F. Ursino placuit lectio vet. codicis, « Respondet, abiisse iudices. Annon, inquit, tibi idoneus videor, etc. » J. V. L.

10. *Crimen invidiamque*. Quod tam

amplam sui criminandi seque in invidiam vocandi omnibus præberet materiam.

XXX. 1. *Ut sui juris*. Ut se civem rom. atque equitem esse meminisset.

2. Edd. pr. et nonnulli codd. *agere*, quod frustra probat Nannius. J. V. L.

3. *Siculos*. Quos Verris metus retinebat.

sisset eo tempore quæstionem, post illis adhibitis⁴, quos ablegarat, absolutum iri Sopatrum videbat : sin autem hominem miserum atque innocentem condemnasset, quum ipse prætor sine consilio, reus autem sine patrono atque advocatis fuisset, iudiciumque C. Sacerdotis rescidisset; invidiam se sustinere non posse tantam arbitrabatur. Itaque æstuabat dubitatione; versabat se in utramque partem, non solum mente, verum etiam corpore : ut omnes, qui aderant, intelligere possent, in animo ejus metum cupiditatemque⁵ pugnare. Erat hominum conventus maximus, summum silentium, summa expectatio, quonam esset ejus cupiditas eruptura : crebro demittebat⁶ se accensus ad aurem Timarchides. Tum iste⁷ aliquando, Age, dic, inquit. Sopatrus implorare hominum atque deum fidem⁸, ut cum consilio cognosceret. Tum repente iste testes citari jubet. Dicit unus et alter breviter : nihil interrogatur : præco dixisse⁹ pronuntiat. Iste, quasi metueret, ne Petilius, privato illo iudicio transacto aut dilato, cum ceteris in consilium reverteretur, ita properans de sella exsiluit : hominem innocentem, a C. Sacerdote absolutum, indicta causa, de sententia scribæ, medici, aruspiciisque condemnavit.

XXXI. Retinete, retinete hominem¹ in civitate,

4. *Adhibitis*. Vetns habet « adhibitis in consilium ».

5. *Cupiditatemque*. Nannii et Metelli codex, « metum cum cupiditate ».

6. Olim « dimittebat ». Jure optimo recepit Lallem. emendationem Lambini. J. V. L.

7. *Tum iste*. Tandem Verres Sopatrum loqui jubet.

8. *Fidem*. Metell. et Fabric. codex post hoc verbum habent « orare, atque

obsecrare », quam Garatonius lectionem defendit.

9. *Dixisse*. Verbum solemne in iudiciis, quod per præconem, causa utrimque perorata, pronuntiabatur, ut in consilium iudices dimitterentur. Vid. Brisson. For. V, p. 534.

XXXI. 1. *Retinete hominem*. Illud a Cicerone verbum adhibetur, quoniam qui repetundarum damnatus fuerat, exsilio multari soleret. —

judices : parcite , et conservate , ut sit qui nobiscum res judicet ; qui in senatu sine ulla cupiditate de bello et pace sententiam ferat². Tametsi minus id quidem nobis , minus populo romano laborandum est , qualis istius in senatu sententia futura sit. Quæ enim ejus auctoritas erit? quando iste sententiam dicere audebit , aut poterit? quando autem homo tanta luxuria atque desidia , nisi februario³ mense , adspirabit in curiam? Verum veniat sane : decernat bellum Cretensibus⁴ ; liberet⁵ Byzantios ; regem appellet Ptolemæum⁶ ; quæ vult Hortensius , omnia dicat et sentiat : minus hæc ad nos , minus ad vitæ nostræ discrimen , minus ad fortunarum nostrarum periculum pertinent.

Illud , illud est capitale , illud formidolosum , illud optimo cuique metuendum , quod iste , ex hoc judicio

Nobiscum. MSS Parisienses , « vobiscum » . J. V. L.

2. Lambin. « dicat » contra libros omnes . J. V. L.

3. *Februario.* Qui totus mensis legationibus exterarum gentium audiendis erat destinatus. Quum autem provinciales legati senatorum sententias sæpius emere cogebantur , tunc venturum Verrem dicit , pretio nimirum adductum , ut venalem sententiam habeat.

4. *Cretensibus.* Cretenses , victo M. Antonio totius oræ maritimæ curatore (Divin. 17. Verr. I , 23) , legatos Romam miserunt qui antiqua fœdera revocarent. Illis favebant Pompeius et magna senatus pars ; Hortensius contra et Metellus , consules designati , bellum suadebant ; quæ valuit sententia. Creta provincia Hortensio obtigit , qui , pacis magis quam belli artibus florens , eam Metello collegæ cessit. Metellus , quamvis se Cretenses Pompeio dedidissent , insulam totam sub-

egit , de ea triumphavit , et *Creticus* cognominatus est. Vid. Flor. III , 7. Liv. Epit. 99. Appian. de reb. Cret. I , p. 99 edit. Schweigh.

5. *Liberet.* Efficiat ut Byzantium non amplius provinciæ forma utatur , sed libera sit , suisque legibus et magistratibus regatur. Byzantios postea Clodius tribunus plebis A. U. 695 lege lata , liberavit. Plinius , Hist. Nat. IV , 1 , ut « oppidum liberæ conditionis » memorat.

6. *Ptolemæum.* Pessimus ille rex , cognomine Αὐλητής (Strabo , XVII , 11) , regno depulsus ab Alexandrinis , Romam venerat , ibique aperte pecunia efficere studebat ut in regnum reduceretur. Sed magna erat controversia , quod hoc vetarent libri Sibyllini ; et qui reducendum censebant , inter se dissentirent , utrum hæc res ad Lentulum an ad Pompeium deferenda esset. Cic. Epist. ad Div. I , 2. Ad Quint. Fratr. II , 2. Appian. de

si aliqua vi se eripuerit, in iudicibus⁷ sit necesse est; sententiam de capite civis romani ferat; sit in ejus⁸ exercitu signifer, qui imperium iudiciorum tenere vult. Hoc populus romanus recusat, hoc ferre non potest: clamat, permittitque vobis; ut, si istis hominibus delectemini, si ex hoc genere splendorem ordini atque ornamentum curiæ constituere velitis, habeatis sane vobis⁹ istum senatorem; istum etiam de vobis iudicem, si vultis, habeatis: de se homines¹⁰, si¹¹ qui extra istum ordinem sunt, quibus ne rejiciundi quidem amplius, quam trium iudicum, præclaræ leges Corneliæ¹² faciunt potestatem, hunc hominem tam crudelem, tam sceleratum, tam nefarium, nolunt iudicare.

XXXII. Etenim si illud est flagitiosum (quod mihi omnium rerum turpissimum maximeque nefarium videtur), ob rem iudicandam pecuniam accipere, pretio habere addictam¹ fidem et religionem: quanto illud flagitiosius, improbius, indignius, eum, a quo pecuniam ob absolvendum acceperis, condemnare; ut ne prædonum² quidem prætor in fide retinenda consuetu-

Bell. Civ. Schweigh. 612. Sueton. in Cæs. 54. Dio Cass. 39.

7. *In iudicibus.* Quia senator est, et soli senatores tunc iudicabant. Sic fiet ut in sua sedeat decuria.

8. *Ejus.* Hortensii, causarum regis. Divin. 7.

9. Ita e codd. edidit Aldus nepos, 1583, et post eum Lambinus, Grævius, Ernest. Alii multi, «vobiscum». J. V. L.

10. *De se homines.* Hunc vos, senatores, retineatis, si quis ex vobis in iudicium vocabitur; sed si quis de populo reus fiet, is certe, quamvis tres tantum iudices ex lege ista Cor-

nelia, quæ adeo senatoribus favet, et reis ceteris adversatur, rejicere sibi liceat, in iis ipsis tribus Verrem ut crudelem, etc. rejiciet.

11. Lalleu. Beck. delent *si*, testibus MSS. J. V. L. — Nota in seqq. «rejiciundi... trium iudicum», græcam omnino phrasim.

12. *Corneliæ.* Vid. Ind. Legum.

XXXII. 1. *Addictam.* Sumpta metaphorâ de auctionibus, in quibus pluri licitanti res venalis addicitur; sic se Verres pluri nummorum numeranti mancipabat.

2. *Præd.* Qui vitam iis non adimere solent, qui pecunia redemerunt.

dinem conservaret? Scelus est accipere ab reo : quanto magis ab accusatore? quanto etiam sceleratius ab utroque? Fidem quum proposuisses venalem in provincia, valuit apud te plus is, qui pecuniam majorem dedit. Concedo : forsitan aliquis aliquando ejusmodi quippiam fecerit. Quum vero fidem ac religionem tuam jam alteri addictam pecunia accepta ³ habueris, post eamdem adversario tradideris majore pecunia ; utrumque falles? et trades cui voles? et ei, quem fefelleris, ne pecuniam quidem reddes? Quem mihi tu⁴ Bulbum, quem Stalenum? quod umquam hujusmodi monstrum, aut prodigium audivimus, aut vidimus, qui cum reo transigat, post cum accusatore decidat? honestos homines, qui causam norint, ableget, a consilioque dimittat? ipse solus reum absolutum, a quo pecuniam acceperit, condemnet, pecuniamque non reddat? Hunc hominem judicum numero habebimus? hic alteram decuriam⁵ senatoriam judex obtinebit? hic de capite libero judicabit? huic judicialis tabella committetur? quam iste non modo cera⁶, verum etiam sanguine, si visum erit, notabit.

XXXIII. Quid enim horum se negat fecisse? illud videlicet unum, quod necesse est, pecuniam accepisse. Quidni iste neget? At eques romanus, qui Sopatrum defendit, qui omnibus ejus consiliis rebusque interfuit, Q. Minucius juratus dicit pecuniam datam; juratus dicit Timarchidem dixisse, majorem ab accusatoribus

3. Aberat « pecunia accepta » a cod. Nannii; idque ei placebat. Sed requirunt verba, quæ statim sequuntur, « majore pecunia ». J. V. L.

4. *Tu Bulbum.* Cod. Metell. « Tulum », qui quidem prætor pecunias ob rem judicandam accepit. De Fin. II, 16. Sed non apto loco. Bulbus

enim et Stalenus una sæpius conjunguntur, ut iniquissimorum judicum nomina (Cluent. 28), qui tamen præ Verre innocentissimi videntur.

5. *Alteram decuriam.* Secundam. Vid. Verr. I, 61.

6. *Cera.* Discolore et infami, qualis Hortensius. Divin. 7.

pecuniam dari: dicent hoc Siculi omnes; dicent omnes Halicyenses; dicet etiam prætextatus Sopatri filius, qui ab isto homine crudelissimo, patre innocentissimo, pecuniaque patria privatus est. Verum, si de pecunia testibus planum facere non possem; illud negare possem, aut nunc negabis, te, consilio tuo dimisso, viris primariis, qui in consilio C. Sacerdotis fuerant, tibi que esse solebant, remotis, de re judicata judicasse? teque eum, quem C. Sacerdos, adhibito consilio, causa cognita, absolvisset; eundem, remoto consilio, causa incognita, condemnasse? Quum hæc confessus eris, quæ in foro palam Syracusis, in ore, atque in oculis provinciæ gesta sunt; negato sane¹, si voles, pecuniam accepisse: reperiens, credo, aliquem, qui, quum hæc, quæ palam gesta sunt², videat, quærat quid tu occulte egeris³; aut qui dubitet, utrum malit meis testibus, an tuis defensoribus credere.

Dixi jam antea, iudices, me non omnia istius, quæ in hoc genere essent, enumeraturum; sed electurum ea, quæ maxime excellerent.

XXXIV. Accipite nunc aliud ejus facinus nobile, et multis locis sæpe commemoratum, et ejusmodi, ut in uno omnia maleficia inesse videantur. Attendite diligenter: invenietis enim, id facinus natum a cupiditate, auctum per stuprum, crudelitate perfectum atque conclusum. Sthenius est, is qui nobis assidet, Thermitanus, antea multis propter summam virtutem¹, summamque

XXXIII. 1. *Negato sane.* Metell. habet «nega totum sane, si voles». Gulielm. vero legebat «negato tum sane, si voles».

2. *Palam gesta sunt.* Dimissos scilicet ac amotos fuisse iudices.

3. *Occulte egeris.* Pecuniamne ad judicia corruptenda acceperis.

XXXIV. 1. *Summam virtutem.* Quum enim Thermitani Mario favissent, et Pompeius illos punire statuisset; Sthenius a se coactos Thermitanos ad sequendas Marii partes respondit, atque adeo de se uno supplicium esse sumendum. Qua fortitudine motus Pompeius et ei et civitati veniam

nobilitatem, nunc, propter suam² calamitatem, atque istius insignem injuriam, omnibus notus. Hujus hospitio Verres quum esset usus, et quum apud eum, non modo Thermis sæpenumero fuisset, sed etiam habitasset; domo ejus omnia abstulit, quæ paullo magis animum cujuspiam aut oculos possent commovere. Etenim Sthenius ab adolescentia paullo studiosius hæc compararat³, supellectilem ex ære elegantiores, et Deliacam, et Corinthiam, tabulas pictas, etiam argenti bene facti, prout Thermitani hominis facultates ferebant, satis: quæ, quum esset in Asia adolescens, studiose, ut dixi, compararat, non tam suæ delectationis causa, quam ad invitationes⁴ adventusque nostrorum hominum, amicorum suorum atque hospitem. Quæ posteaquam iste omnia abstulit, alia rogando⁵, alia poscendo, alia sumendo; ferebat Sthenius, ut poterat. Angebatur⁶ tamen animi dolore necessario⁷, quod domum ejus, exornatam atque instructam fere, jam iste reddiderat nudam atque inanem. Verumtamen dolorem suum nemini impertiebat: prætoris injurias tacite, hospitis placide ferendas arbitrabatur. Interea cupiditate iste illa sua nota, atque apud omnes pervulgata⁸, quum signa quædam pulcherrima atque antiquissima Thermis in publico posita vidisset, adamavit: a Sthenio petere cœpit, ut ad ea tollenda operam suam profiteretur, seque adjuvaret. Sthenius vero non so-

dedit. Vide Plutarch. in Pomp. et Cic. h. orat. cap. 46.

2. *Suam*. Metell. et vett. edd. « *summam* ».

3. Alii hic et paullo inf. *comparabat*.

4. *Ad invitationes*. Quam ut iis uteretur, quum invitati ad eum venirent rom. magistratus, seu hospites.

5. *Rogando*. Per preces. *Poscendo*.

Partim precibus, partim imperio. *Semendo*. Vi et imperio.

6. Alii, « *tangebatur* », minus significanter. Sequimur C. Steph. J. V. L.

7. *Necessario*. Quem non sentire non poterat, quum tot pretiosa artis monumenta a domo raperentur.

8. Multi receperunt « *pervagata* » multis codicibus. J. V. L.

lum negavit, sed etiam ostendit, id⁹ fieri nullo modo posse, ut signa antiquissima, monumenta P. Africani, ex oppido Thermitanorum, incolumi illa civitate imperioque populi romani, tollerentur.

XXXV. Etenim, ut simul P. Africani quoque humanitatem et æquitatem cognoscatis, oppidum Himeram Carthaginieuses quondam ceperant; quod fuerat in primis Siciliae clarum et ornatum. Scipio, qui hoc dignum populo romano arbitraretur, bello confecto, socios sua per nostram victoriam recuperare; Siculis omnibus, Carthagine capta, quæ potuit, restituenda curavit. Himera deleta, quos cives belli calamitas reliquos fecerat, ii sese Thermis collocarant, in ejusdem agri finibus, neque longe ab oppido antiquo. Hi se patrum fortunam ac dignitatem recuperare arbitrabantur, quum illa majorum ornamenta in eorum oppido collocabantur. Erant signa ex ære complura: in his mira pulchritudine ipsa Himera, in muliebrem figuram habitumque formata, ex oppidi nomine et fluminis. Erat etiam Stesichori¹ poetæ statua senilis, incurva, cum libro, summo, ut putant, artificio facta: qui² fuit Himeræ, sed et est, et fuit tota³ Græcia summo propter ingenium honore et nomine. Hæc iste ad iusaniam concupierat. Etiam, quod pæne præterii, capella quædam est, ea quidem mire, ut etiam nos, qui rudes⁴ harum rerum sumus, intelligere possimus,

9. Herelinus pronomen *id* delendum putat. J. V. L.

XXXV. 1. *Stesichori*. Qui poeta circa annum 612 ante Christum florebat. Musam Stesichori *gravem* appellat Horat. Od. IV, 9.

2. Olim « ab eo qui », perperam. Hoc enim ad Stesichorum pertinet.

3. Vulg. « tota in Græcia ». J. V. L.

4. *Qui rudes*. Animadvertendum Ciceronem ubique se omnino harum rerum rudem et contemptorem profiteri, quippe quarum curiosos populos contemneret, et *Græculorum* turpi nomine notaret. Scilicet vetera Romanorum ingenia illud infra suam magnitudinem cadere existimabant, totique in subigendo orbe, illis erant

scite facta et venuste. Hæc et alia Scipio non negliger abjecerat, ut homo intelligens Verres auferre posset; sed Thermitanis restituerat: non quo ipse hortos; aut suburbanum, aut locum omnino, ubi ea poneret, nullum haberet; sed si domum abstulisset, non diu Scipionis appellarentur, sed eorum, ad quoscumque ipsius morte venissent: nunc his locis posita sunt, ut mihi semper Scipionis fore videantur, itaque dicantur.

XXXVI. Hæc quum iste posceret, agereturque ea res in senatu: Sthenius vehementissime restitit; multaque, ut in primis Siculorum in dicendo copiosus est, commemoravit: urbem relinquere Thermitanos esse honestius, quam pati, tolli ex urbe monumenta majorum, spolia hostium, beneficia clarissimi viri, indicia societatis populi romani atque amicitiae. Commoti animi sunt omnium: repertus est nemo, quin mori diceret satius esse. Itaque hoc adhuc oppidum Verres invenit prope solum in orbe terrarum, unde nihil ejusmodi rerum de publico per vim, nihil occulte, nihil imperio, nihil gratia, nihil pretio¹ posset auferre. Verumtamen hasce hujus cupiditates exponam alio loco: nunc ad Sthenium revertar.

Itaque iste vehementer Sthenio infensus², hospitium ei renuntiat; domo ejus emigrat, atque adeo exit: nam jam ante migrarat. Eum autem inimicissimi

accensi sensibus quos mirum in modum descripsit Virgilius: «Excudent alii..... Tu regere imperio populos, Romane, memento: Hæ tibi erunt artes, etc.» *Æn.* VI, 648.

XXXVI. 1. *Nihil pretio.* Vetus codex *precario*. Uncis inclusit Ernest. ut plane spuria et aliena, quod Verres non sit emere solitus. Cui recte opposuit

Beck. ea quæ Verr. IV, 4 leguntur.

2. *Infensus.* Metell. habet, «iratus iste vehementer Sthenio atque incensus». — *Migrarat.* I. e. antequam exiret, partem suppellectilis exportari jusserat. Multa enim Sthenii jam *vasa* alio conferenda curaverat. Sic Ernest. Schütz et J. V. L. Possit forsitan etiam explicari locus si *migrare* idem quod

Sthenii domum suam statim invitant, ut animum ejus in Sthenium inflammarent, ementiendo aliquid et criminando. Hi autem erant [inimici] Agathinus, homo nobilis, et Dorotheus, qui habebat in matrimonio Callidamam, Agathini ejus filiam, de qua iste audierat. Itaque ad generum Agathini migrare maluit. Una nox intercesserat, quum iste Dorotheum sic diligebat, ut diceret, omnia inter eos esse communia³: Agathinum ita observabat, ut aliquem affinem⁴ ac propinquum: contemnere etiam signum illud Himeræ jam videbatur, quod eum multo magis figura et lineamenta hospitiæ delectabant.

XXXVII. Itaque hortari homines cœpit, ut aliquid Sthenio periculi crearent, criminisque confingerent. Dicebant se illi nihil habere, quod dicerent. Tum iste his aperte ostendit et confirmavit, eos in Sthenium, quidquid vellent, simul atque ad se detulissent, probaturos¹. Ita illi non procrastinant: Sthenium statim educunt²; aiunt ab eo literas publicas esse corruptas³. Sthenius postulat, ut quum secum sui cives agant de

ad Div. I, 5; Fin. III, 20; Offic. I, 10, id est, *negligere* significet; ita ut intelligamus, Verrem quum jam antea a Sthenio abalienatus esset, quumque eum negligere cœpiasset, tunc denique vehementer ei infensum, quod signa auferre volenti restitisset, aperte cum eo inimicitias habuisse. Videant doctiores.

3. *Communia*. Græco proverbio aludit orator, τὰ τῶν φίλων κοινὰ et obiter indicat Dorothei quoque uxorem in commune habitam.

4. *Affinem*. Quasi socerum scilicet, quippe cujus cum filia rem habuisset; sic supra *affines* occurrit.

XXXVII. 1. *Probaturos*. Fidem

apud se Verrem habituros, vel nullo appellato teste.

2. *Educunt*. In jus vocant. Ut supra cap. 26.

3. *Esse corruptas*. Quod capitale crimen erat, et lege Cornelia morte plectebatur. Sed hoc iudicium non capitale primum fuisse hic intelligitur. Quum enim postea Agathinum rogavit uti Sthenium accusaret, negavit ille, se Sthenio adeo inimicum esse, ut in capitis periculum adduceret. Inde apparet pœnam solummodo in pecunia aut corpore fuisse constitutam; nisi forte hoc ex iudicis arbitrio penderet. « Non capitalia iudicia sunt, ait Paullus in lib. II de publ. judic. ex quibus

literis publicis corruptis, ejusque⁴ rei legibus Thermitanorum actio sit; quum senatus populusque romanus Thermitanis, quod semper in amicitia fideque mansissent, urbem⁵, agros, legesque suas reddidisset; Publiusque Rupilius postea leges ita Siculis ex senatus-consulto, de decem legatorum sententia, dedisset, ut cives inter se legibus suis agerent; idemque hoc habuerit Verres ipse in edicto: ut⁶ de his omnibus causis se ad leges rejiceret. Iste, homo omnium æquissimus, atque a cupiditate⁷ remotissimus, se cognitum esse confirmat: paratum ad causam dicendam venire hora octava⁸ jubet. Non erat obscurum, quid homo improbus ac nefarius cogitaret: neque enim ipse satis occultarat; nec mulier⁹ tacere poterat. Intellectum est, id istum¹⁰ agere, ut, quum Sthenium, sine ullo argumento, ac sine teste, damnasset, tum homo nefarius de homine nobili, atque id ætatis, suoque hospite, virgis supplicium crudelissime sumeret. Quod quum esset perspicuum; de amicorum hospitumque suorum sententia, Thermis Sthenius Romam profugit. Hiemi sese fluctibusque committere maluit, quam non istam communem Siculorum tempestatem calamitatemque vitare.

XXXVIII. Iste homo certus et diligens, ad horam octavam præsto est. Sthenium citari jubet: quem

pecuniaria, aut aliqua in corpus co-
ercitio poenæ est ».

4. Alii, « ejusce rei ». J. V. L.

5. Alii, « urbes ». Correx. e MS
Nann. cum Græv. Ernest.

6. *Ut*. Postulat Sthenius, ut, ex
omnibus supra enumeratis causis pro-
pter has omnes rationes, se ad leges
Siculas remittat. Errare h. l. Ernest-
ium animadvertit Schützius, qui « de
omnibus causis » accipit de omni ha-

rum accusationum genere. Idem ex
Wytttenb. Bibl. Crit. I, 2, 10, *suas*
ante *leges* addidit.

7. Alii, « a cupiditate omnium re-
motissimus ». J. V. L.

8. Alii, *nona*. Paulo infra Ernest.
quamvis hic *octava* receperit, male
reliquit *nonam*.

9. *Nec mulier*. Callidama, Dorothei
uxor Sthenio inimici.

10. Alii, *ipsum*. J. V. L.

posteaquam videt non adesse, dolore ardere, atque iracundia furere cœpit; Venerios¹ in domum Sthenii mittere; equites circum agros ejus villasque dimittere. Itaque dum exspectat, quidnam sibi certi afferatur, ante horam tertiam noctis de foro non discessit. Postridie mane descendit; Agathinum ad sese vocat; jubet, eum de literis publicis in absentem Sthenium dicere. Erat ejusmodi causa, ut ille ne sine adversario quidem, apud inimicum judicem, reperire posset, quid diceret. Itaque tantum verbo posuit, Sacerdote prætore, Sthenium literas publicas corrupisse. Vix ille hoc dixerat, quum iste pronuntiat, STHENIUM LITERAS PUBLICAS CORRUPISSE VIDERI². Et hæc præterea addidit homo Venerius, novo modo³, nullo exemplo, OB EAM REM H-S QUINGENTIES⁴ VENERI ERYCINÆ DE STHENII BONIS EXACTURUM: bonaque ejus statim cœpit vendere. Et vendidisset, si tantulum moræ fuisset, quo minus ei pecunia illa numeraretur. Ea posteaquam numerata est, contentus hac iniquitate non fuit: palam de sella ac tribunali pronuntiat, SI QUIS ABSENTEM STHENIUM REI CAPITALIS REUM FACERE⁵ VELLE, SESE EJUS NOMEN RECEPTURUM: et simul, ut ad causam accederet, nomenque deferret, Agathinum, novum affinem atque

XXXVIII. 1. *Venerios*. Veneris servos. Vide Divin. 17. Sed paullo infra «Venerius homo» Verres vocatur, i. e. Veneri addictus et in Venerem religiosus; ut qui Veneri Erycinæ reum condemnaret.

2. *Corrupisse videri*. Ea erat veterum modestia, ut sententiam sine affirmatione pronuntiarent; et numquam «fecisse aliquem», sed fecisse videri profiterentur.

3. *Novo modo*. Inaudita ad hoc tempus ratione. Ern. placebat *novo more*.

4. *Quingenties* (10,250,000 fr.) Quæ summa immanior est quam ut ab homine privato Verres eam exegisse potuerit: quum præsertim ipse Cicero, Act. I, 18, «H-S quadringenties» (8,200,000 fr.) Verrem abstulisse dixerit. Hotom. conj. legendum «quingenta millia» (102,000 fr.) Sch. scripsit «quindecies» (307,500 fr.)

5. *Reum facere*. Apparet inde superius judicium de literis corruptis, saltem in provinciis, non capitale fuisse.

hospitem, coëpit hortari. Tum ille clare, omnibus audientibus, sese id non esse facturum, neque se usque eo Sthenio esse inimicum, ut eum rei capitalis affinem esse diceret. Hic tum repente Pacilius quidam, homo egens et levis, accedit: ait, si liceret, nomen absentis deferre⁶ se velle. Iste vero et licere, et fieri solere, et se recepturum. Itaque defertur⁷. Edicit statim, ut kalendis decembr. adsit Sthenius Syracusis. Hic, qui Romam venisset, satisque feliciter anni jam adverso tempore navigasset, omniaque habuisset æquiora et placabiliora, quam animum prætoris atque hospitii, rem ad amicos suos detulit: quæ, ut erant⁸ acerba atque indigna, sic videbantur omnibus.

XXXIX. Itaque in senatu continuo Cn. Lentulus et L. Gellius consules faciunt mentionem, placere statui, si patribus conscriptis videretur, NE ABSENTES HOMINES IN PROVINCIIS REI FIERENT RERUM CAPITALIUM. Causam Sthenii totam, et istius crudelitatem et iniquitatem senatum docent. Aderat in senatu Verres pater istius, et flens unumquemque senatorem rogabat, ut filio suo parceret. Neque tamen multum proficiebat: erat enim summa voluntas¹ senatus. Itaque sententiæ dicebantur, QUUM STHENIUS ABSENS REUS FACTUS ESSET, DE ABSENTE JUDICIUM NULLUM FIERI PLACERE; ET, SI QUOD ESSET FACTUM, ID RATUM ESSE NON PLACERE. Eo die

6. *Nomen absentis deferre.* Quod Romæ, omnino nefas erat; ille enim cujus nomen deferebatur, præsens, apud prætorem interrogabatur, num quidquam contra legem commisisset. Inde nomen ejus in ordinem ac seriem reorum deferebatur.

7. *Defertur.* Quid sit crimen illud capitale, cujus accusatur Sthenius et damnatur, non nominavit orator.

Conjicit Hotom. idem esse crimen corruptarum publicarum tabularum, cujus duplex esse potuit actio, capitalis et non capitalis. Sed qua fretus auctoritate illud affirmet, nescio.

8. *Quæ, ut erant.* Lambinus edere maluit, « quæ ut erat... videbatur ».

XXXIX. 1. *S. voluntas.* Locutio antiqua et perelegans; idem est quod libentissimis animis assentiebantur.

transigi² nihil potuit, quod et id temporis³ erat, et ille, pater istius, invenerat homines, qui dicendo tempus consumerent. Postea senex Verres defensores atque hospites omnes Sthenii convenit: rogat eos atque orat, ne oppugnent filium suum; de Sthenio ne laborent: confirmat his, curaturum se esse, ne quid ei per filium suum noceatur⁴; se homines certos ejus rei causa in Siciliam et terra et mari missurum. Et erat spatium dierum fere triginta ante kalendas decembr. quo die iste, ut Syracusis Sthenius adesset, edixerat. Commoventur amici Sthenii; sperant fore, ut patris literis nuntiisque filius ab incepto furore revocetur. In senatu postea causa non agitur. Veniunt ad istum domestici nuntii, literasque a patre afferunt ante kalendas decembr. quum isti etiam tum de Sthenio integra tota res esset; eodemque ei tempore de eadem re literæ complures a multis ejus amicis ac necessariis afferuntur.

XL. Hic iste, qui præ cupiditate neque officii¹ sui, neque periculi, neque pietatis, neque humanitatis rationem habuisset umquam, neque in eo, quod monebatur, auctoritatem patris, nec in eo, quod rogabatur, voluntatem² anteponendam putavit libidini suæ; mane kalendis decembr. ut edixerat, Sthenium citari

2. *Transigi*. Senatusconsultum perscribi non potuit.

3. *Id temporis*. Advesperascebat. Porro SC. ante ortum, aut post occasum solis factum, ratum non erat. Itaque, si qui SC. quominus fieret, impedire vellent, dicendo tempus consumerent. Licebat enim senatori et qua de re vellet, et quamdiu vellet dicere; quod veteres *diem tollere*, aut *eximere* vocabant.

4. Alii, « noceretur ». Correx. Ernest. ut cum antecedentibus conveniret.

XL. 1. *Officii sui*. Qui numquam curavisset quid ipsum se deceret, non modo tamquam prætorum, sed civem romanum. — *Periculi*. Ne amitteret existimationem, ac serius damnaretur. — *Pietatis*. In patrem. — *Humanitatis*. In amicos.

2. Ernest. addit « amicorum » sine MSS. J. V. L.

jubet. Si abs te istam rem parens tuus, alicujus amici rogatu, benignitate aut ambitione³ inductus, petisset; gravissima tamen apud te voluntas patris esse debuisset: quum vero abs te tui capitis causa peteret, hominesque certos domo misisset, hique eo tempore ad te venissent, quum tibi in integro tota res esset, ne tum quidem te potuit, si non pietatis, at salutis tuæ ratio ad officium sanitatemque reducere? Citat reum. Non respondet. Citat accusatorem (attendite, quæso, judices: videte⁴, quantopere istius amentiae fortuna ipsa adversata sit; et simul videte, quis Sthenii causam casus adjuverit): citatus accusator, M. Pacilius, nescio quo casu, non respondit, non affuit. Si præsens Sthenius reus esset factus, si manifesto in maleficio teneretur; tamen, quum accusator non adesset, Sthenium condemnari non oporteret⁵. Etenim, si posset reus, absente accusatore, damnari, non ego⁶ a Vibone Veliam parvulo navigio inter fugitivorum, ac prædonum, ac tua tela venissem, quo tempore omnis illa mea festinatio fuit cum periculo capitis ob eam causam, ne tu ex reis eximerere, si ego non affuissem ad diem. Quod igitur tibi erat in tuo iudicio optatissimum, me, quum citatus essem, non adesse; cur Sthenio non putasti prodesse oportere, quum ejus accusator non affuisset? Itaque fecit, ut exitus prin-

3. *Ambitione*. Studio gratiæ et favoris conciliandi. Sic infra: « Quis dubitabit quin tu hanc invidiam non ambitionis, sed pecuniæ conciliandæ causam susceperis ».

4. *Videte*. Abest in codd. Metell. et Pall. quod placuit Grutero.

5. *Non oporteret*. Tunc enim valet regula: Tacente accusatore, absolvitur reus; et ea Romæ lex erat ut, si ac-

cusator a præcone citatus non responderet, reus dimitteretur. Itaque Ascon. in orat. pro Cornel. « Postero die quum citati accusatores non adessent, exemplum nomen est de reis Cornelii ».

6. *Non ego*. De insidiis quæ Ciceroni a Verre terra matricque factæ sunt, ne die dicta Romæ esset, vid. Act. I, 2. — *Fugitivorum*. Residuum Spartaci manum intelligit.

cipio simillimus reperiretur : quem absentem reum fecerat, eum, absente accusatore, condemnat.

XLI. Nuntiabatur illi primis illis temporibus¹ id, quod pater quoque ad eum pluribus verbis scripserat, agitatam rem esse in senatu; etiam in concione tribunum plebis de causa Sthenii M. Palicanum² esse questum; postremo me ipsum apud collegium hoc tribunorum plebis, quum eorum omnium³ edicto non liceret quemquam Romæ esse, qui rei capitalis condemnatus esset, egisse causam Sthenii; quum rem ita exposuissem, quemadmodum nunc apud vos, docuissemque hanc damnationem duci⁴ non oportere, tribunos plebis hoc statuisset, idque de omnium sententia pronuntiatum esse, NON VIDERI S'THENIUM IMPEDIRI EDICTO, QUO MINUS EI LICERET ROMÆ ESSE. Quum hæc ad istum afferrentur, timuit aliquando, et commotus est; vertit stylum⁵ in tabulis suis : quo facto causam omnem evertit suam : nihil enim sibi reliqui fecit, quod defendi aliqua ratione posset. Nam si ita defenderet : recipi nomen absentis licet; hoc fieri in provincia nulla lex vetat : mala et improba defensione, verum aliqua tamen uti videretur. Postremo illo desperatissimo perfugio uti posset, se imprudentem fecisse, existimasse id licere : quamquam perditissima⁶

XLI. 1. *Illis temporibus.* Pancis post damnationem diebus, quibus Romam ea res perlata erat, nuntiique Roma in provinciam reversi.

2. *M. Palicanum.* Lolliae gentis, quo tribuno plebis auctore, tribunitia potestas, a Sulla adempta, per Cn. Pompeium consulem est restituta. Vid. Brut. c. 62; ad Att. I, 1. Val. Max. III, 8, 3.

3. *Omnium.* Non otiosa hic est vox illa; etenim nulla intercessione, ac om-

nium unanimi consensu, edictum ac sancitum illud fuisse indicat.

4. *Duci.* Haberi tamquam condemnationem.

5. *Vertit stylum.* Delevit quæ antea scripserat. Styli pars altera, qua scribebatur, in acumen desinebat; altera erat plana, et apta ad delendum id, quod scriptum fuerat. Hinc Horat. Sat. I, 10, 72, « sæpe stylum veritas ».

6. Addunt hæc multi editores, inter quos Lallemand. J. V. L.

defensio est, tamen aliquid dici videretur. Tollit ex tabulis id, quod erat, et facit⁷, coram delatum esse.

XLII. Hic videte, in quot se laqueos induerit, quorum ex nullo se umquam expediret. Primum ipse in Sicilia sæpe et palam de loco superiore¹ dixerat, et in sermone multis demonstrarat, licere nomen recipere absentis; se exemplo fecisse id, quod fecisset. Hæc eum dictitasse², priore actione et Sex. Pompeius Chlorus dixit, de cujus virtute antea commemoravi, et Cn. Pompeius Theodorus, homo et Cn. Pompeii, clarissimi viri, iudicio plurimis maximisque in rebus probatissimus, et omnium existimatione ornatissimus, et Posides Matro Solentinus, homo summa nobilitate, existimatione, virtute: et hac actione quam³ voletis multi dicent, et qui ex isto ipso audierint, viri primarii nostri ordinis, et alii, qui interfuerint, quum absentis nomen reciperetur. Deinde Romæ, quum res esset acta in senatu, omnes istius amici, in his etiam pater ejus hoc defendebat licere fieri; sæpe esse factum; istum, quod fecisset, aliorum exemplo institutoque fecisse. Dicit præterea testimonium tota Sicilia: quæ in communibus postulatis⁴ civitatum omnium, consulibus edidit, rogare atque orare patres conscriptos, ut statuerent, ne absentium⁵ nomina recipe-

7. *Facit.* Scribendo fingit Sthenium adfuisse iudicio.

XLII. 1. *De loco superiore.* Nempe de prætorio tribunali.

2. *Dictitasse.* Est a codd. Fabr. et Metell. et Palatinis; vulgata olim lectio « dictasse ». J. V. L.

3. *Quam.* Tam multi quam voletis.

4. *In communibus postulatis.* Quod petebant civitates, in libello scriptum consulibus, per legatos provinciarum et civitatum, edebatur mense

februario ut de iis in senatu ageretur. Sup. 31. Apparet autem ex hoc loco duo postulatorum genera existitasse; unum communium, quum aliquid communiter ab universis provinciæ civitatibus petebatur; alterum vero propriorum, quæ a singulis civitatibus proprio suo nomine consulibus edebantur.

5. *Ne absentium.* Apparet inde nondum in provinciis illud juris constitutum esse, ne quis absens accusa-

rentur. Qua de re Cn. Lentulum, patronum Siciliæ, clarissimum adolescentem, dicere audistis : Siculos, quum se causam, quæ pro his sibi in senatu agenda esset, docerent, de Sthenii calamitate questos esse; propterque hanc injuriam, quæ Sthenio facta esset, eos statuisset, ut, quod dico, postularetur. Quæ quum ita essent, tantane amentia præditus⁶ atque audacia fuisti, ut in re tam clara, tam testata, tam abs te ipso pervulgata, tabulas publicas⁷ corrumpere auderes? At quemadmodum corrupisti? nonne ita, ut, omnibus nobis tacentibus, ipsæ te tuæ tabulæ condemnare possent? Cedo⁸, quæso, codicem : circumfer; ostendē. Videtisne totum hoc nomen⁹, coram ubi facit delatum, esse in litura? Quid fuit istic antea scriptum? quod mendum ista litura correxit? Quid a nobis, judices, exspectatis argumenta hujus criminis? nihil dicimus : tabulæ sunt in medio, quæ se corruptas atque interlitas esse clamant. Ex istis etiam tu rebus effugere te posse confidis, quum te nos non opinione dubia, sed tuis vestigiis persequamur, quæ tu in tabulis publicis expressa ac recentia reliquisti? Is mihi etiam Sthenium literas publicas corrupisse, causa incognita, judicavit, qui defendere non potuerit¹⁰, se non ex ipsius Sthenii nomine literas publicas corrupisse?

retur. Sed quamvis ea de re nulla lex esset, a ceteris prætoribus, utpote suadente æquitate, fuerat observatum.

6. Suspectam habet vocem *præditus*, tamquam a scriba ortam, Gulielmus, teste Grutero. J. V. L.

7. *Tabulas publicas*. Prætoris erant tabulæ, quæ, jussu senatus, conficiebantur. Ex iis administratæ provincie ratio a prætore reposcebatur; eæ deni-

que in ærario depositæ asservabantur.

8. Restituimus hanc vocem, quam frustra, ut ex ipso Cicerone comprobatum est, Ernest. deleverat.

9. *Hoc nomen*. Hoc caput, hunc locum, ubi scribit Sthenium præsentem fuisse accusatum.

10. Alii, *potuit*. — *Sthenii nomine*. Id est, hoc capite, quod Sthenii delationem continet; ut jam sup. vidimus.

XLIII. Videte porro aliam dementiam; videte, ut, dum expedire sese vult, induat. Cognitorem¹ adscribit Sthenio. Quem? cognatum aliquem, aut propinquum? non. Thermitanum aliquem, honestum hominem ac nobilem? ne id quidem. At Siculum, in quo aliquis splendor dignitasque esset? minime². Quid igitur? civem romanum. Cui hoc probari potest? Quum esset Sthenius civitatis suæ nobilissimus, amplissima cognitione, plurimis amicitiiis, quum præterea tota Sicilia multum auctoritate et gratia posset; invenire neminem Siculum potuit, qui pro se cognitor fieret? Hoc probabis? an ipse civem romanum maluit? cedo, cui Siculo, quum is reus fieret, civis romanus cognitor factus umquam sit. Omnium prætorum literas, qui ante fuerunt, profer, explica: si unum inveneris, ego hoc tibi, quemadmodum in tabulis scriptum habes, ita gestum esse concedam. At, credo, Sthenius hoc sibi amplum esse putavit, eligere e civium romanorum numero, ex amicorum atque hospitum suorum copia, quem cognitorem daret. Quem delegit? quis in tabulis scriptus est? C. Claudius, C. F., Palatina³. Non quæro, quis hic sit Claudius, quam splendidus, quam honestus, quam idoneus, propter cuius auctoritatem et dignitatem Sthenius ab omnium Siculorum consuetudine discederet, et civem romanum cognitorem daret: nihil horum quæro: fortasse enim Sthenius non splendorem hominis, sed familiaritatem sequutus est. Quid? si omnium mortalium Sthenio nemo inimicior, quam

XLIII. 1. *Cognitorem*. Cognitor (*un représentant*) a præsentē tantum domino dabatur ut videre est apud Gaium, IV, 83. Ut ergo Verris invdiam delati absentis effugeret, finxerat Sthenium *coram* accusatum sibi *cogni-*

*to*rem deinde substituisse, a quo defenderetur.

2. *Minime*. Metell. cod. *neminem*. Pro *quid* Lamb. *quem*: recepit Sch.

3. *Palatina*. Ex tribu, quæ Palatinum montem cum Capitolio obtinebat.

hic C. Claudius, tum semper, tum in his ipsis rebus et temporibus fuit? si de literis corruptis contra venit⁴? si contra omni ratione pugnavit? utrum potius pro Sthenio⁵ inimicum cognitorem esse factum, an te in Sthenii periculo inimici ejus nomine abusum esse credemus?

XLIV. Ac, ne quis forte dubitet, cujusmodi totum sit negotium; tametsi jamdudum omnibus istius improbitatem perspicuam esse confido, tamen paullulum etiã attendite. Videtis illum subcrispo capillo, nigrum, qui eo vultu nos intuetur, ut sibi ipse peracutus¹ esse videatur? qui tabulas tenet? qui scribit? qui monet? qui proximus est? Is est C. Claudius, qui in Sicilia sequester istius, interpres, confector negotiorum, prope collega Timarchidi numerabatur: nunc obtinet eum locum, ut vix Apronio² illi de familiaritate concedere videatur; et³ qui se non Timarchidis, sed ipsius Verris collegam et socium esse dicebat. Dubitate etiã, si potestis, quin eum iste potissimum ex omni numero delegerit, cui hanc⁴ falsi cognitoris improbam personam imponeret, quem et huic inimicissimum, et sibi amicum esse arbitraretur? Hic vos dubitabitis⁵, judices, tantam istius audaciam, tantam crudelitatem, tantam injuriam vindicare? dubitabitis exemplum judicum illorum sequi, qui, damnato

4. *Contra venit.* Si acerrimum se adversarium in illa causa præbuit.

5. *Pro Sthenio.* Ut eum adjuvaret. — *In Sthenii periculo.* In Sthenii causa capitali. Multo subtilius interpretatur Ernest. cui *periculum* idem h. l. sonat quod accusationis libellus, seu damnationis elogium. De sensu hoc confer Indicem verborum.

XLIV. 1. *Peracutus.* Contemptim

nos intuens, quasi abjectos et stultos, præ se qui sibi ingeniosissimus videtur.

2. *Apronio.* De isto multa leges Verr. III, 9.

3. *Malim delere et, ut sit, « Apronio illi... qui se, etc. »* J. V. L.

4. *Abest hanc.* J. V. L.

5. *Alii, « dubitatis », ut paullo infra.*

Cn. Dolabella, damnationem Philodami⁶ Opuntii resciderunt, quod is non absens reus factus esset, quæ res iniquissima et acerbissima est; sed quum ei legatio Romam a suis civibus esset data? Quod illi iudices multo in leviori causa statuerunt, æquitatem sequuti; vos id statuere in gravissima causa, præsertim aliorum auctoritate jam confirmatum, dubitabitis?

XLV. At quem hominem, C. Verres, tanta, tam insigni injuria affecisti? cujus¹ absentis nomen recepisti? quem absentem, non modo sine crimine, et sine teste, verum etiam sine accusatore damnasti? Quem hominem? dii immortales! non dicam amicum tuum, quod apud homines carissimum est; non hospitem, quod sanctissimum est: nihil enim minus libenter de Sthenio commemoro; nihil aliud in eo, quod reprehendi possit, invenio, nisi quod homo frugalissimus atque integerrimus, te, hominem plenum stupri, flagitii, sceleris, domum suam invitavit; nisi quod, qui C. Marii², Cn. Pompeii, C. Marcelli, L. Sisennæ, tui defensoris, ceterorumque virorum³ fortissimorum

6. *Philodami*. Philodamus ille (alius a Philodamo Lampsaceno, Verr. I, 25), apud Dolabellam, Ciliciæ prætorem, fuerat accusatus ac damnatus, non absens, sed quum proficisci Romam pararet, quo a civibus legatus mittebatur. Quum autem Dolabella repetundarum damnatus esset, iudices Philodami damnationem resciderunt, etsi non absens reus factus erat, tamen propterea quod iniquum videbatur eum, qui mox legationis causa Romam profecturus erat, reum fieri, antequam hanc legationem obiisset et ab ea rediisset. Vide Wyttenb. Bibl. crit. part. II, pag. 12. Legationem liberam hic intelligit, quæ non rei-

publicæ, sed aut syngraphæ exigendæ, aut hereditatis persequendæ, aut voti solvendi causa dabatur.

XLV. 1. Lambinus ait se in codice MS invenisse ista, « quem hominem absentem de literis corruptis, causa incognita, condemnasti? » J. V. L.

2. *C. Marii*. Septies consulis. — *Cn. Pompeii*. Magni, tum consulis. — *C. Marcelli*. Qui Siciliæ præfuerat, et in causa Verris iudex sedebat. — *L. Sisennæ*. Cornelie gentis, qui in Bruto inter oratores nominatur.

3. *Virorum*. Abest vox illa a cod. Lambini Venetaque. Quam Geron. laudat prætermittam, et multis, de more, defendit.

hospes fuisset atque esset, ad eum numerum clarissimorum hominum tuum quoque nomen adscripsit. Quare de hospitio violato, et de isto tuo nefario scelere nihil queror: hoc dico, non iis, qui Sthenium norunt; hoc est, nemini eorum, qui in Sicilia fuerunt; nemo enim ignorat, quo hic in civitate sua splendore, qua apud omnes Siculos dignitate atque existimatione sit; sed, ut illi quoque, qui in ea provincia non fuerunt, intelligere possint, in quo homine tu statueris exemplum ejusmodi, quod tum propter iniquitatem rei, tum etiam propter hominis dignitatem, acerbum omnibus atque intolerandum videretur.

XLVI. Estne Sthenius is, qui omnes honores domi suæ¹ facillime quum adeptus esset, amplissime ac magnificentissime gessit? qui oppidum non maximum, maximis ex pecunia sua locis communibus², monumentisque decoravit? cujus de meritis in rempublicam Thermitanorum, Siculosque universos, fuit ænea tabula fixa Thermis in curia, in qua publice erat de hujus beneficiis scriptum et incisum? quæ tabula tum imperio tuo revulsa, nunc a me tamen deportata³ est, ut omnes hujus honores inter suos, et amplitudinem possent cognoscere. Estne hic, qui apud Cn. Pompeium⁴, clarissimum virum, quum accusatus esset, quod, propter C. Marii familiaritatem et hospitium, contra rempublicam⁵ sensisse eum inimici et accusa-

XLVI. 1. *Suæ* delendum putabat Gronovius pater, *Observ.* I, 12; similia vero exempla adduxit filius, in *Verr.* II, 28; III, 23, etc. J. V. L.

2. *Loci communibus*. *Ædificiis publicis*, quorum usus est communis.

3. Olim, *reportata*. J. F. Gronov. legendum putat, « nunc a me Romam deportata est ». J. V. L. — Male. Ver-

res frustra tabulam revellit, quæ tamen diligentia Ciceronis investigata est.

4. *Cn. Pompeium*. Quum in Sicilia fuit, Carbonem persequens, Marianarum partium ducem. Nam Pompeius pro Sulla, a quo imperator appellatus est, contra Marium pugnavit.

5. *Contra rempublicam*. Contra nobiles et Sullanæ partes quæ remp.

tores ejus dicerent, quum magis invidioso crimine, quam vero arcesseretur; ita a Cn. Pompeio absolutus est, ut in eo ipso judicio Pompeius hunc hospitio suo dignissimum statuerit⁶? ita porro laudatus defensusque ab omnibus Siculis, ut idem Pompeius non ab homine solum, sed etiam a provincia tota se hujus absolutione inire gratiam arbitraretur? Postremo, estne hic, qui et animum in rempublicam habuit ejusmodi, et tantum auctoritate apud suos cives potuit, ut perficeret in Sicilia solus, te prætore, quod non modo Siculus nemo, sed ne Sicilia quidem tota potuisset: ut ex oppido Thermis nullum signum, nullum ornamentum, nihil ex sacro, nihil de publico attingeres; quum præsertim essent multa præclara, et tu omnia concupisses? Denique nunc vide, quid inter te, cujus nomine apud Siculos dies festi agitantur, et præclara illa Verrea celebrantur, cui statuæ Romæ stant inauratæ, a communi⁷ Siciliæ, quemadmodum inscriptum videmus, datæ: vide, inquam, quid inter te, et hunc Siculum, qui abs te est, patrono Siciliæ, condemnatus, intersit. Hunc civitates ex Sicilia permultæ, testimonio suo, legationibusque ob⁸ eam rem missis, publice laudant: te, omnium Siculorum patronum, una Mamertina civitas, socia furtorum ac flagitiorum tuorum, publice laudat; ita tamen, novo more, ut legati lædant⁹, legatio laudet: ceteræ quidem civitates, publice literis, legationibus,

obtinebant. De Sthenii constantia, vide supra cap. 39, not. 1.

6. Ernestius, emendandi nimium studiosus, jussit excudi « statueret ». J. V. L.

7. *A communi*. Id est, communitate. Græca locutio, cujus jam exem-

pla habuimus Act. prim. — *Datæ*. Ut patrono Siciliæ. Cf. infr. 61, 63.

8. Sic Lambinus, Gruterus, et qui post eos Tull. edidere. Olim « ad eam rem ». J. V. L.

9. *Lædant*. Accusent. Vide Verr. IV, 2 sqq.

testimoniis accusant, queruntur, arguunt; si tu absolutus sis, funditus eversas se esse arbitrantur.

XLVII. Hoc de homine, ac de hujus bonis, etiam in Erycino¹ monte monumentum tuorum flagitiorum crudelitatisque posuisti: in quo Sthenii Thermitani nomen adscriptum est². Vidi³ argenteum Cupidinem cum lampade. Quid tandem⁴ habuit argumenti aut rationis res, quamobrem in eo potissimum Sthenianum præmium poneretur? utrum hoc signum cupiditatis tuæ, an tropæum necessitudinis atque hospitii, an amoris indicium esse voluisti? Faciunt hoc homines, quos in summa nequitia non solum libido et voluptas, verum etiam ipsius nequitiae fama delectat, ut multis in locis notas ac vestigia scelerum⁵ suorum relinqui velint. Ardebat amore illius hospitæ, propter quam hospitii jura violarat: hoc non solum sciri tum, verum etiam commemorari semper volebat. Itaque ex illa ipsa re, quam, accusante Agathino, gesserat, Veneri potissimum deberi præmium statuit, quæ illam totam accusationem iudiciumque conflarat⁶. Putarem

XLVII. 1. Vulg. *Eryco*; P. Manut. *Eryce*. J. V. L.

2. *Nomen adscriptum est*. Nam scriptum et incisum est, ex Sthenii damnati bonis hoc esse donum Veneri dicatum. Exacta sunt enim a Sthenio H-S quingenta millia. — *Argenteum Cupidinem cum lampade*. Garatonius intelligit, non hic lychnum esse pensilem, ut nonnulli interpretantur, sed faciem argenteam in Cupidinis manu positam; quum præsertim verbum illud idem *lampas* in Tibullo occurrat, facis vice positum: « Illius ex oculis, quem vult exurere Divos, Accendit geminas lampadas acer Amor ».

3. Ernest. Sch. *Vide*. Mendo notabili. J. V. L.

4. *Quid tandem*. Quæ causa fuit, quæ ratio, quamobrem in Veneris potissimum templo, Sthenii bona, quasi præmium aliquod Veneri debitum, ponerentur? Posuistine avaritiæ, an tuæ in observanda amicitia fidei; an in Callidamam (supra cap. 36) amoris monumentum?

5. Lambin. maluit *flagitiorum*, quod etiam amplexus est Schütz. — Istius modi homines depictos invenias apud Theophr. Charact. VI, edit. Coray, pag. 34.

6. *Conflarat*. Ob amore enim hospitæ Callidamæ, cujus et vir et pater inimici erant Sthenio, recepta erat a Verre, illa de literis corruptis accusatio.

te gratum in deos, si hoc donum Veneri non de Sthenii bonis dedisses, sed de tuis: quod facere debuisti, præsertim quum tibi illo ipso anno a Chelidone venisset hereditas.

Hic ego, si hanc causam non omnium Siculoꝝ rogatu recepissem; si hoc a me muneris non universa provincia poposcisset; si me animus atque amor in rempublicam, existimatioque offensa nostri ordinis ac iudiciorum non hoc facere coegisset, atque hæc una causa fuisset, quod amicum atque hospitem meum Sthenium, quem in quæstura mea singulariter dilexissem, de quo optime existimassem, quem in provincia existimationis meæ studiosissimum cupidissimumque cognossem, tam crudeliter, scelerate, nefarieque tractasses: tamen⁷ digna causa, cur inimicitias hominis improbissimi susceperem, ut hospitis salutem fortunæque defenderem. Fecerunt hoc multi apud majores nostros: fecit etiam nuper homo clarissimus, Cn. Domitius, qui M. Silanum, consularem virum, accusavit propter Egritomari⁸ Transalpini hospitis injurias. Putarem me idoneum, qui exemplum sequerer humanitatis atque officii, proponeremque spem meis hospitibus ac necessariis, quo tutiorem vitam sese meo præsidio victuros esse arbitrarentur. Quum vero in communibus injuriis totius provinciæ Sthenii quoque causa contineatur, multique uno tempore a me hospites atque amici publice privatimque defendantur: profecto vereri non debeo, ne quis hoc, quod facio, non existimet me summi officii ratione impulsus coactumque suscepisse.

7. Grævius et alii, « tamen digna causa esset, cur ». Codd. Fabr. et Metell. « tamen digna causa videre-

tur »; quod Gruter. ab interpretum ingenio profectum putat. J. V. L.

8. *Egritomari*. Vid. *Divin.* 20.

XLVIII. Atque, ut aliquando de rebus ab isto cognitis, judicatisque, et de judiciis datis¹ dicere desistamus; et, quoniam facta istius in his generibus infinita sunt, nos modum aliquem et finem orationi nostræ criminibusque faciamus: pauca ex aliis generibus sumemus².

Audistis ob jus³ dicundum, Q. Varium⁴ dicere, procuratores suos isti centum et triginta millia nummum dedisse: meministis Q. Varii testimonium, remque hanc totam C. Sacerdotis, hominis ornatissimi, testimonio comprobari: scitis, Cn. Sertium, M. Modium, equites romanos, sexcentos præterea cives romanos, multosque Siculos, dixisse, se isti pecuniam ob jus dicundum dedisse. De quo crimine quid ego disputem, quum id totum positum sit in testibus? quid porro argumenter, qua de re dubitare nemo possit? An hoc dubitabit quisquam omnium, quin is venalem in Sicilia jurisdictionem habuerit, qui Romæ totum edictum atque omnia decreta vendiderit? quin is ab Siculis ob decreta interponenda pecuniam acceperit, qui⁵ M. Octavium Ligurem ob jus dicundum poposcerit? Quod enim iste⁶ præterea genus pecuniæ cogendæ præterit? quod non, ab omnibus aliis præteritum, excogitavit? Ecqua⁷ res apud civitates Siculas expetitur, in qua aut honos aliquis sit, aut potestas,

XLVIII. 1. *Judiciis datis.* Judicia dare tum dicebantur prætores, quum iudices et judicandi formulam dabant. De hoc provincialium prætorum jure confer ad calcem orationis hujus Excursum de prætore provinciali.

2. Lamb. *sumamus.* J. V. L.

3. *Ob jus.* Ut a Verre impetraret juris sui persequendi facultatem.

4. Alii, *Marium, vel Valerium.* J.

V. L. — *Centum et tr.* (26,650 fr.)

5. *M. Octavium.* Vide Verr. I, 48.

6. *Abest iste.* Conjicit Galielm. «Quod enim iste prætor». J. V. L.

7. *Ecqua res.* Nulla res est in Sicilia, quæ expeti possit, ut senatoria dignitas, magistratus, sacerdotium, seu rei alicujus administratio, quam Verres non ad lucrum apposuerit et vendiderit.

aut procuratio, quin eam rem tu ad tuum quaestum, nundinationemque hominum⁸ traduxeris?

XLIX. Dicta sunt priore actione et privatim et publice testimonia : legati Centuripini, Halesini, Catinenses, Panormitanique dixerunt, multarum praeterea civitatum ; jam vero privatim plurimi : quorum ex testimoniis cognoscere potuistis, tota Sicilia per triennium neminem ulla in civitate senatorem factum esse gratis ; neminem, ut leges eorum sunt, suffragiis ; neminem, nisi istius imperio, aut literis ; atque in¹ his omnibus senatoribus cooptandis, non modo suffragia nulla fuisse, sed ne genera² quidem spectata esse, ex quibus in eum ordinem cooptari liceret, neque census, neque ætatis, neque cetera Siculorum jura valuisse. Quicumque senator voluerit fieri, quamvis puer, quamvis indignus, quamvis ex eo loco, ex quo non liceret ; si is pretio apud istum fieret idoneus, ut vinceret³, factum esse semper : non modo Siculorum nihil in hac re valuisse leges, sed ne ab senatu quidem populoque romano datas⁴. Quas enim leges sociis amicisque dat is, qui habet imperium a populo romano, auctoritatem legum dandarum a senatu ; hæ debent et populi romani et senatus existimari.

Halesini pro multis et magnis suis majorumque suorum in rempublicam nostram meritis atque beneficiis, suo jure⁵ nuper, L. Licinio, Q. Mucio consulibus, quum haberent inter se controversias de senatu cooptando, leges ab senatu nostro petiverunt. Decrevit senatus

8. *Hominum*. Walkenaer frustra corrigit *honorum*.

XLIX. 1. Abest *in* a nonnullis. Ernestio *cooptandis* fuit suspectum.

2. *Genera*. Ortum.

3. *Fieret idoneus ut vinceret*. Qui

præ ceteris, obtineret. Vetus et Metelli liber habet : « Si is pretio apud istum idoneus vinceret ».

4. *Datas*. Leges Rupilias, ex SC. datas.

5. *Suo jure*. Sua sponte. — *Nuper*.

honorifico senatusconsulto, ut his C. Claudius, Appii filius⁶, Pulcher, prætor, de senatu cooptando leges conscriberet. C. Claudius, adhibitis omnibus Marcellis⁷, qui tum erant, de eorum sententia leges Halesinis dedit : in quibus multa sanxit de ætate hominum, ne quis minor⁸ triginta annis natu; de quæstu⁹, quem qui fecisset, ne legeretur; de censu¹⁰, de ceteris rebus. Quæ omnia, ante istum prætorem, et nostrorum magistratum auctoritate, et Halesinorum summa voluntate valuerunt : ab isto et præco, qui voluit, istum ordinem pretio mercatus est, et pueri annorum senum, septenumque denum, senatorium nomen nundinati sunt; et, quod Halesini, antiquissimi et fidelissimi socii atque amici, Romæ impetrarant, ut apud se ne suffragiis quidem fieri liceret, id pretio, ut fieri posset, effecit.

L. Agrigentini de senatu cooptando Scipionis leges antiquas habent; in quibus et eadem illa sancta sunt, et hoc amplius : quum Agrigentinorum duo genera sint, unum veterum, alterum colonorum, quos T. Manlius prætor ex senatusconsulto de oppidis Siculorum deduxit Agrigentum; cautum est in Scipionis legibus, ne plures essent in senatu ex colonorum numero,

Annos abhinc XXIV; quippe L. Licinius Crassus orator, et Q. Mucius Scaevola pontifex maximus consules fuerunt anno 658. Caius autem Claudius eodem anno Romæ prætor fuit, qui jam ædilis (A. U. C. 654) fuerat.

6. Lallem. e codd. Paris. « C. filius ». J. V. L.

7. *Marcellis*. Utpote Siciliæ patronis. — *Qui tum erant*. Nempe Romæ. Intelligent quidam qui tum exstabant, vivebant, quod absurdum videtur.

8. Codd. Nann. et Franc. « ne qui

minor », probante Grævio. Hic etiam Garatoniis malit *natus* pro *natu*. J. V. L. — *Triginta annis*. Hoc ætatis anno, senatores Romæ legi solere ex hoc loco recte Manut. colligere videtur. Eæ enim leges ad quamdam romani senatus speciem expressæ procul dubio erant.

9. *De quæstu*. Sordido nimirum et illiberali, ut præconis, histrionis, etc. Quæstus rom. senatori aut vetitus, aut certe non honestus. Parad. VI, 1.

10. *De censu*. Romæ senatorem

quam ex vetere Agrigentinorum. Iste, qui omnia jura pretio exæquasset, omniumque rerum delectum atque discrimen pecunia sustulisset; non modo illa, quæ erant ætatis, ordinis, quæstusque, permiscuit, sed etiam in his duobus generibus, civium novorum veterumque, delectum ordinemque turbavit. Nam, quum esset ex veterum¹ numero quidam senator demortuus, et quum ex utroque genere par numerus reliquus esset; veterem cooptari necesse erat legibus, ut is amplior numerus esset. Quæ quum ita se res haberet; tamen ad istum venerunt emptum locum illum senatorium non solum veteres, sed etiam novi: fit, ut pretio novus vincat, literasque² a prætore auferat. Agrigentini ad istum legatos mittunt, qui eum leges doceant, consuetudinemque omnium annorum demonstrent: ut iste intelligeret³, ei se illum locum vendidisse, cui ne commercium quidem esse oporteret. Quorum oratione iste, quum pretium jam accepisset, ne tantulum quidem commotus est. Idem fecit Heraclæ: nam eo quoque colonos P. Rupilius⁴ deduxit, legesque similes de cooptando senatu, ac de numero veterum ac novorum dedit. Ibi non solum iste, ut apud ceteros, pecuniam accepit, sed etiam genera veterum ac novorum numerumque permiscuit.

oportebat octingenta millia sestertium (circit. 164,000 fr.) in possessionibus habere.

L. 1. Olim editi, *vetere*, quod probat Garatonius, ad Philipp. II, 6. J. V. L.

2. *Literas*. Quibus senator a Verre designaretur, et Agrigentini ipsum in hunc ordinem recipere juberentur.

3. *Ut iste intelligeret*. Ita ut legati Verri intelligendum darent, non modo ab eo venalem propositum et habi-

tum senatorium locum, verum etiam huic traditum cui, propter suam indignitatem, ne licere quidem oporteret de loco illo emendo agere.

4. *P. Rupilius deduxit*. Confecto bello, jura Rupilius cum X legatis Siciliæ indixerat. Colonias eosdem deduxisse, vice triumvirum, conjicit Garatonius; quamquam unius Rupilii consilia, et imperatoris mentio fiat, ad quem ea res potestasque maxime pertinebat.

LI. Nolite expectare, dum omnes obeam¹ oratione mea civitates: hoc uno complector omnia², neminem isto prætore senatorem fieri potuisse, nisi qui isti pecuniam dedisset.

Hoc idem transfero in magistratus, curationes³, sacerdotia: quibus in rebus non solum hominum jura, sed etiam deorum religiones immortalium omnes repudiavit. Syracusis lex est de religione⁴, quæ in annos singulos Jovis sacerdotem⁵ sortito capi jubeat⁶: quod apud illos amplissimum sacerdotium putatur. Quum suffragiis tres ex tribus⁷ generibus creati sunt, res revocatur ad sortem. Perfecerat iste imperio, ut pro suffragio Theomnastus⁸ familiaris suus in tribus illis renuntiaretur: in sorte, cui imperare non poterat, expectabant homines, quidnam acturus esset. Homo, id quod erat facillimum, primo vetat sortiri: jubet extra sortem Theomnastum renuntiari. Negant id Syracusani per religiones sacrarum ullo modo fieri posse; fas denique negant esse. Jubet ille sibi legem recitari: recitatur; in qua scriptum erat, UT, QUOT ESSENT RENUNTIATI, TOT IN HYDRIAM SORTES CONJICERENTUR; CUJUS NOMEN EXISSET, UT IS HABERET ID SACERDOTIUM. Iste, homo ingeniosus⁹ et peracutus, Optime, inquit;

LI. 1. *Obeam*. Scilicet, ut singulatum quid unaquaque in civitate fecerit persequar.

2. *Omnia*. Alii, « crimine omnia ». Franc. autem *nomine*. Utrumque glossa.

3. *Curationes*. Procuraciones, seu administrationes operum publicorum.

4. *De religione*, Grutero suspectum, quasi de margine in textum irrepperit. J. V. L.

5. *Jovis sacerdotem*. Quem a Timotheonte, anno urbis Romæ 406, post

ejectos e tota Sicilia tyrannos, institutum Syracusani Jovis Olympii servum appellabant. Erat annuus, et ex eo anni, uti Romæ ex consulibus, adnotabantur. Adi Diodor. XVI, 70.

6. *Jubeat*. Alii, « jubebat ». J. V. L.

7. *Generibus*. Ordinibus.

8. *Theomnastus*. De homine isto vide Verr. IV, 66.

9. Alii, *negotiosus*. Irridet satuum illam Verris calliditatem, qua leges non acute, sed stulte impudenterque elusit.

nempe scriptum ita est, « quot renuntiati erunt »: quot ergo, inquit, sunt renuntiati? Responsum, tres. Numquid igitur oportet, nisi tres sortes conjici, unam educi? nihil. Conjici jubet tres, in quibus omnibus scriptum esset nomen Theomnasti. Fit clamor maximus, quum id universis indignum atque nefarium videretur. Ita Jovis illud sacerdotium amplissimum per hanc rationem Theomnasto datur.

LII. Cephalœdi mensis est certus, quo mense sacerdotem maximum creari oporteat. Erat ejus honoris cupidus Artemo¹ quidam, Climachias cognomine, homo sane locuples, et domi nobilis; sed is fieri nullo modo poterat, si Herodotus quidam adesset: ei locus ille atque honos in illum annum ita deberi putabatur, ut ne Climachias quidem contra diceret. Res ad istum defertur, et istius more deceditur. Toreumata sane nota ac pretiosa auferuntur². Herodotus Romæ erat: satis putabat se ad comitia tempore venturum, si pridie venisset. Iste, ne aut alio mense, ac fas erat, comitia haberentur, aut Herodoto præsentī honos adimeretur (id quod iste³ non laborabat, Climachias minime volebat), excogitat (dixi jamdudum; non est homo acutior quisquam, nec fuit), excogitat, inquam, quemadmodum mense illo legitimo comitia haberentur, nec tamen Herodotus adesse posset. Est consuetudo Siculorum, ceterorumque Græcorum, quod suos dies men-

LII. 1. Sic multi codd. Alii, *Arthenio*. P. Manut. *Athenio*. J. V. L. — *Toreumata*. Ea sunt vasa, si vim græcæ originis spectes, torno facta, plerumque autem ita sculpta, ut figuræ emineant.

2. *Pretiosa auferuntur*. Nempe ex ædibus Artemonis ad Verrem deportantur; quæ solita erat prætoris istius

conciliandi et emendi consuetudo.

3. *Id quod iste*. Verres facile vel alio mense, ac mos erat, comitia habuisset, aut Herodoto præsentī honorem ademisset, nisi Climachias obstitisset, qui minime volebat contra morem ac leges sacerdos creari, etsi Verres ejus moris rationem non habebat.

sesque congruere volunt cum solis lunæque ratione, ut nonnumquam, si quid discrepet, eximant⁴ unum aliquem diem, aut summum, biduum ex mense; quos illi εξαίρεσίμους dies nominant: item nonnumquam uno die longiorem mensem faciunt, aut biduo. Quæ iste quum cognovisset, novus astrologus, qui non⁵ tam cæli rationem, quam cælati argenti duceret, eximi jubet non diem ex mense, sed ex anno unum dimidiatumque mensem; hoc modo, ut, quo die, verbi causa, esse oporteret idus januiarias, eo die kalendas martias proscriberet⁶. Itaque fit, omnibus recusantibus et plorantibus⁷. Dies is erat legitimus comitiis habendis. Eo modo sacerdos Climachias renuntiatus est. Herodotus quum Roma revertitur, diebus⁸, ut ipse putabat, quindecim ante comitia, offendit eum mensem, qui consequitur mensem comitiale, comitiis jam abhinc triginta diebus habitis. Tunc Cephalœditani decreverunt intercalarium xlv dies longum, ut reliqui menses in suam rationem reverterentur. Hoc si Romæ⁹ fieri posset, certe aliqua ra-

4. *Eximant.* Græci tres in partes, seu δικάδας, mensem totum suum, qui lunaris erat, dividebant; quarum prima et secunda decem diebus singulæ constabant; tertia autem, die uno aut ad summum altero nunc longior, nunc brevior erat, prout luna serius aut celerius appareret. Exemptos autem dies εξαίρεσίμους, intercalatos ἐμβολίμους vocabant. Verres autem immuni licentia xlv dies exemit, significavitque v. g. eo die fore kal. mart. quæ die esse oporteret idus jan. De his vid. Jul. Pontedera, *Antiq. Lat. et Græc.* enarrat, p. 322. Jos. Scalig. *Petav.* etc. et *Indic.*

5. *Qui non.* Qui minus siderum

quam colligendi argenti rationem haberet. Festive ludit orator in ambiguo.

6. *Cod. Nann.* «proscribere jubet». J. V. L.

7. *Vett. edd.* «implorantibus». Unde Nannius conjicit, «deos hominesque implorantibus». Nimia, opinor, audacia. J. V. L.

8. *Diebus.* Herodotus redierat v. g. die xiv febr. quindecim diebus ante kal. mart. Quum autem Verres xlv dies exemisset, xiv febr. jam erat Cephalœditanis xxxi Martii, et comitia abhinc triginta diebus erant habita.

9. *Hoc si Romæ fieri posset, certe, etc.* Deinde tamen hoc Romæ, sed alia de causa, factum est. Quum negligentia

tione expugnasset iste, ut dies XLV¹⁰ inter binos ludos tollerentur, per quos solos iudicium fieri posset.

LIII. Jam vero censores¹, quemadmodum in Sicilia isto prætore creati sint², operæ pretium est cognoscere. Ille enim est magistratus apud Siculos, qui diligentissime mandatur a populo, propter hanc causam, quod omnes Siculi ex censu quotannis tributa conferunt: in censu habendo potestas omnis æstimationis³ habendæ summæque faciundæ censori permittitur. Itaque eum populus, cui maxime⁴ fidem suarum rerum habeat, maxima cura deligit; et propter magnitudinem potestatis hic magistratus a populo summa ambitione contenditur. In ea re iste nihil obscure facere voluit, non in sortitione⁵ fallere, neque dies de fastis eximere; nihil sane vafre, nec malitiose facere conatus est: sed, ut studia cupiditatesque honorum atque ambitiones ex omnibus civitatibus tolleret, quæ res evertendæ reipublicæ solent esse, ostendit, sese in omnibus civitatibus censores esse facturum. Tanto mercatu prætoris indicto, concurritur undique ad istum

pontificum, quibus intercalandi potestas erat, æquinotium vernum Ciceronis ætate pæne in ætatem incideret, J. Cæsar adhibito Sosigene astronomo, confusa omnia redegit.

10. *Dies XLV.* Elate. Nam revera septem tantum et triginta dies erant vacui binos inter ludos, Circenses et Victoriæ, per quos dies solos iudicium fieri posset. De Verris in hanc rem machinamenti vide Act. I, 10.

LIII. 1. *Censores.* Illi a provincialibus creabantur, bini in singulas civitates. Eorum munus erat censum ordinare, et quid quisque, ex suo censu, pendere in privatam civitatum administrationem deberet, æstimare.

In Sicilia apparet cxxx creatos fuisse, cap. 55.

2. Sic Ernest. Vulgatam tamen lectionem, *sunt*, defendit Gœrens. ad Cic. de Finib. IV, 24. J. V. L.

3. *Æstimationis.* Æstimandi cujusque bona, et constituendi summam quæ a quoque est tributi nomine conferenda.

4. *Cui maxime.* Quem iudicat dignissimum cujus fidei suorum bonorum æstimationem, et adeo bona ipsa committat. — Alii, « qui maximam f. s. r. habebat ». J. V. L.

5. *Non in sortitione.* Ut fecerat Syracusis. — *Neque dies.* Ut Cephalædi fecerat.

Syracusas. Flagrabat domus tota prætoria studio hominum et cupiditate : nec mirum, omnibus comitiis tot civitatum unam in domum revocatis, tantaque ambitione provinciæ totius in uno cubiculo inclusa. Exquisitis palam pretiis, et licitationibus factis⁶, describebat censores binos in singulas civitates Timarchides. Is suo labore, suisque accessionibus⁷, hujus negotii atque operis molestia consequebatur, ut ad istum, sine ulla sollicitudine, summa pecunia referretur. Jam hic Timarchides quantam pecuniam fecerit, plane adhuc cognoscere non potuistis : verumtamen priore actione, quam varie, quam improbe prædatus esset, multorum ex testimoniis cognovistis.

LIV. Sed ne miremini, qua ratione hic tantum apud istum libertus potuerit, exponam vobis breviter, quid hominis sit : ut et istius nequitiam, qui illum secum habuerit, eo præsertim numero ac loco, et calamitatem provinciæ cognoscatis. In mulierum corruptelis, et in omni ejusmodi luxuria atque nequitia, mirandum in modum reperiēbam hunc Timarchidem ad istius flagitiosas libidines singularemque nequitiam natum atque aptum fuisse ; investigare, adire, appellare, corrumpere, quidvis facere in ejusmodi rebus, quamvis callide, quamvis audacter, quamvis impudenter : eundem mira quædam excogitasse¹ genera furandi : nam ipsum Verrem², tantum avaritia semper

6. *Licitationibus factis.* Auctis scil. subinde pretiis, ab iis qui præturas mercabantur. — *Describebat*, particubatur.

7. Nannio magis placebat *accensionibus*. Ignotum verbum. J. V. L. — Sensus est : Timarchides homines ad-eundo, appellando, molestias omnes sibi uni insumendo consequebatur, ut

ad Verrem, sine ulla molestia, pecunia rediret.

LIV. 1. Vulg. *excogitare*. Omnes probant Ernest. emendationem, quod ad antecedentia refertur.

2. *Ipsum Verrem.* Nam Verres immani tantum et ad prædam hiantē avaritia notus, nihil in furtis ingeniose excogitare poterat, utpote hebes

hiantem atque imminenti fuisse, ingenio, et cogitatione nulla; ut, quidquid sua sponte faciebat, item ut vos Romæ cognovistis, eripere potius, quam fallere videretur. Hæc vero hujus erat ars et malitia miranda, quod acutissime tota provincia, quid cuique accidisset³, quid cuique esset necesse, indagare et odorari solebat; omnium adversarios⁴, omnium inimicos diligenter cognoscere, colloqui, attentare; ex utraque parte causas, voluntates perspicere, facultates et copias; quibus opus esset, metum afferre; quibus expediret, spem ostendere. Accusatorum et quadruplatorum quidquid erat, habebat in potestate; quod cuique negotii conflare volebat, nullo labore⁵ faciebat; istius omnia decreta, imperia, literas peritissime et callidissime venditabat. At non solum erat administrator istius cupiditatum; verum etiam ipse sui meminerat æque. Non solum nummos, si qui isti exciderant, tollere solebat, ex quibus pecuniam maximam fecit; sed etiam voluptatum flagitiorumque istius ipse reliquias colligebat. Itaque in Sicilia non Athenionem⁶, qui nullum oppidum cepit; sed Timarchidem fugitivum omnibus oppidis per triennium scitote regnasse; in Timarchidi⁷ potestate sociorum populi romani antiquissimorum atque amicissimorum libe-

et obtusus. — Sumpta a corvis aut vulturibus translatio, qui cadaveribus, ore faucibusque apertis inhiant.

3. *Quid cuique accidisset.* Triga horum verborum, teste Grutero, primum accedit Ciceroni e oodd. Fabr. et Metell. J. V. L.

4. *Omnium adversarios.* Ex iisdem libris hæc duo verba ortum habent. J. V. L.

5. *N. labore.* Ut qui quadruplatores,

ipsumque prætorem penes se haberet.

6. *Athenionem.* Fugitivorum et Drepanitanorum qui a Romanis deferant ducem in Sicilia, qui se regem appellari voluit, fuitque revera, sed paucorum dierum; nam a M'. Aquillio in acie interfectus est anno 654. Vide Flor. III, 19. Appian. Mithridat. et Diodor. fragm.

7. *Alii, Timarchidis.* Sed Priscian. h. l. legerat *Timarchidi*.

ros, matresfamilias, bona, fortunasque omnes fuisse. Is igitur, ut dico, Timarchides in omnes civitates, accepto pretio, censores dimisit: comitia, isto prætore, censorum, ne simulandi quidem causa, fuerunt.

LV. Jam hoc impudentissime: palam (licebat enim videlicet legibus) singulis censoribus denarii¹ trecenti ad statuam prætoris imperati sunt. Censores cxxx facti sunt: pecuniam illam² ob censuram contra leges clam dederunt; hæc denarium xxxix millia palam salvis legibus contulerunt in statuam. Primum quo tantam pecuniam? Deinde quamobrem censores ad statuam tibi conferebant? Ordo aliquis³ censorum est collegium? genus aliquod hominum? nam aut publice civitates istos honores habent; aut generatim homines, ut aratores, ut mercatores, ut navicularii. Censores quidem qui magis, quam ædiles? Ob beneficium? Ergo hoc fatebere, abs te hæc petita esse (nam empta⁴ non audebis dicere); te eos magistratus hominibus, beneficii, non reipublicæ causa, permi-

LV. 1. *Denarii trecenti* (221 fr. 10 c.) Ut habet *Letronne*. Inf. autem «denarium xxxix millia» (31,980 fr.) constant.

2. *Illam* refertur ad narrationem, cap. 53, de exquisitis pro prætura pretiis. — Lalleu. e codd. *Parisiens. aliam*. Minus recte.

3. *Ordo aliquis*. Non civium pecuniaris ordo, censores sunt; utpote ex omnibus ordinibus collecti. Atqui aut civitates publica impensa istos honores statuarum tribuunt; aut privatim hominum classes (gall. *des communautés, des corps*), ut aratores, etc. Si publice, non debebat a censoribus nominatim altera exigi pecunia: si privatim, non debebat etiam, siqui-

dem censura non est sejunctus ordo ab aliis ordinibus. Cur ergo magis censores conferant quam ædiles? An conferebant *ob beneficium*, i. e. ob censuram, quam abs te ea conditione acceperant, ut conferrent. Si hoc fateris, etiam fatebere hæc denarium tot millia abs te petita fuisse; empta (censura nimirum) melius diceret. Garatonius vero locum illum sic distinguendum putabat: Ordo aliquis censorum est? collegium? genus aliquod hominum? Sed ita laborat structura. Præterea Cicero querere non poterat, an collegium esset censorum. Ut enim collegia dicuntur consulum, prætorum, etc. quidni etiam censoribus?

4. *Empta*. Habent *erepta* Gruter.

sisse? Hoc autem quum tute fatebere, quisquam dubitabit, quin tu istam apud populos provinciæ istius invidiam atque offensionem, non ambitionis, neque beneficiorum collocandorum, sed pecuniæ conciliandæ causa susceperis? Itaque illi censores fecerunt idem, quod in nostra republica solent ii, qui per largitionem magistratus adepti sunt: dederunt operam, ut ita potestatem gererent, ut illam lacunam⁵ rei familiaris explerent. Sic census habitus est, te prætore, ut eo censu nullius civitatis respublica posset administrari: nam locupletissimi⁶ cujusque census extenuarant, tenuissimi auxerant. Itaque in tributis imperandis tantum oneris plebi imponebatur, ut, etiamsi homines tacerent, res ipsa illum censum repudiaret: id quod intelligi facillime re ipsa potest.

LVI. Nam L. Metellus, qui, posteaquam ego inquirendi causa in Siciliam veni, repente Letilii adventu, istius non modo amicus, verum etiam cognatus factus est; is, quod videbat istius¹ censum stare nullo modo posse, eum censum observari jussit, qui viro fortissimo atque innocentissimo Sex. Peducæo prætore habitus esset. Erant enim tum censores legibus facti, delecti a suis civitatibus: quibus, si quid commisissent, poenæ legibus erant constitutæ. Te autem prætore, qui

Ernest. sensu non commodo. Nos cum Græv. Beck. Sch. et J. V. L. ed. 1473 sequimur.

5. *Illam lacunam.* Ut scilicet eo in magistratu pecuniam omnem retraherent, quam Verri ob munus illud emendum dare fuerant coacti. Sic optime Sen. de Benef. I, ait, provincias spoliari, et nummarium tribunal, audita utrimque licitatione, alteri addici non mirum; quando quæ emeris vendere gentium jus est.

6. *Locupletissimi.* Censores illi, qui a Verre munus emerant, accepta a locupletibus pecunia, iis minora, pauperibus majora tributa imperabant. Græv. loco *auxerant* recepit *hausèrant* e MSS duobus, quod antithetum dissolvit.

LVI. 1. *Istius censum stare.* Codd. Metell. et Fabr. « istius censum stari »; unde Gulielm. Verisimil. I, 7, conjicit legendum, « istius in censu stari ». J. V. L.

censor aut legem metueret², qua non tenebatur, quoniam creatus lege non erat; aut animadversionem tuam, quum id, quod abs te emerat, vendidisset? Teneat jam sane meos testes Metellus; cogat alios laudare, sicut in multis conatus est: modo hæc faciat, quæ facit. Quis enim umquam tanta a quoquam contumelia, quis tanta ignominia affectus est? Quinto quoque anno Sicilia tota censetur: erat censa prætore Peducæo. Quintus annus quum te prætore incidisset, censa denuo est. Postero anno L. Metellus mentionem tui census fieri vetat: censores dicit de integro sibi creari placere: interea Peducæanum censum observari jubet. Hoc si tuus inimicus tibi fecisset, tamen etsi³ animo æquo provincia tulisset, inimici iudicium grave⁴ videretur: fecit amicus recens, et cognatus voluntarius⁵. Aliter enim, si provinciam⁶ retinere, si salvus ipse in provincia vellet esse, facere non potuit.

LVII. Expectas etiam, quid hi iudicent? Si tibi magistratum abrogasset¹, minore ignominia te affecisset, quam quum ea, quæ in magistratu gessisti, sustulit atque irrita iussit esse. Neque in hac re sola fuit ejusmodi; sed, antequam ego in Siciliam veni, in maximis rebus ac plurimis. Nam et Heraclio Syracusano tuos

2. Alii, *metuerit*; alii, *metuerat*. — *Qui pro quis* sumitur, ut sæpe.

3. Olim, *tamen si*; codd. al. *tametsi*. Mureti codd. sequimur. J. V. L.

4. *Judicium grave*. Ingens tibi præiudicium fieri videretur.

5. *Cognatus voluntarius*. Repente enim cœpit dicere, se omnia Verris causa velle, sibi que cum eo amicitiam esse et cognationem.

6. *Si provinciam*. Excusare primum Metellum videtur, sed re ipsa accusat, quod ita sit mutatus quasi ipsi summa

vis adhibita fuisset. Ferrat. intelligebat si provinciam non penitus everti, suamque agendi rationem reprehensione carere vellet. Garat. vero hæc ad quemdam seditionis metum pertinere conj. Frustra. Cic. hanc suam sententiam pluribus jam non semel verbis explicuit; nempe omnino deserturos provinciam agricolas, nisi aliter regeretur.

LVII. 1. *Abrogasset*. Ademisset, curasset ut a te auferretur; abrogare enim magistratum alicui, est legem ferre, ut suus ei tollatur magistratus.

illos² palæstritas bona restituere jussit, et Epicrati Bidinos, et pupillo³ Drepanitano A. Claudium; et, nisi mature Letilius in Siciliam venisset cum literis, minus xxx diebus Metellus totam triennii præturam tuam rescidisset.

Et, quoniam de ea pecunia, quam tibi ad statuam censores contulerunt, dixi; non mihi prætermittendum videtur ne illud quidem genus pecuniæ conciliatæ, quam tu a civitatibus statuarum nomine coegisti. Video enim ejus pecuniæ summam esse pergrandem, ad H-S cxx millia⁴: tantum conficitur ex testimoniis ac literis civitatum. Et iste hoc concedit, nec potest aliter dicere. Quare cujusmodi putamus esse illa, quæ negat, quum hæc tam improba sint, quæ fatetur? Quid enim vis constitui? consumptam esse omnem istam pecuniam in statu? Fac ita esse: tamen hoc ferendum nullo modo est, tantam ab sociis pecuniam auferri, ut omnibus in angiporis prædonis improbissimi statuæ ponantur, qua vix⁵ tuto transiri posse videatur.

LVIII. Verum ubi tandem, aut in quibus statu? ista tanta pecunia consumpta est? Consumetur, in-

2. *Tuos illos.* Amicissimos scilicet, quibuscum Heraclii et Epicratis bona partiti es.

3. *Pupillo.* Sosippi, qui frater erat Epicratis, filio. Quem bonis spoliatur omnibus A. Claudius, Apollonius, homo dignissimus Verris moribus. Vid. Verr. IV, 17.

4. *CXX millia* (24,600 fr.) Quæ summa non *pergrandis* videtur; nisi a singulis civitatibus exacta dicatur, cui rei refragari et latini sermonis ratio et sequentia videntur. Reposuit Man. «ccc millia», quod non sufficit; quum infra Verres hanc omnino summam a solis Centuripinis abstulisse statuarum

nomine arguatur. Legi voluit Lallem. «centies vices», qui numerus omnem fidem ac modum excedit. Quum enim Cicero sæpius dicat Verrem «quadringenties sestertium» ex Sicilia contra leges abstulisse, quis credere possit pecuniam a civitatibus statuarum nomine ablatam, plus quam quartam illius summæ partem effecisse. Conjicit Garaton. «sestertium vices» (410,000 fr.), quem numerum per xx in codd. expressum paulatim in «cxx millia» abiisse arbitratur. Recepit Schütz. hic et paullo post.

5. *Qua vix.* Quasi Verris statuæ spoliandi vim et ipse habeant.

quies. Scilicet exspectemus legitimum illud quinquennium¹: si hoc intervallo non consumpserit, tum denique nomen ejus de repetundis pecuniis statuarum nomine deferamus. Reus est maximis plurimisque criminibus in iudicium vocatus. H-S cxx millia ex hoc uno genere capta videmus. Si condemnatus eris, non opinor, id ages, ut ista pecunia quinquennio² consumatur in statu; sin absolutus eris, quis erit tam amens, qui te, ex tot tantisque criminibus elapsus, post quinquennium statuarum nomine arcessat? Ita si neque adhuc consumpta ista pecunia est, et est perspicuum non consumptum iri; licet jam intelligamus, inventam esse rationem, quare et iste H-S cxx millia uno genere conciliarit et ceperit, et ceteri, si a vobis hoc erit comprobatum³, quam volent magnas hoc nomine pecunias capere possint: ut jam videamur non a pecuniis capiundis homines absterre⁴, sed, quum genera quædam pecuniarum capiundarum comprobarimus, honesta nomina turpissimis rebus imponere. Etenim, si C. Verres H-S cxx millia populum, verbi gratia, Centuripinum poposcisset, eamque ab his pecuniam abstulisset; non, opinor, esset dubium, quin eum, si tum id planum fieret, condemnari necesse esset. Quid, si eumdem populum H-S ccc millia poposcit, eaque coegit atque abstulit? num idcirco absolvetur, quod adscriptum est, eam pecuniam datam statuarum

LVIII. 1. *Quinquennium*. Censuerat senatus, ut pecunia tantum certa ac definita prætoris in statuas a provincialibus erogaretur; lataque lex erat ut illæ intra *quinquennii* spatium collocarentur; quo præterito, si positæ non essent, licebat eum qui pecuniam statuarum nomine abstulerat, repetundarum accusare.

2. *Quinquennio*. Intra quinquennium, quod tempus lege definitum est, ut modo ostendimus.

3. *Comprobaturum*. Nisi vos magno exemplo non impune nocentibus futurum ostenderitis.

4. *Homines absterre*. Quum in tot magistratus illud nunc cadat crimen, ut vix castigari posse videatur.

nomine? Non, opinor: nisi forte⁵ id agimus, non ut magistratibus nostris moram accipiendi, sed ut sociis causam dandi afferre videamur. Quod si quem statuæ magnopere delectant, et si quis earum honore et gloria ducitur; is hæc tamen constituat necesse est; primum, averti pecuniam domum non placere; deinde, ipsarum statuarum modum quemdam esse oportere; deinde illud, certe ab invitis exigi non oportere.

LIX. Ac de avertenda pecunia, quæro abs te, utrum ipsæ civitates solitæ sint statuas tibi faciundas locare ei, cui possent optima conditione locare, an aliquem curatorem præficere, qui¹ statuis faciundis præset, an tibi, an cui tu imperasses, annumerare pecuniam? Nam si per eos statuæ fiebant, a quibus tibi iste honos habebatur; audio²: sin Timarchidi pecunia numerabatur; desine, quæso, simulare, te, quum in manifesto furto tuo teneare, gloriæ studiosum ac monumentorum fuisse.

Quid vero? modum statuarum haberi nullum placet? atqui habeatur necesse est. Etenim sic considerate. Syracusana civitas (ut eam potissimum nominem) dedit ipsi³ statuam: est honos. Et patri: bella hæc pietatis et quæstuosa simulatio. Et filio: ferri hoc potest; hunc

5. *Nisi forte*. Nisi nos non tam magistratum cupiditati obstatum, quam ei causas extorquendi asserimus. Loco *afferre* vulgo erat *auferre*, quem Ern. ferri posse existimabat, si verba *morem* (pro *moram*) et *causam* sedes permutarent. Recte Hotom. coniecit legendum esse *afferre*, quod postea in cod. Metell. repertum plerique editores comprobaverunt. Manutio tamen placuit «morem accipiendi...causam dandi auferre», hoc sensu: Si absolvis Verrem, non auferetis magistra-

tibus accipiendi morem, sed sociis causam dandi.

LIX. 1. Verba hæc, «qui...præset», Herelius non sine jure quodam insititia judicavit. J. V. L.

2. *Audio*. Bene est: nihil possum dicere.

3. Lectio F. Ursino probata, præsertim e cap. 67: «C. Verris ipsius, et patris, et filii». Alteram vero, *isti*, alii magis probant. J. V. L.—Nempe alia est h. l. ratio, ubi Verris nomen non additur.

enim puerum⁴ non oderant. Verum quoties, et quot nominibus a Syracusanis statuas auferes? Ut in foro statuerent, abstulisti: ut in curia, coegisti: ut pecuniam conferrent in eas statuas, quæ Romæ ponerentur, imperasti: ut iidem⁵ darent homines aratorum nomine; dederunt: ut iidem pro parte in commune Siciliae conferrent; etiam id contulerunt. Una civitas quum tot nominibus pecuniam contulerit, idemque hoc civitates ceteræ fecerint; non res ipsa vos admonet, ut putetis, modum aliquem huic cupiditati constitui oportere? Quod si hoc voluntate sua nulla civitas fecit; si omnes imperio, metu, vi⁶, malo adductæ, tibi pecuniam statuarum nomine contulerunt: per deos immortales, num cui dubium esse poterit, quin, etiamsi quis statuerit, accipere ad statuas licere, idem tamen statuatur, eripere certe non licere? Primum igitur in hanc rem testem totam Siciliam citabo: quæ mihi una voce statuarum nomine magnam pecuniam per vim coactam esse demonstrat. Nam legationes omnium civitatum in postulatis⁷ communibus, quæ fere omnia ex tuis injuriis nata sunt, etiam hoc ediderunt, UT STATUAS NE CUI, NISI QUUM IS DE PROVINCIA DECESSISSET, POLLICERENTUR⁸.

4. *Hunc enim puerum.* Acerbe in puerum tamquam blandum et pergratosum Syracusanis, et in Syracusanos ipsos dictum; quos, quia legationem Verris laudandi gratia miserant, multis locis non leviter lacescit.

5. *Ut iidem.* Illos coegisti ut quasi ex aratorum ordine darent, et iterum, quamvis jam dedissent, ut cum ceteris Siciliae populis conferrent. Cf. c. 55.

6. *Metu, vi.* Quamquam Verres nihil poenarum statuarum nomine proposuerat, at probe noverant Siculi,

non impune ipsis fore, si recusarent, nec prætori calumniæ causas defuturas. Itaque quum sponte facere viderentur, tamen vi, metu maloque adducti faciebant.

7. *In postulatis.* De his cf. cap. 42.

8. Schütz. corrigit e sequentibus, « liceret polliceri ». Infra enim sic sese habet postulatam de statu, « Postulant... ut ipsis ne liceat ». Et paullo post, « mihi impone istam vim, ut omnino mihi non liceat polliceri ». J. V. L.

LX. Tot prætores in Sicilia fuerunt; toties apud majores nostros Siculi senatum adierunt; toties hac memoria: tamen hujusce novi postulati genus¹ atque principium tua prætura attulit. Quid enim tam novum, non solum re, sed genere ipso postulandi? Nam cetera, quæ sunt in iisdem postulatis de injuriis tuis, sunt nova, sed tamen non novo modoulantur. Rogant et orant Siculi patres conscriptos, ut nostri magistratus posthac decumas lege Hieronica vendant. Tu primus contra vendideras: audio². Ne, in cellam quod imperatur, æstiment. Hoc quoque propter tuos ternos denarios³ nunc primum postulatur: sed genus istud postulandi non est novum. Ne absentis nomen recipiatur: ex Sthenii calamitate et tua natum est injuria. Cetera non colligam: sunt omnia Siculorum postulata ejusmodi, ut crimina collecta in unum te reum esse videantur; quæ tamen omnia novas injurias habent, sed postulationum formulas usitatas⁴. Hoc postulatum de statu ridiculum esse videatur ei, qui rem sententiamque non perspiciat⁵. Postulant enim, non, uti ne cogantur statuere: quid igitur? ut ipsis ne liceat. Quid est hoc? petis⁶ a me, quod in tua potestate est, ut id tibi facere non liceat? pete potius, ne quis te invitum polliceri aut facere cogat. Nihil

LX. 1. *Genus*. Nempe quod inauditus ille postulandi modus, non, ut ne cogantur statuas collocare, sed ut ipsis non liceat: ut infra disertissime explicat orator.

2. *Audio*. Nunc intelligo: illud non miror postularum.

3. *Tuos ternos denarios*. Quos in modios singulos exegisti. Vid. Div. 10.

4. *Formulas usitatas*. Ut præter formulam nihil simile habeant postu-

lationum, neque aliud quidquam sint nisi criminationes.

5. Priscian. pag. 1147, « respiciat ». J. V. L.

6. *Petis*. Quid tu, Sicule, a me postulas, ut te lex facere vetet, quod a te uno pendet, etc. Sed hac ratione nihil profecerimus, respondet Siculus; nos a se coactos negabunt prætores, ac si nostras fortunas vis servare, hanc nobis impone necessitatem ut, etc.

egero⁷, inquit; negabunt enim omnes se coegisse: si me salvum esse vis, mihi impone istam vim, ut omnino mihi non liceat polliceri. Ex tua prætura primum nata est hæc postulatio: qua quum utuntur, hoc significant, atque adeo aperte ostendunt, sese ad statuas tuas pecuniam, metu ac malo coactos, invitissimos contulisse. Quid, si hoc non dicant? tibi non necesse sit ipsi id confiteri? Vide, et perspice, qua defensione sis usurus: nam intelliges⁸, hoc tibi de statu is confitendum esse.

LXI. Mihi enim renuntiatur, ita constitui a tuis patronis, hominibus ingeniosis¹, causam tuam, et ita eos abs te institui et doceri: ut quisque ex provincia Sicilia gravior homo atque honestior testimonium vehementius dixerit, sicuti Siculi multi primarii viri multa dixerunt, te statim hoc istis tuis defensoribus dicere: « Inimicus est propterea, quod arator est. » Itaque uno genere², opinor, circumscribere habetis in animo genus hoc aratorum, quod eos infenso animo atque inimico venisse dicatis, quia fuerit in³ decumis iste vehementior. Ergo aratores, inimici omnes⁴, omnes adversarii sunt: nemo eorum est, quin perisse te cu-

Vehementissima dialogismi forma, a nostris sacris oratoribus, præsertimque a *Massillone* feliciter sæpius usurpata.

7. *Nihil egero. Nihil profecero.*— Sic optime codd. Ursin. et Paris. Olim, « Nihil ergo ». J. V. L.

8. *Nam intelliges.* Habent edd. Oliv. Oxon. Lalle. « jam intelliges ». J. V. L.

LXI. 1. *Tuis patronis.* Hortensio, Curione, et Sisenna, et aliis, quos per oppositionem vocat ingeniosos. Nihil enim acuti habet illa, quam excogitaverant, defensio.

2. *Uno genere.* Hoc uno respondendi modo, cogitatis ab accusatione aratores remove. Hoc enim sensu est *circumscribere*, Mil. 33. Philipp. XIII, 9.

3. *In decumis.* Exigendis. Ex hoc aratorum odio laudem et gratiam populi rom. sibi comparaturum sperabat Verres, quod pluris, quam ceteri decumas vendidisset et remp. adeo ditasset. At egregie hanc ejus defensionem refutat Cicero Verr. III, de re frumentaria.

4. Sic edidimus, post Lalle. et

piat. Omnino præclare te habes ⁵, quum is ordo atque id genus hominum, quod optimum atque honestissimum est, a quo uno ⁶ et summa reipublicæ et illa provincia maxime continetur, tibi est inimicissimum. Verum esto : alio loco de aratorum animo et injuriis videro ; nunc, quod mihi abs te datur, id accipio, eos tibi esse inimicissimos : nempe ita dicis, propter decumas. Concedo ; non quæro, jure an injuria sint inimici. Quid ergo illæ sibi statuæ equestres inanratæ volunt, quæ populi romani oculos animosque maxime offendunt, propter ædem ⁷ Vulcani ? Nam inscriptum esse video, « quamdam ex his statuam aratores de-
« disse ». Si honoris ⁸ causa statuam dederunt, inimici non sunt : credamus testibus : tum enim honori tuo, nunc jam religioni suæ consulunt. Sin autem metu coacti dederunt, confiteare necesse est, te in provincia pecuniam statuarum nomine per vim ac metum coegisse. Utrum tibi commodum est, elige.

LXII. Equidem libenter hoc jam crimen de statu

eum sequutos, e duobus codd. Paris. Vulgo « inimici omnes, adversarii sunt ». At Gruterus jam repeti vocem maluerat. Lambinus dedit, « inimici omnes et adversarii sunt ». Languidius. J. V. L. — Garatonius conjicit vocem illam *sunt* adjectam fuisse : nec optime.

5. *Omnino præclare te habes.* Præclare tecum agitur, habes quo te oblectes. Ironice.

6. *A quo uno.* A quo pendet et tota reip. salus, quippe qui aratores Romam alant ; et Siciliæ fortuna, quæ ex hoc frumentorum commercio efflorescat.

7. *Propter ædem.* Ad Vulcani templum, quod supra comitium erat,

in foro. In eam tribuni plebem advocare et concionem habere consueverant. Fuerat a Romulo extra Urbem condita, quo senatus curiæ loco uteretur ; verum ampliato pomerio celeberrimum postea urbis locum occupavit.

8. *Si honoris.* Si isti aratores honoris causa, tibi statuam dederunt, inimici tibi non sunt. Ergo iis testibus est credendum, si testimonium contra te dicunt. Tum enim, quum tibi statuas collocabant, honori tuo consulerunt ; nunc quum te accusant, religioni suæ in testimonio dicendo consulunt. Lambin. et Sch. habent *consulent*, quod omnino necesse non est.

relinquam, ut mihi tu illud concedas, quod tibi honestissimum est, aratores tibi ad statuam honoris tui causa, voluntate sua, contulisse. Da mihi hoc : jam tibi maximam partem defensionis præcideris. Non enim poteris, aratores tibi iratos esse¹ atque inimicos, dicere. O causam singularem ! o defensionem miseram ac perditam ! nolle hoc² accipere reum ab accusatore, et eum reum, qui prætor in Sicilia fuerit, aratores ei statuam sua voluntate statuuisse ; aratores de eo bene existimare, amicos esse, salvum esse cupere ! Metuit, ne hoc vos existimetis : obruitur enim aratorum testimoniis. Utar eo, quod datur³ : certe hoc ita vobis judicandum⁴ est, eos, qui isti inimicissimi sunt, ut ipse existimari vult, ad istius honores atque monumenta pecuniam non voluntate sua contulisse. Atque ut hoc totum facillime intelligi possit, quem voles eorum testium, quos produxero, qui ex Sicilia testes sint, sive togatum⁵ velis, sive Siculum, rogato, et eum, qui tibi inimicissimus esse videbitur, qui se spoliatum a te dicet⁶ ; ecquid suo nomine in tuam statuam contulerit : neminem reperiēs, qui neget : etenim omnes dederunt. Quemquam igitur putas dubitaturum, quin is, quem inimicissimum tibi esse oporteat, qui abs te gravissimas injurias acceperit, pecuniam statuæ no-

LXII. 1. *Tibi iratos esse.* Liber Metell. tibi honestis, unde fingit Guelm. hosteis.

2. *Nolle hoc.* O desperatam litem, in qua reus ea rejicit quæ ei ab accusatore conceduntur ?

3. *Quod datur.* Quod a Verre mihi conceditur, aratores metu coactos Verri statuam posuisse. Hoc enim concedit, quum illud accipere negat. Nam alterutrum verum sit necesse est, aut sua sponte, aratores, aut vi

coactos pecuniam ad statuam contulisse.

4. *Vobis judicandum.* Illud sanè vobis discernendum patet, ejus inimicos pecuniam invitò contulisse. — *Qui ex Sicilia testes sint.* Sch. delet ut glossema. J. V. L.

5. *Togatum.* Cives romanos in Sicilia r. m. frumentariam aut pecuniariam exercentes, quos paullo infra *aratores* ac *negotiatores* appellat.

6. *Vulg. dicit.* J. V. L.

mine dederit, vi atque imperio adductus, non officio ac voluntate? Et hujus ego pecuniæ, judices, quæ permagna est, impudentissimeque coacta ab invitis, non habui rationem⁷, neque habere potui, quantum ab aratoribus, quantum ab negotiatoribus, qui Syracusis, qui Agrigenti, qui Panormi, qui Lilybæi negotiantur, esset coactum: quoniam intelligitis, ipsius quoque confessione, ab invitissimis coactam esse.

LXIII. Venio nunc ad civitates Siciliæ: de quibus facillime iudicium fieri voluntatis potest. An etiam Siculi inviti contulerunt? non est probabile. Etenim sic C. Verrem præturam in Sicilia gessisse constat, ut, quum utrisque satisfacere non posset, et Siculis, et togatis, officii potius in socios, quam ambitionis in cives rationem duxerit. Itaque eum non solum PATRONUM istius insulæ, sed etiam SOTERA¹ inscriptum vidi Syracusis. Hoc quantum est? ita magnum, ut latino uno verbo exprimi non possit. Is est nimirum SOTER, qui salutem dedit. Hujus nomine etiam dies festi agitantur, pulchra illa Verrea, non quasi Marcellea, sed pro Marcelleis: quæ illi istius jussu sustulerunt. Hujus fornix² in foro Syracusis est, in quo nudus filius stat: ipse autem ex equo nudatam ab se provinciam prospicit. Hujus statuæ omnibus locis³:

7. *Non habui rationem.* Non ad calculos redegi quot nummos ille vi rapuerit.

LXIII. 1. *Sotera.* Egregium hoc *soteris*, s. salvatoris (quod vocabulum Ciceronis ævo in usu non erat) cognomen diis ac regibus impositum fuisse nummi docent. Vide Spanheim. de numm. dissert. VII. — De *Verreis* vid. sup. 21.

2. *Hujus fornix.* Erectus Verri stat triumphalis arcus, in cujus summa

parte eminent filius nudo corpore: quam nuditatem vituperat Cicero, nempe a Romanorum gravitate morum abhorrentem; et apud quos artifices corpora velabant. At Græci non item, ut observat Plin. XXXIV, 5, et ut demonstrant statuæ illæ pulcherrimæ ac vere divinæ quibus tempus pepercit. Facete hic orator, in verba *nudus et nudatum* ludit.

3. Olim addebant *erectæ*. Gruterus, testibus MSS, glossam abstulit. J.V.L.

quæ hoc demonstrare videntur, propemodum non minus multas statuas istum posuisse Syracusis, quam abstulisse. Huic etiam Romæ videmus in basi statuarum, maximis literis incisum, A COMMUNI SICILIÆ datas. Quamobrem? qui hoc probari potest cuiquam, tantos honores habitos esse ab invitis?

LXIV. Hic tibi etiam multo magis, quam ante¹ in aratoribus, videndum et considerandum est, quid velis: magna res est. Utrum tibi Siculos publice privatimque amicos, an inimicos existimari vis? si inimicos, quid te² futurum est? quo confugies? ubi nitere? Modo aratorum honestissimorum hominum ac locupletissimorum, et Siculorum, et civium romanorum maximum³ numerum abs te abalienasti: nunc de siculis civitatibus quid ages? Dices, tibi Siculos esse amicos? qui poteris? qui, quod nullo in homine antea fecerunt⁴, ut in eum publice testimonium dicerent, quum præsertim ex ea provincia condemnati⁵ sint complures, qui ibi prætores fuerunt, duo soli absoluti; huc conveniunt⁶ cum literis, veniunt cum mandatis, veniunt cum testimoniis publicis: qui, si te publice⁷ laudarent, tamen id more potius suo, quam merito tuo, facere viderentur. Hi quum de tuis factis publice cœnqueruntur, nonne hoc indicant, tantas esse inju-

LXIV. 1. Grævius e cod. Nann. « paullo ante ». J. V. L.

2. Quid te. Quid de te; veteri, quam sæpius observavimus, locutione.

3. Abest maximum. J. V. L.

4. Sic Ernest. post Gruterum. Oliv. aïique multi, fecerant. J. V. L.

5. Condemnati. Nempe a privatis provincialibus, sed non totius Siciliæ consensu fuerant accusati; qui vero fuerint duo illi absoluti prætores, non liquet.

6. Huc conveniunt. Nonnulli codices, « hi nunc veniunt »; quod libens acceperim. Garatonijs protulit ex uno manuscripto, « nunc contra te veniunt ». Rectius quoque vulgato. J. V. L.

7. Ernest. delet publice. J. V. L.— Ceterum quamvis in Franc. abait, non video cur ceterorum omnium codicum auctoritati contradicatur, nec ea servetur vox, quæ novam vim ante dictis addit.

rias, ut multo maluerint de suo more⁸ decedere, quam de tuis moribus non dicere? Confitendum est igitur tibi necessario, Siculos inimicos esse, qui quidem et in te gravissima postulata consulibus ediderint⁹, et me, ut hanc causam, salutisque suæ defensionem susciperem, obsecrarint; qui quum a prætore prohiberentur, a quatuor quæstoribus¹⁰ impedirentur, omnium minas, atque omnia pericula, pro salute sua, levia duxerint; qui priore actione ita testimonia graviter vehementerque dixerint, ut Artemonem Centuripinum legatum, et publice¹¹ testem, Q. Hortensius accusatorem, non testem esse diceret. Etenim ille¹² quum propter virtutem et fidem cum Androne, homine honestissimo et certissimo, tum etiam propter eloquentiam, legatus a suis civibus electus est, ut posset multas istius et varias injurias quam apertissime vobis planissimeque explicare.

LXV. Dixerunt Halesini, Catinenses, Tyndaritani¹, Ennenses, Herbitenses, Agyrinenses, Netinenses, Segestani. Numerare omnes non est necesse: scitis, quam multi et quam multa priore actione dixerint: nunc et illi, et reliqui dicent. Omnes denique hoc in hac causa intelligent, hoc animo esse Siculos, ut, si in istum animadversum non sit, sibi relinquendas domos ac sedes suas, et ex Sicilia decedendum, atque adeo fugiendum esse arbitrentur. Hos homines tu persua-

8. *De suo more.* Lenitatis et patientiæ in tolerandis romanorum magistratuum injuriis oblivisci. Vid. sup. 3.

9. Sic Gruterus e codd. Fabr. et Metelli. Antea « ediderunt, obsecrarunt, duxerunt, etc. » J. V. L.

10. *A quatuor quæstoribus.* A duobus Verris, duobus Metelli quæstoribus. Vid. sup. 4.

11. *Publice.* Suae civitatis nomine.

12. A vulg. abest ille. — Cum Androne refertur cum electus est.

LXV. 1. *Tyndaritani.* Tyndaris a Castore et Polluce, qui Tyndarei filii, condita. Unde Sil. Ital. XIV, 207: « Geminoque Lacone Tyndaris attollens sese ». De ceteris urbibus conf. Ind. Geogr. — Hoc. Schützcius delet hoc,

debis ad honores² atque amplitudinem tuam pecunias maximas voluntate sua contulisse? credo, qui te in tua civitate incolumem esse nollent, hi monumenta tuæ³ formæ ac nominis in suis civitatibus esse cupiebant. Res declaravit⁴, ut cupierint: jamdudum enim mihi nimium tenuiter Siculorum erga te voluntatis argumenta colligere videor, utrum statuas voluerint tibi statuere, an coacti sint. De quo homine hoc auditum est umquam, quod tibi accidit, ut ejus in provincia statuæ, in locis publicis positæ, partim etiam in ædibus sacris, per vim, per universam multitudinem dejicerentur? Tot homines in Asia nocentes, tot in Africa, tot in Hispania, Gallia, Sardinia, tot in ipsa Sicilia fuerunt: ecquo de homine hoc umquam audivimus? Novum est, judices; in Siculis quidem, et in omnibus⁵ Græcis, monstri simile: non crederem hoc de statu, nisi jacentes revulsasque vidissem; propterea quod apud omnes Græcos hic mos est, ut honorem hominibus habitum in monumentis hujusmodi, nonnulla religione deorum consecrari⁶ arbitrentur. Itaque quum Rhodii bellum illud⁷ prope soli superius cum Mithridate rege gesserint, omnesque

suadente Herelio. Probamus. J. V. L.

2. Sch. recepit honorem e cod. Hotomanni, duce Lambino. J. V. L.

3. Tuæ formæ. Quæ tui vultus lineamenta, tuumque nomen servarent.

4. Cod. Metelli, *declarabit*. J. V. L.

5. Gulielm. emendabat *hominibus*, quod valde verisimile esse Grut. et Ernest. putant; Sch. negat. J. V. L.

6. *Consecrari*. Ex illa Græcorum opinione manavit consuetudo ad statuas, tamquam ad asylum confugiendi. T. Liv. XXIII, 10.

7. *Bellum illud*. Bellum cum Mi-

thridate exarsit anno 665; ter instauratum quum fuisset, ipsius Mithridatis morte finitum est A. U. 690. — *Superius* autem habita temporis ratione, primum illud est cujus auctor fuit M. Aquilius, et cui finis a L. Sulla est impositus. Hoc autem prope soli sustinuerunt Rhodii, attritis multa clade Cassio, Aquillio, Oppio, etc. romanis ducibus. Ipsi autem in romana fide perstantes, Mithridatem non uno navali prælio victum, a suæ urbis oppugnatione decedere coegerunt.

ejus copias, acerrimumque⁸ impetum mœnibus, litoribus, classibusque suis exceperint, quum et regis inimici præter ceteros essent; statuam ejus, quæ erat apud ipsos in celeberrimo urbis loco, ne tum quidem in ipsis urbis periculis attigerunt⁹. Forsitan vix convenire videretur, quem ipsum hominem cuperent evertere, ejus effigiem simulacrumque servare; sed tamen videbam, apud eos quum essem, et religionem esse quamdam in his rebus, a majoribus traditam, et hoc disputare¹⁰: cum statua se ejus habuisse temporis rationem, quo posita esset; cum homine vero, quo gereret bellum, atque hostis esset.

LXVI. Videtis igitur, consuetudinem religionemque Græcorum, quæ monumenta hostium in bello ipso soleat defendere¹, eam summa in pace prætoris populi romani statuis præsidio non fuisse. *Taurominitani*, quorum est civitas foederata², homines quietissimi, qui maxime ab injuriis nostrorum magistratuum remotissimi³ consuerant esse, præsidio foederis; hi tamen istius evertere statuam non dubitaverunt. Qua ablata, basin tamen in foro manere voluerunt: quod gravius in istum fore putabant, si scirent homines,

8. Olim, «acerrim. ejus impet. a mœnibus», quæ additamenta MSS rejiciunt. J. V. L.

9. *Attigerunt*. Alterum Rhodiorum religionis in re eadem exemplum suggerit Vitruv. II, 8.

10. Herelius corrigit *disputari*. — *Cum statua*. Quod ad statuam attinet, illi se pepercisse, quod, quo tempore fuit exstructa, is erat amicus Rhodiorum: sed quod ad hominem pertineret, se spectare tempus, quo hostis ex amico factus esset.

LXVI. 1. *Defendere*. Tamen iidem ipsi Rhodii, Chalcide capta, Philippi

regis Macedonum statuas dejecerunt ac truncharunt. De his et de Atheniensibus olim erectas statuas evertentibus conf. T. Liv. XXXI, 23, 44. Appian. in Mithrid.

2. *Foederata*. Duæ tantum in Sicilia foedere cum Romanis junctæ erant civitates, Taurominium et Messana, quæ ideo decumas non vendebant. Vide Verr. III, 6.

3. *Maxime...remotissimi*. Sic Græv. Ernest. e MSS. Vulgo *remoti*. Hujus locutionis exempla habes ad Att. XII, 38. T. Liv. XLI, 23, etc. Frustra corrigere tentavit J. F. Gronovius.

statuam ejus a Taurominitanis esse dejectam, quam si nullam umquam positam arbitrarentur. Tyndaritani dejecerunt in foro; et eadem de causa equum inanem reliquerunt. Leontinis, misera in civitate atque inani, tamen istius, in gymnasio, statua dejecta est. Nam quid ego de Syracusanis loquar, quod non est proprium Syracusanorum, sed et illorum commune⁴, et conventus illius, ac prope totius provinciæ? quanta illuc multitudo, quanta vis hominum convenisse dicebatur tum, quum statuæ sunt illius dejectæ atque eversæ? at quo loco? celeberrimo⁵ ac religiosissimo: ante ipsum Serapim, in primo aditu vestibuloque templi. Quod nisi Metellus hoc tam graviter egisset⁶, atque illam rem imperio edictoque prohibuisset; vestigium statuarum istius in tota Sicilia nullum esset relictum.

Atque ego hoc non vereor, ne quid horum non modo impulsu, verum omnino adventu meo factum esse videatur. Omnia ista ante facta sunt, non modo, quam ego Siciliam, verum etiam quam iste Italiam attingeret⁷: dum ego in Sicilia sum, nulla statua dejecta est. Posteaquam illinc discessi, quæ sunt gesta, cognoscite.

LXVII. Centuripinorum senatus decrevit, populusque jussit, ut, quæ statuæ C. Verris ipsius, et patris, et filii, essent, eas quæstores demoliendas locarent; dumque ea demolitio fieret, senatores ne xxx minus

4. *Commune*. Quam ultionem cum illis communicavit et civium romanorum conventus, et tota provincia.

5. *Celeberrimo*. Quo notior esset Verris infamia. — *Religiosissimo*. Ut dejectiendæ, nisi maximam ob causam, statuæ non viderentur. De Serapidis templo vid. Creuzer. Dionys.

pag. 184 sqq. Male alii quidam dant Jovem.

6. *Egisset*. Tam severe sese in hac re habuisset.

7. *Italiam attingeret*. Quum iste ex provincia sua decederet. Dedit Ern. ex edd. vett. Non improbandum attigit. J. V. L.

adessent. Videte gravitatem civitatis et dignitatem : neque eas in urbe sua statuas esse voluerant, quas inviti, per vim atque imperium, dedissent; neque ejus hominīs, in quem ipsi, cum gravissimo testimonio¹, publice, quod numquam antea, Romam mandata legatosque misissent : et id gravius esse putaverunt, si publico consilio, quam si per vim multitudinis factum videretur. Quum hoc consilio statuas Centuripini publice sustulissent, audit Metellus : graviter fert : evocat ad se Centuripinum magistratum, et decemprimos² : nisi restituissent statuas, vehementer iis minatur. Illi ad senatum renuntiant. Statuæ, quæ istius causæ nihil prodesse, reponuntur : decreta³ Centuripinorum, quæ de statuierant facta, non tolluntur. Hic ego⁴ aliud alii concedo : Metello, homini sapienti, prorsus non possum ignoscere, si quid stulte facit. Quid? ille hoc putabat Verri criminosum fore, si ejus statuæ essent dejectæ, quod sæpe vento⁵, aut aliquo casu fieri solet? non erat in hoc⁶ neque crimen ullum, neque reprehensio. Ex quo igitur crimen atque accusatio nascitur? ex hominum judicio et voluntate.

LXVIII. Ego, si Metellus statuas reponere Centuripinos non coegisset, hæc dicerem : Videte, judices, quantum et quem acerbum dolorem sociorum atque

LXVII. 1. *Gravissimo testimonio.* Cum mandato ut gravissimum testimonium in eum diceretur. — *Publice* in Schütz. abest.

2. *Decemprimos.* De his vid. Roac. Amer. 9.

3. Totum istud, « decreta ... non tolluntur », Tullio adjecit Gruterus e MSS. J. V. L.

4. *Hic ego.* In hoc ego loco, quamvis multa multis ignoscam, non pos-

sum stultam agendi rationem Metello ignoscere.

5. *Quod sæpe vento.* Livium vide XL, 2, narrantem, quasnam statuarum strages ediderit, « atrox cum vento tempestas coorta ». Conf. etiam Plin. de Tarentino Jovis colosso, Hist. Nat. XXXIV, 7.

6. *Non erat in hoc.* Ex hac statuarum dejectione nulla in Verrem oriebatur accusatio.

amicorum animis inusserint istius injuriæ; quum Centuripinorum amicissima et fidelissima civitas, quæ tantis officiis cum populo romano conjuncta est, ut non solum rempublicam nostram, sed etiam in quovis homine privato nomen ipsum Romanorum semper dilexerit, ea publico consilio atque auctoritate judicaret, C. Verris statuas esse in urbe sua non oportere. Recitarem decreta Centuripinorum: laudarem illam civitatem; id quod verissime possem: commemorarem, decem millia¹ civium Centuripinorum, fortissimorum fidelissimorumque sociorum, eos omnes statuisset, MONUMENTUM ISTIUS IN SUA CIVITATE NULLUM ESSE OPORTERE. Hæc tum dicerem, si statuas Metellus non reposuisset. Velim quærere nunc ex ipso Metello, quidnam sua vi² et auctoritate mihi ex hac oratione præciderit: eadem opinor omnia convenire. Neque enim, si maxime statuæ dejectæ essent, eas ego vobis possem jacentes ostendere³; hoc uno uterer: civitatem tam gravem statuas judicasse C. Verris demolendas. Hoc mihi Metellus non eripuit: hoc etiam addidit, ut quereretur, si mihi videretur, tam iniquo jure sociis atque amicis imperari, ut iis ne in suis quidem beneficiis libero judicio uti liceret; ut vos rogarem⁴, ut conjecturam faceretis, qualem in his rebus in me L. Metellum fuisse putaretis, in quibus rebus obesse mihi posset, quum in hac re tam aperta cupiditate fuerit, in qua nihil obfuit. Sed ego Metello

LXVIII. 1. *Decem millia.* Quot cives Centuripini sunt.

2. *Sua vi.* Ista sua violentia et prætoris auctoritate qua statuas a Centuripinis aut eversas, aut evertendas reponi decrevit.

3. *Ostendere.* Quum illæ essent in Sicilia, vos vero Romæ.

4. *Vos rogarem.* Non modo Metellus meliorem Verris causam non fecit, sed etiam sibi ipse nocuit, quum nunc vos ex isto Metelli, in re tam parvi momenti, studio ac favore, conjicere possitis, quid contra me fecerit, quum vere et aperte nocere potuerit.

non irascor, neque ei suam purgationem eripio, quae ille apud omnes utitur, ut nihil malitiose⁵, neque consulto fecisse videatur.

LXIX. Jam igitur est ita perspicuum, ut negare non possis, nullam tibi statuam voluntate cujusquam datam; nullam pecuniam statuarum nomine, nisi vi expressam et coactam. Quo quidem in crimine non illud solum intelligi volo, te ad statuas H-S cxx¹ millia coegisse; sed multo etiam illud magis, quod simul demonstratum est², quantum odium in te aratorum, quantum omnium Siculorum sit et fuerit. In quo quæ vestra defensio futura sit, conjectura assequi non queo. Oderunt³ Siculi: togatorum enim causa multa feci. At hi quidem acerrimi inimicissimique sunt. Inimicos habeo cives romanos, quod sociorum commoda ac jura defendi. At socii in hostium numero se abs te habitos queruntur. Aratores inimici sunt propter decumas. Quid? qui agros immunes liberosque arant, cur oderunt? cur Halesini? cur Centuripini? cur Segestani? cur Halicyenses? Quod genus hominum⁴, quem numerum, quem ordinem proferre possis, qui te non oderit, sive civium romanorum, sive Siculorum? ut, etiamsi causam, cur te oderint, non possim dicere, tamen illud dicendum putem: quem omnes mortales oderint, eum quoque vobis odio esse oportere. An hoc dicere audebis; utrum de te aratores, utrum denique Siculi universi bene existiment, aut quo modo existiment,

5. *Malitiose*. Juvandi Verris et ejus criminis extenuandi causa. Ironice hæc in Metellum quasi aliud agens detorquet ita ut omnino Verris fauorem ostendat.

LXIX. 1. *H-S CXX*. De summæ hujus disputatione vid. snp. 57.

2. *Demonstratum est*. Vulg. « demonstrandum est ». Male: nam illud ipsum jam ostenderat.

3. *Oderunt*. Subintell. dices forsân. — *Cives rom.* In Sicilia negotiantes.

4. *Quod genus hominum*. Servoane, an libertos, an ingenuos, etc.

ad rem id non pertinere? Neque tu hoc dicere audebis; neque, si cupias, licebit. Eripiunt enim tibi istam orationem contemnendorum⁵ Siculorum atque aratorum, statuæ illæ equestres, quas tu paullo ante, quam ad urbem venires, poni inscribique jussisti, ut omnium inimicorum animos⁶ accusatorumque tardares. Quis enim tibi molestus esset, aut quis appellare auderet, quum videret statuas ab negotiatoribus, ab aratoribus, a communi Siciliæ? Quod est aliud in illa provincia genus humanum⁷? nullum. Ergo ab universa provincia, generatimque a singulis ejus partibus non solum diligitur, sed etiam ornatur: quis hunc attingere audeat? Potes igitur dicere, nihil tibi obesse oportere aratorum, negotiatorum, Siculorumque omnium testimonia, quum eorum nominibus in statuarum inscriptione positis omnem te speraris invidiam atque infamiam tuam posse extinguere? An, quorum auctoritate⁸ tu statuas cohonestare tuas conatus es, eorum ego dignitate accusationem meam comprobare non potero?

Nisi forte, quod apud publicanos gratosus fuisti, in⁹ ea re spes te aliqua consolatur. Quæ gratia ne quid tibi prodesse posset, ego mea diligentia perfeci:

5. *Contemnendorum ... aratorum.* Suspiciatus est Gruter. pannum esse Tullii purpuræ assutum. Cui adsentitur Desjard. et Schütz. qui quatuor hæc verba delet. Defendit recte Ern. qui genus hoc exquisitum loquendi *orationem contemnendorum*, id est, quasi contemnendi sint, etc. negat ejusmodi esse ut pro glossa haberi possit.

6. *Animos.* Alii, *amicos.* J. V. L.

7. Melius forte Lambinus, « hominum ». J. V. L. — Recepit Schütz.

8. Conjicit Ernest. vocabula *auctoritate* et *dignitate* permutata, quum illi magis conveniat *comprobare*, huic *cohonestare*. Frustra. *Auctoritas* ad eos qui decernendi Verri honoris fuerant auctores; *dignitas* ad testes refertur. Sensus est: Non ego dignis ac locupletibus iis testibus uti potero, quorum nomine, pondere et auctoritate usus es, ut statuis tuis aliquod decus adderes?

9. Cur *in ea re*? imo *ea re*, propterea. Ernest.

ut etiam obesse deberet, tu tua sapientia curasti. Et enim rem totam, iudices, breviter cognoscite.

LXX. In scriptura¹ Siciliæ pro magistro² est quidam L. Carpinatius, qui et sui quæstus causa, et fortasse quod sociorum interesse arbitrabatur, bene³ penitus in istius familiaritatem sese dedit. Is quum prætorem circum omnia fora sectaretur, neque ab eo umquam discederet; in eam jam venerat familiaritatem⁴ consuetudinemque in vendendis istius decretis et iudiciis, transigendisque negotiis, ut prope alter Timarchides numeraretur. Hoc erat etiam capitalior, quod idem pecuniam iis, qui ab isto aliquid mercabantur, fœnori dabat. Ea autem fœneratio erat huiusmodi, iudices, ut etiam hic quæstus huic cederet⁵. Nam, quas pecunias iis ferebat⁶ expensas, quibuscum contrahebat; aut scribæ istius, aut Timarchidi, aut etiam ipsi isti referebat acceptas. Idem præterea pecunias istius extraordinarias grandes suo nomine fœnerabatur.

Hic primo Carpinatius, antequam in istius tantam

LXX. 1. *Scriptura*. Illud vectigal ex agris publicis pendebatur, quos privatim locabant homines, ut pecuniam facerent, i. e. in eos numerosos pecorum greges, quæstus sui causa, immitterent. Dicebatur *scriptura*, quia pastores oportebat ut numerum pecudum quos in agros publicos immitterent, ad publicanum profiterentur; quem numerum publicanus in tabulis suis describebat; unde vectigalis ratio inter pastorem et publicanum conficiebatur.

2. *Pro magistro*. Publicani, seu romani equites, qui reipublicæ vectigalia redimebant, *magistrum* aliquem *societatis* eligebant, qui omnia societatis negotia Romæ administrabat. Magister vero ille in provinciam,

cujus vectigalia conduxerat *societas*, vicarium mittebat, cui *pro magistro* nomen erat.

3. *Bene* delet Schützius. — *Omnia fora*. Id est, omnes urbes, seu conventus, in quibus prætor forum agebat sive jus dicebat.

4. *Abeat familiaritatem* a codice Metelli, et satis recte abest. J. V. L.

5. *Huic cederet*. Ad Verrem rediret. Qui sensus magis cum aq. congruere videtur, quam si, cum gallico interprete, intelligas, « priori quæstu esset maior ».

6. *Iis ferebat*. Quas se mutuo dedisse pecunias scribebat, illas se a Verris scriba, aut Timarchide, aut ipso Verre accepisse in tabulis referebat.

familiaritatem pervenisset, aliquoties ad socios⁷ literas de istius injuriis miserat. Canuleius vero, qui in portu Syracusis⁸ operas dabat, furta quoque istius permulta nominatim ad socios perscripserat⁹, ea quæ sine portorio¹⁰ Syracusis erant exportata: portum autem et scripturam¹¹ eadem societas habebat. Ita factum est, ut essent permulta, quæ ex societatis literis dicere in istum ac proferre possemus. Verum accidit, ut Carpinatius, qui jam cum isto summa consuetudine, præterea re ac ratione conjunctus esset, crebras postea literas ad socios de istius summis officiis in rem communem beneficiisque mitteret. Etenim quum iste omnia, quæcumque Carpinatius postulabat, facere ac decernere solebat; tum ille etiam plura scribebat ad socios, ut, si posset, quæ antea scripserat¹², ea plane exstingeret. Ad extremum vero, quum iste jam decebat, ejusmodi literas ad eos misit, ut huic frequentes obviam prodirent, gratiasque agerent; facturos se, si quid imperasset, studiose pollicerentur. Itaque socii fecerunt, vetere instituto publicanorum: non quod¹³ istum ullo honore dignum arbitrarentur, sed quod sua interesse putabant, se memores gratosque existimari,

7. *Ad socios.* Id est, publicanorum societatem.

8. *Operas dabat.* *Operas dare* societati dicebatur is, qui vectigalium erat exactor, gall. *un commis*. Hujusmodi homines Cicero *servos* societatis appellat, inf. 77. Scilicet quum Romæ certo pretio a censoribus vectigalia, quæ pro exportandis rebus a provincialibus pendebantur, societates redimerent, socium aliquem in singulis provinciæ urbibus habebant, qui ea exigeret. Sic Vâler. Maxim. VI, 9, 8: « P. Rupilius non publicanum in Sicilia egit, sed operas publicanis dedit »,

ad quem locum doctorum animadversiones adi.

9. Vulg. « perscripserat ea, quæ ». J. V. L.

10. *Sine portorio.* Non soluto eo vectigali, quod pro traiectione rerum trans aquam, debebatur. — Portum h. l. gall. *la douane*.

11. *Scripturas.* Rectius, ut videtur, habet *scripturam* prima editione Lambinus; sed exinde mutavit. J. V. L.

12. *Quæ antea scripserat.* De Veris injuriis in societatem.

13. *Scribant quo* Ernest. Schütz. alii. J. V. L.

gratias isti egerunt: Carpinatium sæpe ad se de ejus officiis literas misisse dixerunt.

LXXI. Iste quum respondisset, se ea libenter fecisse, operasque Carpinatii magnopere laudasset; dat amico suo cuidam negotium, qui tum magister erat ejus societatis, ut diligenter caveret atque prospiceret, ne quid esset in literis sociorum, quod contra suum caput atque existimationem valere posset. Itaque ille¹, multitudine sociorum remota, decumanos convocat: rem defert. Statuunt illi atque decernunt, ut eæ literæ, quibus existimatio C. Verris læderetur, removerentur, operaque daretur, ne ea res C. Verri fraudi esse posset. Si ostendo, hoc decrevisse decumanos; si planum facio, hoc decreto remotas esse literas: quid exspectatis amplius? possumne rem magis judicatam afferre, magis reum condemnatum in iudicium adducere? At quorum iudicio condemnatum? nempe eorum², quos ii, qui severiora iudicia desiderant, arbitrantur res iudicare oportere, publicanorum iudicio; quos videlicet nunc populus iudices poscit; de quibus, ut eos iudices habeamus, legem ab homine³ nou nostri generis, non ex equestri loco profecto, sed nobilissimo, promulgatam videmus. Decumani, hoc est, principes et quasi senatores pu-

LXXI. 1. *Ille*. Magister ille societatis, remota publicanorum multitudine, tantum decumanos, i. e. societatis principes et quasi senatores, ut ait Cicero, convocat. Apparet inde hanc societatem etiam *decumas* habuisse; aut generatim publicanorum principes ad quos societatis reddenda ratio pertinebat, hoc nomine appellatos fuisse. Quod certius esse videtur. Cf. ad calc. orat. h. Exc. II de Vectig.

2. *Nempe eorum*. Equitum rom. quorum ex ordine erant publicani.

3. *Ab homine*. Nempe hoc ipso anno 683 C. Aurelius Cotta prætor legem tulit ut iudicia inter senatores, equestrem ordinem, et tribunos ærarii communicarentur. Quod eum non insensum Patribus fecisse demonstrat orator, quippe qui patricius, sola iudiciorum infamia ad id adductus sit ut legem promulgaret.

blicanorum, removendas de medio literas censuerunt. Habeo ex iis, qui affuerunt⁴, quos producam [quibus hoc committam], homines honestissimos ac locupletissimos, istos ipsos principes equestris ordinis: quorum splendore vel maxime istius, qui legem promulgavit, oratio et causa nititur. Venient in medium; dicent, quid statuerint. Profecto, si recte homines novi, non mentientur. Literas enim communes de medio remove potuerunt: fidem suam et religionem remove non possunt. Ergo equites romani, qui te⁵ suo iudicio condemnarunt, horum iudicio⁶ condemnari noluerunt. Vos nunc, utrum illorum iudicium, an voluntatem sequi malitis, considerate.

LXXII. At vide, quid te amicorum tuorum studium, quid tuum consilium, quid¹ sociorum voluntas adjuvet. Dicam paullo promptius: neque enim jam vereor, ne quis hoc me magis accusatorie, quam libere dixisse arbitretur. Si istas literas non decreto decumanorum magistri removissent; tantum possem in te dicere, quantum in literis invenissem. Nunc, decreto isto facto, literisque remotis, tantum mihi licet dicere, quantum possum²; tantum iudici suspicari, quantum velit. Dico, te maximum pondus auri, argenti, eboris,

4. *Qui affuerunt.* Quam de literis delendis decretum est.—*Causa nititur.* Quia nemo est qui tales viros, tanto splendore ac decore, iudicandi honore non dignos habeat.

5. *Qui te.* Etsi illi equites Verrem condemnandum esse iudicaverunt, noluerunt eum condemnari, s. eum, quantum in se fuit, absolvendum curaverunt, propterea quod sua interesse putabant, se gratos erga Verrem existimari. Vos vero, iudices, videte an sequi malitis eorum voluntatem, quæ

apparet in literarum remotione, in qua cupiditas dominata est; an iudicium, quo Verrem nocentem et damnandum esse cognoverunt. Facile h. l. videas hærere Ciceronem, quod equitum rom. offensionem vereatur; et ipse in seq. c. illud non obscure innuit.

6. *Iudicio.* Addit te Lambinus.

LXXII. 1. *Sociorum.* Publicanorum. — *Promptius.* Liberius.

2. Ernest. mallet *possim*, quia sequitur *velit*. At *possum* definite dicitur, *velit* infinite. Scn.

purpuræ, plurimam vestem Melitensem, plurimam stragulam, multam Deliacam³ supellectilem, plurima vasa Corinthia, magnum numerum frumenti, vim mellis maximam, Syracusis exportasse; his pro rebus, quod portorium non esset datum, litêras ad socios misisse L. Canuleium, qui in portu operas daret.

Satisne magnum hoc crimen videtur? nullum, opinor, majus. Quid defendet Hortensius? postulabit, ut literas Canuleii proferam? crimen hujusmodi, nisi literis confirmetur, inane esse dicet? Clamabo, literas remotas esse de medio; decreto sociorum erepta mihi esse istius indicia ac monumenta furtorum. Aut hoc contendat numquam esse factum, aut omnia tela excipiat necesse est. Negas esse factum? placet mihi ista defensio: descendo⁴: æqua enim conditio, æquum certamen proponitur. Producam testes, et producam plures eodem tempore: quoniam⁵ tum, quum actum est, una fuerunt, nunc quoque una sint, quum interrogabuntur; obligentur non solum jurisjurandi atque existimationis periculo, sed etiam communi⁶ inter se conscientia. Si planum fit, hoc ita, quemadmodum dico, esse factum; num poteris dicere, Hortensi, nihil in istis fuisse literis, quod Verrem læderet? non modo id non dices, sed ne illud quidem tibi dicere licebit. tantum, quantum ego dicam, non fuisse. Ergo hoc

3. *Deliacam*. Mensas, lectulos ex ære Deliaci maximam, post Corinthia, famam habuisse constat ex Plin. lib. XXXIV, cap. 4. Cf. etiam Rosc. Am. cap. 46.

4. *Descendo*. Subintell. in campum, in certamen.

5. *Quoniam*. Plures simul citabo testes, ut, quia una fuerunt quum renotæ sunt literæ, nunc quoque una sint et obligentur, etc. — Loco *una*

sint, quod ex cod. Metell. recepit Ernest. vulgo est *una sunt*.

6. *Communi*. Quia inter se norunt id quod actum est; et nemo ex iis, præsentem altero, qui rem æqualiter tenet, mentiri audebit aut dissimulare. Alter igitur alterius conscientia ita impeditus erit, ut ab omni tum simulatione, tum dissimulatione revocetur, ne scil. mendacii ab aliis ejusdem rei consciis coarguatur.

vestro⁷ consilio et gratia perfecistis, ut, quemadmodum paullo ante dixi, et mihi summa facultas ad accusandum daretur, et iudicibus libera potestas ad credendum⁸.

LXXIII. Quod quum ita sit, nihil fingam tamen : meminero, me non sumpsisse, quem accusarem¹, sed recepissem, quos defenderem; vos ex me causam non a me prolatam, sed ad me delatam, audire oportere; me Siculis satis esse facturum, si, quæ cognovi in Sicilia, quæ accepi ab ipsis, diligenter exposuero; populo romano, si nullius vim, nullius potentiam pertimuero; vobis, si facultatem vere atque honeste iudicandi fide et diligentia mea fecero; mihimet, si ne minimum quidem de eo curriculo vitæ, quod mihi semper propositum fuit, decessero. Quapropter nihil est, quod metuas, ne quid in te confingam; etiam quod lætere, habes : multa enim, quæ scio abs te esse commissa, quod aut nimium turpia, aut parum credibilia sunt, prætermittam. Tantum agam de hoc toto nomine societatis. Ut jam scire possitis²; quæram, decretumne sit. Quum id invenero; quæram, remotæne sint literæ. Quum id³ quoque constabit, vos jam, me tacito, intelligetis; si illi, qui hoc istius causa decreverunt, equites romani, nunc iidem in eum iudices essent,

7. *Vestro*. Ad Verrem et ejus patronos refertur.—*Gratia*. Qua removens literas impetrastis.

8. *Ad credendum*. In margine Lamb. affertur lectio ex MS, « ad cernendum », unde aliquis conjicit « ad decernendum ». Vulgata tamen lectio vera est, et ad superiora refertur.

LXXIII. 1. *Quem accusarem*. Sæpius jam vidimus maxime curæ Tullio fuisse, ne accusatorum numero adscriberetur; illorum quidem, qui plu-

rimi in Urbe male audiebant, invidiosumque in primis hoc nomen apud omnes fecerant. Conf. Rosc. Amer. cap. 2, et etiam Quintil. XII, 9.

2. *Vulg. possit*. Sed edd. pr. et codd. « eam si possit ». Unde hæc eruitur nostra lectio. J. V. L.

3. *Quum id*. Postquam remotas literas vobis plane ostendero, tunc, vel me tacente, hoc intelligetis : nempe ab ipsis equitibus, si judicarent, damnatus fuisset Verres, quippe

istum sine dubio condemnarent, de quo literas eas, quæ istius furta indicarent, et ad se missas, et suo decreto remotas scirent esse. Quem igitur ab iis equitibus romanis, qui istius causa cupiunt omnia, qui ab eo benignissime tractati sunt, condemnari necesse esset; is a vobis, iudices, ulla vi⁴ aut ratione absolvi potest?

Ac, ne forte ea, quæ remota de medio, atque erepta vobis sunt, omnia ita condita fuisse, atque ita abdite latuisse videantur, ut hac diligentia⁵, quam ego a me exspectari maxime puto, nihil horum investigari, nihil assequi potuerit: quæ consilio aliquo aut ratione inveniri potuerunt, inventa sunt, iudices: manifestis in rebus hominem jam teneri videbitis. Nam quod in publicanorum causis vel plurimum ætatis meæ versor, vehementerque illum ordinem observo⁶, satis commode mihi videor eorum consuetudinem usu tractandoque cognosse.

LXXIV. Itaque ut hoc comperi, remotas esse literas societatis; habui rationem annorum, per quos iste in Sicilia fuisset. Deinde quæsivi, quod erat inventu facillimum, qui per eosdem annos magistri istius societatis fuissent. Sciebam enim hanc magistrorum, qui

qui per se ipsi scirent Verris furta, etc. Nota post *intelligetis* plenam esse phrasim; quod nisi esset, constructio *condemnatos* postularet. Conf. sup. 71, sub fin.

4. *Ulla vi*. Nempe si iudices contra leges, auctoritates, testimonia, improbum absolvant, id certe per vim faciunt, ac legibus vim inferunt. Itaque frustra emendandum censuit Ernest. «ulla via»; et frustra Schütz. hunc contra Beckium defendit.

5. Gronovius, Obs. I, 2: «hæc

diligentia... nihil hor. investigare... Habet quidem «investigare» unus e codd. reg. J.V.L. — Quod ni recipiatur, tunc passive erit *assequi*, quod durius videtur. Nihil enim ad rem faciunt deponentium participia, quæ sæpius hoc sensu usurpantur.

6. *Observe*. Cicero ipse ad Att. VI. 2, sibi applaudit de amore ac benivolentia qua ipsum publicani complectebantur, et quod eorum esset patronus. Inde est quod illis sæpius parcit.

tabulas haberent, consuetudinem esse, ut, quum tabulas novo magistro traderent, exempla literarum ipsi habere non nollent. Itaque ad L. Vibium, equitem romanum, virum primum, quem reperiēbam magistrum fuisse eo ipso anno, qui mihi maxime quærendus erat, primum veni. Sane homini præter opinionem improvise incidi. Scrutatus sum¹, quæ potui, et quæsi omnia. Inveni duos solos libellos, ab L. Canuleio missos sociis ex portu Syracusis: in quibus erat ratio scripta mensium complurium, rerum exportatarum istius nomine sine portorio. Itaque obsignavi statim. Erant hæc ex eo genere, quod ego maxime genus ex sociorum literis reperire cupiebam; verum tantum² inveni, iudices, quod apud vos quasi exempli causa proferre possem. Sed tamen, quidquid erit in his libellis, quantulumcumque videbitur esse, hoc quidem certe manifestum erit: de ceteris ex hoc conjecturam facere debebitis. Recita mihi, quæso, hunc primum libellum; deinde illum alterum. **LIBELLI CANULEII.** Jam non quæro, unde cccc amphoras mellis habueris, unde tantam Melitensem vestem³, unde quinquaginta tricliniorum lectos, unde tot candelabra; non, inquam, jam quæro, unde hæc habueris: sed quo tibi tantum opus fuerit, id quæro. Mitto de melle: sed tantumne Melitensium? quasi etiam amicorum⁴ uxores: tantum

LXXIV. 1. *Scrutatus sum.* Accusatoribus, prætoris lege atque imperio, potestas dabatur omnia, quæ apud quemque ad accusationem instruendam pertinentia reperirent, scrutandi ac obsignandi, et Romam deferendi, ne quid removeri posset. Sed lege excipiebantur tabulæ publicanorum, quominus Romam deportarentur.

2. *Tantum.* Paucos inveni libellos,

at satis multos tamen ut judicaretis quot et quanta invenissem furtorum Verris argumenta, si plures ejusmodi tabulas reperissem.

3. Lambin. Grut. alii, «unde tantum Melitensium, unde quinquaginta». J. V. L.

4. *Amicorum.* Patronorum, quos inde in invidiam adducit, quasi hæc eis aut eorum uxoribus donata fuerint.

lectorum? quasi etiam omnium istorum villas ornaturus esses.

LXXV. Quum hæc paucorum mensium¹ ratio in his libellis sit, facite, ut vobis triennii totius veniat in mentem. Sic contendo; ex his parvis libellis apud unum magistrum societatis repertis, vos jam conjectura assequi posse, cujusmodi prædo iste in illa provincia fuerit, quam multas cupiditates, quam varias, quam infinitas habuerit; quantam pecuniam non solum numeratam, verum etiam hujusmodi in rebus positam, confecerit². Quæ vobis alio loco planius explicabuntur: nunc hoc attendite. His exportationibus, quæ recitatæ sunt, scribit H-S³ LX socios perdidisse ex vicesima portorii Syracusis. Pauculis igitur mensibus, ut hi pusilli et contempti libelli indicant, furta prætoris, quæ essent H-S duodecies, ex uno oppido solo exportata sunt. Cogitate nunc, quum illa sit hæc insula, quæ undique exitus maritimos habeat, quid ex ceteris locis exportatum putetis: quid Agrigento, quid Lilybæo, quid Panormo, quid Thermis, quid Halesa, quid Catina, quid ex ceteris oppidis: quid vero Messana; quem iste sibi locum maxime tutum arbitrabatur; ubi animo semper soluto liberoque erat, quod sibi iste Mamertinos delegerat, ad quos omnia, quæ aut diligentius servanda, aut occultius exportanda erant, deportaret. His inventis libellis, ceteri⁴ remoti et diligentius sunt reconditi: nos tamen, ut omnes

LXXV. 1. *Mensium*. Nannii codex, Beck. ac Schützius habent « paucorum mensum », quod sæpius contractum in veteribus libris videas.

2. *Confecerit*. Collegerit, acquisi-
verit.

3. *H-S LX*. Ratio postulat ut *LX millia* (12,300 fr.) scribatur. Nam

quum Verres exportasset merces quæ essent *duodecies* centenum millium sestertium (256,000 fr.); vicesima pars quæ portorii nomine erat solvenda, est *LX* millia. De vicesima hæc cf. Exc. II de Vectig. ad calc. h. orat.

4. *Ceteri remoti*. A publicanis nimium, qui Verris causæ favabant.

intelligent, hoc nos sine cupiditate⁵ agere, his ipsis libellis contenti sumus.

LXXVI. Nunc ad sociorum tabulas accepti et expensi, quas remove honeste nullo modo potuerunt, et ad amicum tuum Carpinatium revertemur. Inspiciebamus Syracusis a Carpinatio confectas tabulas societatis, quæ significabant¹, multis nominibus eos homines versuram a Carpinatio fecisse, qui pecuniam Verri dedissent. Erit vobis luce clarius, iudices, quum eos ipsos produxero, qui dederunt: intelligetis enim, illa tempora, per quæ, quum essent in periculo, pretio sese redemerunt, cum societatis tabulis non solum consulibus², verum etiam mensibus, convenire.

Quum hæc maxime cognosceremus, et jam in manibus tabulas haberemus; repente adspicimus lituras ejusmodi, quasi quædam vulnera³ tabellarum recentia. Statim suspitione offensi, ad ea ipsa nomina oculos animumque transtulimus. Erant acceptæ pecuniæ a C. VERRUTIO, C. F.⁴, sic tamen, ut, usque ad alterum R, literæ constarent integræ, reliquæ omnes essent in litura⁵. Alterum, tertium, quartum, per-

5. *Sine cupiditate.* Non accusatorio odio, sine ira aut dolore.

LXXVI. 1. *Quæ significabant.* In quibus ostendebatur eos, qui pecuniam Verri dedissent, eam mutuam sub usuris non semel a Carpinatio sumpsisse. Hoc est enim « versuram facere ». De Carpinatio conf. sup. 71.

2. *Consulibus.* I. e. anno ipso. Anni enim per consules numerantur; neque anno tantum, sed quo clarius res pateat, mensibus etiam convenire.

3. *Quædam vulnera.* Scil. abrasæ priori scripturæ, posterior imponebatur. Sic afflicti erant MSS illi codices,

quos *καλυψίστους* vocamus, et unde tam miras opes hisce temporibus eruit curiosa feliciter doctorum prudentia.

4. Gruterus revocavit « C. F. » e MSS. Antea deerant. J.V. L.

5. *In litura.* Nam antea scriptum fuerat « a C. Verre acceptas fuisse pecunias, quæ datæ erant »; sed deinde, ne res ea isti noceret, sic correctum erat, ut scriberetur « Verrutio ». Prioris igitur nominis ultima syllaba re detrita, repositum fuerat *rutio*; ita tamen ut legeretur « C. Ver » integris sane literis, et altera pars nominis, i. e. *rutio*, ceu cauda Verris, tamquam in luto, jaceret in litura. Cf. inf. 78.

multa erant ejusdemmodi nomina. Quum manifesta res⁶, tum flagitiosa tabularum atque insignis turpitudine teneretur; quærere incepimus de Carpinatio, quisnam esset is Verrutius, quicum tantæ pecuniæ rationem haberet. Harere homo, versari, rubere. Quod lege excipiuntur tabulæ publicanorum, quo minus Romam deportentur; ut res quam maxime clara ac testata esse posset, in jus ad Metellum Carpinatium voco, tabulasque societatis in forum deferro. Fit maximus concursus hominum; et, quod erat Carpinatii nota cum isto prætore societas ac fœneratio, summe exspectabant omnes, quidnam in tabulis contineretur.

LXXVII. Rem ad Metellum deferro, me tabulas perspexisse sociorum, in his tabulis magnam rationem C. Verrutii permultis nominibus esse, meque hoc perspicere ex consulum mensiumque¹ ratione, hunc Verrutium neque ante adventum C. Verris, neque post decessionem quidquam cum Carpinatio rationis habuisse. Postulo, mihi respondeat, qui sit iste Verrutius; mercator², an negotiator, an arator, an pecuarius³; in Sicilia sit, an jam decesserit. Clamare omnes ex conventu, neminem umquam in Sicilia⁴ fuisse Verrutium. Ego instare, ut mihi responderet, quis esset, ubi esset, unde esset: cur servus⁵ societatis,

6. *Manifesta res.* Wytténb. Bibl. crit. I, 2, 12, emendat: « manifesta res tam fl. » Schütz. recepit. Beck. particulam *tum* uncinis inclusit. Desjard. et Hotom. putant loco *tum* reponendum *quum*, quod felicius videtur.

LXXVII. 1. Alii e codd. ut supra, *mensum* pro *mensium*. J. V. L.

2. *Mercator, an negot.* Nempe mercatores sedem habebant Romæ, ubi erat collegium mercatorum; negotia-

tores vero plerumque in provincia domicilium collocabant.

3. *Pecuarius.* Is est qui quæstus sui causa pascua publica redemit, in quæ mittat pecora et armenta. Est etiam publicanorum genus: inde est quod supra pecuarianorum ordinem citavit cap. 6.

4. Sic Lallén. e cod. Metell. et Paris. Vulgo « ex Sicilia ». J. V. L.

5. *Cur servus.* Cur scriba ille pu-

qui tabulas confecerit, semper in Verrutii nomine, certo ex loco, mendosus esset. Atque hæc postulabam, non quo illum cogi putarem oportere, ut ea mihi responderet invitus; sed ut omnibus istius⁶ furta, illius flagitium, utriusque audacia perspicua esse posset. Itaque illum in jure⁷ metu conscientiaque peccati mutum, atque exanimatum, ac vix vivum relinquo: tabulas in foro, summa hominum frequentia, exscribo: adhibentur in exscribendo de conventu viri primarii; literæ lituræque omnes assimilatae, expressæ, de tabulis in libros transferuntur. Hæc omnia summa cura et diligentia recognita et collata, et ab hominibus honestissimis obsignata sunt. Si Carpinatius tum mihi respondere noluit; responde mihi nunc tu, Verres, quem esse hunc tuum pæne gentilem⁸ Verrutium putes. Fieri non potest, ut, quem video, te prætore, in Sicilia fuisse, et quem ex ipsa ratione⁹ intelligo locupletem fuisse, eum tu in tua provincia non cognoris. Atque adeo, ne hoc aut longius, aut obscurius esse possit, procedite¹⁰ in medium, explicate descriptionem imaginemque tabularum: ut omnes mortales istius avaritiæ non jam vestigia, sed ipsa cubilia videre possint.

LXXVIII. Videtis Verrutium? videtis primas literas

blicanorum, qui has tabulas confecisset, semper in hoc nomine et «certo ex loco», id est, post primam syllabam nominis peccasset.

6. *Istius. Verris. Illius. Carpinatii.*

7. *In jure.* Ante prætoris tribunal.

8. *Gentilem.* Propter nominis similitudinem.

9. *Ex ipsa ratione.* Nempe ex ea negotiorum serie quæ cum Carpinatio habuit. — *Non cognoris.* Ingeniose in

Verrem: quum iste omnes in Sicilia locupletes curiose investigaret, et etiam tum Romæ, «jam quesisset non modo furandi genera, sed etiam nomina», ut sup. 6.

10. *Procedite.* Scribas alloquitur. — *Explicate.* Aperite librum, seu tabulas, quas in foro Syracusis exscripsi. — *Cubilia.* Metaphora a feris desumpta, ad Verris nomen alludit Cicero, necnon et initio sequentis capituli.

integras? videtis extremam partem nominis, caudam illam Verris, tamquam in luto, demersam esse in litura? Sic habent se tabulæ, iudices, ut videtis. Quid exspectatis? quid quæritis amplius? tu ipse, Verres, quid sedes? quid moraris? nam aut exhibeas nobis Verrutium, necesse est; aut te esse Verrutium fateare.

Laudantur¹ oratores veteres, Crassi illi et Antonii, quod crimina diluere dilucide, quod copiose reorum causas defendere solebant. Nimirum illi non ingenio solum his patronis, sed fortuna etiam præstiterunt. Nemo enim tunc ita peccabat, ut defensionis locum non relinqueret: nemo ita vivebat, ut nulla ejus vitæ pars summæ turpitudinis esset expers: nemo ita in manifesto peccatu² tenebatur, ut, quum impudens fuisset in facto, tum impudentior videretur, si negaret. Nunc vero quid faciat Hortensius³? avaritiæne⁴ crimina frugalitatis laudibus deprecetur? At hominem flagitiosissimum, libidinosissimum, nequissimumque defendit. An ab hac ejus infamia, nequitia⁵, vestros animos in aliam partem, fortitudinis commemoratione, traducat? At homo inertior, ignavior, magis vir⁶ inter mulieres, impura inter viros muliercula proferri non potest. At mores commodi⁷. Quis contumacior? quis inhumanior? quis superbior? At hæc

LXXVIII. 1. *Laudantur*. Ita codd. Male Ern. Schütz, «laudabantur... solerent». J. V. L.

2. *Peccatu*. Sic Tiro ipse scripserat, teste Gellio, XIII, 19. J. V. L.

3. *Faciât Hortensius*. Cujus conditio Crassi et Antonii fortunæ tam dissimilis est in eo, quem defendit, cliente. Quid faciat? qua ratione Verrem defensurus est, cujus vitæ pars nulla summæ turpitudinis est expers.

4. *Avaritiæ*. An cupiditatis labem

frugalitatis laude excusare tentabit?

5. Forsan legendum «ab hac ejus infami nequitia», adnotante Gulielmio; Hotomannus, contra ceteros libros, edidit «infamia nequitie». J. V. L.

6. *Magis vir*. Notum illud in Cæsarem Carionis dictum: «eum esse omnium mulierum virum, et omnium virorum mulierem».

7. *Mores commodi*. At enim si muliere ignavior, atque impurior est

sine cujusquam malo. Quis acerbior? quis insidiosior? quis crudelior umquam fuit? In hoc homine, atque in ejusmodi causa quid facerent omnes Crassi et Antonii? Tantum, opinor⁸, Hortensi, ad hanc causam non accederent, ne in alterius impudentia sui pudoris existimationem amitterent. Liberi⁹ enim ad causas solutique veniebant, neque committebant, ut, si impudentes in defendendo esse noluissent, ingrati in deserendo existimarentur.

Verres, poteris forsan, mores ejus mites et ad omnis humanitatis speciem compositos laudare.

8. *Tantum, opinor.* Tantum abest ut defenderent causam huic similem, ut contra ne id quidem tentarent; ne hominem aperte improbum defendendo ipsi impudentes viderentur.

9. *Liberi enim.* Non accepta mercede illigabantur, neque id committebant, quod commisit Hortensius, qui, si defendit Verrem, impudens est; si deserit, quum multa ab eo

acceperit, ingratus existimabitur. Acceperat Hortensius autem præter cetera, sphingem æneam magnæ pecuniæ. Unde Ciceronis in eum jocus est. Nam quum illi testem in judicio Verris roganti dixisset Hortensius: non intelligo hæc ænigmata: atqui debes, inquit, quum sphingem domi habeas. Conf. Quintil. VI, 3. Plin. XXXIV, 8. Plutarch. in Cic. 10, et Sallier in dissertat. de Q. Hortensio, *Mémoires de l'Académie des Inscriptions et Belles-lettres*, t. IX.

EXCURSUS

DE PRÆTORE PROVINCIALI:

PRÆTURA Romæ, ut supra vidimus (ad calcem Verr. I), in jurisdictionibus, seu quæstionibus exercendis transacta, postero anno in provincias, quas obtinuerant, prætores proficiscebantur, ornatas de cetero senatus, cujus fuit ornamenta provinciarum dare, atque adimere; augere, atque minuere pro arbitrio. In his autem ornamentis fuit latitudo provinciæ; magnitudo exercitus; stipendium in milites; viaticum et alimenta in legatos, tribunos militum, præfectos, reliquosque prætoris ministros, majoresve, aut minores, qui omnes uno cohortis prætoris nomine comprehendebantur; vasa, vehicula, tabernacula, muli, vestes et annulus, quem de publico datum etiam fuisse scribit Zonaras. Hoc omne, vasarii nomine, prætori de publico dabatur; atque illud erat, «ornare provinciam». Meminit Cicero in Verr. lib. IV, cap. 5. «Alexander Severus, inquit Capitolinus, exemplo veterum argento et necessariis magistratus quos in provinciam mittebat, instruebat; ita, ut præsides provinciarum acciperent argenti pondo vicena; phialas senas, mulos binos, equos binos, vestes forenses binas, domesticas singulas, aureos centenos, cocos binos».

Prætozem in provinciam exeuntem adjutores et ministri magno numero sequebantur: quos omnes cohortis prætoris nomine mox complexi sumus.

Cohors prætoria duplex fuit; altera militaris, constans peditum manu, et equitum turma, ad tutelam imperatoris; altera domestica ex iis quos ministros imperii sui, et adjutores negotiorum publicorum prætori dabat ipsa respublica.

Sunt qui velint cohortem prætoriam militarem peditibus solum constitisse; eamque ab initio ipso rerum romanarum institutam fuisse. Sane ejus mentio jam a temporibus P. Postumii dictatoris occurrit apud Livium, his verbis: « Cohorti suæ, quam delectam manum præsidii causa circa se habebat, dat signum. Cohors dictatoris tum primum prælium iniit ». Liv. II, 20. His verbis, « Cohors dictatoris, etc. » docemur 1^o cohortem illam jam ante Postumii tempora fuisse institutam; 2^o eam non, nisi quum necessitas cogeret, pugnasse; atque ante Postumium numquam prælium iniisse. Nihilominus istud prætoriæ cohortis institutum Festus refert ad P. Scipionem Africanum: « Prætoriam cohors est dicta, inquit, quod a prætore non discedebat. Scipio enim Africanus primus fortissimum quemque delegit, qui ab ipso in bello non discederet, et cetero militiæ munere vacaret, et sesquipleum stipendium acciperet ». Uter igitur audiendus? Liviusne, an Festus? Neutrum erroris argues, si Lipsium audieris: « Jam quidem, inquit, a Postumii temporibus fuit cohors prætoriam, sed raro usurpata: fuit e voluntariis fortasse, aut in unius pugnae eventum captis. At Scipio, ut ordinaria esset, ut munerum militiæ vacationem, et stipendium amplius haberet, instituit; ac proinde ejus auctor a Festo habitus est ». Lips. de Milit. II, 4. Porro institutum illud idem Lipsius referendum putat ad Africanum minorem, seu Numantinum, 1^o quia silet de illo Polybius; quod argumento est, illud ævo majoris Africani in usu non fuisse; 2^o auctoritate ductus Appiani, qui Ibericorum pag. 516, scribit « Numantinum clientes et amicos ex Urbe eduxisse ad quingentos, quos in turmam unam redactos vocabat φίλων ἄνδρ., i. e. cohortem amicorum ». Cohortes prætoriæ Marii, Petreii, Antonii, Sallustio et Plutarcho memorantur. Cæsar nullam videtur habuisse. Ducibus olim singulæ, postea duci uni plures cohortes additæ sunt. Prætoriani milites, gall. *la garde prétorienne*, exemplo prætorianæ cohortis ad principum tutelam insti-

tuti sunt: in novem cohortes ab Augusto divisi, quarum numerum, qui sequuti sunt Augustum, principes auxerunt. Selecti omnes hi fuerunt milites, et robore, et gente, ut ex sola fere Italia assumpti.

Altera fuit cohors prætoria, quæ propius ad hoc quod tractamus argumentum pertinet, et quam domesticam prætoris appellavimus. Dicta est prætoria, quod a prætore, ut illa militaris, nusquam discederet; domestica, quod aut ex domesticis esset convictoribus, aut ex necessariis apparitoribus. Cic. ad Quint. Epist. I, 1: « Quos vero aut ex domesticis convictoribus, aut ex necessariis apparitoribus tecum esse voluisti, qui quasi ex cohorte prætoris appellari solent, etc. »

Cohors prætoria domestica complexa est adjutores, ministros, comitesque omnes præsidum, quos, quum usus ratioque provinciæ, tum dignitas ipsa magistratuum, ac rei publicæ postulavit.

Adjutores fuerunt, legati, tribuni militum, centuriones, præfecti, decuriones, aliique militarium operum; assessores, consiliarii, quos jurisperitos secum ducebant, quorum consilio secundum jura causas definirent: scribæ, accensi, præcones, lictores, interpretes, tabellarii, aruspices, cubicularii, medici, et qui quotidianæ vitæ prope socii fuerunt, inter ministros referendi sunt. Contubernales, et ipsi in comitatu prætoris numerabantur, sed neque adjutores erant, neque ministri.

Jam vero singula hæc aut officia, aut ministeria sigillatim explicanda sunt.

Legati magistratibus in omni provinciali, ac bellico munere adjutores dabantur, ut vicariam eis operam præstarent. Legatos permissu senatus a prætoribus fuisse adscitos, aut certe lege aliqua extra ordinem delectos dico. Ad primum, Cicero testis adducitur in Vatin. cap. 15; ad alterum idem Cicero, lib. I in Verr. cap. 15.

Legatorum numerus qui minimus, trium fuit. Verumtamen

in statuendo numero habita ratio fuisse videtur provinciæ, et belli, et ipsius denique hominis; si quidem Pompeio lege Gabinia quindecim datos fuisse constat. Quoniam autem præsidēs legatis potestatis, atque imperii sui partem communicabant, unde eos Cicero appellat « ministros muneris provincialis », in Vatin. cap. 15 : hinc factum est, ut et ipsi legati lictoribus, ac fascibus uterentur, maxime quum fiduciariam operam præstarent, pro prætore relictī, aut missi quopiam a prætore.

Tribuni militum solis peditibus præfuerunt: sic dicti sunt, auctore Varrone, quod initio terni essent in legione, i. e. quum ipsa tribus peditum millibus constabat. Ut autem numerus peditum in legione auctus est, sic tribunorum crevit etiam numerus; ita ut a tribus ad quatuor, et inde ad sex pervenerint, quum nempe ex senis millibus peditum cœpit confici legio. Mille ergo pedites ducebat tribunus: et quum Horat. Sat. I, 6, 48, dicit, sibi legionem romanam paruisse tribuno, intelligendus est, quasi dixerit, partem sextam legionis, hoc est, mille homines sibi paruisse; quum, Bruto duce, pugnavit ad Philippos.

Tribuni militum, primis temporibus, omnes ab imperatoribus legebantur. Post autem, anno Urbis 393 institutum ut pars eorum populi suffragiis crearetur; partem imperatores solito de more facerent. Testis Livius, lib. VII, c. 5. Hinc est, quod Asconius tribunorum militarium genera distinguit duo: primum, eorum qui in exercitu creati, Rufuli dicebantur, seu Rutuli, a quodam Rutilio Rufo, qui legem tulerat, qua eis cavebatur multis modis: (Festus) alterum eorum, qui comitiati appellabantur, quia Romæ a populo comitiis designabantur. Mansit ille mos legendi, et creandi tribunos militum ad usque novissima tempora rei publicæ.

Centuriones in legione erant sexaginta; centuriōni pedites centum parebant.

Præfecti et decuriones equestribus copiis sociorum præ-

fuerunt. Illi alas, hi turmarum decurias ducebant. Erant præterea præfecturæ in exercitu aliæ multæ: præfecti castrorum; præfecti evocatorum; præfecti fabrum apud auctores celebrantur: Atque has quidem omnes ab imperatore delatas fuisse existimo. Declarat Corn. Nepos, in Att. c. 6, quum scribit Atticum multorum consulum, prætorumque præfecturas delatas sic accepisse, ut neminem in provincia sequeretur. Et Cicero, lib. V ad Att. epist. ult. « Scaptius ad me in castra venit..... præfecturam petivit. Negavi me cuiquam negotianti dare ».

Usus præfecturarum alium etiam indicat Manutius, quum ad hunc locum Ciceronis addit jurisdictionem: et epist. 1 lib. VI, ad hæc verba, « quid dicam de illius præfectis? jus, inquit, in provincia dicentibus ». Jurisdictionem ergo præfectis nonnumquam, ut legatis et quæstoribus suis, in provincia deferbat prætor. At istud puto certius, præfecturas intelligi his locis apud Ciceronem eas, quæ darentur negotiatoribus, ut equitum, quos ducerent, terrore, pecunias quas sub usuris apud provinciales collocaverant, facilius extorquerent: atque eam esse mentem Ciceronis existimo. Ait enim eadem epistola ultima libri quinti, « Appius noster turmas aliquot equitum dederat huic Scaptio, per quas Salaminios [quibus pecunias crediderat] coerceret; et eundem habuerat præfectum: vexabat Salaminios: ego equites ex Cypro decedere jussi ». An ista possunt ulla ratione pertinere ad jurisdictionem?

Hactenus prætorum adjutores. Venio nunc ad ministros, qui quid fuerint ipsi ferme nomine suo declarant.

Apparitores communi nomine dicebantur omnes magistratuum ministri, quia magistratibus apparere, et semper eorum imperio præsto esse debebant. Hæc ministeria libertis fere suis quisque magistratus more majorum mandavit: atque ita porro liberti, sive libertini, erant plerique ex ministris, uti accensi, præcones, etc. non autem scribæ: non quod apparitorum de numero non fuerint, sed quod

eorum ordinem ex ingenuis potius, quam ex libertinis constitisse animadvertimus, inquit Sigon. de Antiquit. jur. civ. Rom. lib. II, cap. 15. Refellit Sigonium Horatius, Sat. I, 5, 66; nisi dixeris Sarmentum scribam privatum dominæ fuisse. Aliud enim erat, scriba privati esse, ut Tiro fuit Ciceronis; aliud, in scribarum ordinem referri. Utut sit, ego non credo libertinos a scribarum ordine fuisse dejectos, quibus ordo senatorius etiam quandoque patuit.

Scribas Festus definit « librarios, qui rationes publicas scribunt in tabulis ». Illorum ergo munus fuit, ut rationes publicas in tabulas referrent : leges et acta in commentarios redigerent. Hinc « scriptum facere » apud Liv. IX, 46, est, scribæ munus exercere.

Quum scribæ multi essent in civitate, factum est, ordinis sui servandi gratia, ut in decurias describerentur. Decuriæ dicebantur collegia, in quibus librarii, scribæ, lictores, viatores, nomenclatores, accensi magistratuum romanorum censebantur. Fuerunt ergo decuriæ scribarum prætoriorum, ædilitiorum, quæstoriorum, prout a prætoribus, ædilibus, quæstoribusve essent lecti; uti L. ille Petillius, quem scribam Q. Petillius quæstor in decuriam legerat (Livius, XL, 29); aut prout magistratibus essent additi ministri. Hinc memoratur apud Gruterum et Reinesium « scriba ædiliū; ædiliū curulium; pontificum; scriba quæstorius; prætorius; publicus ». Ex senatusconsulto anni 743 curatoribus aquarum publicarum et insignia quasi magistratibus conceduntur, et scribæ librarii attribuuntur.

De scribarum ordinis dignitate docti multa disputant. Qui eum ordinem honestum esse volunt, auctorem habent Ciceronem, qui lib. III in Verr. cap. 79, sic ait : « Ordo scribarum est honestus; quis negat?..... Est vero honestus quod eorum hominum fidei tabulæ publicæ, periculaque magistratuum committuntur ». Qui vilem eum fuisse contendunt, his Nepotis verbis id probare conantur : « Itaque eum habuit ad manum scribæ loco, quod multo apud

Graios honorificentius est, quam apud Romanos. Nam apud nos revera, sicut sunt, mercenarii scribæ existimantur. Cornel. Nep. in Eum. cap. 1. In hoc Nepotis loco notanda duo occurrunt: 1^o Graii illi, apud quos honorificentius fuisse ait scribarum munus, quam apud Rómanos, non sane fuerunt Athenienses. Declarant scriptores, quorum adducunt testimonia Sam. Petitus ad leges Attic. pag. 257, 258, et Spanhem. de Numism. dissert. 9, pag. 704. Sed Græcos illos fuisse existimo, qui in Asia Minore ad oram maris Ægæi incolebant: quippe Actor. Apostol. XIX, 35, memoratur scriba sedans turbas; quod indicio est non levem ejus auctoritatem fuisse apud populum Ephesium. 2^o Mercenarios scribas Romæ fuisse, atque ideo pro vilibus habendos esse ait Nepos, quod mercedem acciperent de publico; sed non video cur viliores ob id existimandi sint, quam majores illi magistratuum adjutores, et magistratus ipsi provinciales, quorum in sumptum erogabatur pecunia de publico. Sive enim scribæ pecunia numeretur in sumptus proprios, sive quæstori attribuat in sumptus alterius, puta legati, leve est discrimen: legatus juxta ac scriba mercedem operæ suæ de publico accipere uterque dicendus est, hic per se, ille per alium. Non igitur admodum gravis est Nepotis contra scribarum dignitatem auctoritas. Magis me moveret Livius, dum, lib. IX, cap. 46, narrat Cn. Flavium, ædilem factum, repudiatum fuisse, quod scriba esset; neque nomen ejus acceptum fuisse prius, quam jurasset «se scriptum non facturum»; si non viderem senatum indignatione exarsisse, non tam quod Flavius esset patre libertino, humili fortuna ortus, quam quod Flavium dixerat ædilem forensis factio, et quod is fastos promulgaverat. Plin. lib. XXXIII, cap. 6. Illud opinionem eam in qua sumus, scribarum ordinem et honestum et honorificum fuisse, præterea confirmat, quod aditus scribis ad majores honores non fuerit interclusus; Cicereii, qui Scipionis Africani majoris scriba fuerat, exemplum ostendit,

apud Val. Maxim. III, 5, 1, et IV, 5, 3. Quia et Cicero in libris de Offic. quemdam memorat, qui quum in Sallæ dictatura scriba fuisset, post, in Cæsaris, prætor urbanus fuit.

Ergo scribarum ordo ex se honestus Romæ fuit, et honorificus: at quia plerique libertini et servi locum illum pecunia emebant, ut notat Cicero Verrina tertia, quod per se munus honorificum fuit, per sordes dedecoratum est. Itaque Cicero duo scribarum genera diserte distinguit, ibid. cap. 79: unum eorum, qui illo ordine digni sunt, patrum-familias, virorum bonorum, atque honestorum: alterum eorum qui nummulis corrogatis de nepotum donis, ac de scenicorum corollariis decuriam emebant.

Suos quisque magistratus tum in Urbe, tum in provinciis habuit scribas. Hi sortiebantur inter se ad ærarium procurationis suæ partes, quas sustinerent ad tempus: nempe qui scriba esset consulis; qui, tribuni plebis; etc. Cic. Catil. IV, cap. 7.

Qui magistratibus in Urbe apparebant scribæ, eos leges quodammodo in manibus habuisse, et magistratibus jus suggessisse ostendit Cicero, de Legg. lib. III, cap. 18. Quod ipsum etiam testatur Plutarch. in Cat. min. his verbis: « Cato, quum quæsturam inisset, ministros et scribas coercuit, qui publicas tabulas, legesque tractantes, quum adolescentes nacti essent, quibus magistratibus apparerent, quod ii propter inscientiam magistris egerent, potestate non cedebant, sed ipsi erant magistratus ».

Accensus, quod fuit alterum ministrorum genus, ab acciando dictus, erat magistratibus præter lictores attributus, qui et acciret ad prætorem, qui jus eum poscerent, et qui molestis interpellatoribus, et diutius quam oporteret loquentibus, silentium imponeret. Libertis suis hoc muneris vulgo magistratus dabant. Testis Cicero ad Q. Fratr. Epist. I, 1, 10. Neque vero quum dixit, in Verr. lib. I, cap. 28: « Homo ordinis sui frugalissimus, qui tum accensus C. Ne-

roni fuit, P. Tettius, alium ordinem, quam libertinorum, intellexit, ut ad hunc locum observavimus, in quibus, ut in servis, frugalitas commendatur.

Antequam horologia Romæ essent, accensorum hoc etiam officium fuit, ut clamarent esse horam tertiam, meridiem, et nonam. Varro de Ling. Lat. lib. V.

Præconum in civitate usus fuit varius, et multiplex: in auctionibus, ut ad hastam starent, et pretia oblata nuntiarent: in concionibus, ut audientiam facerent: in comitiis magistratuum, ut tribus ad suffragia ineundam citarent; et eos, qui designati erant, renuntiarent: in judiciis et quæstionibus, ut iudices, reos, accusatores, defensores, testes citarent: in suppliciis, ut causam damnationis dicerent: in funeribus, ut ad exsequias evocarent.

Liberos fuisse præcones exemplo sit Nævius ille, cui «quum natura nihil melius quam vocem dedisset, pater nihil præter libertatem reliquisset, vocem in quæstum contulit, etc.» Quibus tamen verbis eum libertini filium fuisse Cicero mihi tacite videtur indicare, pro Quint. cap. 3.

Præcones a consulibus ex civibus romanis legebantur: eorum multæ erant decuriæ.

Lictores Festus dictos putat, quod fasces virgarum ligatos ferrent: male: a ligandis reis nomen habuerunt. Illorum origo a Romulo; exemplum ab Etruscis fuit, Liv. I, cap. 8. Fuerunt liberi. Eligebantur plerumque ex ima Quiritium plebe. Idem, II, 55. Sed togæ jus illis fuit; atque ideo cives fuerunt. In Pison. cap. 23.

Lictoribus usi sunt dictatores, consules, prætores, et quicumque magistratus potestatem, et imperium habuerunt. Nam viatoribus tantum utebantur ii, quorum sola potestas erat, sine imperio. Lictoribus viginti quatuor dictator: duodecim, consul penes quem erant fasces; alter vero duobus: sex, prætor utebatur.

Lictorum munus erat triplex. Ibant ante magistratum non gregatim, aut temere, sed singuli, ordine, ita ut lineam

ducerent: et qui magistratui proximus esset, proximus appellaretur. Cic. in Verr. V, cap. 54. Populum summovebant venienti magistratui. Sontes virgis cædebant, et securi feriebant. Cic. ibid. Liv. lib. I.

Interpretes adhibebantur ad interpretandam prætori populorum externorum orationem, aut ad prætoris decreta gentibus exteris explicanda. Fuere ex apparitorum et libertinorum numero.

Tabellarii erant, qui epistolas ultro citroque ferrent. Hieron. ad Niceam, lib. I, epist. 1: «Ante chartæ, et membranarum usum, inquit, aut in dedolatis e ligno codicillis, aut in corticibus arborum, mutua epistolarum alloquia missitabant; unde et portitores earum tabellarios, et scriptores, a libris arborum, libenarios vocavere».

Aruspices extorum scientiam tenebant. Extæ inspiciebant, et quid portenderent, imperatori referebant. Ostenta, prodigia interpretabantur.

Contubernaliū nomine significantur nobiles adolescentes, qui rei militaris percipiendæ et provinciæ cognoscendæ gratia, magistratus in provinciam sequebantur; ut militari-
bus sermonibus, et interdum consiliis interessent, et usu rerum peritiores evaderent. Nam contubernium est vocabulum castrense, usurpari solitum de militibus decem sub uno papillione, seu tentorio degentibus. Inde factum ut adolescentes illi, propterea quod familiariter cum magistratibus vixerunt, neque ab eorum lateribus discesserunt, in eorum agere contubernio, et contubernalesses dicerentur. Sic M. Cælius, ille quem Cicero defendit, in Africa Q. Pompeio; sic L. Gellius C. Carboni; sic L. Torquatus Ciceroni consuli contubernalis fuit.

His omnibus, quos hactenus recensui, ministris aut adiutoribus, adjungendi sunt jurisperiti, quorum consilio; servi publici, quorum etiam ministerio magistratus provinciales uterentur. Illos ex Urbe secum ducebant. Hi perpetui erant in provincia. Ejusmodi fuerunt Venerii illi, de quibus

frequens est mentio in Verrinis : et Bruttiani, sive e Bruttio acciti homines quos magistratibus in provincias euntibus in servorum vicem parere et præministrare dicit A. Gellius, quem adi lib. X, cap. 3.

Hic erat provincialis prætoris comitatus : hi simul omnes cohortem prætoriam domesticam conficiebant.

Quæstorem inter prætoris ministros non recensui, quia ejus ratio longe alia fuit, atque ceterorum. Hic enim a populo potestatem a prætoria separatam accepit; neque apud prætorem asseclæ, sed filii locum obtinuit. Divinat. c. 19. Ad Div. XIII, 10.

In singulas provincias singuli quæstores; at in Siciliam duo mittebantur. Legebantur eo modo, quo præsides; et provincias in sortem conjiciebant. Quæstorum procuratio fuit duplex: urbana, eorum qui ærario populi romani præessent; provincialis, eorum, qui cum consulibus, aut cum prætoribus in provincias irent. Quod ita institutum declarat Cicero non uno loco.

Si quando quæstor in provincia moreretur, in demortui locum prætor proquæstorem adsciscebat. Sic C. Malleolo quæstore Dolabellæ occiso, Verres a Dolabella statim proquæstor esse jussus est. In Verr. lib. I, cap. 14. Quæstorum provincialium munus hoc erat, ut pecuniam prætori ex ærario a senatu attributam, a tribunis ærarii acciperent, quam in stipendium et frumentum legatorum, ac totius prætoris cohortis insumerent. Totius præterea rei frumentariæ administrationem a prætore sibi commissam habuerunt. Cic. Verr. I, c. 14 et 38. Frumentum Romam mittendum curabant. Pro Planc. c. 26. Prædam ab hostibus captam vendebant; pecuniam inde redactam in publicas tabulas referebant. Liv. lib. IV, c. 53. Jurisdictionem, absente prætore, in provincia sua exercebant. Divinat. c. 17.

Eorum insignia erant, toga prætexta; scribæ ad faciendas tabulas publicas; lictores, ad majestatem tuendam magistratus. In Verr. lib. II, c. 4.

Quæstorium dicebatur tabernaculum seu domus quæstoris, ut prætorium, domus prætoris.

Expositis iis quæ ad præsides, et eorum ministros pertinent, restat ut eorum in provinciam protectionem, et quoniam modo ibi se gesserint exponamus.

In provinciam profecturi magistratus in Capitolium prius ascendebant, ubi solennia pro republica vota nuncupabant; atque inde paludamento, lictoribus, insignibusque imperii ceteris assumptis, recta ad portam Urbis ibant; et amicis eos, officii causa, aliquanto viæ spatio prosequentibus, ac bene ominantibus, iter ingrediebantur: aut si quid negotii in Urbe haberent, ad Urbem per aliquot dies, aut menses manebant, quod in ea cum imperio esse non possent. *Cæsar de B. Civ. lib. I, c. 6. Festus voc. Prætor.*

Moris fuit ut decessorem suum præses de adventu suo in provinciam certiore faceret; scilicet ut cum eo congregiendi de statu posset provinciæ cognoscere. *Cic. ad Div. III, epist. 6. Ulpian. Dig. lib. I, tit. 16, l. 4, § 4.*

Prætoris in provinciam adventus magnis provincialium studiis, laudibus, feriatis diebus, aliisque publici gaudii significationibus celebrabatur. Ei lætissimo agmine procedebatur obviam; flores spargebantur; incendebantur odores; aulæis parietes contegebantur; epulæ, ludi, et cetera id genus, apparabantur; hostiæ quandoque immolabantur. *Sallust. Hist. II, 7. Val. Max. IX, 1, 5.* Nihil denique quod ad ornatum portarum, itinerum, locorumque communium, qua prætor iturus erat, aut potius ad projectissimam adulationem, saltem extremis reipublicæ temporibus, excogitari poterat, relinquebatur. *Hirtius de Bell. Gall. c. 51.* Sic provincia inaniter et effuse de illorum adventu exultabat, quorum sæpe tyrannicam dominationem mox erat expertura, ac Romæ plerumque frustra conquestura.

Quo die prætor in provinciam accedebat, eodem provincialis muneris, imperiique initium capiebat. *Lex Cornelia Sullæ dictatoris* concedebat ei, cui succedebatur, ut per

triginta dies post successoris adventum in provincia morari posset.

Præsidis officium provinciale in duas partes fuit, ut diximus, distributum : potestatem, et imperium. Potestas, fuit facultas cognoscendi; imperium, exercitui imperandi, bellumque gerendi. Æstatem fere rei militari; hiemem prætoris cognitioni, quæ in jurisdictione potissimum est versata, dicabant.

Quoniam autem horum officiorum neutrum tueri, nisi variis itineribus per provinciam faciendis, potuerunt, de iis pauca præmittenda sunt.

Primis temporibus iter ita facere præsides romani per provinciam solebant, quod jam a nobis observatum est, ut sociis nulli oneri, neque sumptui essent; quippe qui hospites etiam privatim haberent, ad quos plerumque diverterent. Postea vero, gliscente libidine, sociis usque adeo incommodi esse cœperunt, ut eorum multorum adventus parum ab hostili impressione differret. Quocirca multis legibus eorum constringenda libido fuit.

Primus Cato, quum Sardiniam obtineret anno 555, sumptus, quos in cultum prætorum socii facere soliti erant, circumcidit, aut sustulit : atque huic malo nihilominus in dies ingravescenti remedia alia subinde allata sunt, donec lex Julia, quam Cæsar tulit in primo consulatu, præter cetera, quid a sociis dari oporteret, præcepit : nempe tectum, ligna, sal, fœnum, et cetera ejusmodi, quæ, repente adveniente prætore, commode parari ab ipsius comitatu non poterant. Instituti ministri, qui, quæ lege continebantur, præberent, græco vocabulo parochi nominabantur. Horat. Sat. I, 5, 46. Cic. ad Att. lib. XIII, epist. 2. Sed de his jam diximus.

Lepidam Verris itinerum descriptionem habes libro quinto Accusationis.

Itinerum ratione perspecta, sequitur, ut de potestate agamus.

Potestas cognitionem, et curationem complexa est.

Cognitio aut domestica fuit, aut popularis. Domestica, intra prætorium, et in cubiculo, querelis provincialium audiendis, admittente cubiculario, est consumpta : popularis, in basilica, atque in tribunali, scribis, accensis, præconibus et lictoribus apparentibus. Utriusque meminit Cicero, ad Q. Fr. I, epist. 1. Utramque autem potestatem non ante, quam provinciam suam attigissent, neque alibi, quam in provincia sua exercere poterant. Ulpian. Digest. lib. I, tit. 16, l. 1.

Ut autem potestas ea commodè exerceretur, institutum erat ut certas in partes, seu diœceses [gall. *ressort*, *étendue de jurisdiction*] provinciæ dividerentur, atque in iis partibus essent oppida, in quibus jus diceret magistratus romanus, evocatis eo nimirum provincialibus, qui ejus diœceseos essent. [Gall. *qui étaient de ce ressort*.] Oppida sic constituta juri dicundo in provinciis, fora, seu conventus dicebantur. Plin. III, 1, «juridicos conventus»; et V, 28, «jurisdictiones», et cap. seq. «conventus», appellat. Forum, seu conventum agere præses dicebatur, quum in uno aliquo ex his oppidis jus dicebat.

Ad conventum provinciales evocabantur edicto, quod præses per omnia oppida, quæ illis conventibus attributa erant, aut etiam per totam provinciam, die certa foro agendo constituta, proponebat. Cæsar de B. Civ. II, 19.

His ita constitutis, aut uno in oppido plures conventus, aut in singulis singulos agebat, atque omnes percurrerebat. Verumtamen singulos conventus vulgo a prætore perlustratos fuisse existimo, quod id fuit ad provinciæ rationes accommodatius. Quum autem conventibus indictis, et convocatis, prætores alia domi, alia in foro cognoscerent; quæ domi transigebantur, ea fere per diplomata annulo obsignata perficiebantur. Cic. in Pis. passim. Quæ vero in foro cognita sunt, ea totam jurisdictionem complexa sunt. Jurisdictio autem nihil aliud fuit, quam potestas juris ejus

reddendi quod legibus contineretur, de privatis controversiis, et criminibus publicis, aut provincialibus hominibus, aut civibus romanis in provincia versantibus, quoties existeret qui illud posceret. Privatæ controversiæ, in quibus potissimum collocata jurisdictio fuit, aut ad personas, aut ad res, et earum acquisitiones; aut ad obligationes pertinebant.

Leges, quibus jus reddendum continebatur, fuerunt, aut quas imperator, quum bello acquisitam provinciam constitueret, ex decem legatorum sententia dederat, ut Rupilia lex de judiciis apud Siculos, in Verr. lib. II, c. 12, aut quas postea e re nata consules aut tribuni plebis tulerant, quibus etiam attexenda senatusconsulta sunt, ut lex Terentia Cassia de emendo in Sicilia frumento, in Verr. lib. III, c. 69, et senatusconsultum illud, ut, qui Ciliciam obtineret, jus de centesimis usuris ex syngrapha diceret. Lib. V, ad Att. epist. ult.

Personæ, quibus jus reddebatur, fuerunt, ut dixi, provinciales homines [ex quorum numero eximi liberos populos oportet, quibus jus dici non licuit. Cic. de Prov. cons. c. 2]; et cives romani quos in provinciis versatos dixi: ii fere aut aratores, aut publicani, aut negotiatores fuerunt, quibus non minus, quam sociis ipsis, jus dictum. Cic. in Verr. lib. III, c. 14.

Quum jurisdictio reddendi juris potestas fuerit quod legibus contineretur, legibus autem omnia comprehendere non potuissent, factum est, ut multa edictis ipsis prætoris sint permissa. Itaque uti prætores urbani Romæ magistratum ineuntes edicta proposuerunt, ex quibus jus se dicturos esse professi sunt; sic præsides in provincias ingressi et ipsi sua edicta singulis de rebus diligenter scripta ediderunt; ad eaque postea totam jurisdictionem suam accommodarunt. Atque hæc quidem si ex urbanis aut provincialibus edictis sumpsissent, translatitia; sin minus, nova dicebantur. Hoc nimirum Cicero testatur ad Att. VI, ep. 1; ad Div. III, ep. 8.

Neque illa solum in edictis comprehensa fuerunt, de quibus prætor esset cogniturus, sed etiam ea de quibus iudicium esset daturus, et quomodo. Declarant edicta Verris, quæ recensentur lib. III, c. 10 et seqq. Improbe factum iudicabatur, si quis aliqua de re aliter in provincia, atque in Urbe edixisset [modo tamen id injuste fecisset: nam licet is qui provinciæ præest, omnium Romæ magistratuum vice et officio fungi debeat, non tamen tam spectandum est quid Romæ sit factum, quam quid fieri debeat. Procul. leg. 12, de Off. præsidis]: si quod edictum contra leges provinciæ fecisset; si contra edictum suum jus dixisset. Hinc Verri Cicero in crimen vertit, quod de hereditatûm possessionibus in edictum provinciale non transtulerit, quod in edicto urbano habuerat, lib. I, c. 46, et quod contra leges Siculis datas edixisset, lib. III, c. 10 et seq. et ipse negat se posse contra suum edictum. Ad Att. V, epist. ult.

Pendebat igitur iurisdictio tota fere ab edicto; quo proposito, ea exercebatur aut coercendo, aut statuendo. Prehendi, pignora capi jubere, multam dicere, coercionis sunt effectus: ministri, accensus et lictor.

Statuendi locus fuit basilica, et tribunal: ministri, scribæ, præcones et lictores. Tribunal, suggestus fuit editor, unde conspici magistratus ab omnibus poterat; in quo sella curulis locata erat; ubi sedens prætor cognoscebat, et pronuntiabat.

Statuendi partes duæ fuerunt: decretum, et iudicii datio. Decreta, sententiæ præsidum fuerunt, sine iudicum consilio, singulis de rebus interpositæ. Decernere autem dicebatur prætor, quum manumitti, mancipari apud se permittebat; quum possessionem ex edicto dabat; quum tutorem dicebat; quum bona addicebat; quum interdicebat; et omnino quum ipse sine iudice rem et cognoscebat, et de ea pro suo iudicio statuebat. Verris iniqua decreta Cicero passim exagitat.

Judicium dabat prætor eo modo, quo postulabatur, i. e. aut ex lege provinciæ, aut ex edicto suo. Legis nomine h. l.

significatur id, quod in provincia per magistratum aliquem constitutum est. Sic legem Rupiliam appellat Cicero id, quod Rupilius in Sicilia, senatu comprobante, constituit. Si res ex lege gereretur, moris erat ut actionis editio præcederet, seu, dicæ scriptio, ut ait Cicero Græcorum lingua de Siculis, quia græce loquebantur. Scribi dicæ dicebatur tum, quum lis intendebatur, id est, quum iudicium postulabatur. Dicæ scriptionem sequebatur sortitio [interpositis nimirum triginta diebus, ex lege Rupilia; ut interim deliberaret reus an cedere, vel contendere deberet], seu datio iudicium ex urna sorte eductorum. Dicæ ab omnibus, qui agere volebant, quolibet die ex arbitrio scribebantur: edicebatur certus dies a prætore, quo eas esset sortiturus. Si eo die sortitio alicujus dicæ, propter triginta dies nondum elapsos, fieri non potuisset, ea aliam ad sortitionem per aliud edictum faciendam differebatur. Hæc omnia ex iudicio Heraclii, hominis Siculi cognoscuntur, apud Cicer. Accusat. lib. II, cap. 15.

Ex edicto res agebatur, quum litigatoribus iudex unus, aut tres recuperatores dabantur, prout prætor in edicto suo posuerat se de illis, aut illis rebus, iudicem, aut recuperatores daturum. Iudicii dandi formula hæc erat: « Si pareret, etc. » Cicero, Accusationis libro tertio, cap. 22: « Dabat iste iudicium si pareret jugera ejusmodi fundi esse plura, quam colonus esset professus; tum Xeno damnaretur ».

Quos litigatoribus præses iudices aut recuperatores dabat, eos ex conventu, et foro illo, in quo res agebatur, dabat; id est, ex iis civibus romanis, sociisve, qui in iis oppidis quæ ad id forum pertinerent, versabantur. Itaque inter cetera hoc quoque crimini vertit Cicero Verri multis Accusationis in locis, quod non de conventu, sed de cohorte sua, recuperatores dedisset. Ut in Urbe, sic in provincia, rejectio fiebat eorum iudicium, seu recuperatorum, quos uterque litigator sibi incommodos fore arbitraretur. Vide plura in Append. de ordinand. judic. ad calc. huj. volum.

Quod si non recuperatores tres, sed iudex unus datus

esset, tum, ut Romæ, sic in provincia ille peritum aliquem sibi in consilium advocabat, atque ex ejus sententia judicabat : quod ex verbis M. Petilii ad Verrem admonemur. Lib. II, c. 30.

Ista quæ notavimus præses habebat in jure dicundo peculiaris : in ceteris, eadem in provinciis actionum ratio fuisse videtur, ac Romæ. Ante judicium vadationes, compromissa, sponsiones, satisfactiones ; post judicium autem, additiones, abductiones, et cetera ejusmodi, de quibus, quum de ordine judiciorum agemus, disputabitur.

Atque hoc quidem modo privatarum controversiarum cognitio, quam proprie jurisdictionem appellarunt, administrabatur. Nunc quemadmodum judicia publica, seu quæstiones, exercerentur, demonstramus.

Romæ jus alii inter cives et peregrinos dicebant ; alii judicia publica exercebant : at non ita erat in provinciis. Utraque cognitio præsidi provinciæ a populo romano commissa fuit : privatarum quidem litium, ex ea lege quæ ex decem legatorum sententia data fuerat ; publicorum vero criminum, ex ea quæ de quoque crimine cognoscendo, aut vindicando, lata fuit.

Publicæ quæstiones fuerunt, vis, peculatus, falsum, majestas, et si qua alia ejus generis. Earum exercendarum eadem in provinciis ratio, ac Romæ, fuit. Deferebatur rei nomen ab accusatore apud prætorem ; prætor, si id recepisset, diem judicii constituebat. Ubi illa advenerat, accusatorem, reum, et testes citari per præconem jubebat ; interrogatione testium absoluta, sortiebatur ex lege quæ de eo crimine lata fuerat, judices, et quidem e conventu : sequebatur rejectio more romano : quibus absolutis, sedente in tribunali ac sella prætore, iudicibus in subselliis, causa ab utraque parte agebatur, i. e. ab accusatoribus et patronis rei : prætor cum consilio cognoscebat ; atque ex consilii sententia, ubi ab utraque parte peroratum erat, reum aut comperendinabat, aut condemnabat, aut absolvebat ; aut amplius pronun-

tiabat : si comperendinatus reus, aut ampliata causa fuisset, secunda actio instituebatur; vel etiam, si necesse fuisset, tertia, saltem in ampliatione. Tum de integro aut absolvebat, aut condemnabat, atque in condemnatum animadvertebat prætor. Sunt in Verrinis tria hujus generis judicia : De Philodamo, Nerone Asiæ prætore judicium exercente, lib. I, cap. 25 et seqq. De Sopatro, lib. II, cap. 28. De Sthenio, ibid. cap. 34. In his duobus quærebat Verres. Quæ judicia quamquam a Cicerone ut perperam facta afferuntur, tamen ejusmodi sunt, ut veterem publicorum in provincia judiciorum consuetudinem illustrare possint; cujus rei notitiam alioquin haurire aliunde, nisi concepta ex urbanis judiciis conjectura, non possemus.

His tribus judiciorum exemplis quartum etiam addere possumus, veterum literis in primis celebratum, de muliere Smyrnæa, quæ filii, quem ex priore marito pepererat, ulciscendi causa, virum et filium ex eo genitum, venenis interfecerat. Cujus criminis postulata quum fuisset apud Asiæ proconsulem Dolabellam, is, quia nemo ex consilio suo sententiam ferre in causa tam ancipiti auderet, rem Athenas ad areopagitas rejecit. Hi, causa cognita, mulierem, et eum a quo accusabatur, centesimo post anno adesse jusserunt. Val. Max. VIII, 1. A. Gell. XII, 7. Amm. Marcell. lib. XXIX. Ex hoc exemplo Dolabellæ, uti ex aliquot Ciceronis locis elicitur in magna causæ obscuritate prætores causam alio rejicere potuisse.

Atque hæc sint de provinciali privatarum ac publicarum causarum cognitione. Hic autem quæret fortasse aliquis, an vero, quum in una provincia, ac sæpe duabus, aut tribus, prætor unus juri dicundo præesset, ipse in tantis occupationibus tanta esse diligentia potuerit, ut præsens omnibus jus poscentibus satisfaceret? minime vero: sed vicariis ad eam rem usus est multis, nempe legatis, quæstore; nonnumquam etiam aliis, quibus ipse partem suæ jurisdictionis mandavit. Id confirmatur testimonio Ciceronis pro Flacco,

cap. 14. Divinat. in Cæcil. cap. 17. Ad Quintum Fratr. Epist. I, 1.

Hoc autem loco illud etiam observandum monet Sigon. de Jure provinc. lib. II, cap. 5, præsidēs, quum legis jurisdictionem mandarunt, publicarum quæstionum exercitio- nem non mandasse, sed tantum privatarum controversia- rum cognitionem, quæ proprie jurisdictio dicta est; quæ quoniam a magistratu tota profecta est, cum quæstione, seu causarum publicarum cognitione conjuncta non fuit, quæ a lege tota pependit. Erant enim de singulis criminibus latæ leges, ut de adulteriis, vi, falso, etc. quibus quid cuique observandum esset, qui aut Romæ quæreret, aut provinciam obtineret, sciscebatur: ex quo intelligi potest publici judicii exercitio- nem mandari non licuisse, nisi forte lege, quæ de quæstione illa scripta esset, nominatim cautum esset, ut is cui exercitio hujus quæstionis obtigisset, posset eam mandare.

Prætoriam potestatem divisimus in cognitionem et cura- tionem. Primæ parti divisionis satisfactum est: nunc de altera disserendum, quæ tota ceteris in rebus curandis, atque provinciæ imperandis versata est. Hæ fuerant, res frumentaria, tributaria, vectigalis, viaria. Ista omnia a præ- sidibus per edicta administrabantur; non perpetua illa qui- dem, sed repentina, hoc est, de singulis rebus, prout cu- jusque postulavit occasio, interposita. Testis Cicero in ipso hujus disputationis fonte, Siciliensi prætura Verris, lib. III, cap. 14, et aliis locis.

Jam ut quæque modo memorata prætor curaverit, ex- quiramus.

Frumentum in provinciis aliud vendebatur, ut decuma- num in Sicilia (nam aliarum provinciarum decumæ Romæ a censoribus vendebantur); aliud emebatur; aliud in cellam prætoris æstimabatur; aliud imperabatur; aliud honoris causa accipiebatur. Ergo ex legibus, et senatusconsultis aut veteribus, aut recentibus omnia hæc prætor curavit;

totumque jus vendendi, emendi, æstimandi, imperandique frumenti habuit. Testis Cicero passim in Verrinis.

Jam vero, ut alio loco dixi, ut vinum fuit honorarium, quod prætori honoris causa dabatur, et cujus meminit Cato in oratione de innocentia sua, apud Isidor. Orig. XX, 3; sic honorarium frumentum, quod prætori dabatur, appellat Cicero in Pison. cap. 35: quam vectigalis prætorii partem Ciliciæ remisisse se Cicero gloriatur in epistola quadam ad Atticum.

Ac rem quidem vectigalem frumentariam ordine ita curarunt. Extra ordinem autem vectigalia nova instituerunt, ac tributa imperarunt; verum non sine crimine, quoties ex ipsorum libidine imperata sunt.

A provinciis exegerunt prætores jure, sive ex fœdere, sive ex senatusconsulto, tributi nomine pecuniam, naves, nautas, milites, in quorum sumptum civitates dare solebant. In Verr. lib. V, cap. 24. Tributorum contra leges imperatorum exempla suggerunt Verres, lib. II, cap. 55. Piso, in Pison. cap. 35. Appius, lib. V ad Attic. epist. 16. Scipio, Cæsar in Bell. Civ. lib. III, cap. 32.

Viarum publicarum curatio minima pars præsidum officii non fuit. Ad illud pertinuit ut viæ publicæ sternerentur, aperirentur, signarentur, eversæ restituerentur, tum ut exercitus romani commodius per provincias ducerentur; tum ut majori celeritate Roma in provincias, et inde Romam nuntii commearent; tum denique ut ipsi cum comitatu suo facilius provinciarum suarum urbes obirent. Sane rudis sit, qui intra Italiæ fines, qua Urbs adibatur, stetisse putet viarum magnificentiam; ab ortu enim ad occasum, regionum itinera strata, et lapidibus miliaribus dimensa fuerunt. Isid. Orig. XV, 16.

Prætores, quum majoribus curis impedirentur, legatis suis hoc viarum muniendarum negotium dabant. Præerant ipsi; imperabant pro dignitate sua quod videbatur, et probabant. Cic. pro Font. cap. 3.

Neque solum regiarum cura viarum ad rectores provinciarum pertinuit: iisdem et stationes navium, portus, litora, turres et castella in limitibus, omnesque provinciarum accessus commendabantur. Cod. Th. de Itinerum mun. et de litorum et itin. cust.

Ulpianus etiam inter officia proconsulis retulit, ut, si in celebrem civitatem, vel provinciae caput adveniret, aedes sacras, et opera publica circumiret, inspiciendi gratia an sarta tectaque essent; et si qua coepta essent, curaret ut consummarentur, prout vires ejus reipublicae permitterent; curatoresque operum diligentes solenniter praeponeret. Digest. lib. I, tit. 16, l. 7.

Congruit, ait idem Ulpianus, bono et gravi praesidi curare, ut pacata atque quieta provincia sit quam regit: quod non difficile obtinebit, si sollicite agat ut malis hominibus provincia careat, eosque conquirat: nam sacrilegos, latrones, plagarios, fures conquerere debet; et prout quisque deliquerit, in eum animadvertere, receptoresque eorum coercere, sine quibus latro latere diutius non potest. Ibid. l. XIII. In mandatis principum est, inquit Paullus, ut curet is qui provinciae praest, malis hominibus provinciam purgare. Ibid. lib. III.

Peractis iis quae ad potestatem praetoriam pertinent, jam ad explicandam alteram partem provincialis officii, quod est imperium, pergimus.

Imperium hoc loco nihil aliud est, quam jus habendi exercitus, belli gerendi, et rei totius bellicae capessendae: cui rei praesides non minus, quam jurisdictioni operam dederunt, neque injuria: hac enim sociorum quidem commodis consuluerunt; at illa eosdem in fide continuerunt, exercitus terrorem, bellicae minas, si deficerent, ostentantes: atque provinciam ipsam a finitimorum hostium incursionibus, aut latronum populationibus tutam praestiterunt. Ergo praesidi qui habebat imperium, jus fuit exercitui imperandi; bellum auspiciis suis gerendi; et totius rei milita-

ris suo consilio atque arbitrio in sua provincia gubernandæ. Tria hæc breviter explicanda.

Exercitum præses aut novum conscripsit, aut veterem ab ipso præside decedente, aut ab ejus legato accepit: acceptum lustravit; et, concione habita, si qua corrigenda in eo, aut immutanda visa sunt, proposito edicto, emendavit et immutavit. Cicero lib. V ad Attic. epist. 20. Livius, XXXVIII, 12, et XLV, 41.

Lustratio, erat solenne sacrificium, quod faciebant sub dio ad expiandum exercitum, censorio non absimile, quo populus romanus in campo Martio lustrabatur. Plutarch. in Bruto. Liv. XL, 6. Q. Curt. X, 9.

Disciplinæ militaris emendatæ dabunt exempla P. Scipio ad Numantiam, et Q. Metellus in Numidia. Appian. in Iber. Sallust. in Jug. cap. 45.

Imperator in exercitu non privatas solum controversias, sed publicas cum consilio ac sine consilio cognovit; ac demum summam vitæ necisque cujusque potestatem et in socios, et in cives ipsos, habuit; ac persæpe in cives militesque romanos severe ac vehementer vindicavit, ut ait Cic. in Verr. lib. V, cap. 51. Argumento sit illud P. Scipionis, quo in auctores seditionis ad Sucronem animadvertit. Liv. lib. XXVIII, cap. 29. Appian. in Iber.

De auspiciis imperatoriis id fuit ejusmodi. Institutum ab initio Romæ fuerat ut nihil neque domi neque militiæ, nisi auspicato, gereretur. Panv. de civit. Rom. cap. 17. Hanc causam affert Cn. Manlius apud Livium, quod nullius calumniæ subjicerentur ea quæ dii comprobavissent. Auspicia in exercitu unius tantum fuerunt imperatoris; ceteri auspiciis ejus pugnare; ipse bellum ut ductu, sic auspiciis suis gerere dicebatur. Unde dixit Scipio ad seditiosum exercitum, apud Liv. XXVIII, 27: « Quin mihi ne hodie quidem scire videmini quo amentię progressi sitis: quid facinoris in me, patriamque vestram; quid in deos sacramenti testes; quid adversus auspicia sub quibus militatis; quid adversus mo-

rem militiæ, disciplinamque majorum; quid adversus summi imperii majestatem ausi sitis. Itaque nec imperatoris nomen, nec supplicatio, nec triumphus dabatur aut legato, aut ulli alii exercitus præfecto; ne si eorum quidem opera, atque virtute imperator absens, aut ægrotus, victoriam adeptus esset; quod non eorum auspiciis res esset gesta, sed ipsius imperatoris. Sigon. de antiq. jur. prov. lib. II, cap. 6.

Auspiciorum voce denotatur, ut dixi alio loco, vis ipsius summæ potestatis, et eminens quædam rerum gerendarum auctoritas ac efficacia divinitus imperantibus concessa.

Auspicia in castris duo adhibebantur. Unum, coactum; alterum, ex acuminibus. Coactum auspicium illud erat, quod petebatur ex pullis, quos fame antea domitos e cavea pullarius objectam ad offam emittebat: si aliquid e pullo- rum pascentium ore in terram cecidisset, tripudium solistimum dicebatur, ac prosperum habebatur: sin minus, infaustum. Coactum autem dicebatur, quia, ut ratum esset auspicium, ut ex offa caderet aliquid oportebat. Cicero de Divinat. lib. II, cap. 33. Illud autem observandum, quod magistratus quidem, qui in consulatu et prætura provinciam obtinuissent, non, nisi addicentibus pullis, rem ullam aggredi solitos fuisse: proconsules vero, et proprætores, ut qui sine magistratu essent, ea non observasse. Quod elici posse videtur ex verbis Ciceronis. Ibid. cap. 36.

Auspicium ex acuminibus militare fuit, sed cujusmodi fuerit eruditi certant, et adhuc sub iudice lis est. Meminit Cicero ibid. cap. 36, et de Nat. Deor. II, cap. 3. Ego acmina interpretari posse reor quasi cacumina, loca collium editissima, ubi colles deficient; unde quid boni portenderet avium volatus observabatur¹.

1. Toto cælo quod ad hoc auspicii genus pertinet, fallitur Desjardins: apparet enim, ut optime explicuit Hottingerus ad Toca supra laudata,

phenomena quædam electrica fuisse, e quo genere est illud quod Livius narrat Hist. XXII, 1: - Angebant metum prodigia ex pluribus simul locis

Neque auspicia solum, sed et omina observabant. Fuerunt autem omina ex dictis, ut quum Paulo paranti expeditionem adversus Perseum Macedoniæ regem, filiola mœste occurrit, dicens, « Persa periit ». Cui pater, « accipio omen ». Erat autem catella mortua eo nomine. Ex factis, ut quum Flaminius exercitu lustrato, quum contra Hannibalem legiones duceret, ipse et equus ejus concidit. Ex auditis, ex visis.

Neque solum auspiciato, sed et litato rem aggrediebantur. Ostendit multis ex locis Livius. Erat autem litare, pacem deum immolandis hostiis impetrare: id autem fiebat, quum, cæsa hostia, aruspices exta diligenter aperientes atque inspicientes, ex quibusdam aruspiciæ præceptis propitios aut infestos deos interpretabantur.

In extis autem, ut jecore, pulmone, et corde, caput et fissum observabant, in primis an aucta aut imminuta essent, quum in iis partem familiarem, atque hostilem, sic enim vocabant, constituissent. Itaque si caput in jecinore non fuisset, auspicia pestifera esse; si auctum esset, læta portendi omnia, existimabant. Docent Cicero et Livius.

Ac de auspiciis imperatoris hæc dicta sint. De ratione rei gerendæ satis constat summam belli ad eum pertinuisse, atque de ea illum ita decrevisse, ut penes eum jus ipsum fuerit dimicandi, oppugnandi, obsidendi, insidias struendi, signum pugnæ ac receptui dandi, castra locandi, muniendi, movendi; præterea milites in æstiva atque hiberna deducendi, obsides hostibus dandi aut ab iis accipiendi, quæ omnia Cicero in arte imperatoria complexus est, de Orat. I, cap. 60.

Ea imperator aut per se, aut cum consilio administrabat.

nuntiata: in Sicilia militibus aliquot spicula, in Sardinia autem in muro circumnenti vigilas equiti scipionem, quem manu tenuerat arsisse ». Idem, XLIII, 13: « Fregellis in domo Atrei hasta quam filio militi omerat, inter-

diu plus duas horas arsisse, ita ut nihil ejus ambureret ignis, dicebatur ». Cui quidem interpretationi tum alia multa, tum hoc quoque favet, quod Cicero dicit auspicium ex acuminibus totum militare esse.

Nam ut in rebus capitalibus cognoscendis, sic in militaribus consilium adhibebat. Erat autem consilium castrensis quasi quidam senatus, ex senatoribus, si qui forte in castris aderant, et aliis hominibus idoneis constitutus. Sallust. Jug. cap. 62.

Quamquam diximus summum jus penes imperatores omnia pro suo arbitrio peragendi fuisse, fatendum est tamen nonnullis in rebus eorum imperii vim legibus compressam fuisse, ita ut neque exercitum contra quoscumque vellent hostes educere, neque apud quoscumque socios vellent, hibernare eis liceret. Ac de hostibus quidem extra provinciam non persequendis video, quum aliis legibus, tum Cornelia majestatis, et Julia repetundarum postremo esse sancitum.

Hinc est quod Cicero invehitur in Gabinium, quod exercitum eduxerat e Syria, sua provincia (in Pis. cap. 17). De sociis autem, legibus erat cautum, apud quos, milites in stativa deduci, ac non deduci, liceret. Hæc autem stativa duo fuerunt, æstiva et hiberna. Addo etiam imperatorem non potuisse exercitum pro arbitrio dimittere. Testis Cicero in Pison. cap. 16.

Hoc satis sit dictum de præside, et de toto ejus munere provinciali tuendo. Jam ad decora pergimus.

Genus eorum fuit duplex, pro duplici ratione earum rerum, ob quas veniebant. Præsides qui nulli rei alii, quam commodis et ornamentis sociorum in provinciali munere obeundo studuerant, honores summos ab ipsa provincia referebant, statuas, fana, dies festos; ut passim in Verrinis fuit videre. Qui autem imperium recte ac feliciter administraverat, huic, quod maximum decus fuit, absenti nomen imperatoris et supplicatio; præsentis triumphus, Romæ decernebatur. Vocabulum imperator duplici modo acceptum fuit; et pro quolibet exercitus duce, qui suis auspiciis rem gereret; et pro eo, qui hostibus magno prælio fuis, eo nomine, militum acclamatione esset ornatus. Ergo im-

peratoris nomen, quo sensu hic accepimus, fuit titulus honoris, appellatione militari delatus, quo præsens re bene gesta dux exercitus, militum acclamatione in castris, deinde sententia senatus in Urbe, est honestatus.

Supplicatio, fuit honos, qui una cum imperatoris nomine præsidi victori decernebatur: nempe quum senatus templum deum aperiri, ac diis gratias imperatoris nomine agi iubebat. Mos erat enim ut præsides, postquam a militibus appellati imperatores fuerant, fasces laureatos ad senatum de re bene gesta mitterent, quibus imperatoris nomen, ac supplicationes a senatu postularent.

Primis temporibus supplicatio in unum, alterumve diem ægre decernebatur. Anno 304, M. Valerio et M. Horatio coss. ob devictos Sabinos supplicatio in unum diem decreta est. Sed dierum numerus crevit postea. Camillo, Veiis captis, quatuor; Pompeio, Mithridatico bello confecto, duodecim; Cæsari, bello Gallico, primum quindecim, deinde viginti; Hirtio Pansæ et Octavio Cæsari, Mutina colonia liberata, quinquaginta dierum supplicationes decretæ sunt.

Quoniam jus universum in provincia præsidi aperuimus, et quomodo in eam venirent ostendimus; restat jam ut quemadmodum ex ea discesserint exsequamur.

Moris ergo fuit ut præsides annuo provincialis imperii munere terminato successorem, si mature venturus esset, in provincia expectaret; atque ei advenienti obviam prodiret, ac præsenti præsens provinciam atque exercitum traderet; deinde inter triginta dies (tot enim lex Cornelia L. Sullæ dedit) decederet: verum interea nullam provincialis administrationis partem attingeret. Quocirca Appius ægre ferebat quod quum Lentulus sibi, ipse Lentulo processisset in Cilicia obviam, Cicero sibi decedenti noluisset: quod Cicero ita purgavit, ut omnem ejus rei culpam in Appium ipsum rejecerit. Ad Div. III, epist. 7.

Quod si decessor ante successoris adventum decessisset, tum vero aliquem, qui provinciæ præesset, veluti quæsto-

rem aut legatum, cum imperio relinquere fuit coactus. Cicero ad Att. lib. VI, epist. 3, 4, 6. Qui vero sic provinciae præponebatur, sive quæstor, sive legatus, is aut proprætoris, aut proconsulis nomen obtinebat, prout aut prætoris aut consulis vices sustinebat.

Si præsides rem triumpho dignam gessissent, ac de eo postulando cogitarent, e provincia reversi, ad Urbem manebant, et lictores fascesque laureatos, donec triumphassent, retinebant; ac senatu in ædem Bellonæ evocato, res a se gestas exponebant; et triumphum petebant. Liv. XXXI, 47. Decreto inde a senatu triumpho, lex ferebatur ad plebem, ut quo die Urbem triumphans inisset, imperium haberet. Id. XXVI, 21. Urbem ingressus, pompa quam maxima in Capitolium ascendebat, ac sacrificiō facto convivium ibi celebrabat; atque ad vesperam, positus imperiū insignibus, domum privatus se referebat.

Alter erat triumphus ovatio dictus; major ille, hic minor; ille ob insignem victoriam, hic etiam ob levem, concessus; in illo, quadrigis; in hoc, pedibus, aut equo triumphabatur; in illo taurus, in hoc ovis in Capitolio immolabatur. Plura vide apud A. Gellium, lib. V, c. 6. Ubi, sive triumphantes, sive privati, Urbem introierant, tum alio die rationes referre ad ærarium cogeantur; nec multo post centuriones, ceterosque provincialis curæ socios ad ærarium in beneficiis, si liberet, deferre. Ante legem Juliam laxius rationum referendarum tempus fuit: nam ea lege cautum est ut rationes, quas in provincia apud duas civitates reliquissent, eas statim atque Urbem inissent ad ærarium totidem verbis referrent; atque triginta diebus quibus rationes retulissent, comites in beneficiis deferrent.

Quæris quid sit « in beneficiis ad ærarium referre ». Beneficium in re militari vocabatur provectio ad altiorum gradum: quod ut ratum esset, debebat, ut diximus, ad ærarium referri. Qui promoti fuerant, beneficii ejus dicebantur esse, a quo promoti fuerant. Suët. Tib. c. 12: « Venit in

suspicionem per quosdam beneficii sui centuriones *, id est, quos ipse ad centurionatum promoverat. Hi tales beneficiarii appellantur.

Porro comites magistratuum ex cohorte prætoria deferebantur, non ut beneficiarii milites crearentur, sed honoris et commendationis causa, ut is honos eis aliquando prodesset, aut in honoribus consequendis, aut periculis declinandis. Lips. ad Tac. Hist. IV, c. 48.

Ut præsidibus, qui bene se in provincia gessissent, magni ibidem et in Urbe honores sunt habiti; sic contra, si quid deliquissent, iudicium ex legibus subire jubebantur. Tribus autem quæstionibus potissimum fuerunt obnoxii; peculatus, si prædam, aut pecuniam publicam avertissent; quo iudicio etiam quæstores, legati, scribæ eorum obstricti fuerunt: majestatis, si aut exercitum, aut provinciam hosti prodidissent; aut ultro exercitum e provincia eduxissent; aut bellum sine senatusconsulto intulissent: repetundarum, si se in socios aut avare, aut superbe, aut libidinosæ, aut crudeliter, aut injuste gessissent.

Lex de repetundis maxime socialis fuit; ea provinciarum salus continebatur: ea postulati plurimi, damnati, florente republica, multi, pauci absoluti sunt.

Initio diximus quæstorem fuisse alium provinciæ magistratum, atque separatam fuisse ejus, et præsidis potestatem, apud quem non asseclæ, sed filii locum obtinuit. Nunc reliquum est ut quæ ad eum pertinent, paucis expediam. Quoniam quæstor sæpe sine suo prætore in provinciam profectus est, sæpe etiam non idem quæstorii muneris ineundi fuit dies, ac prætorii. Quod ubi evenit, simul illud etiam contigit ut duos quæstores præses unus eodem anno aut sane aliqua parte anni habuerit; ut Cicero Rufum et Cælium; et duos præsides quæstor unus, ut qui in Sicilia Verre, ac Metello prætoribus quæstor fuit.

Dixi provinciale munus quæstorum fuisse curam pecuniæ publicæ. Ea fuit duplex, attributa et vectigalis. Illa depro-

540 EXCURSUS DE PRÆTORE PROVINCIALI.

mebatur ex ærario in usus provinciales, id est, in stipendium militum, in viaticum, seu sumptum prætoris, legatorum, et totius cohortis prætoris, expendenda : hæc a provincia exacta ex vectigalibus et tributis colligebatur in ærarium referenda.

Ut autem quæstores non semper cum suis prætoribus in provinciam venerunt, sic non semper cum iis, verum sæpe aut ante, aut post eos, decesserunt. Diximus de relatis prætoris ad ærarium rationibus : illud autem tum prætorum, tum quæstorum commune fuit : quod ex uno Cicerone apertius est, quam ut probari indigeat.

DESJARD. EX RECENSIONE EDITORIS.

EXCURSUS

DE VECTIGALIBUS REIPUBLICÆ, ET DE EORUM EXACTORIBUS.

OMNIS pecunia quæ veniebat in ærarium populi romani, fere aut tributi nomine pendebatur, aut vectigalis.

Tributum, dictum a tribubus, erat pecunia populo imperata, quæ tributim a singulis pro portione census exigebatur. Varro de Ling. Lat. IV.

Stipendium militare primis reipublicæ temporibus ex tributo fuit: belli præda, et cetera pecunia ad ceteros usus reipublicæ reservabatur; qui mos, uti mox dicetur, usque ad Perseum Macedoniæ regem devictum, duravit.

Vectigal, erat ea pecunia, quæ alio quocumque nomine pendebatur. Discrimen inter has voces non semper apud auctores observatur; eas promiscue habuit Sueton. in Cal. cap. 40 et 41.

Tributorum tria genera Festus distinguit. Unum, capitis, sive personæ; alterum rei, sive soli; tertium, fortuitum et temerarium.

Ante Servium regem, tributum æqualiter in capita, nullo pauperum et divitum habito discrimine, conferebatur: propterea tenuiores onere tributi premebantur. Servius instituit primus ut pro suo quisque censu, i. e. pro rei familiaris copia, conferret. Dionys. Halicarnass. lib. IV. Livius, I, 43.

Anno ab exactis regibus sive secundo, sive tertio, tributo plebs exsoluta est; decretumque ut pauperes omnium vectigalium vacationem haberent, quæ regibus pependissent, neque in bellum quidquam conferrent; satis enim esse, si

ipsi pro republica militarent. Liv. II, 9. Dionys. Hal. V. Viduis etiam et pupillis tributorum collationem remissam fuisse testantur iidem scriptores, uti et Plutarchus in Poplic. Has autem vacationes tributorum stetisse dicimus duntaxat, dum res ærarii non essent impeditæ : urgente vero necessitate sublatas fuisse.

Hic rerum istarum status fuisse videtur usque ad annum Urbis 349, quo anno senatusconsulto provisum est, ut plebi, quæ eo usque suis sumptibus meruerat, stipendium quotannis de publico penderetur. Exin coacti sunt omnes cives tributum ex censu quotannis in stipendium militare conferre. Liv. IV, 59 et 60. Quod institutum, uti etiam comitia et delectus, postea non semel tribunitiis calumniis vexatum est.

Ut autem tributum sæpe a tribunis plebis impeditum, sic a senatu nonnumquam est remissum; quum nempe victis populis imperaretur in pœnam belli, quod satis esset pecuniæ ad stipendium militare. Sic anno Urbis 361, victis Faliscis in stipendium militum ejus anni, ut populus romanus tributo vacaret, pecunia imperata. Liv. V, 27. Et ut idem sæpe remissum, sic, propter bellorum magnitudinem, justo gravius aliquando imperatum est. Liv. XXIII, 31, et XXIV, 11.

Atque hoc sit de primis duobus tributorum generibus. Tertium fuisse diximus fortuitum et temerarium; nimirum quum, necessitate cogente, omnes temere atque extra ordinem propter periculi imminētis magnitudinem, quidquid auri, quidquid argenti haberent, sine discrimine in medium conferrent: uti, post Urbem a Gallis captam, a matronis collatum est. Liv. V, 50. Et bello Punico secundo, Valerio Lævino, M. Claudio Marcello coss. senatus et populus aurum, argentum, æs signatum omne in publicum contulerunt. Liv. XXVI, 36.

Hujus autem temerarii tributi ea fere fuit ratio, ut postquam subita illius tumultus vis desiisset, ex victi populi

spoliis locupletato ærario, pecuniæ suæ cuique redderentur. Liv. XXIX, 16.

Redeo ad tributum annuum, et supra dictis addo imperatum civibus fuisse degentibus non in Urbe solum, sed et in coloniis etiam [Liv. XXIX, 15]: atque imperari tandem aliquando desiisse post annum Urbis conditæ 586. Etenim quum ærarium annuis Italiæ, et provinciarum Siciliae, Sardiniae, Hispaniarum vectigalibus, ac quotidianis victoriis, et imperatorum manubiis, jam uberius esset factum; tum « omni Macedonum gaza, quæ fuit maxima, Perseo devicto, potitus L. Paullus, tantum in ærarium pecuniæ invexit, ut unius imperatoris præda finem attulerit tributorum ». Cic. de Offic. II, cap. 22. Saltem usque ad Hirtii et Pansæ consulatum, anno 710. Plut. in L. Paulo, passim. Verba illa Ciceronis prædæ magnitudinem significant quidem, sed modum non expriment. Illum ceteri scriptores, non tamen constanter, indicant. Variant in summa. Vell. Paterc. I, 9: « Intulerat L. Paullus in ærarium bis millies centies [placet Lipsio et J. F. Gronov. ducenties] sestertium » (circ. 41,000,000 fr.). Livius, XLV, 40: « Summam omnis captivi auri argentique translati sestertium millies ducenties fuisse » (circ. 24,600,000 fr.) ex Valerio Antiati tradit; nimis infra Velleianam summam. Propius ad eam Plin. Hard. XXXIII, 17: « Intulit Æmilius Paullus, Perseo victo, e Macedonica præda, sestertium bis millies trecenties; a quo tempore populus romanus tributum pendere desiit ». Quod autem Plutarchus, quem supra retulimus, addit « usque ad Hirtii et Pansæ consulatum », in hoc ei fidem abrogat Sigonius, et contra eum affirmat, Asconio et Orosio auctoribus, ærarium bellis civilibus exinanitum fuisse multo ante Hirtii et Pansæ consulatum; et L. Paulli pecuniam Persicam in ærarium illatam longe ante horum consulatum consumptam fuisse. Defendetur Plutarchus, si negaveris eum asserere voluisse prædam Persicam usque ad Hirtium et Pansam coss. superfuisse; et eam ejus men-

tem fuisse dixeris, ut significaret necessitatem non fuisse ante hos consules tributi populo imperandi: non quod pecunia illa sola sufficeret; sed quia supplerent identidem creberrima latissimi imperii vectigalia, frequentesque imperatorum manubiæ, quæ demum, propter nimium assidua civilia bella, aut labefactata fuerunt, aut cessaverunt. Itaque post horum consulatum multa tributi collati mentio renovatur. Cic. ad Div. lib. XIII, epist. 30. Philipp. II, cap. 21, et alibi sæpe.

Ἐπιμεράλαια, sive capitum exactiones, ut vocat Cicero ad Attic. V, 16, et ad Div. III, 8, atque ostiorum, repertæ fuerant in provinciis, a magistratibus romanis, non ut rempublicam his opibus tuerentur; sed ut ipsi suam libidinem et avaritiam provincialium fortunis explerent.

Ultro-tributorum meminit Livius non semel. Ultro-tributa esse puto, inquit Turneb. Advers. I, 25, impensas et attributiones operum publicorum faciendorum, et sartorum tectorum præstandorum, mancipibus et redemptoribus certa mercede locatorum: vel ultro-tributa sunt, quæ præter vectigalia penduntur; tributum extra-ordinarium: differunt a tributis. Idem, XXVII, 32. Turnebi interpretationem sequuntur J. Lipsius et J. Obsop. ad Senec. de Benef. IV, 1. Muretus ad eundem locum fatetur se non satis intelligere quæ sint ultro-tributa: neque sibi ullo modo satisfacere quæ de iis scripsit Turnebus; ubi supra. Si conjectura uti licet, libens crediderim compositum esse pro simplici; et ultro-tributa dicta fuisse eodem sensu, quo tributa; cui voci adverbium *ultro* additum est ad hoc tantum, ut populi auriculis indulgeretur, suæ libertatis studiosissimi; et ut significaretur pecunias tributi nomine a populo sponte, nulla vi cogente, in ærarium conferri. Multa sunt quæ favent huic nostræ opinioni. Sigon. de jur. civ. Rom. lib. II, cap. 4, sic scribit. Erant publicani equites romani fere, qui publica vectigalia populi romani et ultro-tributa, quæstus sui causa, conducebant. Liv. XXXIX, 44: «vectigalia sum-

mis pretiis, ultro-tributa infimis censores locaverunt »; hoc est, tributorum pretia imminuerunt censores, ut populo gratificarentur, a quo tributa exigebantur; vectigalium adauxerunt, ut ne quid de summa deperderet respublica. Idem, XLIII, 15, censores edixerunt, « Ne quis eorum, qui Q. Fulvio, A. Postumio censoribus publica vectigalia, aut ultro-tributa conduxissent, ad hastam suam accederet ». His locis satis probatum arbitror ultro-tributa, non esse tributa extraordinaria, seu pecuniam sponte ultra tributum datam; quia, quum ab eorum, qui eam conferrent, voluntate penderet, nullo pretio potuit redemptoribus a censore locari. Non sunt « impensæ operum publicorum faciendorum », quas translaticium est a quovis censore quam minimo locari; neque attinebat hoc observari potissimum in Catone, quod omnium censorum fuit. Ergo ultro-tributa pro ipsis tributis accipienda sunt, quæ censores infimis pretiis locaverunt; id est, quorum de summa, ut populo gratificarentur, multum detraxerunt. Quod si cui hæc nostra interpretatio non arriserit, consulat doctissimi Creverii in Livium notas, meliora forsitan ad vocis hujus interpretationem inde hausturus. Hoc satis sit dixisse de tributis: nunc, quod reliquum est, vectigalia persequamur.

Vectigal est a *veho*, *vehere*; et proprie significat quod ex vectura penditur; quod Latini portorium appellabant. Deinde translatum est nomen ad alios quosque redditus publicos significandos qui ex agris, sive elocatis, sive scripturariis, veniebant in ærarium. Cic. pro lege Manilia, cap. 5: « Ita neque ex portu, neque ex decumis, neque ex scriptura, vectigal conservari potest ». Denique vectigal omnes omnino redditus significavit, qui vel portorii nomine, vel decumarum, vel scripturæ, vel stipendii, vel salis, vel vicesimæ, vel quoquo alio modo exigebantur. Sic prætorium vectigal dicebatur, ea pecunia quæ, salva repetundarum lege, a prætoribus accipi poterat. Sic in eodem genere Sueton. in Aug. cap. 46: « Italiam duodetriginta coloniarum

numero... frequentavit, ac vectigalibus publicis plurifariam instruxit»; et Paradox. VI, 3: « non intelligunt homines quam magnum sit vectigal parsimonia ». Vectigalia, pro terris vectigalibus Sallust. usurpavit, Hist. I, cap. 14, et Cic. lib. II in Verr. cap. 3.

Jam vero singulæ species quas modo indicavimus, explicandæ. Ac primum de portorio.

Portorium definitur in glossis, τῶς ἐν λιμένι, vectigal in portu. Sicut portarium et pontarium vectigalia fuere, pendi solita, maxime ævo inferiore, in pontibus, aut in viis; et in portis oppidorum, pro mercium transgressu, ingressu, aut egressu.

Portorium vectigal institutum est, quum primum portus, qui mercibus recipiendis paterent, habere cœpit republica. Primum Romanis portum Ostiæ patefecit Romanorum rex Ancus Martius. Flor. I, 4. An simul vectigal mercibus imposuerit, incertum. Sane portoria sub regibus jam invaluisse colligitur ex eo, quod inter commoda quæ Valerius, exactis regibus, populo restituit, sublata ab eo etiam portoria fuisse memorantur. Vide plura apud Liv. II, 9. Plut. in Popl.

Crescente deinde romano imperio quum ad bella continua præsens ærarium non sufficeret, portoria vetera restituta fuerunt, quibus postea nova Gracchus addidit. Liv. XL, 51. Vell. Pat. II, 6. Mox autem propagatis imperii finibus, portoria quæ devictas apud gentes ab earum regibus jam antea exigi solebant, Romani victores, vel novis etiam additis sibi exercuerunt. Sic porteriorum extra Italiam late patienti in imperio ingens numerus factus est. In Italia nihilominus exigebantur, donec omnia sustulit Quintus Cæcilius Metellus prætor, lege lata anno Urbis conditæ 693. Dio, XXXVII. Causa autem tollendi fuit non ipsius portorii onus; neque ideo quia ærarium Cn. Pompeius, ingenti vi pecuniæ in id illata locupletasset; sed quia « portitorum injuriæ ulterius ferri non possent ». Lex Cæcilia gratissima

populo fuit: optimatibus et Ciceroni vehementer displicuit. Quippe jam omnibus subsidiis respublica nudata; agris divis; scriptura abolita; portoriis sublatis; solis provinciarum vectigalibus sustentabatur: nullumque ei supererat vectigal domesticum præter vicesimam. Cic. ad Attic. Epist. II, 15. Portoria peregrinarum mercium Cæsar deinde restituit. Sueton. in Jul. cap. 43.

Res omnes, tum venales, tum quæ magis ad luxuriam quam ad usum paratæ erant, portorio erant obnoxie. Publicani vero, ut ne fraudarentur a callidis negotiatoribus, mercium, quæ ferebantur, professionem exigebant. Quin et, si profitentibus diffiderent, licebat illis excutere merces, et aperire sarcinas. Pœna omissæ professionis erat, ut res improfessa caderet in commissum, seu fisco vindicaretur. Cic. Agrar. II, cap. 23. Non. Marcell. p. 53. Quintil. Decl. 341 et 359.

Res autem erant immunes, quas quis non negotiandi, sed utendi causa; quas legati exterarum, aut sociarum gentium Roma domum deferebant; non vero si ex patria sua Romam aliquid deportarent. Digest. lib. XXXIX, tit. 4. Immunitate etiam donabantur res exercitui paratæ, ut et instrumenta itineris. Quintil. Declamat. 359. Magistratibus, in provinciam euntibus, uti et ex ea decedentibus, licebat suppellectilem ad usum necessariam immunem secum ferre, instrumenta luxuriæ non licebat.

Si quando Romani cum devictis gentibus mitius agere vellent, aut portoriis eas liberabant, aut ea per illas gentes exerceri permittebant; ita ut pecuniam inde redactam civitates sibi haberent. Quæ facultas sociis et civitatibus concessa a senatu, postea a Sulla adempta est. Plura de h. l. dabunt Cic. de prov. coss. cap. 3. Liv. XXXVIII, 44. Appian. de Bell. Civ. I.

Superest ut portorii modus declaretur. Res obscura et difficilis, quum auctores qui de portoriis loquuntur, quantum hoc nomine exigetur reticeant; et quum solutionis condi-

tionem in omnibus provinciis æqualem non fuisse credibile sit; sed diversam eam fuisse pro ratione legum provinciarum; aut locationis censoriæ; aut rerum ipsarum quæ importarentur, aut exportarentur. In Siciliae portu vicesimam mercium exactam fuisse colligitur ex Cicerone, Verr. II, cap. 75.

Ex lege quæ recitatur apud Quintil. Declam. 359, omnes res quadragesimam publicano debebant. At ubi? at quarum civitatum in portu? lex non definit. Atque ea tempora significat Quintilianus, quæ pertinent ad imperatores; quum res publica jam fuisset a Cæsaribus oppressa: porro lex est ejusmodi: «Præter instrumenta itineris, omnes res quadragesimam publicano debeant. Publicano scrutari liceat. Quod quis professus non fuerit, perdat. Matronam ne liceat attingere», i. e. scrutari. Vides ex hac lege nihil certi elici posse, nisi hoc unum, quod supra diximus, permissam publicano scrutationem fuisse non sarcinarum modo, sed et personarum ipsarum; præter matronas, quas attingere non licebat.

Decima, portorii nomine, Chrysopoli Chalcedoniæ solvebatur ab iis, qui ex Ponto Euxino remeabant. Docet Xenoph. Hist. Gr. lib. I, c. 30. Centesima in Piræeo, Athenarum portu, exigebatur. Idem de republica Athen. pro qua vigesima exacta est tempore Peloponnesiaci belli, quum exhausta sumptibus esset respublica. Quinquagesimam in Piræeo exigi solitam fuisse contra Xenophontem contendit M. Cursius, Lection. Att. V, 28. Aliud vectigalis genus memorat Harpocratio. *ἑπώνια*, inquit, est vectigal quod ne quapiam empta penditur; ac fortasse fuit pars quinta.

Sed græca sunt hæc instituta; quæ ideo huc adduxi, ut ostenderem vectigalis istius modum ex temporum conditione, aut mercium magis vel minus pretiosarum ratione, tum apud Græcos, tum apud Romanos, fuisse definitum.

An portitoribus traditus olim fuerit index ille, gall. *un tarif*, quali nunc istorum nepotes utuntur, quo definitum

esset pretium pro quaque merce solvendum, non est quod affirmem. Contra vero existimo portitorum fuisse mercis cujusque æstimationem. Itaque sarcinas quasque diligenter excutiebant; omnia curiose observabant; sciscitabantur; mercium in pretia, vim, naturam, regionem unde adveherentur, inquirebant; et ex earum a se facta æstimatione, pro ratione pretii vectigal exigebant. Testatur Plautus in *Menæch. act. I, sc. 2*, ubi *Menæchmius* de muliere curiosa in primis, quæ virum domo egredientem, et redeuntem sedulo observabat, ait, «Rogitas quo ego eam, quam rem agam, quid negotii geram, quid petam, quid feram, quid foris egerim; portitorem domum duxi, ita omnem mihi rem necesse loqui est, quidquid egi, atque ago». Testatur *Quintil. Declam. 340*, his verbis: «Videtur *Mangoni* puer pretiosus; timuit ne magno æstimaretur». Vide et *Plutarch. de Curiosit.* Hinc *Nonius Marcellus* portitores definit, «telonarios, qui portum obsidentes omnia sciscitantur, ut ex eo vectigal accipiant». Varias fraudes adhibitæ fuisse, quibus circumscribere vectigalia solerent negotiatores, si dixerō, non erit quod mirere; neque si ostendero æstimationes illas quæ a portitoribus inducerentur, sæpe ab æquitate abiisse. Hinc continuæ de portitorum injuriis querelæ apud auctores occurrunt; quæ injuriæ tollendis tandem portoriis causam attulere. *Cic. ad Q. Fr. Epist. I, 1*. Hactenus de portorio: jam ad decumas, alterum vectigalis genus, ex agris eloçatis exigi solitum, veniamus.

Alterum vectigalium genus fuisse diximus illud, quod agris imponebatur. Ager fiebat vectigalis jure victoriæ. Romani populos bello devictos aut immunes esse, ac suis legibus vivere volebant; aut suis eos agris exuebant, quos in publicum reip. patrimonium redigebant. Hinc toties apud *Ciceronem*, et alios, agri dicuntur publicati fuisse.

Agrorum vectigalium triplex genus fuit pro modo et varia deditionis forma: 1° aut enim agri ex hostibus capti, totj publici, et reip. velut patrimonium fiebant. Talis ager *Cam-*

panus fuit. Hi erant certissimum reipublicæ subsidium, quippe qui duris temporibus ad sublevandas ærarii angustias venderentur; 2º aut devictis gentibus adepti, militibus, vel inopi plebi dividebantur, unde coloniæ ortæ; 3º aut denique gentibus in deditionem acceptis colendi relinquebantur. Liv. XXVI, 16; XXVIII, 46; XXXI, 13. Cicero, Agrar. II.

Ex agrorum illorum omnium, pauculis exceptis qui immunitate donabantur, fructibus vectigal reipublicæ pendebatur.

Agrorum, qui patrimonium reipublicæ facti fuerant, omnis redditus ad ærarium pertinebat. Id erat luculentissimum reipublicæ subsidium. Agrar. II, c. 20.

Agrorum, qui coloniis erant assignati, fructus quidem ad colonos pertinebant; vectigal tamen aliquod, quasi mercedis nomine, publice pendebant. Non æquale illud fuit in omnes colonias; sed pro jure et legibus quibus deductio earum facta erat, vel pro terræ aut ubertate, aut sterilitate, alii agri quintas pendebant, alii septimas, teste Hygino, cui fere consentit Appianus, quum ait decimam partem ex satis solvi solitam; quintam ex arbustis, hoc est, ex pomo, vino, nuce, ficu, et reliquis arborum fructibus. Hygin. de Limit. constit. I, p. 198; Appian. Bell. Civ. I.

At pinguissimum fuit illud vectigal quod capiebatur ex agris, qui gentibus in deditionem acceptis colendi relinquebantur. Arationes istæ soli populo romano erant fructuosæ; quippe ex agrorum vel feracissimorum fructibus vix supererat aratoribus unde familiam suam alerent: tantum fructuum populus romanus auferebat. Testis est una Sicilia, quæ, prima fere romanam in provinciam redacta, triplex frumenti genus, nempe æstimatum, emptum et decumanum ad perpetuum tum prætoris in provincia, tum plebis urbanæ annonam pendere cogebatur. Ordinarium fuisse vectigal decumas infinitis ex locis patet. Has Sicilia jam ab antiquis temporibus regibus suis pendebat; et postquam Romanorum provincia

facta est, omnem agrum retinuit, eo jure, ut easdem Romanis deinceps persolveret. Neque illas solum tritici, sed et hordei, et minutarum frugum omnium, vini denique, olei, mellis, etc.

Alterum præterea fuit quasi vectigal; emptum dico frumentum et æstimatum, hoc in prætoris provinciæ, illud in populi annonam Sicilia quotannis præstare cogeatur. Empti frumenti genus duplex fuit: unum, alterarum decumarum; alterum, quod præterea civitatibus æqualiter esset distributum. Illius decumani tantum, quantum ex primis decumis fuisset: hujus imperati tritici modium octingenta millia. Cic. in Verr. lib. III, c. 69.

Locatio decumarum in singula jugera fiebat. Ex singulis jugeris quæ arabantur, fructuum pars decima, decumarum nomine, detrahebatur. Hinc jugera profiteri debebant aratores. Hæc fuit, stante republica, vectigalis frumenti ratio. Nam frumentum illud quod Cicero in Pison. cap. 35, honorarium vocat, non pendebatur reipublicæ; sed dabatur prætoribus a publicanis, honoris causa, et ut illos sibi faventes in litibus suis cum provincialibus haberent. Sed honorarium vinum appellatur, quod potentibus viris, honoris gratia, offertur. Cato de innocentia sua: «Quum essem, inquit, in provincia legatus quamplures ad prætores et consules vinum honorarium dabant; numquam accepi, nec privatus quidem». Vide Muret. Var. Lect. XII, 5. Alterum ex agris pendebatur vectigal scriptura. Ex pascuis publicis exigebatur: montes enim et agri culturæ inhabiles, silvis et salictis impediti, pascendis gregibus elocabantur; et saltus, communi nomine, vel pascua publica appellabantur. «Saltus est, ubi silvæ et pastiones sunt», inquit Festus. Saltum possidere fere proverbii speciem obtinuit de divite patrefamilias.

Pascua ejusmodi plurima per totam Italiam et provincias possidebant Romani: præcipua Italiæ erant in Apulia, et vicinis Apuliæ locis. Hinc propter magnitudinem pastorum

conjuraciones in ea provincia factæ sæpe memorantur. Celebrantur etiam Scantia silva in Campania; salicta ad Minturnas, et mons Gaurus.

Pascuorum publicorum, quæ erant in Sicilia, meminit Cicero passim in Verrinis; et Asianorum, in orat. pro lege Manilia, cap. 6. In Africa etiam publica pascua fuisse testatur Plinii locus, XIX, 3. Denique nulla fere erat provincia quæ fructuosa reipublicæ pascua non haberet.

Illa privatim homines redimebant a censoribus, ut pecuariam facerent, et in ea numerosos pecorum greges, quæstus sui causa, immitterent. Varro de Re Rust. lib. II, præf. de se testatur se pecuarias habuisse grandes; in Apulia, oviarias; in Reatino, equarias. Communem saltum possidebant in Gallia Nævius et Quintius, teste Cicerone pro Quintio. Terentia Ciceronis uxor, et Atticus ipse, publica pascua in agro Mulvio possidebant. Ad Att. Epist. II, 15.

Ex his igitur pascuis, saltibus, silvis publicis, magnum ærario romano vectigal accedebat; quod diu solum fuit. Plin. XVIII, 3. Atque initio non ita certum, propter privatorum licentiam greges suos in publica pascua impune immitterent; donec tandem Publicii frâtres, ædiles plebis anno Urbis conditæ 513, quum ærario consultum vellent, lege lata multam primi irrogarunt iis, quorum pecudes agrum publicum depascerent. Ovid. Fast. V, 279 et seqq. Intentiore cura deinceps publica pascua servata sunt; et multæ sæpe in pecuarios, ob violatam legem Publiciam irrogatæ sunt. Liv. X, 47; XXXIII, 42.

Ab ædilibus hæc pascuorum cura deinceps translata est ad censores, a quibus illa publicani redempta elocabant privatis certo ære, vectigalis nomine, dissolvendo.

Hoc vectigal dicebatur scriptura; quia pastores oportebat ut numerum pecudum quas in pascua publica immittere vellent, ad publicanum profiterentur: quem numerum deinde publicanus in tabulis suis describebat; ex qua scriptura vectigalis ratio, inter pastorem et publicanum, con-

ficiebatur. Inde etiam ager, sive pascuum ipsum, dicebatur ager scriptuarius. Festus.

Qui vero pecudes, quas non erat professus, aut plures quam publicano scribendas dederat, pavisset, in legem censoriam incidebat. Varro de Re Rust. lib. II, cap. 1. Omissæ professionis pœna videtur fuisse, ut non scriptæ pecudes caderent in commissum : et ut publicanus, pro vectigali fraudato, eas sibi vindicaret. Rixarum pastores inter et publicanos subortarum frequens occurrit mentio apud Livium. Nec etiam continua illis erat cum aratoribus qui agros publicos conduxerant, concordia, ut patet ex Inscript. apud Grut. pag. 150, n° 6, 7. Erant enim pastores silvestre genus hominum, et ab humanitate alienum : unde et vias publicas latrociniiis eos infestasse narrat Livius, XXXIX, 29, et sæpe motus concitasse.

Hæc erat, libera et stante republica, ratio triplicis hujus vectigalis, portorii, decumarum, et scripturæ; quod multis modis primo imminutum, deinde omnino sublatum est.

De portoriis jam diximus. Eamdem sortem habuere et agri publici, et pascua publica; quod factum est incredibili locupletum avaritia, qua pulsi sunt aratores ex antiquis possessionibus, quas divites aliis temporibus alias ementes continuarunt, et populum romanum vectigalibus annuis, et pauperes propriis alimentis spoliaverunt. Itaque lex fuit necessaria, quam tulit C. Licinius Stolo tribunus plebis, anno Urbis 377 : « Ne quis plus quingenta jugera agri, centum pecoris majoris capita, quingenta minoris possideret ». Liv. VI, 35. Qua sua lege ipse vigesimo anno post, quod mille jugerum agri cum filio possideret, damnatus est. Idem, VII, 16. Quum nihilominus Licinia lex negligetur, eam Tib. Sempronius Gracchus tribunus plebis anno Urbis 620, nova lege sibi muniendam duxit. Neque minus tamen avaritia dominata est. Agri, quod Sempronia lex vetuerat, ut antea vendi cœperunt, atque ita in divitum a pauperibus ementium potestatem redigi. Cui incommodo

subvenire cupiens Sp. Thorius tribunus plebis anno Urbis 646, tulit, «Ne ex lege Sempronia dividerentur amplius agri publici, sed possessores in iis relictis vectigalia pro iis penderent; eaque pecunia plebi divideretur».

Thoriam legem vitiosam et inutilem appellat Cicero in Bruto, quod fraudaret ærarium publicum, et plebi viritum pecuniam vectigalem divideret. Non tamen hoc loco res stetit, sed ulterius progressa libido est: nam tribunus plebis alius vectigal illud totum lege sua sustulit; et agros vectigales omnes immunes fecit; cavitque, «Ne populo, neve publicano pecunia, scriptura, vectigalve daretur, darive deberet». Sic respublica omni fructu Italiæ spoliata, atque nudata est: unde merito dixit Cicero, «portoriis Italiæ sublati, agro Campano diviso, vectigal nullum superesse domesticum præter vicesimam».

Ea fuit rerum istarum ratio in Italia. In provinciis vero attentata interdum a seditione, aut populari studio devotis civibus, et decerpta de publico patrimonio etiam fuisse vectigalia docent historiæ. Sic P. Clodius, furiosus ille tribunus plebis, Byzantios lege sua liberavit, hoc est, immunitate donavit. Interea divites in provinciis latifundia sibi comparaverunt, quibus agrorum scripturariorum facta est imminutio. Crevit civium, et civitate rom. donatorum numerus, atque eo crescente deminutum est portorium vectigal, cujus immunes romani cives, et socii nominis latini erant; ut colligitur ex Livio, XXXVIII, 44.

Stipendium, vectigalis genus etiam fuit, quod pendebant provinciæ illæ, quæ ob id stipendiariæ appellabantur. Harum pessima erat conditio. Tributum enim duplex conferebant. Tales Poeni, Hispani, Galli, et plures, qui per vim ultimam, et bello pertinace victi essent. Quorum corpora, sive capita, ut Latini loquuntur, et agri ipsi onusti erant. Hoc autem non, nisi in vere victos, et vi subditos, usurpatum.

Præter illa vectigalia, de quibus hactenus egimus, aliud

fuit reipublicæ vectigal uberrimum ex metallis. Metallorum nomine continentur aurum, argentum, æs, ferrum, plumbum, etc. saxa, lapides; cretifodinæ; cotoriæ; salinæ, etc. Vid. Goth. ad cod. lib. XI, tit. 6.

Primis temporibus in Italia metalla, et ex iis vectigalia, ærarium locupletaverunt. « Metallorum omnium fertilitate, inquit Plin. III, 20, Italia nullis cedit terris ». At propagato deinde extra Italiam imperio, quum ubertim provinciæ deinde illa suppeditarent, cautum est « vetere interdicto patrum Italiæ parci jubentium », ne metalla in Italia exercerentur. Itaque hoc lucro solæ deinceps auxerunt rem romanam provinciæ, quæ metalla visceribus suis continebant; præcipue Hispania, Macedonia, Illyricum, Africa, Sardinia.

In Hispania primus hoc vectigal instituit Cato. Liv. XXXIV, 21. Amplissimum fuisse colligitur ex Strabone, lib. III. Plumbi etiam metalla, minium, ferrum, ex Hispania amplum vectigal dederunt. Plin. XXXIII, 7.

Macedonia, jam antequam Romanorum provincia esset facta, regibus suis vectigalia ex metallis solvebat, quæ præcipuæ opes ejus regni erant.

Romani victores vectigal metalla exercentibus dimidium ejus imposuerunt quod pependissent regi. Liv. XLV, 29. Eodem modo, quo Macedonia habita fuit, cum Illyrico actum est. Ibid. c. 18. Africa, Thracia, denique omnes provinciæ, ex quibus aut metalla effodiebantur aut lapides, hoc nomine vectigal Romanis pependerunt.

Porro metalla fuerunt aut publici juris, aut privati. Publici juris, stante republica, pauca fuerunt, nec diuturna: nam sublatis Italiæ metallis, respublica subjectis gentibus videtur exercitium metallorum, vectigali tantum imposito, reliquisse. At eversa republica imperatores metalla sibi vindicarunt.

Proximum metallorum vectigal est illud quod ex salinis redigitur. Salinas primus instituit Ancus Martius: fuere

circa Ostiam. Liv. I, 33. Primum sali vectigal impositum est a censoribus Marco Livio et C. Claudio, anno Urbis conditæ 549. Idem, XXIX, 37. Unde et Livio, cujus id commentum esse credebatur, Salinatori inditum cognomen est. Quantum hoc vectigal stante republica fuerit, incertum. Sub imperatoribus eandem huius vectigalis summam, quæ metallorum erat, nimirum decimam fuisse vult Pancirolus, Var. Lect. III, 31.

Vendere sal licuit olim privatis; sed ejectis regibus, quia nimis impenso pretio veniret, arbitrium hoc illis ademptum, et in publicum translatum est. Liv. II, 9. Quodcumque magistratibus aut legatis per provincias euntibus de publico subministrabatur in sumptus itineris, a sale salarium dictum est. Hinc in glossis salarium vertitur *παροχή*, et salarii, i. e. præbitores, ab Horatio parochi appellantur. Sat. I, 5, 45. Hæc sint de metallorum vectigali.

Præter autem diversa vectigalium genera quæ hactenus descripsimus, vectigal aliud fuit, domesticum, quo vigesima pars de pretio servi manumittendi ærario solvebatur, et dicebatur vectigal manumissionum. Ejus origo refertur ad Cn. Manlium consulem, qui de eo legem tulit, anno Urbis 396. Liv. VII, 16. Ab hoc tempore constanter exactum est usque ad ultima reipublicæ tempora; et sublati portorii, et reliquis Italiæ vectigalibus, unum hoc superfuit. Cic. ad Att. II, epist. 16. Quæritur uter vigesimam solverit, dominusne qui manumittebat, an servus qui manumittebatur. Ex Arriano Diss. in Epict. II, 1, potest colligi vectigal istud a domino solvi solitum fuisse; et ita censuisse videtur Gronovius, de Pec. vet. III, 13. Sed verisimilius est id a servo ipso fuisse persolutum. Docet aperte idem Arrianus, III, 26, et Petronius, cap. 58 et 71. Dominos tamen servis aliquando libertatem gratuitam et immunem præstitisse benivolentiæ gratia, non negaverim.

Vectigal manumissionum, qui auro solvi solebat, dicebatur aurum vicesimarium: in sanctiori Saturni ærario ad

summos reipublicæ casus servabatur. Liv. XXVII, 10. Et quoniam, ut Rævard. observat de Auctor. prudent. cap. 7, duplex erat manumissio, altera justa, quæ vindicta, testamento, censu; altera latina, quæ vel inter amicos, vel convivii adhibitione, vel per epistolam fiebat, a vigesimæ vectigali immunes erant servi, qui justam, seu perfectam, i. e. jus romanæ civitatis non consequiebantur. Quid enim solverent ii, qui quotidie a dominis in servitutem revocari poterant? Non etiam exigebatur istud ab iis servis qui a peregrino manumittebantur.

Huic vectigali colligendo præficiabantur publicani vicessimarii, qui ex servi manumissi æstimatione partem suam sibi auferebant. Illam æstimationem definire non ita promptum est. Variasse, pro servi manumissi pretio, non est quod dubitetur.

Hactenus maxima populi romani vectigalia quam potuimus breviter et accurate recensuimus. Supersunt minuta quædam verbo declaranda.

Primum occurrit illud, quod pro aqua pendebatur.

Aquæductus publici Romæ constituti sunt an. U. C. 441. Eo anno, quo Appius Claudius censor viam ab Urbe Capuam usque munivit, ab eo dictam Appiam; idem aquam ab eodem dictam Claudiam primus induxit, quum antea Romani aquis Tiberinis tantum, aut fontibus puteisque contenti fuissent. Vetitum autem primo fuit privatis aquæ publicæ partem aliquam decerpere. Front. de aquæduct. II, p. 247.

At sensim jus aquæ publicæ vel ruri in agros privatos deducendæ, vel Romæ in domos privatas derivandæ, dato certo vectigali, permissum est a censoribus, aut, quum censores in republica non essent, ab ædilibus. Hoc appellabatur vectigal ex aquæductibus; sive hortorum, eo quod iis irrigandis aqua deduceretur; sive formæ, sic enim appellabantur canales, per quos aqua ex publico in privatorum agros derivabatur. Meminit hujus vectigalis Polyb. lib. VI.

Proximum huic vectigali est illud, quod pro cloacis solve-

batur, cloacarium vulgo dictum. Cloacæ a Tarquinio Prisco institutæ fuerunt; admirandum sane opus, et in quibus prædicandis auctores mirifice sibi indulgent. Vid. Lips. de Magnit. Roman. III, 12.

Erant præterea, solarium, quod pro solo pendebatur, in quo ædificia excitabantur. Non aliter Dido Carthaginem condidit, statuto annuo vectigali pro solo Urbis; quod vectigalis illius antiquitatem declarat. Justin. XVIII, 5. Columnarium, et ostiarium, erat vectigal, quod pro columnis, et ostiis ædium privatarum exigebatur. Ejus origo refertur ad legem Juliam sumptuariam, qua, quum omnium impensarum modus et numerus esset definitus, etiam insanum columnarum, et ostiorum studium inhibitus est, imposito vectigali, si quis plures, quam lex permetteret, haberet. Vide Bosium ad Ep. 6 ad Att. lib. XIII. Non diuturnum hoc vectigal fuit. Libitinarium fuisse videtur etiam vectigalis genus quod pendebatur libitinariis, qui jus apparandorum funerum a populo redemerant. Vid. Kirchm. de funerib. I, 9.

Tertullianus, Apolog. 13, et l. I, ad Nat. 10, memorat olitorium, quod redemptoribus pendebatur pro iis rebus quæ in foro olitorio venales proponerentur; Serapeum, Capitolium, quod pendebatur pro solo templi, pro aditu sacri; pro stipitibus; pro ostiis: verum an hæc omnia instituta fuerint stante republica, affirmare non ausim.

Hoc satis erit dixisse de vectigalium numero, et magnitudine. Jam vero operæ pretium fuerit declarare quam pecuniæ annuæ summam hæc universa in unum collecta conficerent; ac proinde quantus pecuniæ modus florente republica, «Orbem quum totum victor Romanus habebat», rediret quotannis in ærarium publicum. At ne tentemus ea quæ, si non vires hominis, at sane meas excedunt. Immensam illam fuisse pecuniam quantum conjectura assequi possumus, affirmare non dubitabit, qui ad illa mihi pro se animum intendet, quotuplex vectigalium genus fuerit;

quantum pecuniæ ex uno quoque conficeretur; quot provinciæ, quam latæ, quam vario fructuum genere abundantes; quot nationes, quam opulentæ romano imperio parerent, a quibus singulis vectigal raro leve, sæpe gravisimum, exigebatur.

Sola Asia, Minorem intellige, imo Ioniam, et hanc Asiæ Minoris partem quæ ad mare est, quo tempore Cæsar est interfectus, pro vectigalibus pendebat annua viginti talentorum millia (circit. 110,000,000 fr.). Id colligitur ex Plutarch. in Anton. et Appian. de Bell. Civ. V. Hic ait Antonium, postquam Philippis debellatum est, ab Asianis exegisse ut decem annorum vectigalia intra anni spatium repræsentarent; ille autem refert collata ab his ducenta millia talentum fuisse; quæ si in decem annos dividantur, exsurgent vicena millia annua talentum, quæ vectigalis nomine quotannis Asia tum pensitabat.

De Pompeii triumpho post devictas ab eo Asiam, Syriam, Phœnicen, Judæam, Ciliciam, etc. narrat Plutarchus in Pomp. atque in eo prælatum fuisse ait titulum, qui literis indicaret universa populi romani vectigalia (subaud. ex his locis) ante id bellum bis millies fuisse (circit. 41,000,000 f.); ex iis vero quæ bello ipse acquisisset, redire ad ter millies quadringenties (circit. 62,320,000 fr.).

Quod si quem id commoveat, quod summa hæc vectigalium ante victoriam Pompeianam exigendorum longe minor illa fuerit quam modo ex Plut. et Appiano retulimus, is noverit Asianos initio, post Attali testamentum, quo Romanis relictæ fuerant, indulgentius etiam acceptos fuisse; donec exortæ turbæ fecerunt ut majores illis pecuniæ imperarentur. Appian.

Decumas unius Siciliæ, atque eas tenuiter æstimatas, Cicerone fuisse dicit nonagies sestertium (circ. 1,845,000 fr.), at solas tritici decumas significat. Quid si his addas hordei, et leguminum? Quid si vini, olei, mellis, etc. quorum proventus in Sicilia fuit uberrimus, an ex his decumis minus,

quam ex illis exactum fuisse quis affirmare audeat? Quid pastiones jam dicam? quam numerosæ, quam fructuosæ fuerint populo romano? Sicilia omnis est montosa. Ex vallibus arabantur fruges uberrimæ. Colles, vepreta, silvæ, denique seges omnis quæcumque vitibus non erat accommoda, aut frugibus, pascebatur pecoribus. Huc armenta et greges immittebantur, pro quorum singulis capitibus reipublicæ pendebatur vectigal. Hoc quantum fuerit, et quam fructuosum facile tibi animo finges, si attenderis quod supra diximus, saltus illos vulgo elocari solitos fuisse Romanis opulentis, qui magnas pecuarias in Sicilia faciebant. Hæc omnia, decumas et pastiones dico, ad quatuor, vel quinque milliones gallicæ pecuniæ non inepte videor posse producere. Hæc magna sunt, quis neget? Sed si cum portoriis, quam parva præ illis videbuntur! urbs maritima quæque, multæ autem erant in insula Sicilia, suum fere habuit portum; et in eo portitores, qui pro rebus aut importandis, aut exportandis vectigal exigerent. Ex omnibus orbis partibus naves huc per omnia maria ad omnes Siciliæ portus, quia tutissimi erant, appellebantur ex Hispania, ex Asia, et Syria, Tyro, Alexandria. Hic statio navibus et mercibus erat quasi constituta.

Celeberrimus omnis erat Siciliæ portus, sed maxime Syracusanus, « omnium quietissimus quos aut natura posuit in tutelam classium, aut adjuvit manus; sic tutum, ut ne maximarum quidem tempestatum furori locus esset », Sen. Consol. ad Marc. c. 17.

In eo portu, teste Cicerone, lib. II in Verr. c. 75, partem vicesimam pretii earum rerum quæ importabantur, publicani, portorii et vectigalis nomine, exigebant. Res illæ erant purpura Tyria; thus, atque odores; vestesque lintæ; gemmæ et margaritæ; vina græca; venales Asiatici. Lib. V, cap. 56.

Ex tot et tam pretiosis mercibus facile intelligitur, quam uberrimum effecisse vectigal harum pretii vicesimam par-

tem; quantum reliqui Siciliæ portus; quantum Syracusanus ipse in omni cujusvis mercium generis advectione et evectione toto anno efficere debuerit pecuniarum. Qui has vel ad viginti, vel etiam ad triginta gallicæ pecuniæ miliones produxerit, an ille audacior in illa re augenda erit jam existimandus? Conjectura ducti sat bona, et pressis Ciceronis ex vestigiis subodoramur quam magnus census reipublicæ fuerit ex Sicilia. At quanto fiet major, si vectigalibus illis adjunxeris minutiora quædam: si tributi genus addideris non leve, quod stipendiariæ non paucæ civitates in Sicilia pendebant. At Sicilia quanta pars fuit orbis romani? profecto ne centesima quidem.

Jam vero quot erant portus, in quibus non vigesima, ut Syracusis, sed octava etiam exigebatur. Hæc enim pro locis et mercibus variasse opinandum est; maxime tamen pro mercibus, ut gravius vectigal solverent peregrinæ, ad delicias magis aut pompam, quam ad usum necessarium invectæ; qualia sunt marmora, ebur, gemmæ, mancipia, unguenta, et cetera infinita ejusmodi, quibus luxus indigebat: quibus si octavam imponis vectigal, quantum id futurum sit? Neque tamen his omnibus, quæ significata sunt, vectigalia definiebantur. Erant præterea minutiora alia, ut modo dicebamus, quæ pecuniis non spernendis et ipsa locupletabant ærarium; uti sunt vigesimæ manumissionum; centesimæ rerum venalium, et auctionum, de quibus Cic. epist. 18 ad Brutum; et cetera id genus sane multa.

Stipendium, tributi genus erat, quod, quasi victoriæ præmium et pœna belli, victis provincialibus imperabatur, qui ob eam rem stipendiarii dicebantur. Tales fuere Hispani, Galli, plerique Pœnorum, Syri, Cilices, Judæi, etc. An vero hi stante republica, non affirmo.

Illud autem singulis vulgo imponebatur pro censu, in caput unius cujusque, habita tamen ætatis ratione. Nam in Syriis a quatuordecim annis masculi, a duodecim feminæ, usque ad sexagesimum quintum tributo capitis obligaban-

tur. Ulpian. Digest. lib. L, tit. 15, l. 3. Solvebatur pro agris et opibus. Deinde æstimatione eorum omnium facta, etiam centesima annua pro ipso capite dabatur. Is enim erat fere modus istius tributi. Pro liberis ipsi parentes exsolvebant. Servorum æstimatio censibus accedebat. Ista capitatio, fas sit uti verbo peregrino, alterum vectigal fuit grave populis, quibus, præter ordinarium, accedebat [unde stipendiario- rum conditio durissima semper habita est]: reipublicæ vero fructuosissimum; etsi solis centesimis primo persolvi videretur. Sæpius enim eveniebat ut duæ, ternæ centesimæ exactæ fuerint ab iis nimirum, qui sæpe victi, quia sæpe rebellarent; quanto magis inde crescere debuit vectigal? Certe de Judæis scribit Appianus in Syr. ob eam rem graviora Judæis tributa, quam quæ pro censu conferrentur, in singulorum caput imposita fuisse.

Ergo, ut hoc argumentum concludam, facile dixeris orbis universi divitiarum partem maximam in ærarium romanum confluisse, et quidquid annis singulis populi, aut sererent, aut meterent, id omne reip. fuisse.

De jure instituendi, et locandi vectigalia pauca hæc addimus.

Jus instituendi vectigalia penes reges initio fuit, quippe quorum manu omnia gubernabantur. His ejectis omnis eorum potestas ad senatum, populumque romanum pervenit. Digest. l. I, tit. 2. Hic ergo quæritur penes quos, libera republica, fuerit potestas vectigalia instituendi; an ea penes senatum fuerit inconsulto populo, an senatus-consulto jussus populi accedere debuerit. Ita censet Manutius. Vectigal, inquit de senatu Rom. pag. 85, victis bello gentibus non sine populo senatus imponebat. Sed Manutium probe refellit P. Burmannus de Vectig. c. 7, et locupletibus adductis auctoribus probat populi partes eas tantum fuisse, ut bellum aut foedus juberet, aut vetaret; sed provinciarum et ærarii curam ad senatum unum pertinuisse. Instant adversarii, et ex multis Livii locis, nempe lib. IV, c. 8; lib. XXIX,

c. 37; lib. XL, c. 51, probare conantur jus illud instituendorum vectigalium senatui cum censoribus communicatum fuisse. Fatetur idem Burmannus et censores et alios magistratus inventores quidem, suasores, et tutores vectigalium fuisse; at negat illos ea aliter quam ex senatusconsulto instituisse: et testem ejus rei producit Ciceronem, qui obiectum Fonteio portorii vinarii in Gallia ab eo instituti crimen magnum vocat (pro Font. c. 5), et falso obiectum fuisse contendit. Quod argumento est, nulli magistratui licuisse, inconsulto senatu, vectigalia instituere. Quin et civitates et municipia, quibus mittebantur agri, pascua, et metalla, ex quorum vectigali onera sua sustinerent, jus ipsum vectigalis novi alicujus instituendi non habuerunt; sed illud a senatu obtinere debuerunt.

Vectigalium locatio, seu, ut sæpe Cicero loquitur, venditio, censoribus a senatu permissa erat: debebat fieri Romæ. Censores vectigalia locaturi tabulas publice proponebant, in quibus leges et conditiones locationis descriptæ erant. Hinc mentio tabularum et legum censoriarum frequens apud Ciceronem in Verrinis, et alios.

His multæ continebantur in eos definitæ, qui fraudassent vectigal; et remittebantur pretia redemptionis iis, qui frui publico per hostem non possent. Locatio autem [Macrob. Sat. I, cap. 12] quinto quoque anno, mense martio, qui primus anni habebatur, fiebat in foro, hasta posita, quæstore præsentē, qui pretia quibus locationes factæ fuerant, in codicem dictum hastarium, referebat. Vid. Tertull. Apolog. c. 13, et ibi Rigalt. Excipienda tamen est Sicilia, cujus vectigalia non a censoribus, sed ab ipsis magistratibus qui eam provinciam obtinebant; non Romæ in foro, sed in ipsa insula; non nova lege et conditione, sed veteri et Hieronica, vendi debuerant. Cic. in Verr. lib. III, c. 6.

Omnis censorum potestas circa locationes finiebatur: pecuniam ex vectigalibus redactam ipsi non recipiebant, sed quæstorum ea cura fuit. Consulū etiam partes aliquæ fuisse

videntur, in examinandis nimirum publicanorum rationibus. Vid. Cicer. ad Att. lib. IV, ep. 11. Vectigalis scripturæ curam aliquando ædiles gessisse apparet ex Ovidio supra citato.

Omnes qui reipublicæ vectigalia redimebant, communi nomine dicebantur publicani, a publico, quod apud Cic. pro Rab. Post. cap. 2, et alios bonos auctores, idem est ac vectigal. Sic ad Q. Fratr. I, 1: «et publicanis satisfacias, præsertim publicis male redemptis». Non erant vile et sordidum hominum genus, sed erant ex «equestri splendore homines, flos equitum romanorum, ornamentum civitatis, firmamentum reip.» inquit Cicero pro Plancio, cap. 9. Ergo publicanorum ordo equitibus romanis constitit, ac nulli fere alii fuerunt publicani, quam equites romani: itaque sæpe pro equitibus usurpantur.

Quoniam vectigalium redemptio res erat maximi impendii, ad quam sustinendam ampla pecunia opus foret, quia totius alicujus provinciæ vectigalia, atque ea sæpe diversi generis, ut portorium et scriptura, simul redimebantur, non erat unius, quamvis ditissimi, ea redimere. Itaque societates inibantur, ut collatæ opes facilius sufficerent immensæ vectigalium administrationi. Hinc frequens sociorum, et societatis, quum de publicanis agitur, mentio passim apud Ciceronem, et alios occurrit. Inita societate, locatum sibi provinciæ alicujus vectigal socii inter se in partes tot, quot erant ipsi, distribuebant, et suam cuique partem pro ratione pecuniæ, quam in societatem contulerant, assignabant. Hinc de Rabirio Postumo Cicero dicit in ejus defensione, cap. 2, magnas eum partes habuisse publicorum, hoc est, populi romani vectigalium, quia, quod erat ditissimus, majorem, quam reliqui socii, pecuniam in societatem contulerat.

Partibus ita distributis ditiores publicani, si quando tenuioribus amicis, et qui redimendis vectigalibus pares non essent, gratificari vellent, particulas aliquas concedebant unde rem facere possent. Cicer. ibid. Valer. Max. lib. VI, cap. 9, § 7.

Conductio vectigalium fiebat per unum aliquem, qui quasi princeps erat societatis : dicebatur manceps, quasi manuceps, id est, manu capiens, inquit Festus, quia manu sublata se pluris esse licitatum significabat. In auctionibus enim sublata manu, vel digito licitationes fiebant. Quamquam ipsi universe publicani aliquando mancipes a Cicerone appellantur : ut in *Divinat.* in *Cæcil.* cap. 10.

Mancipis periculo maxime totum vectigalium negotium gerebatur. Ipse præcipue reipublicæ erat obligatus. Ipse pro se et pro sociis cogebatur, datis fidejussoribus, qui prædes proprie dicebantur, cavere populo. Festus; Ascon.

Diversus a mancipe erat qui dicebatur magister societatis, cujus mentio sæpe occurrit in *Verrinis*, et alibi. Magister fuisse videtur primarius aliquis socius, qui omnia societatis negotia Romæ administrabat ; ad quem controversiæ omnes deferebantur, quæ ad rem communem pertinebant ; qui rationes societatis conficiebat ; et apud quem tabulæ asservabantur. Ejus magisterium fuisse annuum, a Cicerone adducor ut credam, lib. II in *Verr.* cap. 74. Anno exacto, alter ei succedebat magister ; sic tota in locatione magistri quinque selecti ex sociis numerabantur.

Magister in provinciam cujus vectigalia conduxerat societas, vicarium mittebat qui ejus inibi vicem gereret, et totius provinciæ vectigalia curaret. Is dicebatur pro magistro dare operas ; et ipse promagister uno verbo, ut proconsul, appellabatur. Talis erat Zachæus ille, qui princeps publicanorum vocatur in *Evangelio*, apud B. Lucam, c. 19, vers. 2.

Præter eos qui societatem constituebant, erant in provinciis etiam alii qui societati serviebant, quos promagister per urbes dimittebat, qui portoria, scripturam, etc. exigèrent, ministri publicanorum et mercenarii : gall. *des commis*. Val. Max. lib. VI, cap. 9, § 8. Sic Canuleius ille de quo Cicero, lib. II in *Verr.* cap. 70, in portu Syracusis operas dabat. Sic Rupilius, Valerio teste ubi supra, publicanis

sit, quod garum sociorum, quia societates publicanorum illo in primis delectarentur, *κατ' ἐξοχὴν* appellabatur liquor ille, seu sanies pretiosa, ut Manilius vocat, tantopere celebrata veteribus; quæ gari, aut scombri piscis ex intestinis conficiebatur tanti pretii, ut singulis millibus nummum (circit. 204 fr. 50 centes.) permutarentur congii fere bini. Plin. Hard. lib. XXXI, cap. 43; Sen. epist. 95; Martialis, lib. XIII, epig. 102.

De publicanorum avaritia pleni sunt veterum libri. Sed hoc loco intelligendi sunt ii præcipue, qui operas publicanorum societatibus dabant. Hi quam fraude, avaritia, immodestia, audacia superent ceteros homines nemo est qui nesciat, inquit Cujacius, in Parat. ad lib. XXXIX Digest. tit. 4. Narrat Livius, XXV, 3, M. Postumi Pyrgensis impudentia singulari prope factum, ut turbæ maximæ in Urbe concitarentur. Itaque Paullus Æmilius in Macedonia ordinanda metalli Macedonici, quod ingens erat vectigal, et prædiorum rusticorum locationes tolli voluit, quod intelligeret sine publicano ea exerceri non posse; et «ubi publicanus esset, ibi aut jus publicum vanum, aut libertatem sociis nullam esse». Liv. lib. XLV, c. 18. Hanc Livii sententiam comprobatur P. Rutilii, viri innocentissimi, calamitas: hunc equites romani, qui tum soli judicabant, condemnarunt, quod legatus Q. Mucii proconsulis Asiam a publicanorum injuriis defenderat. Cic. de Orat. I, cap. 53 et seqq. Liviana Epit. 70. Inde mire confirmantur præclara illa cl. *Montesquieu* verba, qui de judiciis ad equites relatis loquens: «Numquam miseriis succincti homines, et id unum quærentes ut necessitates publicas ex publicis necessitatibus sererent, æquissime potuerunt judicare. Illi scilicet judiciorum severissimæ custodiæ tradendi erant, nedum ipsi ea exercerent: neque illi ordini, qui ad unum lucrum spectans, semper exigebat, quum ab ipso nihil peteretur, divitias ac paupertatem ipsam exhauriebat, Romæ judicia erant committenda». *Esprit des Lois*, XI, 18. Fecit tandem

hæc istorum immodestia ut tollerentur portoria (Cic. ad Quint. Fr. Epist. I, 1), et ut publicani nomen odio esset exteris nationibus. Cic. in Verr. II, cap. 3. Stante republica, publicanorum fraudes multis, interdum et exsilio vindicatæ sunt. Postea ex edicto Neronis prætores et præsides extra ordinem adversus publicanos jura reddiderunt. Corn. Tac. XIII, 50. Deinde prætor ordinariam actionem dedit, quæ proponitur in fr. 1 pr. Digest. de Public. et Vectig. hoc sensu: «Si quid publici nomine, publicani aut familia eorum vi ademissent, aut damnum injuria, furtumve fecissent, intra annum in duplum, post annum in simplum restituere tenerentur».

DESJARD. EX RECENSIONE EDITORIS.



APPENDIX

DE ORDINE EXERCENDORUM, TAM PRIVATORUM QUAM PUBLICORUM, STANTE REPUBLICA, JUDICIORUM.

VETEREM judiciorum exercendorum rationem et formam exposituro, non ea mihi mens est, ut rem tenebris quandoque involutam omnino discutiam et illustrem, ac in breviori hoc compendio, quidquid in vetere jure continetur, complectar; sed ut ea tantum attingam, quæ et intelligendo Ciceroni omnino necessaria, et etiam a civili studio abhorrentibus animis non injucunda futura esse crediderim. Ceterum hac tota in re facem nobis prætulit Gaius, cujus inventus liber ad id maxime valuit, ut ea, quæ in veteri jurisdictione aut latebant, aut explicari vix poterant, jam hoc duce et auctore, mira undique luce collustrentur.

« Omnia judicia, aut distrahendarum controversiarum, aut puniendorum maleficiorum causa, reperta sunt : quorum alterum levius est, propterea quod et minus lædit, et plerumque disceptatore domestico dijudicatur : alterum est vehementissimum, quod et ad graviores res pertinet et non honorariam operam amici, sed severitatem judicis ac vim requirit ». Cic. pro Cæcin. cap. 2.

Ex his auctoris nostri verbis, ut ceteros omittamus, manifestum fit judicia fuisse, aut privata, hoc est, de controversiis inter privatos; aut publica, id est, de criminibus ad totam rempublicam pertinentibus propter atrocitatem. Utriusque judicii exercendi ratio erat dissimilis : itaque de singulis dicam sigillatim. Atque ita porro hic titulus in duos articulos distribuetur.

ARTICULUS I.

De judiciis privatis.

Juris dicendi provinciam initio reges habuere, deinde consules et qui cum potestate consulari fuerunt; postremo tota ejus administrandi ratio ad summum quemdam judicem, seu prætorem pervenit, qui legum interpretes, custodes, administer esset et exsequutor. Sed quum tam multa in eum ingruerent negotia, ut neque solus de eis decernere, neque eis adesse posset, tunc judicandi munere alteri delegato, postquam ipse de jure cognovisset, quod ad factum pertinebat alii cuilibet decernendum committebat. Jurisdictio igitur prætoris in duobus fuit posita, ut nempe aut ipse judicaret, quod perraro evenit, aut judicandi munus alteri delegaret. Quum judicavit, tum decrevisse, aut decretum interposuisse; quum judicari jussit, judicem dare dictus est.

Neque autem iudices, ut apud nos, ex certo ac peculiari ordine constabant, quorum proprium illud erat ut jus administrarent, neque umquam ex illo munere moverentur. Privati scilicet erant homines, qui ex egregiis delecti civibus, ad tempus de civium fortunis, ex prætoris sententia, decernebant; quos optime nostris juratis similes dixerimus.

Prætor autem, imperio simul ac jurisdictione, seu judicandi simul et exsequendi potestate legibus data utebatur. Tum jurisdictionem exercebat, quum definita primum ex jure litis ordinatione, deinde judicem daret qui de ea cognosceret ac sententiam ferret. Re vero judicata, jam sententiæ exsequendæ potestas ad prætorem pertinebat, qui, si reus ultro parere recusaret, tum, ex imperio, in ejus bona petitorum immittebat. Verum ea nobis serius repetenda occurrent.

§ 1. *In jure, seu ante prætorem litigatio.*

A sella curuli in qua, quum jurisdictionem exerceret, se-

debat prætor, dies juri dicundo destinatos dies sessionales vocaverunt. Horum alii postulationibus, alii cognitionibus fuerunt dicati. In prioribus intendebatur actio, in posterioribus vero de ea quærebatur, ac litigatores audiebantur. Nec omnibus quidem diebus, sed fastis tantum ac intercis, jus dicere prætori licebat, ea etiam conditione ut fasti toti; intercisorum vero pars tantum et horæ certæ huic muneri attribuerentur. Vid. ad calc. Verr. I Exc. de Præt. Urb.

Diebus fastis, id est, diebus, quibus prætori licebat juri dicundo vacare, si dies postulationum esset, postulabat qui postulandum habebat aliquid eorum quæ supra retulimus. Ceterum postulationum ratio non erat temeraria, nec ab arbitrio pendebat: sed postulabatur ea forma, quæ in singulis legis actionibus scripta erat. Quid sint legis actiones docet Pomponius de origine juris, his verbis: « Ex his legibus [XII tabb.] eodem tempore fere actiones compositz sunt, quibus inter se homines disceptarent, quas actiones ne populus, prout vellet, institueret, certas, solemnesque esse voluerunt; et appellatur hæc pars juris, legis, id est, legitimæ actiones ».

Hinc discimus actiones plane omnes certis formulis adstrictas, verborumque cancellis circumscriptas fuisse. In harum conceptione magna cautio adhibebatur, ne aliter ageretur quam oporteret; et ut apte et congrue formula conciperetur.

Comparebant perscriptæ in albo prætoris. Ad eas litigatores stricte agebant; et formula qui cadebat, causa cadebat. Cicero pro Q. R. Comædo, cap. 8: « Sunt jura, sunt formulæ de omnibus rebus constitutz, ne quis aut in genere injuriæ, aut in ratione actionis errare possit. Expressæ sunt enim ex unius cujusque damno, dolore, incommodo, calamitate, injuria, publicæ a prætore formulæ, ad quas privata lis accommodatur ». Quinque ex causis formula quis cecidisse videbatur, quas his quæstionibus complectitur Quintil. III, 8. An huic; an cum hoc; an hac lege; an apud

hunc; an hoc tempore, liceat agere. Seu ut est apud Jctos : « ipso jure, re, tempore, loco, causa ». Cicero pro Murena lepidè irridet has formulas, seu notas, ut eas vocat, quibus actiones dirigebantur. Idem pro Cæcin. c. 23, formulas appellat aucupia verborum, et literarum tendiculas; atque jurisconsultum qui non sit Orator, per se nihil aliud esse dicit, nisi leguleium quemdam cautum et acutum, præconem actionum, cantorem formularum, aucupem syllabarum. De Orat. I, cap. 55. Et ipse ait Gaius eas omnes legis actiones paullatim in odium venisse: namque ex nimia veterum subtilitate, qui tunc jura condiderint, eo rem perductam, ut vel qui minimum errasset, litem perderet. Id scilicet patricii invenerunt, ut penes se plebeios haberent, qui controversiarum omnino rudes, ad istos ne quid in eligenda actione errarent, et levi quodam peccarent vitio, confugere cogebantur.

His expositis, quæ totius hujus argumenti sint quasi pro-
lusiones, jam dicendum est quæ ratio fuerit postulationis.

Postulationem et actionis editionem præcedebat in jus vocatio; sequebatur dies cognitionis, et denique dationis (dies) judicis postulati.

Fuit honestissima consuetudine comparatum, ut petitor eum, unde petebat, primum omnium conveniret, eique denuntiaret ut vel quod deberet, præstaret; vel, quod consideret, exhiberet, restitueretve. Hoc erat appellare, vel admonere debitorem. Cic. pro Quint. passim.

Quod si res hoc pacto convenire inter adversarios non posset, nondum tamen in jus adibatur; nec actio intendebatur, quin prius illa controversia ad communes aliquot amicos, et familiares delata esset, qui intra privatos parietes experirentur, an possent subortam componere controversiam. Cic. pro Quint. 5, 11. Inde est quod Cicero ac Livius «judicium intra parietes» nuncupent.

Quod si controversia peragi coram disceptatore domestico nequiret, veniebatur in jus hoc pacto.

Die postulationum petitor eum, unde petebat, in jus vocabat.

Nulla hic apparitoris opera; nulla dicæ scriptio. Actor conveniebat adversarium, atque ut se in jus euntem sequeretur, admonebat. Si is sequi noluisset, eum rapiebat. Atque ut ne injuriam ei facere videretur, testem suæ actionis aliquem faciebat, aut forte intervenientem, aut præsentem, cujus tangebatur molliter auriculam; rogando his verbis, « LICETNE ANTESTARI? » i. e. te testem sumere. Si respondebat, LICET, tum adversarium frustrantem, aut fugientem, injecta manu ad prætorem trahebat: quod ei licebat per legem XII tabb. Porro illam auri præhendendæ consuetudinem expresserunt Plaut. in Persa; Horat. Sat. I, 9, 76. Plin. XI, 45: « Est in aure ima memoriæ locus, quem tangentes antestamur ». Si vero actor ante antestationem raperet adversarium, competebat in eum actio injuriarum. Lenones, fures, atque istiusmodi homines, lege excipiebantur. Neminem de domo sua in jus vocari licuit. Fr. 18. Digest. de in jus vocando.

Quod si is unde petebatur, latitaret, et nullam secum agendi potestatem faceret, quum de domo extrahi non posset, actor prætoris auxilium implorabat, atque reum evocari postulabat edicto. Edictum ad ipsius, qui latitabat, ædes affigebatur cum solemni vicinorum testatione. Si evocationi primæ non pareret, neque defenderetur; secundam interjectis decem diebus decernebat prætor, qua petitorum in bona latitantis rei mittebat: et nisi facta evocatione tertia, ad sui defensionem venisset; altero decreto bona ejus possideri, proscribi, ac distrahi jubebat prætor.

Si vero vocatus pareret, ubi copulati in jus pervenerant, actor, impetrata loquendi potestate, actionem edebat adversario, qua adversus eum uti volebat. Quod omnino necessarium erat; nam multis in causis non poterat reus divinare, quæ in se actio intenderetur; quum ex edicto prætoris in plures actiones idem posset cadere. Conf. Dupont, Disquisit. in Gai. p. 209.

Actor, edicta actione qua usurus erat, eam postulabat a prætore, id est, petebat ut sibi liceret eam in adversarium intendere. Poterat autem prætor aut statim annuere, aut diem ad illud examinandum insumere, aut omnino abnuere. Quum vero impetrarat, actor certa verborum formula silentem reum vadabatur, id est, vades, aut fidejussores, sive sponsores ab eo petebat, fore ut certo die responsurus, se in jure sisteret. Vid. Gai. IV, 185. Dies autem ille cognitionis a prætore, ex officio, aut ultro petentibus adversariis designabatur; neque perendinus erat necessario, ut olim ante Gaium omnes affirmabant. Gai. IV, 151, 181. Ita concepto vadimonio, id est, vadibus datis et acceptis, e jure discedebatur. Interea res in vadimonio esse dicebatur. Nam a vadibus vadimonium appellabatur intervallum temporis quod erat inter editam actionem, et litis intentionem.

Reus, cognita actione, quandoque sine judicio cessit; et rem per amicos communes composuit. Sin autem se ad contendendum pararet, cognitionis die uterque se sistebat, et hoc erat, obire vadimonium.

Prætor actiones edictas et postulas ex tabulis ordine recitari, atque actores reosque citari per præconem, seu accensum jubebat, ut de eorum lite cognosceret.

Si litigatores ad vadimonium die constituto non occurrerent, id est, in jure se, non interposita dilatione, non sisterent, litem perdebant. Si solus petitor abesset, causa cadebat, ejusque rejiciebatur postulatio, nempe ut ab ipso deserta; sin autem reus, tum a prætore, propter desertum vadimonium, quæ magna erat infamia, multæ nomine, quæ sæpius litem totam æquabat, damnabatur, et prætor, postulante actore, ex edicto bona ejus possideri jubebat.

Sin autem uterque se sisteret, tum prior reus solemnibus verbis ita agebat: « UBI TU ES, QUI ME CONVADATUS ES? ECCE EGO ME TIBI SISTO; TU CONTRA ET TE MIHI SISTE ». Tum procedente actore et respondente: « AD SUM »; rogabat reus, « QUID

ais? » Reponebat actor : « **AIO TE**, etc. » simul formulam actionis a se editæ subjiciens : puta , si actio in rem esset , « **AIO HANC REM, VEL HUNC FUNDUM QUEM POSSIDES, MEUM ESSE** » ; sin actio in personam ; « **AIO TE MINI HOC DARE, VEL FACERE OPORTERE** ». Tunc ita concludebat : « **PRÆTOR JUDICEM ARBITRUMVE UT DES POSTULO** ». Tum prætor ut fides sibi fieret non levide causa litem intendi , defensuramque judicio partem utramque , diversa pignora ab eis exigebat , prout in rem, seu in personam actio cadebat. Alia autem a petitore , alia a reo repeti docet Gaius , IV, § 174.

Ab actore quidem exigebantur genera quatuor, quæ breviter percurramus :

1^o Judicium calumniæ , quum reus se per meram calumniam a petitore argui diceretur ; eaque de re actionem propria ex parte intenderet , quæ si succederet , petitor ad solvendam decimam causæ partem damnabatur.

2^o Contrarium judicium , quod non adversus actiones omnes , ut præcedens , locum habet , sed ex certis causis constituitur : velut si injuriarum agatur , etc. Severior autem coercitio est per contrarium judicium , nam calumniæ judicio decimæ partis nemo damnatur , nisi qui intelligit non recte se agere , sed vexandi adversarii gratia actionem instituit , potiusque ex judicis errore , vel iniquitate victoriam sperat , quam ex causa veritatis. Contrario vero judicio omnimodo damnatur actor , si causam non tenuerit , licet alia opinione inductus crediderit se recte agere.

3^o Jusjurandum de calumnia poterat reus a petitore exigere ; atque etiam sæpius deferebat prætor , ita ut ille qui accusabat sacramenti fide se obstringeret non per malas artes litem intendere. Solemnis autem mos erat , ut dextra saxum tenens hæc adderet : « **SI SCIENS FALLO, TUNC ME DESPITER BONIS EJICIAT, UT EGO HUNC LAPIDEM** », quem simul projiciebat. Quod si malæ fidei convinceretur petitor , tunc eadem quæ in judicio calumniæ , pœna sequebatur.

4^o Restipulationis pœna erat , quum per stipulationem

reus a petitore exigeret, hunc, si causa victus discederet, damni causa, certam quamdam pecuniæ vini soluturum, quæ ad tertiam totius litis partem accedere solebat.

Cavebatur etiam ab eo unde petebatur, quatuor generibus, sponsione, pœna, jurejurando de calumnia, infamia.

1° Sponsio actus erat judicialis in jure fieri solitus, interposita stipulatione certæ pecuniæ, quam perderet qui sponsione vinceretur. Et ea quidem, quum de restipulatione diximus, simul explicatur. Poterat autem duabus tantum de causis fieri, velut de pecunia certa credita, cujus ea erat pœna ut tertia summæ pars vincenti adversario cederet, aut postquam dilatus debitor se nihil debere affirmaret, seu constitutæ pecuniæ, unde et controversa res et dimidia summæ totius pars adversario præstabatur.

2° Pœna quæ victum reum persequabatur, pro causæ statu discrepare, et dupli, seu quadrupli nomine imponi poterat. Sed prætor, prius quam sententiam ferret, reum admonebat etiam tunc temporis debitum fateri posse, quod si ille fateretur, simplex duntaxat solvebat, si contra pertinacius negaret, dupli damnabatur.

3° Jusjurandum de calumnia idem erat quod supra diximus, nisi quod versis vicibus reo deferretur: neque id in omni actione, sed in iis tantum quibus ne statim quidem ab initio pluri quam simpli est actio, et in quibus rei heredes, aut feminæ ac pupilli in jus vocantur. Gai. IV, 172.

4° Infamia denique laborabat, si vinceretur, reus furti judicio, vi bonorum raptorum, injuriarum; item pro socio, tutelæ, mandati, depositi. Sed furti aut vi bonorum raptorum, aut injuriarum non solum damnatos, sed etiam pactos ignominia notari Gaius, IV, 182, confirmat. Poterat autem reus, vel inchoata lite, si omnino petitori de omnibus rebus satisfaceret, infamiam hanc effugere, quæ tantum ex novissima judicis sententia victo inurebatur.

Neque ea omnia prætori satis erant, sed etiam mutuo inter se litigantes obstringebantur, ut se judicis sententiæ,

utcumque casura erat, morem gesturos approbarent. Ea erant quæ satisfactiones vocabantur.

§ 2. *Ante prætorem litis contestatio.*

Quæ ubi constituta erant, formulam prætor ederet necesse erat, quam iudex sequi cogeretur, unde omne penderet iudicium. Neque eam prius edere poterat, quam ipse de litis causa cognosceret. Inde fiebat ut antea quædam summaria litis expositio, quæ interrogata utraque parte constabat, a prætore cognosceretur. Hæc erat vera litis contestatio, quod quidem falso nomen olim attribuebant ei litis parti qua ante iudicem dissereretur, rati scilicet nullam privatæ causæ partem ante prætorem exponi. Sed tenebras has omnes quum discutere potuisset Ciceronis locus, Part. orat. 28, in quo ante iudicium ait, de constituendo ipso iudicio solere, esse contentionem in jure, i. e. ante prætorem; mire illud confirmavit et illustravit Gaius, III, 180, nempe constituto; ante litem contestatam dare debitorem oportere, post litem contestatam damnari oportere, post condemnationem iudicatum facere oportere. Unde illud sequitur, ut, quum non nisi post litem contestatam damnari possit debitor, condemnationisque formula ad prætorem unum pertineat, necessario prætor ipse de re prius cognoscat. Gai. IV, 43. Dupont. p. 265.

Post litem autem contestatam, si in rem ageretur, prætor uter possessor, pendente lite, futurus esset designabat, donec verum possessorem iudicii exitus definiret. Porro qui vindicabat, festucam tenebat; deinde ipsam rem, si moveri posset, apprehendebat, velut hominem, et ita dicebat: « HUNC EGO HOMINEM EX JURE QUIRITUM MEUM ESSE AIO SECUNDUM SUAM CAUSAM, Sicut DIXI, ECCE TIBI VINDICTAM IMPOSUI »; et simul homini festucam imponebat. Adversarius eadem similiter et dicebat et faciebat. Quum uterque vindicasset, prætor dicebat: « MITTITE AMBO HOMINEM »; illi mittebant; qui prior vindicaverat, ita alterum interrogabat:

« POSTULO, ANNE DICAS QUA DE CAUSA VINDICAVERIS ». Ille respondens « . . . SICUT VINDICTAM IMPOSUI »; deinde qui prior vindicaverat, « QUANDO TU INJURIA VINDICAVISTI, D ERIS SACRAMENTO TE PROVOCO ». « SIMILITER ET EGO TE », inquebat alter. Postea prætor secundum alterum eorum vindicias dicebat, i. e. interim aliquem possessorem constituebat, eumque jubebat prædes adversario dare litis et vindiciarum, i. e. rei et fructuum : alios autem prædes ipse prætor ab utroque accipiebat sacramenti, quod id in publicum cedebat. Festuca autem utebantur, quasi hastæ loco, signo quodam justi dominii; maxime enim sua veteres Romani esse credebant, quæ ex hostibus cepissent.

Si qua res talis esset, ut non sine incommodo posset in jus afferri vel adduci, velut si columna, aut grex alicujus pecoris, pars aliqua inde sumebatur; deinde in eam partem, quasi in rem totam fiebat vindicatio. Itaque ex grege vel una ovis, aut capra in jus adducebatur, vel etiam pilus inde sumebatur, et in jus afferebatur; ex nave vero et columna quidpiam defringebatur. Similiter si de fundo, vel de ædibus, sive de hereditate controversia esset, pars aliqua inde sumebatur, ut ex fundo gleba, ex ædibus tegula, et in eam partem fiebat vindicatio. Gai. IV, 16, 17.

His demum peractis, prætor formulam edebat, cujus quatuor vulgo partes erant: *demonstratio*, qua res, de qua agitur, erat demonstrata; *intentio*, qua actor desiderium suum concludit; *adjudicatio*, qua permittitur judici rem alicui e litigatoribus adjudicare; *condemnatio*, ea est pars formulæ qua judici condemnandi, absolvendive potestas permittitur; neque tamen partes istæ omnes inveniuntur, sed tres exstent omnino est necesse: exempli gratia: « QUOD SERVILIUS DECEM MILLIA SESTERTIUM A MÆVIO STIPULATUS (1^o demonstratio). SI PARET MÆVIUM DECEM MILLIA SESTERTIUM SERVILIO PROMISSISSE (2^o intentio). JUDEX MÆVIUM SERVILIO H-S X MILLIA CONDEMNARE; SI NON PARET, ABSOLVE (3^o condemnatio) ». Gai. IV, 9.

Inde constat judici de facti tantum quæstione cognoscendum, et ex animi conscientia, pronuntiandum, ita ut omnino ad nostrorum juratorum similitudinem accedere videantur.

§ 3. *Dies dationis judicis postulati.*

Non autem eodem die edebatur judex quo formula, sed triginta tantum elapsis diebus, postquam ad accipiendum judicem venerant, quem plerumque ipsi postulaverant litigantes; quam consuetudinem in jus per Pinariam legem translatam edocet Gaius, IV, 15.

Observandum est judicis nomine contineri non unum genus; verum hoc sub titulo intelligi judicem ipsum, arbitrum, recuperatores, et centumviros. Sive hos, sive illos actoris voluntate dabat prætor: de singulis pauca dicemus. Ad judicem mittebantur ii, quibus stricto jure decertare placebat, aut quorum causa ad stricti juris contractum pertinebat. Qua in re edebatur actio stricti juris.

Dicebatur delegatus, propterea quod certæ causæ cognitio ei delegabatur.

Arbiter cognoscebat causas quæ erant bonæ fidei, aut quas ex arbitrio judicari litigantes malebant. Quæ sit ratio arbitri, cui solutum ac liberum erat de formula discedere, ac judicis, qui ea veluti constrictus tenebatur, optime definit Cicero pro Comædo, cap. 4: «Judicium est pecuniæ certæ, arbitrium incertæ; ad judicium hoc modo venimus, ut totam litem aut obtineamus, aut amittamus: ad arbitrium hoc modo adimus, ut neque nihil, neque tantum, quantum postulavimus, consequamur: ejus rei ipsa verba formulæ testimonio sunt. Quid est in judicio? directum, asperum, simplex. Si paret H-S 1300 dari oportere. Hic nisi planum facit H-S 1300 ad libellam sibi deberi, causam perdit. Quid est in arbitrio? mite, moderatum; quantum æquius, et melius sit dari». Porro unus semper arbiter, aut judex dabatur.

Secus erat de recuperatoribus, qui numquam non plures erant. Ad eos quasi ad diversi generis arbitros, sive sequestres, qui summatim de re deciderent, confugiebant litis cito peragendæ cupidi; et ii quidem non nobiliorum, sed ex quolibet civium numero eligebantur. In provinciis dabantur ex foro illo, et conventu, id est, ex civibus romanis, sociisve, qui in iis oppidis versarentur, quæ ad id oppidum convenirent, in quo forum agebat prætor. [Gall. *qui étaient du ressort.*] Itaque inter cetera hoc quoque crimini vertit Cicero Verri, quod non de conventu, sed de cohorte sua dedisset recuperatores, lib. III in Verr. cap. 11, 59, 60.

Centumviri quasi electi iudices, seu jurati, quotannis a triginta quinque tribubus, quæ tres singulæ assumebant, eligebantur, ita ut eorum numerus ad usque quinque et centum progrediretur, sed contrahendi causa dicti centumviri absolute. Illi a jurebus et arbitris non propter dignitatem differebant, sed quod omnino non similes eæ causæ essent de quibus cognoscebant: ii quidem in Basilica Julia, modo per partes, modo universi, ex jussu prætoris judicabant, Cic. de Orat. I, 38, et de his rebus judicabant quæ majoris essent momenti: puta, de usucapionibus, servitutibus, testamentis, etc. Ea erat his judiciis vis, ut in Romanorum jus transire solerent, et eis esset auctoritas rerum perpetuo similiter judicatarum.

Curabant partes ut prætori arbitrum, vel judicem designarent, quarum postulationi ille annuere solebat. Sin dissentirent, sorte judex obveniebat.

His ita constitutis, actor reo et actori reus denunciabat quo die eum iudicio adesse vellet. Is erat dies tertius, sive perendinus: nam in eum judex datus fuerat. Hæc denuntiatio prisco more dicebatur condictio, seu comperendinatio. Gai. IV, 15.

Judicium.

Die tertio judicium factum est, nisi aut judex, aut alter litigatorum abfuit.

Quod si causa absentiae fuit probabilis, uti v. gr. morbus, dies judicii prolatus est, seu diffissus.

Postquam judex venit, extemplo ad jurandum accessit se ex lege judicaturum. Arbiter non juravit, quia cognovit causas quæ erant bonæ fidei. Formula jurisjurandi sollemnis fuit, «ex animi sententia»: locus, ara in comitio, quæ «puteal Libonis» dicebatur.

Quod si litigatorum alter non adesset, neque morbum excusaret, non statim causa cadebat; sed, dimisso tribunali, alter ad prætorem ibat, a quo edictum, quo absens citaretur, postulabat. Dabat prætor in dies decem, cui si absens non pareret, secundum in dies decem atque etiam tertium edictum scribebat, et denique edebat in eum edictum peremptorium, ac jubebatur judex de lite, quasi præsentem utroque, cognoscere, cui tamen si melior absentis causa videretur, pro eo judicare licebat.

Judex quum unus fuit, unum aut duos judicii socios jurisperitos sibi adjunxit, quorum consilio in judicio uteretur. Ita Aquilius in causa Quintii judex, tres jurisconsultos in consilium vocavit. Ipse sedit juratus; alii injurati: non enim judicarunt, sed consilium communicarunt.

Causa exponebatur apud judicem aut per litigatores ipsos, aut per patronum, uti Cicero Quintii causam egit apud Aquillium. Eadem aut paucis, aut pluribus verbis exponebatur.

Brevis expositio appellabatur causæ coniectio, seu collectio, quasi dicas, causæ in breve coactio; quia inde judex audita levi litigatorum altercatione, summam quamdam ejus controversiæ quasi informationem colligebat. Longioris expositionis exemplo sint causæ a Cicerone defensæ P. Quintii, et Q. Roscii. Testibus qui plerumque decem

fuerunt, literis, argumentis ex ipsa re, de qua agebatur, depromptis in agenda causa certabatur. Ejus rei conficiendæ, ac status excogitandi, atque eo probationes omnes conferendi artificium ex libris Oratoriis, multis verbis demonstratur. Neque enim in aliis præceptis antiqui rhetores, tam græci quam latini, plus studii, aut operæ consumpserunt.

Causa utrimque perorata, per instrumenta, testes, ac jusjurandum ministrabantur probationes, et ante solis occasum sententia ferebatur. Neque enim ex XII tabulis post solis occasum jus dici, neque causa cognosci poterat. Si causa judici videretur adhuc obscurior, jurabat sibi non liquere; atque inde ad prætorem redeundum erat, qui alterum daret judicem, et secunda actio instituenda. Sin autem manifeste res pateret, statim sententiam ferebat. Sententiæ ferendæ non una omnium judicum, neque in omnibus causis ratio fuit. Sed hæc pronuntiandi formula moribus erat recepta, ut dicerent, non absolute rem ita esse, aut non esse, sed per modestiam sibi videri aut ita, aut non ita esse. Semel lata sententia, nullum jam erat judicis munus; quæ peragenda sequebantur ad unum prætorem pertinebant.

De exsequenda sententia.

Judicio causæ perfecto, lege XII tabularum cavebatur uti damnatus illud ultro exsequeretur; secus post triginta dies quam debere judicatus fuerat, manus ei a petitore injiciebatur; cujus actionis tenorem dedit Gaius: « QUOD TU MIHI JUDICATUS SIVE DAMNATUS ES, SESTERTIUM X MILLIA QUÆ DOLO MALO NON SOLVISTI, OB EAM REM EGO TIBI SESTERTIUM X MILLIUM JUDICATI MANUS INJICIO »; et simul aliquam corporis ejus partem predebatur. Nec licebat judicato manum a se depellere et pro se lege agere; sed vindicem dabat, qui pro se causam agere solebat. Qui vindicem non dabat, domum ducebatur ab actore, et vinciebatur. Ea ratione debitor *addictus* propter

judicium; et *nexus* propter vincula creditoris, dicebatur. Gai. IV, 22. A. Gell. XX, 1.

Quum autem in melius est immutata debitorum conditio, tunc jam obsolevit manus injectio, et prætor actionem alteram, cui nomen *judicati*, dabat, qua absoluta, et debitor dupli damnato, actor in ejus bona immittebatur, quæ vendi juberet, ut inde debita sibi pecunia expediretur. Ceterum vicit postea creditorum sævitia nec omnino abrogata XII tabularum lex videtur, si modo fidem Sallustio, Bell. Cat. 35, adhibemus, qui Manlianos legatos inducit, querentes, « se omnes fama et fortunis expertes esse, neque cuiquam suorum licuisse more majorum lege uti, qua nimirum cautum erat ne debitorum corpora in posterum necerentur; neque amisso patrimonio, corpus liberum habere; tanta sævitia fœneratorum atque prætoris fuit ».

Hactenus de privatis judiciis; neque enim stante republica, usitatas appellationes liquet; illud tantum constat intercedendi jus, quotiescumque se vexatos cives arbitrantur, tribunis fuisse, et ex Cicerone, Verr. I, 46; de Leg. III, 4, ac Cæsare, Bell. Civ. III, 20, prætorem prætori, consulem consuli, et parem denique omnem potestatem pari, item ut superiorem inferiori potuisse intercedere. Quandoque prætor in *integrum restitutionem* dabat, quæ hujusmodi erat, ut si quis in actione vel accipienda, vel recusanda multis modis lapsus esset; post sententiam semel latam daretur damnato potestas litis retractandæ, et omnia in pristinum statum restituerentur; sed ea rara evenire solebant, et ex eo tantum adjunctorum concursu, quæ post latum judicium comparebant. De quibus cf. tit. 1 et seqq. Dig. lib. IV.

ARTICULUS II.

De publicis judiciis.

Olîm regibus attributa de sceleribus judicandi potestas ad populum transiit, et ipsa XII tabb. lege vetabatur ne quis

capitis accusatus ab aliis quam a centuriatis comitiis judicaretur : « De capite civis nisi per maximum comitiatum ne judicanto ». Quæ quidem judicia extraordinaria vocata, quod quotiescumque scelus admissum non ab solitis magistratibus, ut tribuno plebis, quæstore, ædili deferretur, non justus erat, quemadmodum apud nos lege perpetua, definitus agendæ causæ tenor; verum senatusconsulto, sive plebiscito, quæstor, qui de ea re duntaxat cognosceret, possetque pœnam applicare, constituebatur.

Sed quum, victoriis crescente imperio simulque vitiis cum luxu invalescentibus, jam omnino populus neque per se illa crimina cognoscere quæ a magistratu deferrentur, neque eam potestatem certo magistratui tot legibus deferre posset quot scelera patrantur, omnino necesse fuit ut quodammodo de jurisdictione sua decederet, quam perpetuis quibusdam magistratibus in perpetuum concederet. Inde ortæ *quæstiones illæ perpetuæ* quæ primum anno 604, lege Cornelia de repetundis, multo firmitus postea Sullanis legibus fuerunt constitutæ.

Non ea autem apud judicia de quovis poterat facinore cognosci, verum singulis quæstionibus sua erat cognoscendorum criminum pars attributa. Sic majestas, ambitus, repetundæ, peculatus, proprium suum quæsitorem habuere, nempe unum ex sex his qui quotannis eligebantur, prætoribus, exceptis urbano et peregrino, quorum alter civium, alter peregrinorum jurisdictionem exercebant. Sic usque ad Sullam exercita publica judicia, ita ut si crimen aliquod præter ea quæ nominata sunt, deferretur, lege lata novus quæstor, qui de eo duntaxat cognosceret, constitueretur. Sulla quatuor prioribus quæstionibus alias quatuor adjecit de sicariis, de veneficiis, de falsis, de corrupto judicio, et propterea prætorum numerum auxit, ita ut octoni essent, e quibus sex quotannis de maleficiis quærerent.

Jam quid certissimum nobis de prioribus quatuor quæstionibus, quippe majoris momenti, supersit, paucis ex ordine disseremus.

I. *Quæstio perpetua majestatis.*

Maximum hoc erat apud Romanos crimen, si quis dignitatem populi romani magistratuumve ejus minuisset, aut etiam quoquomodo reip. tranquillitatem interturbare esset conatus. Siquidem, ut ait Cicero, «majestas est in imperii atque in nominis populi romani dignitate, quam minuit is qui per vim multitudinis rem ad seditionem vocavit». Et ea quidem ad multos peculiares casus referebantur, quæ hic explicare non nostri est operis, et multo convenientius in Legum Indice collocabuntur.

Sulla lege Cornelia majestatis (ann. 673) novam huic tribunali formam imposuit; ad hoc pertinere jussit, si quis contra justorum magistratuum edicta egisset, extra fines provinciæ exercitum duxisset, hostium ducibus pepercisset, auctoritatem sibi a populo rom. commissam infringi esset passus, denique quicumque civis romanus regis externi gratiam esset aucupatus: et quo ipsi magis accenderentur delatores, falsæ accusationis ullam esse pœnam, aut mulierum hac de re testimonium rejici vetuit.

Illud autem hoc loco mirandum occurrit quod ille idem dictator, qui in cruentis triumphis primus delictis pœnas æquare imperfecte quidem tentavit, qui 4,700 cives romanos ex arbitrio se proscripsisse jactabat, sui ævi opiniones tamen non offendit, et non modo non ærarii furem, aut latronem, provinciæ eversorem magistratum capite plectendum sanxit, verum multæ exsilio seu aquæ et ignis interdictione addita, ad populum provocari permisit.

Quam autem imperatorum, eversa republica, crudelitati faverit illius legis nomen nemo nescit, quum Tiberius illa fretus non jam facta, sed ipsas voces persequeretur, et pro capitali esset vel pauca et simplicia verba pronuntiasse.

II. *Quæstio perpetua de ambitu.*

Quam multis artibus Romæ summi ambirentur magistra-

tus, nemo est qui nesciat, si modo vel levissime historiæ studuerit. Ut omittamus legibus permissas illas rationes, aucupandæ popularis auræ causa, illos nomenclatores qui candidatis cujusque nomen insusurrabant, dextræ prehensiones quæ Nasicæ Scipioni repulsam intulerunt, largitiones illas quæ populo donabantur, quarum celeberrimum dederat exemplum Crassus, qui postquam decem mensarum millibus plebem romanam exceperat, ei insuper frumentum in tres menses erogaverat; jam de vetitis agamus viis quibus ad munera omnia plerique grassabantur. Primum apud eos vigeat veluti quædam suffragia redimendi provincia, quæ per suos sequestres, ministros, interpretes fieret; et de qua sæpius Cicero in Verrinis mentionem habet. Vebantur et gladiatorum munera, quæ adeo avidè expetebat populus, et multa alia quæ hic enumerare vanum ac inutile videretur.

Ac vel primis reip. temporibus necesse omnes duxerunt, has corruptelas severissimis legibus cohiberi; sic instituta Mænia lex (anno 439) et Cornelia Bæbia (571), quarum tenor non ad nos usque pervenit, sed quæ damnatum morte, aut etiam exsilio, quod semper reo liberum erat occupare, multarent.

Marius etiam eadem de causa legem tulit (634), ne in ponte per quem suffragia daturos transire erat necesse, candidatorum quisquam staret; sed ipse ceteris magis quam sibi hæc scripsisse est visus, quippe qui et ambitus fuerit accusatus, et sextum consulatum, nonnisi multa pecunia potuerit impetrare. Et ipse Sulla, quum semel prætura excidisset, nonnisi corruptis suffragiis, eam obtinuit. Quibus exemplis, etiamsi non aliunde pateret, illud comprobatur, nihil hac de re umquam leges valuisse. Quas tamen multas vel inde scriptas constat: ut legem Fabiam, ne tanta amicorum cohors candidatos prosequeretur; Corneliam, quæ tam atrociter in damnatos animadvertibat, ut senatus ei intercedere æquum censuerit; Calpurniam, quæ, quamvis

hanc severitatem mitigaret, vix quidem a populo est accepta, quippe obstantibus iis qui candidatorum pecuniam plebi dividere solebant, et ad quos divisorum nomine ea lex quoque pertinebat; et ita quidem obstantibus, ut consul, ne omnino vincerent, solemnem formulam edere fuerit coactus: « Qui rempubl. salvam volunt ad hanc legem adeant ». Et ea quidem confirmata, damnatos et pecunia, et senatu ac quovis adeundo munere multabat, etiam accusatori satis magnam mercedem tribuebat.

Est etiam alia celeberrima, quam unam in consulatu tulit Tullius noster anno 689, legem scilicet Tulliam de ambitu. Verum de ea quid in Legum Indice dicatur satius erit repetere; et idem porro addemus de nonnullis hac eadem ætate latis legibus, nempe Licinia, Aufidia, Pompeia, quæ in supra laudato Indice suum locum aptius ac convenientius invenient, quippe quæ facilius hoc loco reperiantur. Unum jam adjicere operæ pretium est, semel corrupta rep. tot reos adductos quot magistratus obtinebant, et eos semper accusare, qui a petitione sua deciderant; neque jam pecunia aut spectaculis plebem conciliari, verum armatis cohortibus forum cruentari, quæ non jam gratia verum ferro inter se contenderent, ita ut vere his temporibus conveniat, quod de Attico Cornelius Nepos dixit; nempe non eum ambiisse honores, quod neque peti more majorum, neque capi possent conservatis legibus, in tam effusis ambitus largitionibus, neque retineri sine periculo, corruptis civitatis legibus.

III. *Quæstio perpetua peculatus.*

Hoc intelligebatur nomine furtum rerum ad remp. pertinentium et aversæ publicæ pecuniæ crimen. Ut ceteræ quæstiones, sic etiam peculatus primis temporibus certum prætorem non habuit; sed lege peculiari, aut prætoribus, aut consulibus mandabatur. Sit exemplo iudicium L. Scipionis illius cui prioris Africani fratri crimen objectum

est, « quo commodior pax Antiocho daretur, ipsum sex millia pondo auri, quadringenta octoginta argenti ab illo rege plus accepisse, quam in ærarium retulisset ». Petilliorum, tribunorum plebis, Scipionis accusatorum, rogatio talis fuit : « Velitis, jubeatis quærat^{ur} quæ pecunia capta, ablata, coacta ab rege Antiocho est... uti de ea re Servius Sulpicius prætor urbanus ad senatum referat, quem eam rem velit senatus quærere de iis, qui prætores nunc sunt. Omnes tribus, UTI ROGAS, jusserunt. Serv. Sulpicio deinde referente, quem, rogatione Petillia, quærere vellent, Q. Terentium Culleonem Patres jusserunt. » Liv. lib. XXXVIII, cap. 54 et 55.

Quo autem anno a populo, qui de ejus crimine non immerito cognoscebat, ad certam quæstionem pervenerit, dubium omnino est : illud tantum constat, multo hoc tempore ante Sullam exstitisse, et illo mortuo latam Aufidiam de residuis legem, quæ ad illos pertinebat, qui nondum pecuniæ publicæ rationem ad ærarium retulerant. Qua lege tenebatur Faustus, Sullæ filius, qui pecuniam qua pater remp. spoliaverat, in manibus habebat ac retinebat.

Præter illam, nulla de peculatu lex exstat, nisi Julia, quam tulit C. Julius Cæsar; et qua peculatum, sacrilegium, et residuas pecunias complexus est : quasi tribus hisce rebus damnum inferretur ærario. Equidem peculatus sacrilegii genus est : residuorum crimen illud est, quo pecuniæ publicæ retinentur, quæ apud aliquem ex administratione resident, in publicum non relatæ.

Juliae legis capita hæc exstant in Digestis, lib. XLVIII, tit. 13 : « Prætor, qui ex hac lege quæret, de eo quærito, qui in aurum, argentum, æs publicum, quid indiderit, immiscuerit, aut quo quid indatur, immisceatur, fecerit dolo malo, quo id pejus fiat » : nimirum sive injecto plumbo aut stanno, dum conflatur; sive erosa pecunia; quod vitium lacunam in argento vocat Cicero ad Atticum, XII, 6.

« Qui pecuniam publicam surripuerit, vel, ut surripere-

tur, curaverit; qui tabulam æneam, leges formamque agrorum, aut quid aliud continentem, refixerit, vel quid inde immutaverit; qui quid in tabulis publicis deleverit, aut induxerit; qui pecuniam publicam delegatam in usum aliquem retinuerit, neque in eam rem consumpserit. Impetrator, qui pecuniam ex præda captam penes se privatim retinuisset, eamque nec in triumpho tulisset, nec in ærarium retulisset, eadem lege peculatus tenebatur.

Peculatus igitur pœna capitalis non fuit, nec a prima origine, nec deinceps, quum in ærarii depeculatores constituta est; ea pecuniaria tantum fuit; quod Livius quoque significat lib. XXXVIII, ubi damnato de peculatu L. Scipione Asiatico, Africani majoris fratre, litis æstimatæ, et carceris, nisi solveret, mentio fit: aquæ vero et ignis interdictio nulla nominatur. Hæc ratio fuit iudicii de peculatu usque ad legem Juliam; damnatis vel solvendum erat quanti lis esset æstimata, aut prædes dandi, vel in vinculis, quoad solverent, miserrime vivendum.

Diserte hæc omnia in L. Scipionis Asiatici iudicio, de quo proxime dictum est, Livius significat his verbis: « Iudiciis a prætore perfectis, Hostilius et Furius damnati prædes eodem die quæstoribus urbanis dederunt. Scipio quum contenderet omnem, quam accepisset, pecuniam in ærario esse, nec se quidquam publici habere, in vincula duci cœptus est. In bona L. Scipionis possessum publice quæstores prætor misit ».

Quod si reus, iudicio non exspectato, in exilium voluntarium abiisset; tum accusationem quidem is, qui cœperat, persequabatur; reum tamen absentem non alia, quam pecuniaria pœna populus condemnabat: eamque pecuniam solvere, si rediret, damnatus cogeabatur; aut, si solvendo non esset, in carcerem ire.

Postea irrogata est alia lege deportatio, abrogata interdictionis pœna. Deportati vero, sicut omnia pristina jura, ita et bona amittebant omnia; denique ultimum supplicium in hoc scelus est constitutum.

IV. *Quæstio perpetua repetundarum.*

Repetundæ, et peculatus, ut ex eodem nascuntur affectu cupiditatis, sic promiscue quandoque apud scriptores sumuntur. Verum ut hoc crimen ad res populi romani; ita illud ad res sociorum et provincialium ereptas pertinet.

Devicta Italia, bellum exteris nationibus Romani intulerunt, et quas regiones sub imperium suum ditionemque subjunxerunt, eas in provinciæ romanæ formam redactas, per magistratus annuos administraverunt. Ut autem nemo sociis in ulla re oneri, aut sumptui esset, magistratus in provinciam ituri, « mulis, tabernaculisque, et omni alio instrumento militari ornabantur, ne quid tale imperarent sociis ». Liv. XLII, 1. Argentum, vestis, et cetera ejusmodi quæ usus provincialis requirit, dabantur de publico. Denique nihil non prævisum, atque præcautum initio fuit, contra avaritiam, antequam peccari coeptum esset, quum nihil dum etiam istiusmodi, pro summa illa temporum innocentia, majores nostri suspicarentur, inquit Cic. in Verr. IV, cap. 5.

Leges illæ, atque instituta officiorum, manserunt quamdiu respublica innocentiae laude floruit. Verum ubi primum invasit animos habendi cupiditas; neque institutorum auctoritas, neque majorum reverentia, neque tacita populi existimatio iniquitatem coercere potuerunt. Provincialium rectores, ipsi illi in quorum fide, innocentia, integritate, socii debuerant acquiescere, ad latrocinia sese avidè converterunt, et commissas sibi provincias primum quidem obscure; mox vero per potestatem aperte spoliaverunt.

Crevit exinde nihilominus iniquitas: donec tandem quum ultra jam tolerari non posset, L. Calpurnius Piso, qui Frugi primus dictus est, tribunus plebis anno 604, Manilio et Censorino coss. exstitit, qui legem Calpurniam ferret de pecuniis repetundis, nulla quum antea fuisset, de Off. II, c. 21. Verba legis sunt, « Utei. quibus. in. provinciis. magistratus. populi. rom. eorumve. comites. contra. leges. pecunias.

cepissent. quidve. commisissent. earum. injuriarum. ergo. Romæ. quiritari. judicioq. quæsito. sua. repetere. provinciales. possent».

Pœna qua vindicandum hoc crimen sanxit Piso, non adeo gravis primum fuit. Pecuniariam eam fuisse verba legis indicant; neque ultra sæviisse. Quod exemplo comprobatur; quum L. Lentulus repetundarum crimine oppressus, biennio post ad præturam fuerit evectus. Pœnæ huic ignominiam leges posteriores addiderunt: nempe «uti ne in senatum venire, nec in concione orationem habere repetundarum lege damnatis liceret». Auct. Rhet. ad Herenn. I, cap. 20. Additaque est postea ignis et aquæ interdictio; et postremis temporibus, exsilium. Hinc ait Cicero «multas postea leges latas, et proximas quasque duriores fuisse».

Præterea instituit lege sua Piso ut certum hæc quæstio posthac haberet prætorem, ita ut nova lege opus non esset sociis; sed certum haberent ad quod confugerent tribunal. Etenim ante latam hanc Pisonis legem, si quando de isto crimine quæreretur, de eo extra ordinem ex senatusconsulto a recuperatoribus, uti de causa privata cognitum est. Testis Livius, XLIII, 2, ubi narrat de Hispaniæ utriusque legatis aliquot populorum in senatum introductis; qui de magistratuum romanorum avaritia superbiaque quum essent conquesti, L. Canuleio prætori negotium per senatum datum est, ut in singulos a quibus Hispani pecunias peterent, quinos recuperatores ex ordine senatorio daret. Ex hac igitur Pisonis lege cœperunt constitui quæstiones perpetuæ, quæ, uti modo dicebamus, nullæ antea fuerant.

Calpurnia lege, sublata non est magistratuum avaritia: provinciæ nihilominus populatæ et vexatæ sunt; tot reis, tot damnatis, tanto magis sæviit expilatio direptioque sociorum. Itaque post Calpurniam leges aliæ complures latæ sunt, quas ordine recensebimus.

Legem hanc subsequuta est Junia, quam tulit M. Junius Pennus tribunus plebis, M. Æmilio Lepido et L. Aurelio

Oreste coss. anno 627. Lege Junia, præter litis æstimationem, seu pœnam pecuniariam lege Calpurnia constitutam, exsilium etiam damnatis est irrogatum.

Post annos inde duos et viginti, lex Servilia lata est a C. Servilio Glaucia tribuno plebis, C. Mario II, C. Flavio coss. anno Urbis 649.

Transtulit in legem suam Servilius capita legum superiorum : tulit præterea, quod novum caput fuit, ut comperendinaretur reus : et, ut certum intra dierum spatium hujus judicii tempus concluderetur, dedit accusatori dies viginti ad agendum, hoc est, ad ea paranda, quæ accusator necessario parare deberet; et totidem reo ad defendendum. Antea si reus erat absolvendus, statim dicta sententia, dimittebatur : si videretur autem esse damnandus, quod mala ejus esset causa, judices statim eum non damnabant, sed, ut rem protraherent, et ut, quantum in se erat, parcerent, reum ampliabant. Quæ res ad summam rei existimationem et salutem pertinebat : dum etenim moram ad condemnandum hac ratione judices acquirebant, spatium reo ad se colligendum, et ad novas defensionis rationes inveniendas, dabatur.

Servilia autem lex, sublata ampliatione, comperendinationem intulit. Comperendinatio, est rejectio causæ in tertium diem, quo citantur denuo accusator et reus. Igitur ex lege Servilia duæ ejusdem criminis necessario fuerunt actiones, quarum altera instituta est post diem tertium a priori, seu, post perendinum, unde nomen habuit.

Sequitur Serviliam legem Acilia. Tulit Man. Acilius Glabrio tribunus plebis anno Urbis 652. Pater fuit hujus M'. Acilii Glabronis, qui prætor judicio Verris præfuit. Tulit Acilius, uti repetundarum causæ una tantum actione peragerentur, et ut, « nulla omnino neque comperendinationis, neque ampliationis dilatione interposita, semel accusati, semel dicta causa, semel auditis testibus, rei judicarentur ». Cic. lib. I in Verr. cap. 9.

Corneliam inde tulit L. Cornelius Sulla dictator anno 673. Ex ea lege judicia omnia de repetundis usque ad primum Cæsaris consulatum peracta sunt, ut Cn. Dolabellæ, C. Verri, etc.

Sublatam Acilia lege comperendinationem Cornelia restituit. Fecit accusatori potestatem, uti lex Acilia, literas publicas et privatas conquirendi, obsignandi, et deportandi: omnibus denique, quod Acilia plus habuit, testimonium denuntiandi præterquam defensori. Ex hac lege quærebatur etiam de magistratu provinciali, qui rationes ad ærarium non retulisset: de iis, ad quos pecuniæ captæ pervenissent: de eo, qui proconsul privatim aliquo profectus fuisset, aut transmarinas res arcessivisset. Ea etiam accusatori viginti dies dabat; totidem reo. Pœnam constituabat reo damnato, litis æstimationem, aquæ et ignis interdictionem.

Postremo Juliam tulit C. Julius Cæsar, consul, anno 694, quæ usque ad extremum imperii tempus servata, etiam nunc in Pandectis celebratur. Julia lex multo latius patuit, quam ullæ aliæ superiores: non enim provinciales solum, sed urbanos etiam magistratus obligavit, pecuniasque revocavit omnes, quas quis in magistratu, potestate, curatione, legatione, vel quo alio officio, munere, ministeriove publico cepisset ipse, vel aliquis ex ejus cohorte; et qui ob judicandum, decernendumve aliquem honorem vel munus, pecuniam acceperet. Digest. XLVIII, 11, 1. Julia lege cavebatur ne quis ob militem legendum mittendumve, æs acciperet; neve quis ob sententiam in senatu consiliove publico dicendam, pecuniam acciperet; vel, ob accusandum; utque urbani magistratus ab omni sorde se abstinere; neve plus doni, muneris in anno acciperent, quam quod esset aureorum centum. Magistratus munera, sive partes, vel officia erant, judicare; arbitrum dare, vel mutare; jubere judicare, vel non judicare; in vincula publica conjicere, aut vincire, aut vinciri jubere; ex vinculis dimittere; condemnare; absolvere; litem æstimare

judicium capitis, aut pecuniarium facere; in his omnibus lex Julia vetabat ne quis pecuniam acciperet.

Præter pœnas legibus superioribus irrogatas, Julia lege damnatus, testimonium publice dicere, aut judex esse, postulareve prohibetur. Addidit Cæsar ut repetundarum convicti etiam ordine senatorio moverentur; et ut ne judicare, neve testimonium dicere liceret ei, qui ob turpitudinem senatu motus, nec restitutus esset. Pœnæ illæ fuerunt ordinariæ; sed gravius nonnumquam et plerumque extra ordinem in id crimen, pro delicti modo, animadversum est. Legem Juliam de repetundis Tullius in Vatin. cap. 29, «acerimam» vocat; atque multa in ea severius scripta esse ait, ac sanctius, quam in antiquis legibus, pro C. Rab. Post. cap. 8.

Quum hic de Verre fuerit quæsitum, multo certius de litis ratione constat: illud primum singulare occurrit, quod postquam accusator argumenta ac testes produxerat, responderatque reus, tertius tantum erat definitus dies, quo sententiam ferrent judices. Apparet etiam duo fuisse judicia, quorum priori, damnari poterat reus; posteriori de litis æstimatione statuebatur. Accusator etiam de postulata olim summa demittere poterat, ut Cicero qui, anteaquam in Siciliam esset profectus, in priori sua oratione H-S millies (20,500,000 fr.) repetierat, in ceteris Verris furta, immani discrepantia, ad H-S quadringenties (8,200,000 fr.) reduxerit, qua summa Verrem judices multavere. Hac ergo legum humanitate usus Verres potuit etiam delictis exsul indulgere, donec eum Antonius, non minus Corinthiorum, ac pretiosæ cujusque rei curiosus, quædam ei recusantem proscriptione involutum interfecerit.

Ceterum quamvis peculiares suæ quæstioni cuique partes essent attributæ, et ipse senatus quotannis eas definiret, mirum tamen quam facile illæ interturbari possent. Nempe Vatinia lege anno 694 reo illud, quo ab actore vocabatur, tribunal recusare et aliud sibi eligere licebat. Itaque causa

de vi privata ad quæstionem de ambitu vocari potuit, ut ipse Cicero pro Cœlio nobis exemplum suppeditat.

Reus autem, de hoc tantum crimine apud iudices convinci potuit cui castigando eos lex præposuerat; verum accusatores etiam alia crimina subscribere poterant, ut ea peculiari crimini superaddita novam vim ei adderent, majoremque fidem iudicibus efficerent. Sic Verrem non eo tantum nomine persequitur Cicero, quod Siciliam deprædatus est, sed et priorem orationem in ea una re consumit, ut ostendat quot se flagitiis ac sceleribus, in Asiatica legatione, in prætura urbana, commaculaverit; eo nempe consilio, ut ea veluti introductio ac præparatio ad subsequentem omnino accusationem esse videatur.

Quæstionibus perpetuis ita constitutis ab anno 604, nihilominus factum est aliquando ut quæstiones extra ordinem etiam senatusconsulto, aut plebiscito, ut ante, consilibus, vel aliis magistratibus, vel etiam privatis hominibus mandarentur: sive quia maleficio novum esset; sive quod propter rei atrocitatem extra ordinem de ea quærendum esse videretur. Sic Cn. Cæpioni cos. de L. Tubulo, qui, prætor quæstionem inter sicarios sortitus, pecuniam ob rem iudicandam ceperat, plebiscito decreta est. De Fin. II, cap. 54. Sic in causa Milonis quæstionem L. Domitius, suffragio populi creatus, nova lege Pompeii exercuit.

Quæstorum, sive ordinarii, sive extraordinarii essent, potestas ex ea lege, qua creati erant, tota manavit; et in his tota collocata fuit, ut in foro atque in tribunali, et in sella curuli sedentes, iudice quæstionis aliquo operam, fidemque navante, gladio, ut alio loco dixi, posito, iudicium exercerent cum iis iudicibus qui sorte designati ovenissent, sedentibus in suis subselliis; scribis vero, accensis, præconibus, lictoribus, aliisque apparitoribus assistentibus; ac totum iudicium prudentia sua regerent. Nam accusatoris officium est, inferre crimina; defensoris, diluere; testis, dicere quæ scierit; quæstoris, unum-

quemque eorum in officio continere. Rhet. ad Herenn. IV, cap. 46.

Diximus judicem quæstionis fidem prætori, operamque navasse. Atque ita est. Prætor, quem summum quæsitorem recte dixeris, dabat actionem et negabat, ut supra fuit sæpius videre; cogebat judices; invitos pro potestate retinebat, aut pro arbitrio dimittebat. Judex autem quæstionis aut prætoris vices explebat, ac ejus loco præerat, aut præsentē illo inferior vicarias partes exercebat; judices sortiebatur; testes audiebat; quæstiones habebat; tabulas inspiciebat; quæ omnia prætor aut propter occupationes obire non poterat, aut propter dignitatis fastigium exsequi nolebat. Sic in causa Oppianici prætor Verres, judex quæstionis C. Junius fuit: in causa Verris prætor fuit M'. Acilius Glabrio, judex quæstionis, Q. Curtius. Denique prætor, ut ait Quintilianus, in iis quæ imperii sunt fere impediēbatur; judex quæstionis, in iis quæ ad causæ cognitionem pertinebant. Quibus conditionibus eligerentur quæstionum judices, non omnino constat; apparet inter ædilitatem et præturam eligi solitos, ita ut veluti gradus ad superiorem dignitatem esse videretur. Ceterum non magistratuum loco habebantur, utpote qui, vel illud exercentes munus, citari possent et accusari. Quod omnino de magistratibus fieri non poterat, ut sæpius jam est dictum.

Postremi ad cognoscendum sunt judices; id est, privati homines qui ex lege ad judicandum certo numero adhibebantur. Munera judicum, ut in legem jurarent; citati a prætore judicium exercente adessent; in subselliis, quæ subjecta tribunali erant, ex lege sederent; ne inter se disputarent; jurati sententias ferrent, quas prætor ipse pro tribunali pronuntiaret.

De judicum legendorum ratione, numero, conditione, ætate, de ordinibus denique ex quibus legerentur, dicenda quædam. Judicia penes senatores annos amplius sexcentos mansere; postea mutata priorum temporum consuetudine,

novis subinde legibus jactata res judiciaria numquam plaue conquievit.

Ante C. Sempronii Gracchi alterum tribunatum, soli senatores judicaverunt. C. Gracchus tribunus plebis iterum anno Urbis 631, « vir optimo ingenio male usus », ut rempublicam quam multis aliis legibus perturbare instituerat, hac etiam in parte vexaret, a senatu, cui propter fraternam necem erat infensus, ad equites judicia, lata lege, transtulit. Prætexebat judiciorum dissolutionem, et recens exemplum Aurelii Cottæ; Salinatoris; M. Aquillii; qui repetundarum rei, corruptis judiciis, elapsi fuerant. Quam rem attestabantur provinciarum spoliatarum legati, qui frementes et indignabundi tota Urbe discurrebant cum magna senatus invidia. Itaque senatus pudore victus legi ferendæ non admodum adversatus est.

Anno post Semproniam legem decimo septimo, quum jam equitum judicantium avaritia atque superbia ultra ferri non possent (vide Appian.), Q. Servilius Cæpio cos. is qui Tolosam urbem diripuit, et ex Apollinis fano, quod in ea urbe fuit, ad quindecim millia talentum abstulit (Strabo, lib. IV), quique postea cum Cimbris male pugnavit (Liv. Epit. 67), legem rogavit, anno Urbis 647, ut cum equitibus senatores etiam judicarent : ob quod beneficium senatus eum « patronum suum » appellavit (Val. Max. VI, 9, 13), et « patræ liberator » in inscriptionibus apud Gruter. p. 468, 5, nuncupatur.

Legem Serviliam Cæpionis, brevi intervallo sequuta est altera Servilia Glauciæ. Tulit C. Servilius Glaucia tribunus plebis anno 649, uti, contra Q. Cæpionis legem Serviliam, equites soli ex lege Semproniana judicarent. Cujus legis beneficio Glaucia equestrem ordinem sibi non mediocriter in posterum conciliavit et obstrinxit. Ex ea lege decem post annis, C. Norbani, quo accusante Cæpio damnatus erat, causa apud equites tum iudices acta est. Cic. de Orat. II, cap. 48.

Interea senatus, quum impotentiam equestris ordinis, penes quem Sempronia lege judicia erant, ferre non posset, omni ope contendebat ut ea ad se transferrentur. Tandem exstitit M. Livius Drusus, ejus Drusi filius, quo tribuno plebis ad labefactandam C. Gracchi potentiam senatus usus erat. Is, quum et ipse esset tribunus plebis anno 662, rem aggressus est animo meliore, quam fortuna. Quum enim aperte judicia senatui reddere non posset, hac arte ea inter utrumque ordinem communicavit. Quum senatores, propter superiorum temporum discordias, vix ad trecentos essent, tulit ut singuli viritim equitem legerent, atque in senatum cooptarent; atque ut ex his omnibus in posterum decuriæ judicum legerentur. Addidit præterea legi, ut deinceps quæreretur in eos, qui ob rem judicandam, pecuniam accepissent. Quod crimen consuetudine jam pro nullo numerabatur. Adeo corruptelæ sine ullo pudore increbruerant! Hæc Drusi ratio neutri ordini placuit. Non senatoribus, qui tot in senatum allegi equites ægre ferebant: non equitibus, qui senatui judicia communicari nolebant. Itaque legi summa vi utrique restiterunt. Coorta seditione Drusus in magistratu occisus est. Hæc ejus lex, et aliæ reliquæ quas tulerat, tamquam adversus auspicia latæ, senatusconsulto sublatae sunt, et in eundem, quo ante fuerat, statum res judiciaria restituta est.

Quum ergo equester ordo semper in judiciis dominaretur; anno deinde interjecto, hoc est, anno 664, qui fuit annus Italici belli secundus, M. Plotius Silvanus tribunus plebis, adjuvantibus nobiles, tulit, ut singulæ tribus e suo numero quinosdenos legerent, qui per annum judicarent. Ex eo factum est ut equitum potentia minueretur, quum ex tribus ordinibus iudices suffragio crearentur. Cic. pro Cornel. et ibi Ascon.

An lex Plotia diu steterit; et ex ea res usque ad Sullæ tempora judicatæ sint, affirmare non ausim. At illud nullo modo habet dubitationem, septennio post, L. Sullam dicta-

torem tulisse « ut soli senatores judicarent »; quod *equitibus* et plebi esset infensus, qui adversum se pro Marianis partibus steterant.

Sic denique judicia senatoribus restituta sunt; uno et quadraginta annis postquam illa eis adempta lege Sempronia fuerant. Quod autem sæpius usurpat Cicero « *equites* judicia sine infamia per totum hoc tempus exercuisse », plane adversatur historiæ. Etenim contra narrat Appianus, equestrem ordinem jam ab initio potentia sua turpiter abusum fuisse, sive divitibus accusatores subornando; sive leges corruptelis judicum oppositas eludendo, et superbe contemnendo.

De iisdem *equitibus* judicia administrantibus meliora non prædicat Vell. Pat. lib. II, cap. 13: « Eam potestatem judicandi, nacti equites, inquit, Gracchanis legibus, quum in multos clarissimos atque innocentissimos viros sæviissent, tum P. Rutilium, virum non sæculi sui, sed omnis ævi optimum, interrogatum lege repetundarum, maximo cum genitu civitatis damnaverunt ». Vid. Liv. Epit. 70.

Ex his planum fit equites turpiter judicasse, atque Ciceronem, toti equitum ordini ut indulgeret, gratis dixisse ubi supra, « nullam, equite romano judicante, ne tenuissimam quidem suspicionem acceptæ pecuniæ, ob rem judicandam, constitutam fuisse ». Rejectis igitur *equitibus*, senatores, uti ante Gracchanas leges, soli, lege Cornelia, judicarunt; nec ipsi minori, quam equites, infamia. Pleni libri: plenæ sunt Ciceronis in Verrem orationes, inter decem annos, postea quam judicia ad senatum translata sunt, senatorium ordinem in rebus judicandis nefarie flagitioseque esse versatum. Ergo judiciorum levitate factum est, ut ordo alius, nempe equester, postularetur: quod nimirum putaretur integriora fore judicia, si duos inter ordines essent communicata.

Igitur anno undecimo post latam legem Corneliam, hoc est, anno Urbis 683, quo anno causa Verris acta est, C. Aurelius Cotta prætor tulit, « ut judicia, quæ penes solos sena-

tores erant, inter senatores, equestrem ordinem, et tribunos ærarios communicarentur»: hoc est, ut tres Urbis ordines ad judicandum advocarentur: si quidem tribuni ærarii de plebe fuerunt. Itaque Aurelia lex, et Plotia Silvani in eo inter se convenerunt, ut ex utraque lege tribus civitatis ordinibus aditus ad res judicandas pateret.

Anno Urbis 698, Cn. Pompeius consul II, legem judicariam tulit, quæ ab Aurelia nihil de tribus ordinibus discrepabat; sed hoc habuit peculiare ut ex amplissimo censu, quod lex Aurelia non attenderat, e centuriis legi iudices juberet. Item, ut quinque et septuaginta iudices causas cognoscerent.

C. Julius Cæsar, rerum potitus, anno 707 legem judicariam tulit, qua judicia ad duos ordines, senatorium et equestrem, remotis ærarii tribunis, redegit: « ut purissima pars civitatis judicaret ». « Ante enim, inquit Dio l. XLIII, et tribunos ærarii intelligit, ex plebe quidam etiam una cum senatoribus et equitibus judicia exercebant ».

Ultima lex judiciaria est M. Antonii, qui triumvir fuit. Is quum esset consul an. 710, hoc sanxit, ut ad duas senatorum et equitum decurias accederet tertia e centurionibus, antesignanis, manipularibus legionis Alaudæ. Cic. Philipp. V, cap. 12. Hanc Antonii legem Cicero exagitat Philipp. I, cap. 20, ex eo quod in tertio isto ordine judicum legendo tolleretur omne discrimen et fortunæ et dignitatis: « O contumeliosum honorem, inquit, iis quos ad judicandum nec opinantes vocasti ».

Hactenus de variis ordinibus, unde iudices per varias leges fuerunt lecti. Nunc de tota instituenda actione, atque de tota agendi apud prætorem ratione est disserendum. Ordo talis fuit. Privatus civis, qui privati nomen deferre in animo habuit (nam post magistratum, non in magistratu, reddere rationem oportebat earum rerum, quas quis in gerendo magistratu contra leges commisisse putaretur) eum in jus vocavit, et prætorem in foro adiens qui de crimine illo co-

gnoscebat, quod ipse deferre volebat, dicendi potestate accepta, postulavit ut sibi nomen ejus deferre liceret; qua re impetrata, nomen detulit. Nomine recepto, atque a scribis jussu prætoris in tabulas relato, ille reus tum dicebatur. Itaque prima omnium fuit in jus vocatio: deinde postulatio, tum nominis delatio; ad extremum inde sequuta est accusatio. De his singulis ordinatim et breviter est dicendum.

In jus vocato cive, postulabatur a prætore ut ejus nomen deferre liceret. Cic. ad Div. VIII, 6. Postulatio fiebat non solum præsentem, sed etiam absentem illo in quem fiebat. Cic. ad Q. Fr. III, 1, 5. Leges temere potestatem non fecerunt, ut quivis aut postulare, aut postulari posset. Qui possent, aut non possent accusare, vel accusari, declarantur Digest. lib. XLVIII, tit. 2, de accusationibus et inscriptionibus.

Neque solum leges, sed prætores ipsi pro potestate multos a postulatione videntur repulisse. Postulandi formula erat, «ut rei faciendi nomen reciperetur»; hoc est, ut potestas daretur accusandi: prætor enim hoc jus habebat, ut recipere, aut non recipere posset. Potestate impetrata, nomen in jus deferre batur, sive edebatur, ejus, cui accusatio parabatur. Delationem nominis præcedebat solemne jusjurandum, calumniandi causa nomen non delatum iri. Editionis hæc erat formula v. gr. «Aio te, C. Verres, Siculos spoliasset». Vel, si abesset Verres, «Aio C. Verrem Siculos spoliasset».

In conjecturalibus causis nudam propositionem in hunc modum factam fuisse tradit Quintilianus: «Cædis ago: furtum objicio». Erant etiam istæ editionum formulæ: «Ego Mævius L. Titium reum defero, quod... Ego Titiam adulterii, veneficii, etc. ream defero». Nam accusatores sua reis edere crimina coge bantur. Scire enim oportebat eos, quibus essent criminibus responsuri.

Ista verbis peragebantur. Libelli præterea dabantur, et offerebantur prætori. Tacit. Annal. III, 44. «Certi enim juris est inscriptione libelli accusatorem exigi; qua scilicet cujus

criminis alium reum deferat, ipse profiteatur: et subscriptionem, qua se id professum esse, ac reum a se peractum iri, declaret. Idque in hoc inventum est, ut accusatorem, si non vinceret, vinceret hæc subscriptio, et temeritatis coargueret: atque ita uti ne quis temere ad accusationem adsiliret: alioquin talionis pœna obligaretur. In lege penult. C. de accusat. Cujac. observat. I, 20.

Libellorum inscriptio talis erat. Primum quidem consul, et dies præponebatur. Deinde sequebantur nomina prætoris, accusatoris, rei; crimen, de quo futurum erat judicium; locus, tempus quo fuerat commissum. Paulus, fr. 3 Dig. de accusationibus et inscription.

Ex his intelligitur accusatorem et voce et libello omnia, et singula, quibus reus in legem illam, quæ nominabatur, peccasset, esse complexum: uti v. gr. in causa repetundarum, dicebat accusator reum abstulisse, inique judicasse, supplicia de civibus romanis sumpsisse; aut alia, quæ se probare adversus illum posse confideret.

In eadem causa illud præcipue observatum est, ut populi, qui repeterent pecuniam, ac spoliatos se, per legatos quererentur, patronos quoque nominandi potestatem postularent. Hi vero qui sociorum patroni fuerunt, reorum accusatores exstiterunt. Sic Cicero Siciliæ patronus Verrem ejus depeculatorem accusavit.

Sæpe evenit ut duo, aut plures, non solum in causa repetundarum, sed etiam ambitus, et aliorum criminum, accusationem sibi deposcerent. Quod quum accidit, tum judicium factum est ante omnia, uter deberet nomen rei deferre: quod judicium divinationem dixerunt. Quale autem hoc judicium fuerit, facile ipsa Ciceronis in Q. Cæcilium Divinatio, et quod huic orationi præfiximus argumentum, possunt docere. Sæpe etiam multi exstiterunt ejusdem criminis accusatores: ex quibus qui primas egit, is accusator est dictus; qui secundas, tertias, etc. subscriptor proximus, etc. Jus subscribendi dabatur a prætore; sicuti jus

deferendi nominis et accusandi. Cicero in *Divin. cap. 15 et 16*. Subscriptores definit Asconius, *causidicos*, qui adjuvare accusatorem solerent. Itaque hi fuerunt accusatores quasi secundi, qui et ipsi hac subscriptione testatum faciebant se accusatoris primarii factum probare: seque ipsos voluisse accusare, nisi has partes ille sibi sumpsisset. Quatuor numero fuisse subscriptores apparet.

Ex pluribus autem Ciceronis locis, discimus inferioris notæ causidicos hoc ambisse munus, vel, ut in aliquo nomine essent, et industriolam suam populo commendarent; vel, quia magnis oratoribus accusantibus, spes erat certa victoriæ, dum illis subscriberent, aut gloriæ paucillum aucupabantur; aut etiam partem præmii, quod victoribus lex dabat.

Præter subscriptores, custos etiam ex lege apponebatur accusatori, qui observaret ex eo die, quo delatus erat reus, usque in diem qua causa diceretur, quid ille ageret; qua via moliretur accusationem; quibus modis eam instrueret: dolumne, et corruptelam, aut ambitum non admisceret.

Recepto rei nomine, hoc est, in tabulas prætoris relato nomine ejus qui erat accusandus, prætor certam diem, qua accusator et reus ad iudicium adessent, constituebat. Is dies in aliis criminibus erat decimus; in aliis trigesimus. In crimine autem repetundarum accusator diem longiorem ad inquirendum petebat.

Cicero inquisitionis in Siciliam dies centum et decem postulavit: quibus impetratis lege prætoriam totam provinciam colligendis literis in C. Verrem, et denuntiandis testimoniis, peragravit. Eadem lege prætoriam potestas accusatori dabatur omnia non modo Romæ, sed etiam in provinciis obsignandi, ac deportandi, quæ ad instituendam accusationem pertinere arbitraretur.

Interea is, cujus nomen receptum inter reos fuerat, patronos quæsit. De patronis scribit Asconius ante bellum civile Cæsaris raro quemquam pluribus, quam quatuor pa-

tronis usum fuisse : at post bella civilia , ante legem Juliam ad duodenos patronos perventum est , ita ut Augustus luxurians hoc patrocinium cohibere fuerit coactus.

Patronus causam orabat. Patronis certum dicendi spatium primus Pompeius præfixit, A. U. 702. Munera lege Cincia vetabantur accipere. Gratuitam reis operam præstare jubebantur. Tulit eam legem M. Cincius A. U. 549. Advocati aut jus suggerebant, aut præsentiam suam reo commodabant amico.

Ubi dies accesserat actioni a prætore constituta , prætor accusatores , et reum , et patronos citari per præconem jubebat. Si accusator non responderet , nomen rei ex reorum tabulis eximebatur. Si reus , absens damnabatur.

Ubi prætor assederat , et accusatores , reus , patroni prodierant ; de iudiciis legendis agebatur : quod munus plerumque iudici quæstionis assignabatur. Numerus iudicum legebatur , qui ea lege erat præscriptus , qua lege iudicium illud exercebatur. De M. Scauro repetundarum apud prætorem Catonem postulato , sententias tulerunt septuaginta iudices. An legitimus is fuerit numerus in iudicio de repetundis , non ausim affirmare. De Milone , unus et quinquaginta sententia tulerunt. Totidem sederunt in causa M. Saufeii , quæ Milonis fuit appendicula.

Legebantur sortitione iudices. Sortitio fuit ejusmodi. Prætor , aut iudex quæstionis , in urnam conjiciebat omnes iudices selectos ; id est , eorum omnium nomina , qui ad iudicia ejus anni a prætore urbano fuerant delecti ; ac sorte eum numerum educebat , quem lex ipsa præscribebat. Quo facto , potestas dabatur reo et accusatori rejiciendi quos parum sibi putarent idoneos. In locum vero rejectorum alios sive prætor , sive iudex quæstionis , subsortiebatur. Quæres quot vulgo iudices rejicerentur. In causa Milonis , singuli quinos denos accusator et reus rejecerunt. Asconius rejectionem factam primum a reo , deinde ab accusatore putat ; quod Ciceronis testimonio confirmatur. Prima iudicum lectio ,

sortitio; altera, subsortitio dicebatur. *Peracta sortitione, et subsortitione, iudices lecti citabantur, quique adesse non poterat, excusationem afferebat.*

Judices jurabant in leges, ut obstricti religione judicarent; non jurabat prætor, quippe quem jurare non necesse esset, utpote sententias colligentem, non vero ferentem. Quum jurassent omnes præter ipsum prætorem, nomina eorum in album referebantur, et palam ad tribunal prætoris habebantur, ne pro selectis iudicibus, ut fit in multitudine, aliqui supponerentur, corruptissime judicaturi. In causa Verris Tullius plures præterea libellos fecerat quibus nomina iudicum continerentur, et quos compluribus distribuerat, quo Verris patronorum insidiis ac fraudi certius occurreret. Act. I, cap. 6.

Tunc accusator primus orationem habebat, ita ut eam in duas partes divideret; altera testimoniorum nomine omnes probationes extrinsecus sumptas continebat. « Maximus patronis circa testimonia sudor est. » Quintil. V, 7. Ea tres habent partes: quæstiones, testes, et tabulas. Quamquam non omnia crimina iisdem testimoniis confirmata sunt. Nam cædes testibus et quæstionibus probata est; tabularum fidem non desideravit: repetundæ et peculatus testes et tabulas poposcerunt, quæstiones repudiarunt: majestas autem et ambitus solis etiam testibus fuerunt contenta. .

Liberi non dabantur in quæstionem: servi reorum, accusatore postulante, dabantur. Sed contra dominos torqueri non poterant, excepta causa incestus, et conjurationis, adulterii, majestatis. Cic. in Partit. et pro Milone. Tacit. Ann. II, 30.

Quæstiones palam habebantur inspectantibus omnibus nunc in medio foro; nunc in atrio libertatis, et aliis; nunc in senatu. Atrocibus illis tormentis quæ ne ulla quidem specie defendi possunt, diutius Romanæ leges fuerunt pollutæ, ita ut solis recentioribus populis illud sit decus attribuendum hæc ex judiciis omnino depulisse.

Jam a quæstionibus ad testes, quæ altera probationis species est.

Homines liberi fuerunt, qui testimonium extra tormenta dixerunt. Quoniam non omnibus testimonium dicere licuit, de testium conditione, et de iis, quibus testimonium denuntiari non potest, disserunt jurisconsulti; Digest. XXII, tit. 5.

Testium illa divisio fuit, ut alii voluntarii essent, alii coacti. In controversiis inter cives, seu vocati, seu invocati; rogati, seu non rogati; jurati, aut injurati, testimonium dicebant; et quia nulla vi externa cogente, sed sponte, a litigatoribus vocati, comparebant ad judicium, voluntarii testes appellabantur. At in judiciis publicis sive judex, sive accusator denuntiabat testimonium: atque erant legum sanctiones, et poenæ in eos constitutæ, qui non parerent. Testes Cicero in Verr. IV, cap. 66, et Quintil. V, 7. Raro autem parebant, nisi invitati: hoc enim veteres ad humanitatem pertinere arbitrabantur, ut nemo capitis, aut fortunarum omnium testimonium in alios diceret, nisi invitus.

Ex XII tabulis nemo invitus testimonium dicere cogebatur. Postea variis legibus atque edictis prætorum testes coacti sunt in judiciis publicis: ita ut multæ recusantibus irrogarentur; et ab eis pignora caperentur.

In causis publicis accusatori lege licebat centum atque viginti hominibus denunciare testimonium. Val. Max. VIII, 1, 10: «In lege Servilia repetundarum». In privatis autem controversiis plurimum, quam decem hominum testimonio uti non licuisse ait Frontinus, de limitibus. Fuit enim antiquis legislatoribus curæ, ut testium numerum coarctarent, ne in infinitum excrescentes probationes veritati tenebras offunderent.

Testis, tum apud Græcos, tum apud Latinos, admotus ad aram jurabat se vera dicturum, uti ne, in testimonio dicundo religione obstrictus, mentiretur. Hinc dictum Periclis, «Amicus sum usque ad aras». Cic. pro Flacc. cap. 25. At Vestales et Pontifices testimonium dicebant injurati.

Testes, postquam juravissent, interrogabantur. Loqui enim, nisi interrogato testi non licebat. Usus fori gallici est, ut testes iudex interroget. At Romæ olim interrogationes testium fiebant per accusatorem et defensorem; per eum qui testes producebat, et per eum contra quem producebantur.

Accusator, a quo producebantur, prior eos interrogabat, et postea reo tradebat interrogandos.

Prætor interrogandi dabat potestatem; atque interea ipse, et iudices, auditores se, et spectatores otiosos præbebant: scribæ testium dicta omnia in libellos transferebant, quos iudices consignabant. Hinc formula Ciceroni toties usurpata, « Recita testimonium ». Testes accusator et defensor quemadmodum interrogarent diligenter animadvertere debuerunt; fuit enim in interrogando teste summa industriæ oratoriæ laus posita: itaque Quintil. lib. V, cap. 7, de tota ratione interrogandorum ab utraque parte testium pluribus, ac subtilius agit.

Veterum ea fuit diligentia, ut, quod inscientia multa versaretur in vita, qui testimonium diceret, arbitrari se diceret etiam quod ipse vidisset: quemadmodum quæ jurati iudices cognovissent, ea non esse facta, sed, videri, pronuntiabant. Acad. Quæst. IV, cap. 71.

Hactenus de testibus. Jam ad tabulas, quæ tertia pars fuit probationum. Tabularum nomine omne genus scripturarum appellabant, quo causam confirmare suam possent. In primis autem erant tabulæ dati et expensi, quas accusator a reo postulabat in certis causis, ut repetundarum, et peculatus. Scilicet ut sæpius apud Ciceronem vidimus Romanis mos erat, ut quæcumque per singulos dies aut acciperent, aut darent, in certos codices referrent, qui et censoribus, quinto quoque anno, et iudicibus, si necesse esset, ostenderentur. Confer Rosc. Com. Verr. I. Tabulæ pactionales, literæ, syngraphæ, tabulæ rationum, uno tabularum nomine comprehendebantur; æque ab accusatore inquisitæ, et

designatæ, ne corrumpantur, ad prætorem delatæ sunt. Cic. Tusc. disp. V, cap. 12.

Itaque tota illa prima accusatoris oratio interrupta fuit. Deinde alteram sequentibus diebus orationem habuit, quæ perpetua fuit. Hic accusator totam causam retractabat, ac declamatorio more reum insequabatur; criminaque testimoniis confirmata oratorie amplificabat. Hæc autem et longa et perpetua oratio proprie accusatio dicta est.

Hæc proœmia habuit ad odium et invidiam inflammandam composita. Narratio inde, si incidebat [neque enim omne crimen, uti v. gr. ambitus, narrationem admisit], ad confirmationem fuit appositæ: utraque vero, ut ad eum qui jam rem teneret, accommodabatur. Contentio non crimen illud solum quod intendebatur, sed totius præteritæ vitæ criminationem complexa est. Itaque non solum testimonia adhibuerunt accusatores, sed etiam argumenta, id est, sumptus ex ipsa re, et ex vita rei superiore, conjecturas, suspensiones et signa. Omnemque suam eo industriam intenderunt, ut, factum fuisse quod intendebatur, ostenderent. Contentioni denique peroratio gravis et vehemens fuit subjecta. Hæc omnia complexus est Cicero pro Cœlio, cap. 3; ubi ait « accusatio crimen desiderat, rem ut definiat, hominem ut notet, argumento probet, teste confirmet ». Ipse Tullius eadem exsequitur totis in Verrinis.

Accusatione peracta, patroni, nam dixi plures fuisse uti et accusatores, defensionem aggrediebantur eo die, qui esset ex lege a prætore concessus: pro Cluent. cap. 21. Ut accusatores crimina inferenda, sic patroni diluenda, partitis inter se muneribus, susceperunt. Et quoniam in defensionibus non faciendum est solum ut mitigetur iudex, ut faveat, admiretur, diligat, cupiat, speret, lætetur; sed etiam miseratione mens illius permovenda est; peroratio, sive ultimus eliciendi locus illi relinquebatur, qui hac parte orationis plurimum posse videretur. Itaque Ciceroni, etiamsi plures dicerent, perorationem omnes relinquebant, « in quo ut viderer

excellere, inquit modeste, non ingenio, sed dolore assequer-
bar ». Orat. cap. 37.

Quin solebant in defensionibus oratores, miseratione quo
dolentius uterentur, et magis iudicum animos commoverent,
pueros infantes in iudicium producere, ut eorum aspectu
commoti iudices parentibus ignoscerent. Ita Serg. Galba,
productis in iudicium filiis, periculum evasit. Val. Max. VIII,
1, 2. Ita Cicero pro Sulla et pro Flacco, quum pueros eorum
infantes in manibus perorans teneret, plangore et lamenta-
tione forum complevit.

Præter patronos et advocatos, mos fuit, ut rei laudatores
etiam adhiberent, viros graves et nobiles quorum auctori-
tate et testimonio iudicibus commendarentur. Hi fuere aut
municipes, aut provinciales. Laudaverunt Scaurum consu-
lares novem, et Faustus Cornelius, Sullæ filius. Asconius.
Roscius laudaverunt Amerini municipes, decreto decurio-
num ad Sullam profecti : pro R. Am. cap. 9. Reos repetun-
darum prætores, missi ex provinciis publico nomine legati
laudaverunt et defenderunt.

Istiusmodi laudatorum numerus erat non lege quidem,
sed consuetudine, definitus. Qui sive repetundarum, sive
alius cujusvis criminis reus esset, aut nullum, aut decem
dare laudatores eum oportuit. In Verr. lib. V, cap. 22. Hinc
Verrem Tullius exagitat, quod, quum tot in Sicilia civitates
essent, una eum laudaret Mamertina civitas, ibid. Ex quibus
ejus verbis conjicio quasi legitimum fuisse, ut, qui repe-
tundarum lege postularetur, ex singulis denis civitatibus
provinciae suæ denos daret laudatores. Nam laudabat Verrem
Mamertina civitas : Hejus erat princeps laudationis, hoc est,
legatorum qui Romam legitimo numero venerant, ut Verrem
laudarent : at nihilominus Verri objicitur, quod illum quasi
legitimum laudationum numerum non expleverit. Intelli-
gendum est ergo novem alias hic requiri civitates, ut dena-
rius ille civitatum numerus efficiatur. Ceterum hoc omne
genus Pompeius lege sustulit, utpote qui aut gratia inducti,
aut metu coacti venirent.

Causa semel, aut bis utrimque peracta, quum uterque orator se dixisse significavit, aut præco pronuntiavit, dixere, prætor ternas iudicibus tabellas dedit, unam absolutionis; alteram condemnationis; tertiam ampliacionis; quarum unam in urnam mitterent. Urnæ autem tot fuerunt, quot iudicum ordines, qui iudicaret: nempe tres, quum tres ordines; senatorius, equestris, et tribunorum ærarii, iudicia obierunt. At quum Verris iudicium peractum est, soli tunc ab annis decem iudicabant senatores.

Tabellis datis, iudices prætor in consilium misit, hoc est, iussit illos conferre capita, ac deliberare inter se (in Verr. lib. III, cap. 12), et ad urnas accedere, atque in eas tabellam, qua cujusque iudicis sententia contineretur, conjicere. Solebant rei, dum iudices sententiam ferrent, ad pedes eorum se projicere. Confecto iudicio, latisque sententiis, tabellæ quæ aut condemnarent, aut absolverent, aut ampliarent, diribebantur, id est, separabantur.

Postquam ex diribitarum tabellarum numero sententiam iudicum cognovit prætor, tum eam pronuntiavit. Mos erat, si condemnatum pronuntiaturus esset, ut prætextam poneret. Formula pronuntiandæ condemnationis fuit, « videtur fecisse, aut, non jure fecisse. » Absolutionis, « non videtur fecisse, aut, jure fecisse ».

Aliquando in formula condemnationis factum est, ut, non solum crimen commissum, sed etiam pœnam sumendam prætor pronuntiaret. Quod autem de majoris partis sententia per prætorem pronuntiatum est, id jus, ratumque fuit.

Reum prætor aut absolutum, aut condemnatum referendum curabat in tabulas. Condemnatum duæ res sequebantur; æstimatio litis, et animadversio.

Æstimatio litis præcipue erat in causa repetundarum, et peculatus. Erat autem iudicium alterum, quo ratio inibatur furtorum de quibus lis orta fuerat, ut ex divenditis bonis ejus qui fuerat condemnatus, pecuniæ redderentur iis, qui-

612 APPENDIX DE JUDICIIS PUBLICIS.

bus fuerant ereptæ. Nam continuo damnati bona sectoribus auctione vendebantur, qui redactam inde pecuniam quæstoribus ærarii repræsentarent. Animadversio autem statim sumebatur, nisi ad populum damnatus provocaret, aut prætor alius, sive consul intercederet.

Reo absoluto duo relinquebantur judicia, ambo contra accusatorem instituta : unum calumniæ, alterum prævaricationis. Calumniæ ab adversario postulabatur, si falsum crimen eum intulisse constaret : prævaricationis a publico magistratu, si cum defensore collusisset, et vera crimina occultasset. Porro calumniæ poena fuit litera K fronti inusta, ex lege Remmia : prævaricationis ea poena fuit, qua reus affectus fuisset, si non fuisset per prævaricationem absolutus. Præterea infamis fiebat prævaricator, nec alium quemquam deinceps accusare poterat. Digest. lib. XLVII, tit. 15.

PONCELET.



TABULA

RERUM

QUÆ IN HOC PRIMO VOLUMINE SECUNDÆ PARTIS
CICERONIS CONTINENTUR.

P <small>RE</small> FATIO novi editoris de Ciceronis orationibus. Pag.	ix
Nicolai Desjardins præfatio	xvj
M. Tullii Ciceronis pro Quintio oratio	i
Argumentum	3
M. T. Ciceronis orationes. — Pro P. Quintio oratio.	
— Oratio prima	7
M. Tullii Ciceronis pro S. Roscio Amerino oratio.	55
Argumentum	59
M. T. Ciceronis orationes. — Pro Sex. Roscio Ame-	
rino oratio. — Oratio secunda	61
M. Tullii Ciceronis pro Q. Roscio comædo oratio .	137
Argumentum	139
M. T. Ciceronis orationes. — Pro Q. Roscio comædo	
oratio. — Oratio tertia	143
Excursus I de Q. Roscio comædo	175
Excursus II de notis numeralibus	178
M. Tullii Ciceronis in Q. Cæcilium oratio. — De	
accusatore in C. Verrem constituendo, quæ Di-	
vinatio dicitur	181
Argumentum Asconii Pediani	183
Aliud argumentum	185
M. T. Ciceronis orationes. — In Q. Cæcilium Divi-	
natio. — Oratio quarta	189

Excursus de provinciis.....	226
M. Tullii Ciceronis in C. Verrem actionis primæ procœmium	237
Argumentum actionis primæ in C. Verrem, ex Asconio Pediano	239
Aliud argumentum	241
M. T. Ciceronis orationes. — In C. Verrem actio prima. — Procœmium. — Oratio quinta	245
M. Tullii Ciceronis in C. Verrem actionis secundæ liber primus. — De prætura urbana	279
Argumentum Asconii Pediani	281
Aliud argumentum	283
M. T. Ciceronis orationes. — In C. Verrem actio secunda. Liber primus. — De prætura urbana. — Oratio sexta	287
Excursus de prætore urbano	385
M. Tullii Ciceronis in C. Verrem actionis secundæ liber secundus. — De jurisdictione Siciliensi ...	391
Argumentum	393
M. T. Ciceronis orationes. — In C. Verrem actio se- cunda. Liber secundus. — De jurisdictione Si- ciliensi. — Oratio septima	397
Excursus de prætore provinciali	511
Excursus de vectigalibus reipublicæ, et de eorum exactoribus	541
Excursus de ordine exercendorum, tam privatorum quam publicorum, stante republica, judiciorum.	570

FINIS PRIMI VOLUMINIS SECUNDÆ PARTIS.



